



**AL-SUHAIMI**

**P.O. Box 11753  
50756 Kuala Lumpur.**

Cetakan Pertama Januari 1989

Jamadir Akhir 1409

**\$10.00**

M

324.2595

ALA

**518266**

**APB**

635815

**© Hakcipta S. H. Alattas 1989**

Hakcipta terpelihara. Tidak dibenarkan mengeluarkan, dalam apa jua bentuk pu. dan dengan cara apa jua pun secara elektronik, fotokopi, mekanik, rakaman atau lain-lain, mana-mana bahagian isi kandungan buku ini sebelum mendapat izin bertulis dari Al-Suhaimi

8 NOV 1989  
Perpustakaan Negara  
Malaysia



بِسْمِ اللَّهِ الرَّحْمَنِ الرَّحِيمِ

اقرأ

بِسْمِ رَبِّكَ الَّذِي خَلَقَ

BACA, BACALAH DENGAN NAMA TUHAN  
YANG MENJADIKAN KAMU

## **Istimewa untuk Putraku**

**Habib Omar Bin Hussein**

**Bin Alwee bin Abdullah Bin**

**Abu Bakar Bin Abdullah Bin Talib**

**Bin Hussein Bin Omar Bin Abdul Rahman Alattas**

## SALAM PENERBIT

Buku ini sepatutnya sudah berada di pasaran awal 1989 lagi, tapi penerbit terpaksa melewatkannya disebabkan terlalu banyak perkara yang berlaku yang mempunyai pertalian dengan krisis politik di negara ini.

Cerita mengenai politik serpihan ini takkan sesedap ini jika kami terbitkan tanpa mengambil kira suasana pergolakan dan perkembangan terbaru yang berlaku.

Pertama kemasukan Dr. Mahathir ke hospital kerana pembedahan pintasan koronori. Kekalahan Datuk Harun Idris serta kepulangan Datuk Musa Hitam ke pangkuan UMNO. Dr. Mahathir sudah sehat dan Datuk Musa masuk semula UMNO adalah dua perkembangan amat penting dalam pergolakan politik sekarang. Terutama kemasukan Musa Hitam dan orang-orangnya yang telah membuat banyak kekeliruan dan keributan di kalangan orang politik begitu juga orangnya yang sedia menanti di dalam.

Kami memahami kehendak pembaca yang mahukan matlumat yang *up to date*, bukannya basi dan bahan yang nanti cuma akan jadi sejarah.

Umum mahukan berita pergolakan yang tidak ada di akhbar dan majalah. Berita yang berani yang dapat membantu fikiran pembaca untuk mengetahui cerita yang sebenarnya, cerita yang tidak di edit, tidak ditapis ikut polisi akhbar dan majalah.

Kerana menyedari keadaan inilah maka kami terpaksa meminta penulisnya memberikan sesuatu yang *up to date*.

Selamat Membaca.

Penerbit  
KUALA LUMPUR.

## KANDUNGAN

1. MUKADIMAH	9
2. JANGAN BIARKAN MEREKA GILA	27
3. DIMANA BUMI DIPIJAK	43
4. MATI HIDUP BALIK	81
5. BIJI GULI, BOLA JOLOK DAN LUBANG GOLF	108
6. GHOST BUSTERS VS AHLI-AHLI SIHIR MALAYAN UNION	150
7. MUSA HITAM MUSA COKLAT	167
8. SESAL DAHULU PENDAPATAN	187
9. GAGAK MENIRU AYAM HUTAN BERJALAN	206
10. SIAPA TIPU SIAPA	221
11. ULAMAK SIANG HARI	238
12. TEORI KUCING SENAK	266
13. MAHATHIR MASUK PERANGKAP ULAMAK	290
14. BADAI DAN ANGIN	301
15. BAPA-BAPA SERPIHAN	315
16. SESAT DIHUJUNG JALAN KEMBALI KE PANGKAL JALAN	336
17. POLITIK TANG-TANG TUT DALAM PARLIMEN	361
18. ULAMAK DAN TOK GURU MELIHAT ADA TIKUS YANG YANG LEBIH BESAR DARI GAJAH	384
19. POST SKRIP	396

بِسْمِ اللَّهِ الرَّحْمَنِ الرَّحِيمِ

## MUKADIMAH

**D**engan nama Allah yang Maha Pemurah lagi Maha Penyayang. Segala puji-pujian hanya bagi Allah Tuhan sekalian alam. Salam dan selawat kepada junjungan Nabi kita Muhammad SAW serta kaum keluarga dan sekalian para sahabatnya.

Nabi Adam A.S adalah manusia pertama yang dijadikan oleh Allah S.W.T. Dia menjadi Nabi dan Rasul. Adam juga adalah manusia pertama di muka bumi ini. Begitulah yang diajarkan oleh al-Quran.

Walaupun demikian yang diajarkan oleh al-Quran tetapi bukan tidak ada pula orang yang percaya kepada teori Charles Darwin yang mengatakan manusia ini berasal daripada spesies beruk yang telah mengalami evolusi.

Al-Quran membawa berita benar bahawa tatkala Allah SWT hendak menjadikan Adam AS Allah telah berfirman kepada para Malaikat:

**“Sesungguhnya Aku hendak jadikan seorang khalifah di muka bumi ini.**

(Al-Baqarah: Ayat 30)

Maka berkatalah para Malaikat sekalian:

**“Mengapa Engkau hendak jadikan (Khalifah) di bumi itu orang yang akan membuat kerosakan kepadanya dan menumpahkan darah, pada hal kami sentiasa bertasbih dengan memuji Engkau dan mensucikan Engkau?”**

(Al-Baqarah: Ayat 30)

Allah SWT menjawab dengan berfirman:

**“Sesungguhnya Aku mengetahui apa yang tidak kamu ketahui.**

(Al-Baqarah: Ayat 30)

Allah SWT menciptakan Adam AS itu dari segumpal tanah. Allah SWT kemudiannya telah meniupkan roh ke dalam Adam dan lalu memerintahkan kepada iblis supaya sujud kepada Adam AS.

**“Sujudlah kamu kepada Adam”.**

(Al-Baqarah: Ayat 34)

Maka sujudlah sekalian Malaikat, tidak ada satupun yang tertinggal dan engkar kecuali Iblis. Iblis telah engkar kepada perintah Tuhan itu kerana berasakan dirinya yang lebih mulia daripada Adam AS.

Demikianlah berita yang dibawakan oleh al-Quran tentang makhluk Tuhan yang engkar



kepadaNya. Dengan terjadinya peristiwa itu, maka bermulalah catatan dan sejarah keengkaran yang disebabkan oleh ego kerana kejadiannya daripada api.

Iblis berasa dialah yang lebih mulia kerana asal kejadiannya dari cahaya. Itulah egonya. Itulah Iblis yang sangat angkuh, sombong dan bongkak. Sebenarnya perbuatan tersebut, ego, angkuh, sombong dan bongkak adalah perbuatan yang tidak disukai oleh Tuhan.

Dengan keengkaran Iblis terhadap Tuhan itu maka bermulalah sejarah penderhakaan dalam dunia Tuhan ini. Maka Iblis pun jadi makhluk yang bebas, bebas menentang Tuhan yang menciptakannya, bebas membuat kemungkaran dan segala kejahatan yang Iblis suka. Iblis telah membebaskan diri dari Allah.

Umat Islam yang berpegang kepada al-Quran dan al-Hadis menerima perintah agar taat kepada Allah dan taat pada Rasulnya. Adapun Rasul itu adalah pemimpin ummah pada zaman-zamannya yang tertentu. Ada pun Nabi Muhammad SAW itu adalah nabi akhir zaman. Beliau adalah pemimpin ummah. Dan taat kepada pemimpin adalah ajaran yang dibawa oleh al-Quran.

Namun demikian bukanlah tidak ada orang yang mengikut contoh dan sunnah Rasul tetapi dalam waktu yang sama menurut juga contoh dan teladan iblis kerana mereka ini berasa dialah yang pandai, dialah yang pintar, dialah yang hebat, dialah yang bijak, dialah yang cerdik, dialah yang segala-

galanya. Mereka ini sedang menunggu masa kehancurannya. Akan tiba waktunya, cepat atau lambat. Apabila tiba waktu itu maka mereka ini akan terhumban kepada lembah kehinaan serta kedurjanaan.

Begitulah pengajaran dan contoh teladan yang dapat diambil daripada berita benar yang di bawa oleh al-Quran. Akibat dari perbuatan engkarnya itu maka terkeluarlah iblis dari syurga. Maka bebaslah iblis yang lebih senang jadi bebas dari tunduk kepada khalifah pilihan Allah.

Sebelum ia dihantar keluar dari Syurga, iblis telah meminta kepada Tuhan agar memperkenankan permintaannya untuk membujuk dan membawa sebanyak mungkin anak cucu Adam bersamasamanya. Allah telah perkenankan permintaan tersebut.

Di sinilah bermulanya sejarah demokrasi ciptaan Tuhan. Allah berikan iblis memancing undi membuat propaganda untuk menarik Adam hidup bebas seperti nya.

Maka mereka yang tidak beriman dan tidak taat pada perintah Allah dan Rasulnya akan terbujuk, terpengaruh, tertipu melaksanakan kehendak-kehendak iblis di dunia. Di dunia dia bebas membuat apa yang disukai oleh iblis dan di akhirat nanti tidak ada lainlah temannya kecuali iblis dan syaitan. Dan Neraka Jahanamlah tempat tinggalnya manusia yang ego dan tidak taat pada perintah Allah yang telah ditetapkan didalam Al-Quran.

Sesungguhnya banyak pengajaran dan pelajaran



daripada al-Quran yang boleh diambil oleh orang-orang yang tidak angkuh dan yang tidak sombong.

Keengkaran dan keangkuhan beberapa orang yang tidak mahu mengikut untuk duduk bersama-sama dengan pemimpin dalam satu jumaah bagi menyelamatkan manusia di muka bumi ini daripada terjerumus ke dalam kemungkaran yang berlanjutan maka lahirnya apa yang kita kenal hari ini sebagai kumpulan serpihan. Mereka ini kononnya memperjuangkan apa yang dinamakan oleh mereka Semangat 46.

Apakah sifatnya manusia yang demikian itu. Yang tidak mahu ikut duduk berbincang bagi menyelamatkan ummat manusia di muka bumi ini amnya dan Malaysia khususnya. Apakah sifat-sifat lain lagi kalau bukan sifat-sifat yang dipunyai oleh iblis itu?

Iblislah yang telah membawa sifat iri hati, dendam, kesumat dan dengki ke dalam hati anak cucu Adam A.S. Ego yang ada pada iblis yang tidak mahu menerima wujudnya makhluk yang lebih mulia daripadanya mengalakkan manusia yang tidak beriman juga supaya mempunyai perangai dan feel sepertinya.

Ego iblis mempersoalkan kejadian makhluk yang dimintanya sujud. Ego manusia pula mempersoalkan darah keturunan, pangkat dan darjat orang yang mahu memimpin mereka.

Mereka lebih sanggup jadi manusia yang bodoh sombong, yang bodohnya tak boleh diajar, dan yang cerdiknyanya tak boleh diikuti. Manusia yang

macam inilah yang telah mengambil contoh perangai iblis dan syaitan inilah, yang telah menimbulkan punca dan angkara kepada umat manusia.

Sejarah telah mengajar kita dengan cerita Adam AS. Sewaktu Adam AS keseorangan, sunyi sepi di Syurga maka Allah SWT telah menjadikan Hawa untuk dipasangkan dan menemaninya. Tetapi Allah SWT melarang dari mendekati satu pohon larangan. Iblis tahu sifat semula jadi manusia yang lemah, maka dengan helah dan tipu dayanya, dia berjaya menggoda Adam dan Hawa supaya memakan buah dari pohon terlarang. Ini mengakibatkan kedua-duanya dikeluarkan dari Syurga.

Demikianlah akibatnya enggan melaksanakan dan engkar kepada perintah Allah, maka hilanglah keistimewaan yang ada pada Adam dan Hawa. Mereka yang sepatutnya kekal di negeri Syurga kerana leka dan lalai serta tidak taat, maka kini kita semua terdampar didunia akibat pengaruh dan godaan syaitan.

Syaitan gembira kerana kini, dia tidak sendirian lagi, dia sudah mempunyai teman-teman serpihan yang melakukan keengkaran seperti yang telah dilakukannya. Begitulah berita benar di khabarkan di dalam al-Quran. Banyak lagi khabar lain yang diceritakan dengan begitu jelas di dalam al-Quran.

Sayangnya alim ulamak kita tidak mentafsirkan Al-Quran supaya memberi manfaat kepada kehidupan manusia sesuai dengan al-Quran yang dijadikan untuk memberikan rahmat kepada sekalian alam sesuai untuk semua zaman. Saya

mulakan cerita serpihan ini berpandukan Al-Quran dan sunnah. Semuga kita diberi petunjuk dan hidayah dan diberkati Allah akan hidup kita semua.

Ada dua perkara pokok yang ingin saya bincangkan dalam buku saya kali ini. Pertama ialah tentang 'politik' yang bermula setelah wujudnya perasaan ego serta perasaan yang merasakan diri lebih mulia dari orang lain.

Segolongan manusia dari keturunan feodal dan aristokratik yang merasakan mereka sahajalah yang layak dan berhak memimpin umat Melayu, atau pun golongan para ulamak yang memikirkan bahawa mereka sahaja yang berhak memimpin umat Islam di negara ini. Sedangkan orang yang bukan dibidang itu tidak layak dan mereka tak akan ikut dan taat. Mereka mesti kembali kepada Al-Quran untuk mendengar apakah hukuman Tuhan pada makhluk yang mempunyai semangat seperti itu - ego.

Sebagai pemimpin yang mengaku diri Islam, bertuhankan Allah, bernabikan Muhammad dan percayakan rasul, kitab, hari kiamat serta yang ghaib. Marilah kita buang ego yang ada pada diri kita. Kita semua adalah sama. Kita semua adalah hamba Allah, Tuhan telah pilih untuk jadi khalifah di muka bumi dan Tuhan saja berhak memilih siapa yang disukai untuk dijadikan pemimpin.

Selagi kita taat pada perintah Allah dan sedar siapa diri kita, saya percaya kita pasti dapat bersatu untuk menamatkan sengketa tapi selagi kita



terus dengan ego masing-masing hidup berpuak-puak beginilah hidup kita selamanya.

Buku ini juga akan membincangkan pentingnya sifat taat kepada manusia, kerana dengan sifat taat, manusia boleh bersatu dan umat Islam akan memperolehi kekuatan. Allah S.A.W telah berfirman di dalam Al-Quran,

**“Taatlah kamu kepada Allah, dan Rasulnya dan janganlah kamu berbantah-bantahan, yang menyebabkan kamu menjadi gentar dan hilang kekuatanmu dan bersabarlah. Sesungguhnya Allah beserta orang-orang yang sabar.”**

(Surah Al-Anfal : Ayat 46)

Bermulanya serpihan dalam UMNO adalah berpunca dari perletakan jawatan Datuk Musa yang berasa cemburu terhadap Tengku Razaleigh yang dikekalkan oleh Datuk Seri Dr. Mahathir menganggotai kabinetnya. Ego Datuk Musa menunjukkan bahawa dengan adanya Ku Li dalam kabinet, jawatannya sebagai Timbalan Presiden UMNO boleh tergugat.

Musa orang Johor. UMNO dilahirkan di Johor. Dia pun pernah diramalkan sebagai Perdana Menteri Malaysia satu hari nanti. Jadi dengan ego dan sifat kenegerian yang kuat maka lahirlah peperangan ahli UMNO sesama sendiri yang puncanya adalah surat Datuk Musa Hitam kepada Dato Seri Dr. Mahathir supaya menggugurkan Tengku Razaleigh dari kabinet dengan ugutan sekiranya tidak dilakukan demikian, beliau akan meletakkan jawatannya.

Dr. Mahathir tidak tunduk kepada ugutan Datuk Musa. Datuk Sri Dr. Mahathir selaku Presiden UMNO yang menjadi Perdana Menteri lebih mengetahui apa yang patut beliau buat dalam menadbirkan kerajaan yang menjadi tanggungjawabnya.

Datuk Musa dengan bebalnya meletakkan jawatannya sebagai Timbalan Perdana Menteri, Menteri Dalam Negeri dan Timbalan Presiden UMNO pada 26 Feb. 1986. Politik daripada perletakan jawatan itu ialah dengan harapan rakyat akan memberi sokongan padanya. Jika benar berlaku demikian maka mereka boleh adakan undi tak percaya pada Datuk Sri Dr. Mahathir. Musa pun boleh jadi Perdana Menteri dengan lebih cepat.

Orang yang nak memimpin sebuah negara demokrasi tak boleh jatuhkan pemimpin di atas sama ada dengan politiking atau kekerasan tanpa sebab-sebab yang munasabah. Tuhan Maha Mengetahui dan perbuatan Datuk Musa Hitam itu tidak dimakbulkan oleh Tuhan.

Datuk Musa adalah serpihan kabinet yang pertama dalam era pemerintahan Dr. Mahathir. Setelah menjadi orang serpihan maka timbullah sikap dendam dan dengki serta iri hatinya terhadap Ku Li yang sedang bersenang lenang di dalam kabinet Mahathir. Rasa dendam ini disertai dengan rasa marah yang amat sangat terhadap Dr. Mahathir kerana Perdana Menteri enggan tunduk kepada kemahuannya. Musa iri hati melihat

kemewahan dan kenikmatan yang dirasakan oleh Ku Li sebagai seorang menteri dengan pengaruhnya yang semakin hari semakin kuat. Musa percaya sekiranya dia tidak melakukan sesuatu, Ku Li akan menjadi Perdana Menteri Malaysia di satu masa nanti.

Apabila Perhimpunan Agung UMNO yang terakhir hampir tiba, Musa pun tersenyum. Musa tahu Ku Li tidak taat, Ku Li fikir sesudah Hussein Onn, beliaulah yang mesti jadi Perdana Menteri. Othman Saat pun selalu menyebut Tun Razak suruh Ku Li ganti Hussein On bila beliau bersara. Musa tahu perkara ini maka inilah peluang Dato Musa bagi menjatuhkan musuh politiknya.

Musa berjaya menggoda dan memujuk Ku Li supaya bertanding sebagai Presiden dan beliau sendiri tetap mempertahankan jawatannya sebagai Timbalan Presiden. Politik itu semua orang dapat baca iaitu supaya beliau kelihatan sebagai seorang yang taat dan tidak menderhaka terhadap Presiden Parti. Yang lawan Presiden Ku Li, jadinya Ku Li akan dicap sebagai penderhaka. Orang Melayu yang berpegang kepada akidah Islam tidak akan membiarkan seorang yang engkar, seorang yang derhaka sebagai pemimpin bangsanya.

Allah tidak menyukai orang-orang yang ego, engkar serta melakukan perkara-perkara mungkar lalu diberikannya jawatan Presiden dan Timbalan Presiden kepada Dr. Mahathir dan Ghafar Baba. Semuga ini menjadi petunjuk kepada orang-orang yang taat. Ini kerana betapa pentingnya sifat taat



dan setia itu dalam sesuatu perjuangan. Sebab itu Ghafar Baba mendapat kerusi Timbalan Perdana Menteri kerana sifat taat yang ada pada dirinya.

Itulah sebabnya Datuk Mohamad Rahmat menyanyikan lagu '**Setia**' untuk menyemaikan rasa setia dan taat dalam jiwa setiap warganegara Malaysia. Ini adalah kerana Tok Mat yang digelar Mat Rock atau Mat Bulat sedar sekiranya tidak ada semangat taat dan setia pada pemimpin dan negara, rakyat akan hidup dalam keadaan huru hara dan terjadilah perkara-perkara yang buruk yang sedang berlaku di dalam di negara kita ini.

Setelah kalah bertanding menentang Presiden maka jadilah Ku Li dan beberapa orang pengikutnya yang pernah berada di dalam kabinet Mahathir sebagai serpihan UMNO, dan 'serpihan kabinet'. Mereka kesemuanya terpedaya dengan segala strategi Musa yang merangkumi berbagai-bagai teori serta falsafah yang meramalkan mereka semua akan menang. Namun mereka lupa akan kekuasaan Tuhan. Tuhan tidak akan memberi kemenangan kepada yang engkar. Kalau pun mereka dapat kemenangan, itu cuma kemenangan sementara yang mendapat bantuan dan pertolongan iblis. Tuhan perkenankan seperti janjinya pada iblis tidak akan melarang sebanyak mana anak cucu Adam dibawa ke Neraka Jahanam oleh iblis melainkan mereka yang beriman.


Bacalah! Semoga Allah melimpahkan rahmatNya ke atas orang-orang yang membaca dengan nama Tuhan dan berfikirilah kerana berfikir itu pelita

yang menerangi hati untuk mencari yang benar dan yang hak.

YA TUHANKU!  
JADIKANLAH NEGARA INI  
SEBUAH NEGARA AMAN DAN MAKMUR  
ANUGERAHKANLAH RAKYATNYA  
DENGAN REZEKI YANG MELIMPAH  
JADIKANLAH RAKYATNYA  
ORANG-ORANG YANG BERIMAN  
KEPADAMU.....  
YA ALLAH!

Doa Nabi Ibrahim  
(Al-Baqarah ayat 126)

Wabillahi taufiq walhidayah.



SYED HUSSEIN ALATTAS.  
Pengarang.





"Saya dengan you Musa, saya surrender. saya angkat dua tangan. you nak periksa, periksalah".

"Sorry Tok .... Sorry. Saya cuma jalankan tugas. Orang Johor tak percaya yang you ini bersih dan you amanah. Mereka yang suruh saya periksa sama you. Datuk tahulah orang Johor. Mereka cuma percaya pada saya saja, buat kerja-kerja macam ini. Ha .. Ha .. Ha .. Ha ..Ha .." Musa pun ketawa.

Ini gambar lama, gambar masa Musa masih Timbalan Presiden UMNO, Menteri Dalam Negeri dan Timbalan Perdana Menteri. Musa terlupa sifat Tuhan yang Maha Mengetahui, cuba tengok di belakang Musa ada kamera man.



Kuala Lumpur

31 h. Julai '84

TIMBALAN PERDANA MENTERI MALAYSIA

Y.A.B. Perdana Menteri  
Malaysia

Saudara Y.A.B.

Berada kepada percutian percutian  
kita dalam jangka masa beberapa bulan  
lepas dan surir saya bertarikh 5.10.74  
1984, ada lah saya dengan perasaan begitu  
keberatan dan kebahagiaan memaklumkan  
bahwa saya bercadang bersara daripada  
memegang jawatan Timbalan Perdana Menteri  
bermula daripada 1. h. Ogos 1985. Kejutuan  
saya ini ada lah substantif

Saya member "notis" selama satu tahun  
ini semata mata bertujuan supaya Saudara  
akan dapat membuat apa apa jua proses  
pengambil alih dengan secara licin dan  
teratur oleh sesiapa jua yang Saudara akan  
pilih nanti untuk mengambil tempat saya

Jawat ini sengaja saya tolak dengan  
tangan sendiri untuk mengijazahkan saya  
sementara itu, saya akan terus menjalankan  
tugas seolah olah keadaan biasa.

Oleh sebab perin saya keputusannya saya

bersedia dengan tekad ini, ini bawakan  
saya tidak boleh berbuat sesuatu tindakan  
baga kepimpinan para bidadya saya, seperti bersara  
kelak. Ah! itu, saya membatalkan sebagai bawakan  
memberi saya cuti sebelum 6 bulan selama  
tiga bulan bermula 1 Mei 1985 atau mana  
mana tarikh sesuai bagi membolehkan saya  
mengumpul "tiket" dan mencari apa apa kerja  
untuk menampung para bidadya, saya kelak. "

Saya sangat insaf atas segala komplikasi  
keputusan saya ini.

Seterusnya bawakan memulakan saya  
perlu di bantu kan lebih inisiatif, saya  
serah lah kepada kebijaksanaan bawakan sendiri.

Saya akan membatalkan parti ini pada  
masa yang sesuai nanti.

ALLAH SELAMATKAN NO. API KITA.

Atas nama saya,  
dengan segala ikhlas,

Quatun

Semasa saya menceritakan Musa hantar surat kepada Perdana Menteri, suruh singkirkan Ku Li dari kabinetnya, dalam buku Muka Derhaka? orang ramai kata itu satu fitnah. Nah! Sekarang ini surat Musa sebagai buktinya. Photocopy surat ini, sekarang ini boleh didapati hingga di kedai kopi di Chow Kit pun.





## TIMBULAN PERDANA MENTERI MALAYSIA

TOP SECRET - PERDUAL

Y.A.B. Dato' Seri Dr. Mahathir bin Mohamad,  
Perdana Menteri Malaysia,  
Kuala Lumpur.

*Sandain 9/10*

TR in the Cabinet

This letter is written with a very heavy heart and the greatest reluctance.

I did think that you were merely testing him, quite confident that he would not accept it, when I learnt of your offer of the new Ministries to him.

His acceptance of Trade and Industry will carry the following implications :-

- 1) He shall use it to the full by giving out the following perks to his followers and would-be followers - Import permits (cars, materials, etc.), licenses for businesses (MFI looks after Registrar of Companies); licenses and control/supervision of manufacturing ventures.
- 2) He shall have a very strong hold on the take-overs, purchases, distributions, approvals over companies wanting to divest or transfer shares either ordinarily or to comply to the MFP.
- 3) He shall choose, recommend, suggest Malaysian (Malay, more important) partners to foreign investors wishing to invest in Malaysia.
- 4) He shall control the licensing and supervision of the distributive trade.
- 5) He shall choose, recommend, suggest names of individuals for distribution of shares.
- 6) He shall not only continue to have the support of the union group but also give it greatly to the general business (Malay especially) community.
- 7) PATRONAGE could be given to those of his choice. And MON DIEU he shall have the greatest opportunity ever to prepare himself for his political future, even better than financial. Finance only give him prestige and the ability to give tenders, licences, etc. to a very limited top lucky few who would use their influence to get support for him.

But MFI would give him direct access to the actual UMNO voters in the widest way ever! Please remember he is not you, Hussein Onn, Tun Dr. Ismail, Mahathir or Tengku Gin, to mention past Ministers! Just as in Finance, he shall politicize the Ministry for his personal interest.

Personally, while in Finance he had been very difficult and I could only intervene in the most urgent/ important circumstances. So was it, I believe, with you. In MFI, I would personally be rendered almost ineffective and whatever influence I could already assert on MFI so far, very crucial for NEP etc. shall certainly be blunted whichever way you look at it. But more important, the other Ministers would again have to seek his patronage and ..... well, I cannot possibly go further without being accused by you as going into a tantrum and being irrational!


Before your final decision, I feel it now absolutely outboud to remind you of the above. Personally, even though I never had done this before, with the greatest respect, I would like to register my strongest views against IA's appointment at MFI.

Assuming that you go ahead with the appointment, I would have to revise my own plans in a much heftier manner, which I would like to discuss with you after the announcement.

I would like vehemently to assure you that I have no intention of upsetting your administration and, as I said beginning this letter, I am doing this with a heavy heart. I am sure that events in the coming years will prove me right. For God's sake, do ponder over my points and do remind yourself of the type of personality you are dealing with.

Again, God Bless us all. God Bless you.

Sincerely,



(DAID MUSA HILMI)

5 July, 1984.



Kemestaaan Bukanlah Suatu Kriteria untuk Penulis, Tapi Kritik perlu untuk Pemimpin. Begitulah antara Syed Hussein dengan Mahathir dan Musa.



## JANGAN BIARKAN MEREKA GILA

**T**idak boleh dinafikan apabila ada dua pihak yang sedang atau yang mahu bertelagah, maka akan datanglah syaitan untuk menjadi penasihat kepada salah seorang atau kedua-dua sekali. Andainya pertelingkahan itu merupakan pertelingkahan politik, maka syaitan akan mengambil peranannya sebagai penasihat politik.

Cucuk mencucuk, api mengapi ini memanglah kegemaran syaitan. Seperti juga melatah dan mengamuk pula adalah salah satu dari tabiat orang Melayu. Jadi kiranya ada penasihat-penasihat yang berlagak macam ini dalam suasana politik kita kini, eloklah apabila kita bertemu mereka kita bacakan doa **'Ya Allah lindungi aku dari syaitan yang kena rejam'**.

Syaitan memang suka menghasut dan menggoda manusia supaya melakukan kemungkaran seperti berzina, minum arak, main judi, dan menjadi penderhaka dan petualang. Syaitan akan terus menerus menggoda muslimin dan muslimat, menghasut kaum mukminin dan mukminat supaya meninggalkan fardhu ain, melupakan ibadat fardu kifayah dan digalakkannya pula manusia ber-

gelumang dengan noda dan dosa.

Apa bezanya dengan orang-orang politik yang suka menghasut supaya ahli-ahli UMNO meninggalkan pemimpin mereka dan ikut menentang pucuk pimpinan. Apakah ahli-ahli UMNO yang telah meninggalkan parti itu digoda oleh syaitan yang sebenarnya atau manusia yang berhati perut macam syaitan yang memakai topeng manusia. Apakah mereka terpengaruh dengan janji-janji masa depan yang cemerlang atau memang sengaja mereka sendiri yang sudah merasa hampa, kecewa dan putus asa kerana selama ini mereka berjuang untuk mendapatkan sesuatu tetapi masih lagi belum memperolehnya. Kepada orang-orang desperado yang mahu mengikut nasihat mereka, mereka jadikan boneka.

Kebimbangan kita kini ialah bila syaitan nampaknya mula mencampuri hal-hal politik ummah, kerana kesan permainan syaitan ini amat besar. Contohnya kekecuaan dalam negara kita yang dimulakan oleh satu atau dua manusia sudah melibatkan ribuan manusia.

Syaitan inipun jenis makhluk yang ilmiah. Syaitan tahu orang politik senang dicocok-cocok dan orang politik sendiri pun suka main cocok-cocok. Cocok sana, cocok sini, macam lagu iklan Mat Sentul 'celup-celup'. Sekejap dia celup sana, sekejap dia celup sini. Maka jadilah mereka ahli politik celup. Hari ini dia celup dalam UMNO, besuk dia keluar, dia celupkan diri dia dalam serpihan, kemudian keluar lagi dan celup balik



dalam UMNO. Cocok sikit mereka dah melatah. Apa lagi syaitan pun menyediakan sekawah minyak panas untuk mereka main celup-celup. Bila dah tercelup barulah mereka menggelupur dan menggelepar kepanasan. Maka syaitan pun tepuk tangan melihatkan mereka kemaluan tanpa segan-segan. Jadi siapa yang mainkan siapa? Siapa yang cocok siapa?

Bila keadaan sudah jadi macam itu mereka mula mencari guru-guru silat politik. Maka mereka pun dimandikan dengan air penimbul. Selepas mandi air penimbul mereka merasakan mereka sudah kebal. Hilang takut, timbul berani. Mereka pun mulalah tunjuk terror sana sini, macam ustaz Ibrahim Azmi.

Mereka yang ada rasa benci, rasa hasad, rasa cemburu, rasa tamak dan menyimpan perasaan dendam terhadap musuh politiknya tentulah lebih mudah tergoda oleh syaitan. Apa lagi kalau mereka pun ada sikit-sikit perangai macam syaitan.

Cuba kita menyingkap kembali detik-detik sejarah tamaddun manusia. Kita lihat penglibatan syaitan secara langsung dalam politik anak-anak Adam AS.

Mula-mula kita pergi ke Greek Purba tempat lahirnya Socrates, Aristotle, Plato dan Democritus. Cetusan pemikiran demi pemikiran ahli-ahli falsafah ini telah melahirkan idea demokrasi yang amat tahan dan teruji oleh masa ribuan tahun. Dewan (senate) Parlimen yang pertama sekali di dunia lahir di Greek. Tapi sistem pemerintahan

yang difikirkan sempurna itu akhirnya tercemar juga apabila Augustus Caesar mati dibunuh akibat dari fahaman politik yang bertentangan.

Dari sejarah Greek Purba kita menyusul pula sejarah Mesir tua, satu era yang ditandai oleh kegemilangan pemerintahan Firaun. Di zaman itu soal demokrasi tidak timbul. Firaun memerintah rakyatnya secara '**authoritarian**' yang tulen.

Bercakap tentang Mesir Tua, saya nak cakap sikit fasal Mesir hari ini. Ini kerana Ustaz Ibrahim Azmi jaguh pemidato ulamak celup adalah hasil keluaran dari sebuah universiti di Kaherah, Mesir. Dan kebanyakan ulamak yang duduk buat benda-benda karut dulu dan hari ini dibidang politik, samada mereka di dalam atau di luar UMNO, di dalam atau di luar PAS, adalah mereka yang keluar dari universiti-universiti di Mesir.

Berbalik semula fasal cerita Firaun, Firaun yang menganggap dirinya sebagai Tuhan, menyembelih bayi lelaki hidup-hidup kerana takut kalau-kalau suatu hari nanti salah seorang dari mereka bangkit dan menentangnya.

Kekejaman Firaun ini dinamakan 'barbarisme'. Inilah barbarisme dalam sejarah kehidupan se-golongan bangsa yang sudah bertamaddun. Firaun lebih kejam dan lebih diktator dari semua diktator yang pernah kita temui dalam sejarah. Namun, macam mana kejam, macam mana diktator sekali pun Firaun, dia terpaksa tunduk dan mengalah kepada seorang manusia yang bernama Musa AS.

Inilah kekuasaan Tuhan, boleh memberi dan



mengambil semua kuasa yang dipinjamkan bila manusia mula bersifat kejam dan zalim dan merasakan dirinya Tuhan.

Para syaitan dan iblis yang memesong serta membinatangkan hati Firaun tidak terdaya melawan kebenaran yang ditunjukkan oleh Allah SWT. Di situlah timbul firman yang berbunyi **“bila datang kebenaran maka yang batil akan gugur dengan sendirinya”**.

Ahli-ahli UMNO yang tidak mengetahui tentang kebesaran Tuhan tentu merasa hairan dengan adanya politik pancong memancong dalam UMNO hari ini. Tapi bagi mereka yang membaca dan beriman pada yang ghaib tidak hairan pada yang mahu menjadi diktator-diktator kecil di bahagian-bahagian dan cawangan-cawangan UMNO yang baru dihidupkan semula. Mereka tahu apa yang telah terjadi pada Firaun bersama pengikutnya yang akhirnya musnah ditenggelami laut. Apakah mereka tidak tahu sejarah Firaun?

Maka tertawalah para syaitan. Seperti juga syaitan yang telah ketawa berdekah-dekah terhadap ahli-ahli UMNO yang telah membunuh satu pertubuhan yang pernah mereka agung-agung dan dewa-dewakan dulu.

Sesungguhnya syaitan dan iblis berjaya dalam perjuangan menipu manusia. Begitupun syaitan dan iblis masih lagi belum puas. Lalu digodanya serpihan-serpihan Bani Israel yang patuh kepada Musa AS. Akibat politik Syaitan, golongan serpihan itu terus menyembah seekor sapi betina tatkala

Musa AS naik ke Bukit Tursina untuk mendapatkan kitab Taurad.

Akibat dari menurut godaan syaitan akhirnya golongan Bani Israel menjadi manusia serpihan. Manusia yang tercela dan hina dimuka bumi biarpun mereka kaum yang terdiri dari para ilmuan dan cendikiawan dan jutawan yang menguasai ekonomi dunia, tetapi mereka tetap menjadi satu bangsa yang kejam, angkuh, zalim dan disumpah serta dihina dan dilaknat oleh Allah SWT.

Mereka hidup dalam buangan dan kancah kehinaan hampir 2000 tahun lamanya sebelum menduduki bumi Palestin. Itu pun diatas bantuan jemaah syaitan-syaitan yang telah menghasilkan pengistiharaan Balfour dan resolusi Liga Negara-negara. Namun mereka tidak mendapat rahmat dari Allah SWT.

Daripada peristiwa Firaun dan Nabi Musa AS, saya bawa pula ke satu era politik Islam selepas wafatnya Nabi Muhamad SAW. Ianya terjadi kira-kira di abad ke tujuh masehi. Setelah wafatnya Rasulullah, kita dapat menyaksikan adanya umat Islam yang rapat dengan baginda berjaya digoda oleh syaitan kerana mahukan kuasa dan adanya perasaan ego dalam diri; iaitu puak Muawiyah. Marilah kita namakan mereka ini Team B. Mereka mahu menentang ahlil bait yang kita namakan Team A. Di situlah mulanya berpecah Islam menjadi dua puak yang bertentangan.

Puak Muawiyah telah melakukan segala macam kemungkaran yang ditegah oleh Islam, minum

arak, berzina dan mengamalkan sistem diktator. Muawiyah menggunakan pedang untuk melantik anaknya sebagai khalifah yang akan menggantikannya sesudah dia mati. Inilah zaman yang memulakan kesultanan dan kesyaitanan dalam sejarah Islam. Dan di sini jugalah lahirnya segala ulamak-ulamak yang mementingkan diri, ulamak-ulamak jahat yang menurutkan kehendak Muawiyah tanpa takut kepada Allah dan Rasul.

Mereka seolah-olah telah berbalik ke zaman jahiliah. Mereka tidak lagi taat dan mengikut perintah Allah SWT. Mereka tidak lagi taat dan menghormati Saidinna Hassan dan Syaidina Hussein. Walaupun telah diberi ingatan dan amaran namun mereka tetap tidak mahu menghormati para ahlul bait sebagaimana yang diwasiatkan oleh Baginda Rasulullah SAW.

Seperti Qabil membunuh Habil, Zaid bin Muawiyah telah memancong kepala-kepala Syaidina Hussein bin Ali bin Abi Talib anakanda kepada Fatimah Al Zaharah, anakanda Rasulullah SAW dan semua putera puteri Syadina Hussein r.a. Hanya Syaidina Ali Al Zainal Abidin saja yang terselamat atas permintaan Saidah Zainab. Saidina Hassan pula diracun. Ini kerana mereka fikir selagi ada ahlul bait mereka tidak boleh mengikut kehendak syaitan yang mahu menyesatkan umat Islam kerana ahlul bait sanggup mati syahid demi mempertahankan agama yang dibawa oleh datuk nenek mereka.

Tragedi Saidina Hussein dan keluarganya itu



berlaku di Karbala, Iraq. Sebelum itu ayahandanya Sayidina Ali r.a. telah dibunuh selepas bersembahyang di dalam masjid di Najaf Iraq, oleh komplot-komplot Muawiyah. Bagaimanapun Ali Al Zainal Abidin telah diselamatkan oleh Sai'idah Zainab. Menurut tarikh Ar-Rusul wal Muluk susunan At-Tabari (5/457), Ziyad pernah berkata kepada Sai'idah Zainab, setelah memenangi perang karbala.

**“Alhamdullilah segala puji bagi Allah, yang telah membongkar rahsia kamu sekelian, dan yang telah berkenan menumpaskan keluarga mu, dan telah membuktikan cerita bohong kamu sekelian!”**

Dengan berani dan tegas Zainab menjawab, **“Dengan agama Allah, agama ayahku, agama saudaraku dan agama datukku Muhammad SAW, ayahmu dan datukmu telah mendapat hidayah.”**

Ziyad terus terdiam tidak dapat berkata apa-apa kerana dia sedar dia dan keluarganya yang angkuh telah derhaka dan tidak taat pada Rasulullah.

Dipendekkan cerita, kesemua puak Muawiyah yang terlibat dalam pembunuhan ahlul bait dalam tragedi Karbala itu akhirnya mati satu persatu dalam keadaan yang mengerikan dan dalam kehinaan. Ini adalah satu sejarah hitam yang patut dimenungkan oleh umat Islam yang cintakan agamanya dan kasihkan rasulnya Nabi Muhammad SAW rasul dan pesuruh Allah.

Matlamat perjuangan syaitan tidak sahaja habis

di situ. Syaitan akan membawa sebanyak mana cucu Adam tanpa mengira agama, bangsa dan warna kulit untuk menemaninya hingga ke dalam neraka jahanam. Semakin tebal iman seseorang itu, semakin rancaklah godaan syaitan terhadapnya. Bagi orang-orang yang sudah menjadi '**member syaitan**', syaitan tidak akan menggodanya lagi, kerana dia akan terus melakukan kemungkaran demi kemungkaran. Semoga Tuhan membukakan pintu taubat untuk mereka.

Pada mulanya kita dijajah, kemudian melalui pakatan orang-orang Melayu yang sekaligus orang Islam menyaksikan kita memperolehi kemerdekaan. Ketika itu persatuan umat Islam amat hebat sekali sehinggakan tidak ada ruang untuk para iblis dan syaitan masuk menggoda. Tapi iblis nyata lebih bijak. Iblis berjaya menggoda Presidennya yang pertama.

Dato Onn menjadi serpihan kepada parti yang diasaskannya sendiri kerana ego. Sebab itu umat Melayu meninggalkan beliau keseorangan kerana belum ramai pemimpin UMNO yang ego, UMNO pun selamat.

Begitupun UMNO asal terus kekal sungguhpun sudah ada tanda-tanda yang menunjukkan adanya perpecahan dalaman di dalam parti. Perpecahan dalaman ini sampai dikemuncaknya menjelang perhimpunan Agong 1987 yang melahirkan dua kem dalam UMNO saling bertelingkah. Tapi Tuhan mahukan kem yang dipimpin oleh Dr. Mahathir menang.

Ini telah menimbulkan kemarahan dan rasa tidak puas hati kepada para pengikut kem yang dipimpin oleh gandingan Musa-Ku Li. Seperti yang saya sebutkan tadi bila ada sahaja golongan-golongan manusia yang bertelingkah, iblis sudah tentu tidak mahu melepaskan peluang keemasan ini.

Akhirnya dalam tahun 1988, UMNO yang sudah terlalu tenat diisytiharkan mati oleh Mahkamah Tinggi Kuala Lumpur. Untuk menyelamatkan jenazahnya dari terus dikacau syaitan, maka saya pun membacakan 'TALQIN UNTUK UMNO'. Itulah akhirnya riwayat hidup satu pertubuhan politik yang terbesar dan tertua dalam dunia demokrasi moden.

Begitupun pawang-pawang yang menggunakan iblis terlalu ramai. Mereka duduk memuja-muja semangat UMNO yang sudah mati itu. Bila UMNO baru diwujudkan, maka lahirlah juga golongan serpihan yang memuja semangat. Mereka namakan diri mereka semangat 46. Ini lebih kurang samalah dengan occulist dan pengamal ilmu hitam, macam dalam filem Indonesia **'Penangkal Ilmu Teluh'**.

Perbuatan memuja semangat memanglah merupakan satu perbuatan gila. Kalau dia tak gila pun, orang ramai mesti kata mereka gila sebab memuja benda-benda yang sudah tidak lagi menjadi milik mereka.

Bila cakap pasal gila ada orang gila talak, ada orang gila kuasa, ada orang gila duit, kemudian ada orang gila benda yang saya tak boleh tulis di sini (benda boleh menghabiskan duit) ada pula yang gila



babi. Gila babi ini ada macam-macam punya gila babi. Ada yang terkena penyakit anjing gila.

Yang kita takut dan yang kita bimbang ialah gila yang berbentuk psaike. Bukan yang benar-benar psaike tapi gila yang sering terjadi pada manusia siuman.

Kita tahu setiap tahun ribuan malah jutaan manusia merana akibat penyakit tekanan jiwa. Sebab musabab berlakunya benda-benda yang macam ini memanglah banyak. Kalau orang gila talak menghadapi tekanan yang maha hebat sebab dia nak balik kepangkuan jandanya, begitu jugalah dengan orang-orang politik. Dulu dia nikah dengan kuasa, tapi bila kuasa itu bercerai darinya dan menjadi seperti janda yang ada benda, dia pun terus jadi gila, macam orang gila talak. Dan dalam golongan serpihan hari ini memang ada pun yang gila talak. Tak kiralah lelaki atau perempuan. Jadi untuk melepaskan gian mereka pun terlalak-lalak sana-sini. Nak maki lakikah, nak maki binikah tak dapat. Jadi terpaksa maki kerajaan. Maki Mahathir untuk menunjukkan bahawa mereka ini adalah orang-orang perjuangan. Padahal mereka ini tergolong dari orang-orang sakit. Para pembaca tekalah penyakit apakah yang sedang menghingapi mereka ini sebenarnya.

Perbuatan itu samalah seperti manusia yang sudah sasau. Setiap hari ada sahaja pekerjaan yang karut marut yang dibuatnya yang boleh menimbulkan kemarahan orang ramai dan kecelakaan keatas dirinya sendiri. Contoh-contohnya tak payah

disebut. Watak-watak mereka tentulah kita dapat melihat sendiri.

Begitupun para pesakit yang semacam ini tidaklah semestinya tercampak di rumah sakit Bahagia dan Sentosa (yang dulunya dikenali sebagai Hospital Mentol Tampoi dan Tanjong Rambutan). Pesakit-pesakit ini ada di mana-mana sahaja, Kompleks membeli belah, di restoran-restoran, di tepi pantai, malah di dalam bangunan Parlimen sendiri.


Namun begitu tahap kegilaan mereka ini belum-lah layak untuk dipanggil 'orang gila' dalam erti kata yang sebenarnya.

Inilah yang disebut oleh Dr. Thomas Szasz, seorang pakar penyakit-penyakit jiwa Amerika yang terkemuka. Beliau menyatakan: "*Some people argue that there is no such thing as mental illness. Mental illness is not something a person has but it is something he does.*"

Sebenarnya orang-orang gila bukanlah manusia-manusia yang hina. Begitu jugalah dengan manusia-manusia serpihan. Mereka menjadi gila dan menjadi manusia serpihan adalah sesuatu yang lumrah dalam hidup manusia yang ego yang akhirnya menyendiri bercakap seorang diri.

Sekiranya kita tidak dapat menyelamatkan mereka, marilah kita selamatkan maruah bangsa dan negara kita sebelum tercemar dan jadi rosak binasa akibat kegilaan mereka.





"Gua caya lu. Lu caya gua. Kita sama-sama cayalah. Tapi itu Musa Hitam kita tak ada caya punya".

"Betul Ustaz. Dah betullah cakap Ustaz tu. Itulah sebabnya saya nak pakat dengan PAS ni". Begitulah agaknya kata Ku Li kepada Ustaz Fadhil Nor.

Lu macam mana caya sama dia orang ke?





"Pasal apa Datuk nak ambil nasi dari pinggan saya? Nasi lainkan banyak".  
"Makan berebut-rebut ini sedap. Macam rebut-rebut kerusi politik juga".  
"Tak baik Tok berebut makan, orang Islam mesti pandai bersabar".  
"Itu orang Islam, orang Melayu hari ini mesti belajar kurang ajar".  
"Sorrylah tok itu benda gua tak main".  
(Gambar di hari Perhimpunan Melayu Johor).



"Ah .. ini saya pun pinggan", kata Musa.

"Tidak ini saya punya", kata Muhyiddin.

'Saya punya!'

'Saya punya!'

Sampai bila Musa nak rebut sepinggan nasi, berebut dengan anak muridnya. Macam manalah politik Johor nak aman. Nasi dalam pinggan Muhyiddin pun Musa nak berebut. Dulu Ajib masa jadi Menteri Besar Musa jadikan '*erand boynya*'.





**Di mana bumi dipijak ...  
Di situ Allah disembah!**

**FIRMAN** Allah Taala yang bermaksud:

*"Orang-orang yang mengingat Allah sambil berdiri atau duduk atau dalam keadaan berbaring dan mereka memikirkan tentang penciptaan langit dan bumi (seraya berkata): "Ya Tuhan kami, tiadalah Engkau menciptakan ini dengan sia-sia, Maha Suci Engkau, maka peliharalah kami dari seksa neraka."*

Ali Imran: 191



## DI MANA BUMI DIPIJAK

**D**alam semua buku-buku saya, semua tajuk-tajuk bagi setiap babnya saya pastikan supaya menarik dan menyeronokkan. Begitu juga buku ini dan bab ini. Pada mulanya bab ini saya namakan '**antara hantu dan laut biru**' yang saya pinjam dari peribahasa Inggeris '*Between the devil and the deep blue sea*'. Saya memilih tajuk yang demikian kerana mengingatkan kepada kesukaran yang sedang dihadapi oleh penduduk-penduduk dan pengundi-pengundi di Ampang Jaya kini. Mereka sukar hendak memilih calon manakah yang akan diundi oleh mereka. Mereka sukar hendak memilih antara Datuk Harun Idris, yang dulunya terkenal dengan '*keumnoannya*' kini bertanding atas tiket calon bebas dengan calon komponen Barisan Nasional dari MCA, Encik Ong Tee Keat.

Keadaan ini jelas kerana Datuk Harun Idris dalam kempennya meminta semua orang mengundi calon Melayu sedangkan sewaktu dia menjadi Menteri Besar Selangor dulu, di tempat-tempat Cina di suruh orang Melayu sokong Cina.

Jadi orang Melayu yang berasa terhutang budi kepadanya fikir bahawa Harun itu Melayu dan Islam sedangkan MCA itu Cina dan kafir. Jadi kalau undi dia bermakna undi Melayu dan Islam



"Gua caya lu, lu caya gua". Di mana-mana Harun pergi Harun mulakan ceramahnya dengan 'gua caya lu, lu caya gua'. Harun Idris calon bebas lawan Ong ibarat seperti dua ekor burung di atas pohon, sedangkan Ong Tee Kiat ibarat burung yang sudah berada di dalam gengaman. Kerjasama antara Harun, PAS dan DAP cuma satu rancangan.





Mr. Ong Tee Kiat calon MCA. Orangnyanya muda belum terlibat dengan sebarang jenayah. Kalau anda diberi pilihan untuk memilih pemandu, anda pilih pemandu yang belum terlibat dengan bermacam-macam kemalangan atau orang tua yang ada rekod bawa kereta yang sudah beberapa kali aksiden.



sementara kalau undi MCA bermakna mengundi Cina dan kafir.

Semua orang tahu bahawa 70 peratus pengundi di Ampang Jaya adalah pengundi Melayu dan Islam. Datuk Harun tahu orang Melayu itu berpegang pada **hidup dikandung adat mati dikandung budi**, maka untunghlah Datuk Harun. Dia akan menggunakan kesempatan ini untuk menanggung di air yang keruh.

Ini diikuti pula oleh latarbelakang politik orang Melayu sendiri yang telah dirasuk oleh sentimen perkauman ditambah pula dengan peristiwa Lee Kim Sai yang dianggap derhaka pada sultan. Isu-isu ini dengan sendirinya boleh memberikan sokongan moral pada Harun.

Bagaimana pun Datuk Harun mesti ingat jangan bermain api dengan kawasan-kawasan yang banyak rumah-rumahnya beratap yang mudah terbakar. Salah-salah hitung rumah sendiri pun boleh terbakar.

Orang Melayu tidak boleh dipanggil Melayu selagi dia tidak berbudi dan tidak beradat. Taat setia, berbudi dan beradat adalah tradisi Melayu. Namun yang menjadi persoalannya ialah kepada siapa kita berhutang budi? Kepada siapa mesti kita berikan taat setia kita?

Apakah orang Melayu di Ampang Jaya berhutang budi pada orang tua yang gilakan kerusi bernama Datuk Harun Idris atau pun Datuk Harun Idris yang sebenarnya yang berhutang budi kepada penduduk-penduduk Melayu Ampang. Bagaimana

pula dengan penduduk-penduduk Cina?

Hakikatnya kalau tidak kerana orang Melayu; tentu tidak ada Datuk Harun Idris. Datuk Harun Idris menjadi Wakil Rakyat siapakah yang mengundinya? Dia menjadi Menteri Besar siapakah yang melantiknya? Dia jadi Ketua Pemuda siapakah yang memilihnya? Dan selepas itu kerana perbuatannya sendiri beliau terpaksa menjalani hukuman dan menerima pembalasan Tuhan. Setelah diampunkan Harun telah menerima tunggakan hampir satu juta, semuanya kerana sokongan dan pertolongan orang Melayu.

Datuk Harun Idris sepatutnya membalas budi dan jasa-jasa orang Melayu padanya. Kalau Harun tak ingat budi Dr. Mahathir kerana kebenciannya kepada Dr. Mahathir walaupun Mahathirlah yang memainkan peranan untuk pengampunannya, Datuk Harun patut ingat budi orang Melayu kepadanya. Datuk Harun harus tunjukkan taat setia pada bangsa Melayu sesuai dengan pertolongan bangsa Melayu kepadanya.

Tradisi taat yang menjadi darah daging orang Melayu tidak boleh dipisahkan macam mana lagu dan irama atau pun laut dan pantai. Tradisi taat bagi orang Melayu adalah pantulan kemurnian jiwa bangsa Melayu. Ia tidak dapat dipisahkan sebagaimana tidak dapat dipisahkan irama dan lagu. Ia menjadi getaran jiwa bangsa Melayu seperti kata P. Ramlee;

*"Andai dipisah lagu dan irama*

*Lemah tiada berjiwa*

*Hampa*

Itu kata seniman besar Allahyarham P. Ramlee. Sesungguhnya kata-kata itu tidak sahaja menjadi pantulan jiwa bagi seniman lama tetapi juga menjadi sesuatu yang juga sentiasa membisikkan ke telinga generasi baru. Generasi rock hari ini telah pun memberikan penafsiran lain yang tidak kurang hebatnya. Kumpulan 'Search' mengatakan:

*Andai dipisah laut dan pantai*

*Musnahlah ilham*

*Hilang pedoman*

Begitulah kuatnya pegangan tradisi taat yang sebatu menjadi sebahagian daripada orang Melayu. Namun yang menjadi persoalannya kini, apakah perintah Allah yang terkandung dalam budaya taat yang berlandaskan Islam ini akan terus berkekalan?

Taat bukan tidak bagus. Bagus... tapi Allah suruh kita taat ada dengan sebab pasalnya. Allah suruh kita taat pasal Allah tak mahu kita taat ikut macam perangai iblis. Ceritanya sudah ada di dalam Quran. Adat orang Melayu yang merangkumi taat setia ini bukan tak bagus, tapi biarlah sampai ketahap taat kepada Allah dan rasul. Jangan berhenti baca setakat taat sahaja. Baca itu mesti habis. Jangan separuh-separuh. Kalau baca separuh-separuh maka yang dapat pun separuh-separuh juga. Bila dapat separuh nanti budak-budak cakap: Dia tu separuh. Tapi kalau tiga suku lagilah teruk. Jadi mestilah bacanya habis. Lainlah pula kalau kita pergi Negeri Sembilan. Ada kawan-kawan di sana bercerita masuk suku. Ini pun kurang seronok juga. Masuk Islam tidak bolehlah masuk separuh-



separuh, suku-suku atau tiga suku dan sebagainya. Mesti masuk semua.

Apabila bercakap tentang budi bahasa dan kelembutan orang Melayu ini maka satu perkara yang kita akan ingat ialah budaya kurang ajar. Ada pun kurang ajar ini diajarkan oleh Musa Hitam.

Memang telah banyak perbuatan kurang ajar yang telah dilakukan oleh Musa. Yang akhir kurang ajar Musa Hitam ialah apabila dia membuat kenyataan akhbarnya di Hongkong yang memburuk-burukkan negaranya sendiri. Dan yang paling baru ialah apabila Musa Hitam muncul dalam saf Datuk Harun Idris sewaktu penamaan calon di Ampang Jaya. Perbuatan itu dilakukan sewaktu resolusi enam perkara Perhimpunan Melayu Johor yang Musa Hitam terlibat sedang diberikan sensitiviti yang positif. Apakah maknanya semua ini?

Tradisi mentaati para pemimpin yang menjadi pegangan hidup kita seperti yang diajarkan oleh Islam supaya mereka yang beriman taat kepada Allah, taat kepada Rasul dan taat kepada pemimpin yang ada pada bangsa Melayu nampaknya sudah mulai kecundang apabila Shahrir kunci bebas menang di Johor Bahru menentang calon Barisan Nasional.

Sekarang Harun mahu jadi hero di Ampang. Mahu jahanamkan amalan taat yang telah menjadi darah daging kita, mahu orang Melayu tentang kerajaan dengan alasan calon Barisan Nasional seorang Cina. Harun sanggup bakar semangat perkauman kerana mahu rebut satu kerusi.

Tidakkah perbuatan ini adalah perbuatan yang boleh merosakkan banyak pihak sedangkan faedahnya untuk dirinya sendiri. Salah-salah tindak boleh menimbulkan huru-hara yang boleh memusnahkan keharmonian hidup bangsa Malaysia.

Masa Hussein Onn jadi Perdana Menteri ketika itu Harun jadi Godfather UMNO, orang-orang Harun kata Hussein Onn Freemason, kita tentang Hussein Onn kerana Harun Pemimpin Melayu. Harun mewakili UMNO. UMNO itu Melayu. Masa itu Harun masih dalam UMNO. Harun kata Dr. Mahathir adalah seorang diktator, ada yang setuju. Kita pun tentang Dr. Mahathir, biarpun Mahathir Presiden UMNO kerana tentangan itu adalah tentangan dari dalam, pergaduhan sesama ahli, satu perkara biasa yang menjadi amalan demokrasi.

Empat Perdana Menteri tidak ada satu pun yang Datuk Harun berkenan. Takkan empat Perdana Menteri tak ada satu pun yang betul. Ini tentu ada sesuatu yang tidak betul mengenai orang yang suruh kita tentang keempat-empat pemimpin kita ini.

Hari ini Harun berada di luar UMNO. Harun bukan lagi menjadi pejuang Melayu. Harun sudah jadi macam Musa Hitam juga. Harun sudah menyusahkan semua bekas pengikut-pengikutnya yang setia padanya.

Jasa-jasa Harun memang banyak, macam juga jasa-jasa Tun Razak dan Tunku. Tetapi dicelah-celah jasa besar banyak juga kesalahan politik besar

yang tidak boleh dimaafkan oleh rakyat Malaysia yang telah dilakukan oleh Harun.

Melihat sejarah politik Harun, saya teringat Musa. Harun dan Musa, dua nama yang tidak boleh dilupakan. Harun dan Musa suatu masa dulu bagaikan pokok dan manusia, saling memerlukan oksigen dan karbon dioksid. Pohon perlukan manusia dan manusia perlukan pohon untuk terus bernafas dan hidup.

Musa dan Harun juga mempunyai persamaan dari segi kesalahan politik. Kedua-duanya pernah terlibat di dalam kemalangan politik besar mengakibatkan kedua-duanya cedera parah, macam kereta yang sudah bengkok chesisnya.

Waktu Harun enggan menuruti arahan Tun Razak agar menerima tawaran menjadi duta ke Bangsa-Bangsa Bersatu politik UMNO menjadi kecoh. Orang-orang UMNO di Selangor seperti kehilangan pedoman lantas berjuang untuk memulihkan Harun.

Pengikuti-pengikut setia Harun seperti Onn, Mufti dan Fahmi serta lain-lain hampir jadi mangsa namun tetap setia dan sanggup mati untuk big boss mereka. Dan Onn, Mufti yang telah sedar dan insaf bahawa bossnya telah banyak tersilap terpaksa tentang Harun dan anaknya Mazlan dan Fahmi yang dulu teman seperjuangan kerana ikutkan nafsu Harun yang gilakan kuasa.

Hussein Onn semasa menjadi Perdana Menteri gagal mententeramkan politik UMNO hingga beliau dilihat sebagai pemimpin yang gagal men-



jadi pendamai. Ini semua kerana permainan politik Harun akhirnya Hussein sudah tak tahan, tiba-tiba saja ia diserang sakit jantung. Hussein terpaksa berkejar ke London seperti Tun Razak untuk mendapat rawatan. Maka Hussein Onn pun hilang jawatan.

Nasib Tun Razak lebih baik kerana beliau dipanggil pulang oleh Allah sebelum sesuatu yang tidak baik berlaku pada dirinya dan negara yang dipimpinnya. Hussein Onn juga bernasib baik, beliau selamat menjalani pembedahan, tapi terpaksa berundur. Hussein mengundurkan diri di saat isu Harun sampai ke kemuncak. Kemudian digunakan semula oleh Harun sebagai boneka dalam politik serpihan.

Musa pun macam Harun. Bila Musa berhenti dari jawatan kerajaan, politik UMNO menjadi kecuah. Orang Johor jadi tak tentu arah. Tidakkah krisis yang melanda UMNO dan bangsa Melayu hari ini berpunca dari perletakan jawatan Musa Hitam?

Biarlah Musa bermati-matian menafikannya tetapi sejarah tak boleh berdolak dalih. Musa telah banyak membuat angkara hingga hidup orang Melayu Johor jadi haru-biru. Musa sudah dihukum oleh sejarah sebagai punca kepada krisis yang menimpa dunia Melayu. Hari ini kerana Harun lebih pintar, lebih cekap, Harun masih boleh bermain sandiwara.

Biarpun begitu saya tidak menyesal kerana satu masa dulu saya pernah menjadi penyokong kuat

perjuangan mereka dan saya tetap mendoakan agar mereka dapat bertaubat dan kembali ke pangkal jalan.

Sekarang kita tidak boleh ikut orang tua ini lagi. Kita mesti tentang dia. Sebelum terlambat kita mesti timbulkan satu pertanyaan penting. Siapakah Harun Idris ini sebenarnya? Orang-orang Harun kata Tunku prejudis tak peduli tentang kepentingan Melayu. Orang-orang Harun juga mendakwa Tun Razak di kelilingi komunis, dan orang-orang Harun kata Hussein Onn Freemason.

Kata pepatah pula **'Hanya pencuri saja yang kenal pencuri.** Siapa Harun ini sebenarnya yang mahu menghapuskan tradisi taat pada Melayu? Siapa? Mari kita beristihagfar dan bertanya, Harun ini siapa? Harun bukan Melayu kerana Harun bukan ahli UMNO. Datuk Onn mengajar kita Melayu itu UMNO dan UMNO itu Melayu. Siapa yang berjuang di luar UMNO, dia tidak memperjuangkan kepentingan Melayu sebab itu Datuk Onn tersingkir dan disingkirkan oleh umat Melayu.

Memanglah dalam hidup ini kita tak digalakkan jadi Pak turut. Kita tidak disuruh taat membabi buta. Kita ditegah sujud dan menyembah kepada sesiapa saja atau apa juga kuasa selain dari Allah.

**"Hanya Allah yang ku sembah dan kepada Mu Allah tempat aku meminta."**

Surah Al-Fatihah

Kesilapan ulamak yang paling besar di zaman kesultanan Melayu silam ialah mereka hanya mengajar umat Melayu supaya taat setia pada raja.

Mereka tidak berani mengajar para raja supaya sentiasa berlaku adil dan bersikap terbuka untuk mendengar masalah serta rintihan rakyat. Apabila rakyat saja yang taat pada raja, sedangkan raja tidak taat pada Rasul dan pada Allah, maka lahirlah Jebat Derhaka namun yang menjadi sasaran ialah Hang Tuah yang taat.

Para ulamak zaman silam takut untuk menyatakan bahawa raja mesti sentiasa bersikap adil dan bijaksana dalam menjalankan tugasnya sebagai Ulil Amri dan tidak boleh berlaku zalim, tidak boleh ikut saja nasihat orang di sekeliling yang suka membuat fitnah dan angkara. Akhirnya raja mati di hujung keris ditangan Laksamana Bentan kerana kesilapan menurunkan perintah dari orang yang tidak bertanggungjawab.

Tersilap cakap kepada raja-raja di zaman dahulu nampaknya kepala boleh bercerai dari badan. Disebabkan kepentingan diri para ulamak pun membiarkan raja-raja hidup di dalam kemungkaran. Maka buruklah pandangan rakyat kepada Hang Tuah yang taat pada raja.

Para ulamak ketika itu, sepatutnya menyedari bahawa sekiranya mereka mati kerana menegakkan agama Allah, maka matinya itu adalah mati syahid. Tapi mereka takut. Itulah sebabnya kerja-kerja kemungkaran berleluasa di kalangan istana.

Malaysia kini sudah merdeka. Negara kita sudah menjadi sebuah negara demokrasi dan raja-raja cuma menjadi lambang negara saja. Apakah itu bererti ulamak sudah tidak punya tanggungjawab



untuk terus menerus mengingatkan dan menasihati para raja kerana sebagai manusia biasa raja pun ada kelemahan dan sifat leka dan lalai.

Kalau ulamak fikir mereka tidak perlu beritahu kepada raja-raja kerana sekarang ini rakyat yang berkuasa di dalam negeri di mana raja sebagai simbol sahaja. Maka para ulamak, mesti mengingatkan rakyat bahawa mereka mesti taat pada pemerintah, taat pada memerintah itu adalah perintah Allah. Sekiranya para alim menjalankan tugasnya memberikan penerangan yang jelas, mengenai peranan taat setia kepada pemerintahan. Kita tak jadi begini. Ulamak tertidur di dalam masa kemungkaran sedang berleluasa.

Memberi undi pada calon MCA di Ampang tidak bertentangan dengan agama. Calon MCA Mr. Onn Tee Keat yang bertanding di situ bukan bertanding sebagai pemimpin kita? Dia bertanding sebagai Wakil Rakyat kita mengikut sistem parti yang kita semua pilih iaitu sistem demokrasi. Kekalahan calon MCA sekadar mahu menunjukkan kemarahan segolongan opportunist yang mahu memberi tahu dunia kita sudah tidak mahu lagi pada Dr. Mahathir. Kita mahu Tengku Razaleigh Hamzah.

Kemenangan Datuk Harun adalah kemenangan untuk Ku Li dan segolongan serpihan, ia tidak akan menguntungkan sesiapa melainkan dirinya dan keluarganya saja. Fikirkanlah. Baru ada dua orang keluarganya satu anaknya Mazlan dan satu lagi anak angkatnya Fahmi, Harun sudah berani

mendesak dan menggugat kerajaan.

Harun ini jenis mereka yang suka bertarung. Masa zaman Tun Razak dulu Harun adakan kerajaan dalam kerajaan. Mahukah rakyat kita mempunyai dua nakhoda dalam satu kapal.

Kerana sifat suka mendesak dan tunjuk handal ini sudah menjadi darah daging Datuk Harun. Maka Harun yang macam ayam jaguh yang suka berlaga akan terus berkokok berlaga sampai mati.

Berbalik kepada calon MCA yang akan mewakili Barisan Nasional. Mr. Ong bukan mewakili kaum Cina. Beliau mewakili kerajaan. Kalau kita menolak calon Barisan Nasional bererti kita sudah tidak setuju lagi dengan sistem kerajaan yang kita sama-sama pilih.

Kalau Harun menang pun, Harun bukan boleh buat apa-apa melainkan cari peluang berniaga atau terus kekal dalam politik sampai mati. Sebabnya Harun bukannya ada apa-apa parti. Dia cuma calon bebas, jadi partinya adalah parti sendiri dengan dasar sendiri.

Kalau kita letak calon MCA untuk jadi Menteri Besar atau Perdana Menteri, bolehlah Harun tentang. Kita cuma beri balik kerusi kepunyaan MCA. Orang Melayu juga kata kalau sudah beri ambil balik nanti buruk siku.

Orang Melayu dulu berpolitik tak mencaci mencerca pemimpin dan pemerintah seperti yang dilakukan oleh golongan serpihan kini. Kalau mereka dah tak lagi sebulu dengan seseorang pemimpin, mereka akan menyatakannya dengan

cara yang terhormat dan boleh dihormati.

Arwah Tun Dr. Ismail adalah contoh yang baik. Dia marah pada Tunku kerana menyerahkan Singapura. Dia tidak senang dengan kepimpinan Tunku tetapi dia tak tinggalkan UMNO. Dia tak pergi keluar negeri dan memburuk-burukkan kerajaan. Dia tak pergi ke kampung-kampung dan menceritakan akan keburukan kawan-kawannya yang juga dalam kerajaan sepertinya.

Dia tinggalkan kerajaan yang dipimpin oleh Tunku tetapi bila berlaku 13 May 1969 Tun Razak perlukan dia, maka dia kembali semula ke dalam kabinet tanpa meletakkan macam-macam syarat. Inilah contoh pemimpin yang bermoral, yang mempunyai prinsip perjuangan dan ada didikan dan berpegang pada adat dan taat pada agama. Ini baru dinamakan pemimpin Johor.

Pendek kata tegur menegur bukannya dilarang atau ditegah, ia mesti melalui beberapa proses. Di sini teguran itu mestilah berlandaskan Islam dan disebut secara teratur. Seperti yang kita lakukan di dalam sembahyang terhadap Imam, sebab itu sembahyang itu tiang agama. Banyak hikmah yang boleh dipelajari dan didapati dari sembahyang dan Allah berikan 72 pahala bagi mereka yang sembahyang berjemaah di mesjid sedangkan di rumah cuma satu pahala saja. Allah menyuruh kita belajar taat pada pemimpin, tak kira siapa saja Imam kita.

Mereka yang beriman patut belajar dari amalan sembahyang. Apabila imam telah melakukan kesalahan mereka tegur dengan memberi syarat



yang tak merosakkan sembahyang dan kiranya imam tidak mahu mengikutinya, maka mereka faraqahkan imam tanpa meninggalkan saf. Itu cara orang-orang Islam bila tak setuju dengan pemimpin, bukan lari keluar dari mesjid dan kutuk caci imam di luar mesjid.

Saya tidak tahu sama ada saya boleh samakan sebahagian dari golongan serpihan yang telah menamakan diri mereka Semangat 46 sebagai manusia hipokrit atau boneka atau penderhaka. Ini kerana di dalam dunia kita hari ini, terutamanya di negara-negara yang menjadi negara satelit kepada kuasa besar dunia, sudah menjadi lumrah manusia dijadikan boneka dan diperalatkan untuk kepentingan golongan tertentu dengan diberikan sedikit habuan supaya tertidur atau pun mati sebelum sakaratul maut, sebelum Israil memisahkan roh dari jasad.

**“Lalu mereka mabuk  
tertidur khayal  
oleh keseronokan yang disuapkan  
dan tak mungkin sedar buat selamanya  
biar pun dirinya digadai dilelong dijual  
seperti maruah betina lacur.**

Begitulah bahagian dari sebuah sajak tentang mereka yang menjadi alat oleh seorang penyair yang terkenal.

Bagaimana kita hendak menafikan bahawa ramai manusia yang telah memasuki kumpulan serpihan telah terpengaruh oleh putar belit golongan tersebut. Biar pun pada mulanya mereka adalah

orang-orang yang benar-benar beriman, atau benar-benar berpegang kepada dua senjata penting iaitu Al-Kitab dan Sunnah. Namun selagi mereka bernama makhluk sosial, tentulah tidak mudah bagi mereka menghadapi segala tipu muslihat iblis di atas muka bumi ini. Apa lagi kalau motif perjuangan mereka memang sekadar mahu mengaut keuntungan semata-mata. Inilah yang patut menjadi kebimbangan kita hari ini.

Sepatutnya orang-orang serpihan yang asyik bercakap fasal Islam, bercakap pasal perpaduan ummah, tidak menjadi ahli satu pertubuhan politik yang haram yang tidak tentu arah perjuangannya. Kata-kata mereka kononnya mereka mahu memperjuangkan Islam demi mempertahankan kesejahteraan ummah dan tanahair apa buktinya? Apakah sekadar bercakap saja? Kita sudah kenal mereka siapa. Kita tahu mereka adalah orang-orang yang sudah putus asa. Kalau mereka benar-benar jujur, korbankan dulu harta benda yang mereka ambil dari rakyat baru kita mahu percaya.

Buktikan pada kita yang mereka benar-benar berani menyabung nyawa sehingga ketitisian darah terakhir tanpa mengharapkan sesuatu. Buktikanlah dulu bahawa perjuangan mereka adalah satu perjuangan yang jujur dan ikhlas? Perjuangan yang tidak mengharapkan untuk kembali diterima menjadi menteri semula.

Janganlah kata-kata sahaja yang menunjukkan mereka pejuang-pejuang Islam, pejuang-pejuang Nasionalis. Dari segi perbuatan mereka sebenar-

nya terdiri dari orang yang menjualkan ayat-ayat Quran dengan harga yang murah. Perbuatan mereka menunjukkan mereka tidak lebih dari boneka-boneka yang sedang menyalakan api revolusi yang akan menyebabkan tercetusnya huru hara di dalam negara seperti kerja-kerja yang dilakukan oleh komunis.

Api revolusi yang akan berpunca dari permainan mereka dalam arena politik yang sedang rancak dimainkan hari ini akan mengelapkan masa depan kita yang baru nak mula bersinar cerah. Mereka inilah yang hidupnya semata-mata di dorong oleh '*psychological instinct*' atau ketegangan saraf. Perjuangan untuk kepentingan peribadi ini mesti diberi petunjuk yang sebenar. Pengundi di Ampang Jaya saja yang boleh mengajar mereka supaya belajar menjunjung langit di mana buminya sedang mereka pijak.

Hari ini Dr. Mahathir yang menjadi pemimpin umat Melayu. Kenapa Harun dan golongannya memberikan taat setia kepada Tengku Razaleigh Hamzah?

Nampaknya pemimpin PAS pun sudah merestui kerja-kerja karut yang boleh merosakkan akidah ini. Mereka pun sanggup beri sokongan pada manusia yang akan mengekalkan huru hara di negeri yang kita cintai ini.

Memanglah itu kerja PAS. Dia paskan mana-mana yang tak pas, kerana mereka yang ada pas saja yang boleh bercakap pasal agama dan kebolehan mereka untuk mengtaklidkan sesuatu



masalah dan menganggap mereka tak ada tandingannya. Tanyalah sesiapa yang pernah melihat Haji Hadi berucap. Rakaman kasetnya sahaja sudah boleh membuatkan orang tercengang, terpesona, menangis dan ketawa. Inilah keistemewaan yang ada pada keperibadiannya sebagai pemedato semula jadi ini. Untuk apa bakat yang ada pada diri kalau kepentingan parti sendiri saja yang dikejari.

Kalau Hadi cerita pasal Dr. Mahathir itu sedang dihinggap sejenis penyakit, setidak-tidaknya pun, paling minima, orang akan beranggapan bahawa Dr. Mahathir bukan seorang yang Muslimin. Hari ini kalau Ustaz Nakahie berani kata antara Ku Li dan Mahathir sama saja, apakah Hadi tak berani kata Harun Idris dan Musa Hitam sama saja? Petualang dan penderhaka.

Soal politik adalah soal kenegaraan, soal kesejahteraan rakyat dan soal yang bertolak pada kedamaian dan kestabilan negara. Ia bukan soal gedebe, teror atau tidak teror sesuatu kumpulan itu berceramah agama yang telah dicampur adukkan dengan politik. Kalau kita terus biarkan mereka mempermainkan isu-isu politik yang boleh merosakkan bangsa dan negara yang rugi akhirnya kita juga.

Penyakit yang menular ke dalam masyarakat kini adalah berpunca daripada akibat bertuhankan kebendaan, dan mahukan pada kekuasaan. Penyakit tersebut juga tidak syak lagi adalah penyakit yang menular sama ada dari dunia komunis atau pun

dari kapitalis dengan faham atheis dan polytheis (syirik) yang dibawa oleh orang tertentu yang nampaknya telah berjaya mempengaruhi masyarakat.

Masyarakat kita yang sedang sakit ini amat memerlukan kepada kelahiran golongan intelektual yang benar-benar celik, yang jujur dan ikhlas yang ada sifat-sifat taat kepada Allah dan rasul serta pada pemimpin. Sifat taat tidak ada pada Kumpulan Serpihan. Mereka bukan saja tidak taat pada pemimpin negara, pada pemimpin mereka sendiri pun mereka tak taat. Inilah yang patut kita fikirkan. Memang nasib masa depan anak-anak kita kalau dipimpin oleh mereka yang tidak taat akhirnya negara kita dipenuhi oleh rakyat yang degil-degil dan derhaka kerana taat lawannya derhaka.

Siapakah mereka yang sepatutnya mencelikkan manusia yang buta hari ini yang ikut saja ke mana-mana saja pemimpin yang derhaka membawa mereka? Apakah calon bebas seperti Datuk Harun boleh berbuat demikian? Harun hari ini cuma mahu kembali berkuasa seperti di zaman keagungannya dulu. Harun tidak boleh berikan kesedaran kepada umat yang kebutaan kerana dia sendiri pun hidup di dalam kegelapan. Kegelapan yang mencengkam jiwanya akibat bermati-matian mahu merebut semula kuasa yang kononnya akan memberikannya cahaya untuk memimpin ummah. Berikan seekor semut kepak supaya dia boleh terbang sama saja dengan menyuruh dia bunuh diri. Semut yang dapat kepak akan mengejar cahaya

akhirnya dia terbakar oleh kehangatan api.

Pernahkah kita fikirkan kesan-kesan yang lebih buruk lagi yang akan berlaku sekiranya kumpulan serpihan ini menang? Apakah tidak mungkin lahir satu masyarakat yang menyerupai orang atheist ataupun golongan yang hilang perasaan, hilang keadilan, hilang kebebasan untuk menyatakan kebenaran kerana guru dan godfather yang mereka sanjung sudah menyeleweng dari perjuangan. Harun sedang membiarkan anak buahnya bergaduh sesama sendiri kerana mengikutkan kehendak nafsu hatinya sendiri.

Datuk Harun yang sudahpun menerima pencen yang besar dan segala macam kemudahan, yang telah memberikan beliau peluang hidup macam *'The rich and famous'* sepatutnya releks di rumah dan bermain dengan cucu-cucunya. Politik bukan lagi sepatutnya menjadi permainan beliau serahkan saja pada anak-anak buah beliau.

Apakah lagi yang diidam-idamkan oleh beliau? Nak jadi Menteri Besar, dia dah pun merasa duduk di kerusi Menteri Besar. Nak duduk dalam rumah besar, dah pun ada rumah besar tersergam macam istana, ada kolam renang. Nak pakai kereta besar, dah pun ada banyak kereta besar-besar. Nak apa lagi?

Hendak anak buahnya jadi Menteri Besar, Datuk Mohd Taib adalah anak buahnya dan kebanyakan ahli politik yang muda di seluruh negara adalah anak buahnya dulu. Nak apa lagi. Nak jadi Perdana



Menteri, Boleh. Masuk UMNO dulu cuba nasib dengan jalan yang betul dan terhormat. Kalau ada nasib tentulah boleh berjaya. Tapi kalau mengikut pertimbangan logik biasa susahlah sikit.

Dulu masa dia taat pada UMNO, anak dan anak angkatnya Mazlan dan Fahmi menumpang bayangan beliau untuk mendapatkan kedudukan yang tinggi dalam politik. Kedua-duanya pun sudah rasa nikmat politik hasil perjuangan ayahnya. Sesudah masuk kumpulan serpihan, orang Melayu tak marah. Patut sudah seribu Syukur. Sekarang Mazlan dan Fahmi nak masukkan orang tuanya semula ke gelanggang, nanti orang tanya, apakah masih belum cukup lagi dengan ganjaran-ganjaran yang diperolehi Harun sebagai seorang pemimpin UMNO, Mazlan dan Fahmi nak jawab apa? Orang yang tidak Syukur nikmat akan dilaknat oleh Allah.

Taat orang Melayu ini ada batas, jangan melampau sangat?

Kerana Harun hari ini bukan lagi Harun yang kita kenal dulu. Harun hari ini ialah Harun yang sudah membuang adat resam bangsa Melayu jauh-jauh keluar tingkap. Harun sudah lupa diri lupa bangsa. Harun hari ini ialah Harun yang sudah melupai budaya taat, Harun yang cuma mahukan sebuah kerusi di Dewan Parlimen. Apa nak jadi pada bangsa dan negara Harun tak peduli. Harun Idris hari ini akan ditentang oleh umat Melayu. Harun akan kesal seribu tahun lagi kerana tak tahu bersyukur dan berterima kasih.

Apakah Harun tidak mahu belajar dari kesalahan

demi kesalahan yang pernah dilakukannya? Atau apakah kesilapan demi kesilapan masa lalu tidak dapat mengajarnya menjadi orang tua yang baik? Atau apakah masa yang sudah begini lanjut tidak dapat menyedarkan dia bahawa dia sudah terlalu tua untuk berpolitik?

Kalau ini semua tidak dapat mengajar Datuk Harun, mungkin dia boleh belajar dari pokok getah. Lagipun Isaac Newton dulupun belajar mengenai hukum graviti dari pokok. George Washington juga memahami erti kejujuran dari sebatang pokok yang ditebangnya. Belajarlah dari pokok sekiranya Harun sudah tidak percaya pada manusia lagi.

Allahyarham Presiden Sukarno, pernah berkata "*Wanita itu seperti pohon karet kalau sudah tua moleklah ditebang*" Kerana pohon getah tua sudah tidak mengalirkan susu lagi. Saya tidak tahu Sukarno yang mahu jadi Presiden seumur hidup itu terbang dan mati kerana kesalahan politik atau marah wanita-wanita tua yang dianggapnya sebagai pohon karet.

Ramai lelaki yang menebang pohon getah tua untuk dapatkan pohon getah muda hidup sesal sepanjang hidup. Sumpah dari isteri tua, ibu yang sudah tua boleh membawa celaka.

Saya berpendapat ahli politik Malaysia macam pohon getah kawin tak tahan lama. Keuntungannya pun tak seberapa kalau dikira hitung panjang dan mentang-mentanglah getah naik harga. Janganlah getah sekerap nak rasakan diri macam susu getah

grade satu.

Datuk Harun patut memandang ke atas. Tengok-tengoklah daun-daun getah yang kuning. Daun yang dah kuning tak akan kembali jadi pucuk yang hijau. Namun masih belum terlambat untuk Datuk bertaubat kerana sekiranya Datuk pergi dengan baik pemergian Datuk sudah ada gantinya. Datuk ada Mazlan, ada Fahmi dan ada Mufti, ada Onn Ismail dan ramai lagi anak buah yang telah mewarisi keberanian dan ketegasan Datuk. Bak kata pepatah "yang patah akan tumbuh dan yang hilang akan berganti." Kalau tak sedar juga ingatlah.

Buah kelapa yang dah tumbuh pucuk, dah patut benar gugur ke tanah agar dapat tumbuh sebagai pokok yang baru dan segar. Kalau ini juga Datuk Harun tak faham, tak syak lagilah Datuk Harun akhirnya orang akan kata seperti buah jering yang nak dikena jolok ataupun ditebang baru nak jatuh.

Inilah yang susah kalau manusia sudah buang budaya taat. Dulu masa Allahyarham Tun Razak jadi Perdana Menteri, Tun suruh Harun jadi duta. Tun Razak mahu jaga nama baik Harun dan nama baik UMNO. Tapi Harun tak taat pada pucuk pimpinan. Harun engkar arahan Tun Razak. Akibatnya, Harun terpaksa menerima padahnya.

Cukuplah Datuk sudah menyusahkan orang ramai semasa menjadi Ketua Pemuda UMNO dulu. Misal kata Datuk menang kerusi itu sekalipun, masanya dah tak sesuai lagi. Kata orang putih *untimely*.



Datuk sekarang ibarat matahari senja yang dah hampir nak terbenam. Kalau ada sisa-sisa cahaya yang sikit itu pun, semuanya akan ditelan oleh kegelapan malam. Kecuali kalau Datuk ada lampu. Lampu yang saya maksudkan di sini ialah lampu kebenaran. Jangan pulak Datuk ingat lampu Alladin itu lampu kebenaran.

Kalau itupun Datuk tak faham, terpaksa saya gunakan contoh yang lain. Saya faham, dah tua-tua ni, *pick-up* kita dah semakin kurang. Cakap pasal *pick-up* tentulah Datuk boleh bayangkan sebuah kereta yang amat cantik dan mahal tetapi sudah terlampau buruk. Akibatnya tak ada *pick-up*, kereta itu pula sudah terlibat dalam satu kemalangan yang amat dahsyat. Kereta yang macam itu, bagaimana kita baiki dan cat semula sekalipun, ia tak boleh jalan tegak-tegak lagi sebab chassisnya sudah bengkok. Jalannya tetap menyenget-nyenget. Hendak kita scrapkan sahaja kereta itu, ia punyai *sentimental value*. Kalau kita masih sayang kita simpan saja buat kenang-kenangan. Jangan pulak kita bawa ke jalan raya untuk berlumba. Itu membahayakan diri sendiri dan juga orang lain.

Nah. Sekarang takkan Datuk tak faham lagi... tak faham jugak. Tak percaya juga. Percayalah... Gua caya lu... Lu caya gua. Kita kawan lama percayalah.

Saya rasa moleklah Datuk ukur diri Datuk baik-baik sebelum Datuk menampal gambar Datuk sebagai calon sebelum hari penamaan kerana ini sudah menunjukkan sifat *over confident* dan tak

sabar-sabar lagi hendak menang. Orang yang sudah mengukir macam-macam nama dan *title* serta punya kedudukan seperti Datuk ini dah tak patut menanggung di air keroh. Itu bukan kerja seorang pejuang dan pahlawan. Itu kerja Lim Kit Siang dan Karpal Singh dan lain-lain pemimpin DAP yang sudah jadi member Datuk hari ini.

Kata Datuk Harun, sekiranya dia menang dalam pilihanraya kecil Ampang Jaya nanti, dia akan masuk UMNO. Cara dan logika Datuk Harun ini mungkin juga baik untuk dirinya sendiri. Ini macam punya cakap percayalah... Gua tak caya lu.. Lu pun cakap gua banyak takut... Lu sekarang cakap tak serupa bikin punya.

Baru-baru ini Datuk ke Mekah kononnya untuk menunaikan Umrah. Mengerjakan Umrah dan haji memanglah kerja-kerja yang cocok bagi orang-orang yang dah tua macam Datuk. Kata orang bila dah pergi ke Mekah itu, terhapuslah segala dosa-dosa kita. Bila balik ke tanah air, selagi kita tak melakukan dosa-dosa yang baru, kita ini samalah ibarat seorang bayi yang baru lahir. Kalau hendak ke Mekah niat dari rumah ke Subang terus sampai ke Mekah. Kalau singgah ke Taiwan dulu baru ke Mekah ini ibadatnya saya tak berani cakap.

Kerana benda-benda yang berdosa ini ialah benda-benda yang sedap-sedap, yang syok-syok, yang amat sayang hendak ditinggalkan, maka jadi ahli serpihan dulu. Lawan kerajaan kalahkan calon Barisan Nasional kemudian baru nak masuk UMNO samalah seperti orang-orang yang pergi ke Taiwan

ataupun ke Tokyo dulu sebelum pergi ke Mekah atas alasan bila balik nanti dia akan bertaubat. Apakah pendapat orang ramai tentang Haji orang-orang yang macam ini?

Apa akan terjadi kalau orang itu mati di Tokyo atau Taipei ketika sedang bersedap-sedapan sebelum sempat menunaikan Haji? Macamlah sekiranya Tuhan ambil nyawa Datuk hari ini apakah kita akan kenangkan Datuk sebagai pahlawan Melayu yang layak dikebumikan di Makam Pahlawan di Masjid Negara atau kebumikan Datuk sebagai penderhaka? Jangan buat kita semua jadi susah nak memilih tanah kubur untuk Datuk.

Dalam Malaysia ini sudah cukuplah kita ada seorang bapa kucing macam Tunku. Kita tak memerlukan seorang lagi bapa kucing. Jadi buat apa Datuk Harun susah-susah nak jadi macam itu? Hendak membena nama memerlukan pengorbanan dan waktu, nak rosakkan nama sekejap saja. Baru-baru ini seorang anggota Semangat 46 meninggal di Johor. Macam mana nak tulis akhir riwayat hidupnya?

Sepatutnya, jika Datuk Harun betul-betul nak memperjuangkan nasib orang Melayu, dia tak patut jadi calon pilihanraya kecil Ampang Jaya. Orang yang nak dijadikan calon itu mestilah seorang yang lebih muda dan baik dan bukannya kuda-kuda tempang. Biar pun mereka sama-sama berlumba, kita mesti ingat bahawa kuda MCA adalah kuda kerajaan yang akan mewakili para penduduk-penduduk Melayu Ampang Jaya. Samalah seperti seorang



pemandu kereta yang kita akan naiki. Yang penting bukan pemandu. Siapa saja boleh memandu kereta kita asal dia boleh bawa kita ketempat yang kita nak tuju. Namun Datuk Harun telah membuatkan mereka berada dalam keadaan serba salah. Mereka terpaksa memilih Datuk Harun dengan alasan 70 peratus penduduk adalah orang Melayu. Pengundi mesti ada Semangat kemelayuan. Ini satu dakyah politik yang sangat kotor, yang terpaksa digunakannya semata-mata untuk menang tanpa memikirkan risiko dan kesan sampingan sesudah pilihan raya nanti.

Nilai keadilan dan kebenaran yang diperjuangkan bukan sebagaimana yang dapat difahami oleh setiap orang yang waras, tetapi hanya mengikut tafsiran manusia tertentu. Tindakan atau sikap yang sedemikian tidaklah keterlaluan jika dikatakan ibarat memutarakan jarum jam ke belakang atau ibarat memaksa seorang bayi yang baru lahir supaya masuk semula ke dalam rahim ibunya.

Lihat saja bagaimana mereka cuba melumpuhkan kerajaan yang menegakkan tunggak ketuanan Melayu serta memperjuangkan ummah dengan tuduhan diktator, zalim, korup dan bermacam-macam lagi. Tuduhan terhadap Dr. Mahathir ini dilakukan supaya dengan mudah sahaja pemimpin yang dibanggakan oleh umat Melayu hari ini dikuburkan hidup-hidup tanpa dosa dan tanpa kesalahan yang mereka boleh buktikan.

Inilah yang kita namakan '*political cannibalism*' Politik orang makan orang, kawan makan kawan.

Baru-baru ini saya telah melawat ke Papua New Guinea, sebuah negara yang terkenal dengan '*cannibalism*'. Begitupun selama saya berada di sana, saya tidak pun menemui sebarang insiden yang kepala orang dimasak dalam kawah-kawah besar. Sungguhpun penduduk-penduduk pulau itu gemar meminum arak dan berdengung dengan memakan pinang, tapi mereka tidak pula menjadikan manusia sebagai juadah. Sebaliknya bila kembali ke Malaysia, saya dihidangkan dengan segala macam '*political cannibalism*' yang sungguh-sungguh membimbangkan.

Keadaan yang amat mendukacitakan ini adalah kerana manusia sudah buta. Dan memang munasabah jika dikatakan bahawa kebutaan seperti yang berlaku hari ini tidak dapat disembuhkan lagi. Ini mungkin kerana hati manusia sudah terkunci. Atau mungkin juga hati manusia telah dipenuhi dengan segala najis dan kekotoran sehinggakan tidak dapat dibersihkan dan disucikan dengan cara lahiriah. Sesungguhnya manusia sudah terlalu gering. Terlalu tenat. Kebutaannya semakin kritikal dan kronik.

Manusia seperti inilah yang mungkin dimaksudkan sebagai manusia yang lebih rendah tarafnya dari iblis dan haiwan yang tidak mempunyai akal.

Akibat dari kebutaan ini tentu saja boleh menimbulkan berbagai bencana yang tidak diingini. Lainlah halnya dengan kebutaan semula jadi yang diwarisi dari perut ibu. Manusia yang buta sewaktu dilahirkan ke dunia, kebiasaanya merupakan

manusia yang cacat atau pincang pada zahirnya saja. Sungguh pun kecacatan zahir seperti itu berlarutan sehingga ke akhir hayatnya, namun mereka masih dapat menempuh hidup dengan sempurna seolah-olah mereka mampu hidup sebagaimana manusia yang celik atau pun manusia lain yang tidak cacat. Sebaliknya pula, manusia yang celik berjalan meraba-raba tanpa arah dan tujuan yang tertentu. Manusia yang demikian adalah manusia yang cacat rohani atau apa yang dikatakan sebagai manusia yang buta matahatinya.

Penyakit yang demikian pula adalah lebih parah dan teruk jika dibandingkan dengan penyakit buta mata yang diwarisi dari perut ibu. Penyakit buta rohani atau buta matahati menyebabkan manusia hidup sentiasa dalam kegelapan, walaupun berada di tempat yang terang benderang. Mereka peka kepada sinaran cahaya lampu. Mereka tidak dapat merasakan kegemilangan cahaya dari langit. Mereka ini adalah serpihan. Hidup mereka dipengaruhi oleh unsur khayalisme yang amat mendalam serta karut marut. Mereka adalah sekumpulan masyarakat yang sentiasa merasakan seolah-olah duduk di dalam syurga kayangan yang amat indah dan yang tidak ada tolok bandingnya. Suara mereka macam suara orang yang sudah kehilangan akal kerana segala kewarasan fikiran hanyalah sekadar kenang-kenangan semata-mata. Mereka tidak sedar langsung bahawa musuh-musuh, sama ada musuh yang di dalam hutan ataupun musuh dalam kumpulan sendiri sudah mula belot. Inilah yang



dikatakan harapkan pagar, pagar yang makan padi. Sebaliknya jika rebah yang membawa sokong, itu adalah sesuatu yang amat baik.

Politik dan kebudayaan yang tidak mendasari keimanan dan taqwa yang sebenarnya adalah racun yang akan membunuh manusia. Bahayanya sama seperti membina sebuah bangunan yang indah sehingga tampak menakjubkan, tapi bila diteliti lebih dekat begitu memeranjat dan mengerikan kerana bangunan gagah itu sebenarnya sudah rapuh dimakan anai-anai dan hanya menunggu saat keruntuhannya sahaja.

Faktor besar kecelakaan itu tidak lain kerana manusia menolak kebenaran yang berpunca dari sifat bongkak, takbur, sombong, angkuh, degil ataupun bodoh alang yang tak boleh diajar. Sifat-sifat itu menjadikan manusia berkenaan seolah-olah buta, tuli dan bisu seperti boneka.

Manusia takbur dan bongkak dengan ilmunya yang terbatas. Akibatnya sebelum masuk ke Neraka yang abadi mereka sudah merasai sebahagian kecil dari siksaan-siksaannya di dunia ini. Kecelakaan yang sedang menimpa diri mereka tanpa mereka sedari merupakan malapetaka yang paling jelas akibat manusia cuba mempertuhankan dirinya sendiri.

Sama ada mereka sedar atau tidak sikap takbur mereka menyebabkan mereka menolak nilai-nilai hidup yang benar dan yang mutlak dan mereka telah memilih nilai-nilai yang berubah-ubah mengikut masa dan keadaan kerana mereka sen-

tiasa memikirkan keuntungan tanpa menimbang-kan soal moral adalah satu hal yang patut menjadi renungan.

Dengan demikian tidaklah keterlaluan untuk mengatakan bahawa mereka yang mengikuti perjuangan serpihan adalah manusia yang telah membunuh diri mereka sebelum masanya untuk mati kerana roh dan jiwanya sudah tidak berfungsi lagi dalam menempuh hidup yang sepatutnya terikat pada tali Allah mengikut Al-Quran dan Sunnah. Mereka hidup bebas dan kebebasan tanpa berpegang pada tali Allah akan berakhir dengan kesesatan.

Sekiranya kita meneliti hidup orang-orang serpihan kita akan dapati mereka hanya mendapat kepuasan dari tuntutan-tuntutan lahiriah yang tidak tahu erti puas. Lepas dapat satu kerusi hendak satu kerusi lagi. Namun kerusi yang mereka dapat itu tidak ubah seperti seekor semut yang mendapat sayap. Ia akan terbang mencari api yang tinggi akhirnya dia terbakar. Lihatlah Shahrir kunci, lepas dapat satu kerusi hidupnya menjadi bebas tak menentu. Mula-mula dia tak mahu angkat sumpah, lepas itu nak angkat sumpah pulak. Bila dijemput menyertai UMNO, dia tolak bulat-bulat. Lepas itu dia akan terima tawaran itu dengan syarat-syarat.

Inilah contoh orang yang bebas hidupnya gelisah dan tidak tenteram. Mereka berjaya mempengaruhi orang-orang tertentu kerana orang-orang macam itupun adalah kaki-kaki yang berkepentingan dan bukan kerana mereka itu kreatif tapi mereka sudah

tidak tahu apa yang harus mereka buat. Mereka sudah seperti orang yang sesat di hujung jalan, nak balik kepangkal jalan tapi malu disebabkan ego yang terlalu tinggi, maka senang iblis mengoda. Alang-alang berdawat biar hitam, alang-alang menyeluk perkasam biar sampai macam Musa Hitam.

Selama ini belum ada lagi bekas pemimpin kerajaan yang mahu mendedahkan segala pekong mereka melainkan Musa dan serpihan 46 sahaja. Seandainya mereka berkuasa mereka tidak lagi boleh berbuat demikian sudah tentu mereka tidak mahu menelanjangkan diri supaya dilihat rakyat akan peribadi-peribadi mereka yang amat mengaibkan. Bukan itu sahaja, malah kita turut merasakan seolah-olah kita kini berdepan dengan makhluk serpihan yang hanya pandai menggunakan kuku atau taring untuk mengisikan keperluan hidup mereka semata-mata.

Akhirnya mereka menyalahkan semua orang kerana mereka rasa mereka pernah menjadi tuhan kecil atau nabi-nabi yang ada ummahnya sendiri. Mereka terlupa bahawa Muhammad SAW adalah nabi dan rasul terakhir. Mereka tidak lebih dari seorang yang menunjukkan jalan saja. Datuk Harun pula yang sudah hilang sifat taatnya pada pemerintah sanggup berkerja sama dengan musuh-musuh politik yang telah menghina dan mencerca umat Melayu semasa peristiwa berdarah 13 May 1969 dulu, kini berasa bimbang setelah golongannya mendedahkan ketololan dan kerakusan mereka sendiri. Untuk kerusi punya pasal, pulus punya



pasal bangsa dan negara biar jadi habuan, dia tak takut kiranya pengikut dia nanti tidak taat padanya nanti. Bila budaya taat sudah luput, kita mungkin diseret ke kancah **'atheism'** dan **'polytheism'**.

Sebenarnya dalam masyarakat "atheist" atau "polyteist" di zaman moden ini kita dapat melihat manusia mengulangi kembali unsur-unsur kehidupan zaman jahiliah yang terkenal dalam sejarah sebelum Tuhan menurunkan agama Islam. Manusia tidak ada sifat-sifat taat pada Allah pada Rasul dan pemimpin.

Pemimpin hari ini sudah dijadikan musuh dan dianggap bukan lagi sebagai makhluk yang perlu dihormati dan ditaati. Inilah diantara punca-punca besar perpecahan umat Melayu di sini dan lain-lain negara di dunia. Iblis terus menerus menggoda dan menghasut umat manusia supaya mempunyai ego, degil dan keras hati. Walaupun tidak mungkin bagi mereka mempunyai sifat taat seperti iblis, namun mereka mesti taat pada iblis untuk mendapat sesuatu dari iblis sekiranya tidak, iblis akan binasakan hidup mereka, anak isteri dan keluarga mereka.

Orang-orang Melayu yang sudah mulai lupakan tradisi taat, kini mereka semakin lemah dan tiada berjiwa. Akhirnya mereka akan hampa dan hilang pedoman. Justeru itu mereka pun ikut sama jadi boneka yang akan hancur terkena serpihan.

Diantara syaitan dengan laut biru yang dalam, ada yang memilih syaitan dan ada yang terus terjun ke dalam laut. Kedua-dua pilihan ini sama sahaja

kerana dalam laut biru yang dalam pun ada banyak syaitan-syaitan yang sedang menunggu. Jadi gunakan akal, budi dan adat.

Ini Datuk kenalah fikir baik-baik. Kalau Datuk Harun pernah tengok siri komidi Pi Mai Pi Mai Tang Tu yang diarah oleh pengarah terkemuka Osman Hafsham tentu Datuk ingat kata-kata **“Gua caya lu... Lu caya Gua?.... Amenda lu ni....? Percayalah..... Percaya pada Tuhan.”**



"Saya angkat dua tangan, kami tidak mahu berperang dengan Datuk Harun, kami cuma tentang iblis dan syaitan yang menyuruh mereka yang tidak taat. Kalau Datuk Harun taat pada pemimpin, saya rela berikan kerusi saya ini apabila saya bersara nanti. Datuk Muhamad Taib, adalah pemimpin kita di Selangor. Datuk Harun bukan ahli UMNO, semangat 46 satu pertubuhan yang haram. Harun sudah jadi penentang umat Melayu". Begitulah kata-kata Ghabar Baba di hari penamaan calon.





“Yang patah sudah tumbuh, yang hilang sudah berganti. Ini di sebelah saya Datuk Mohd Taib pemimpin Melayu Selangor yang baru, buat apa lagi dengan Datuk Harun. Orang tua itu sudah macam kayu yang sudah makan anai-anai. Suruhlah orang tua macam Harun itu tunjukkan contoh yang taat macam saya ini”, kata Ghabar Baba. Barulah orang Melayu bersatu.

sebuah buku kecil seperti mana yang pernah dihasilkan oleh beberapa orang penulis tempatan. Marwilis Haji Yusof di dalam buku **Harun di Mahkamah**, Mokhtar Shuib dan Ainol Jamal di dalam karya mereka banyak membela Datuk Harun dari sudut tertentu. Waktu itu Datuk Harun dianggap mangsa kepada satu kumpulan yang menginginkan kuasa dan mahu menukar **sistem pemerintahan demokrasi** kepada **sistem Russia** ataupun **China**. Selaku mangsa politik Datuk Harun mendapat pembelaan dari segenap segi. Akhbar **Watan** kepunyaan Tan Sri Khir Johari menjadi "**suara**" bagi membela Datuk Harun hinggalah umum melabelkan Watan waktu itu sebagai akhbar Datuk Harun.

Kepada saya sejarah tetap sejarah, suatu yang tidak boleh diputar-belitkan. Waktu itu Datuk Harun merupakan tokoh yang tidak mudah dilentur kerana prinsip perjuangan. Jawatan dan pangkat sanggup digadaikan semata-mata menginginkan bangsa Melayu diberikan pembelaan.

Saya menyokong Datuk Harun waktu itu kerana merasakan perjuangan beliau satu perjuangan yang murni, bukannya perjuangan memperkayakan diri dan keluarga. Tetapi masa tidak mengizinkan Datuk Harun untuk kekal di dalam sangkar prinsip, liku-liku yang beliau lalui kemudiannya menampakkan beliau tidak tahan dicabar.

Orang-orangnya yang sewaktu Datuk Harun "**berperang dengan mahkamah dan komunis**" begitu tegas dan teguh pendirian mulai kelabu mata



kerana diburu oleh kuasa dan kekayaan. Diwaktu Datuk Harun menjalani hukuman, saya dapati orang-orangnya merencanakan strategi untuk membolehkan mereka bertapak di dalam arena politik. Tambah pula pada masa itu UMNO sedang bergolak akibat dari rebutan jawatan Timbalan Presiden UMNO. Musa dan Ku Li sedang bersiap-siap untuk merebut jawatan berkenaan. Di saat-saat terakhir orang-orang Datuk Harun telah membuat kenyataan menyokong Datuk Musa. Kononnya Datuk Harun telah memberi lampu hijau kepada para penyokongnya agar memberikan sokongan kepada Musa. Datuk Harun yang bertanding Naib Presiden menang walaupun tanpa perlu berkempen. Waktu itu Datuk Harun masih lagi menjalani hukuman. Seperti yang diduga orang-orang Datuk Harun diberi peluang bertanding di dalam pilihanraya umum 1982. Ini termasuk Mazlan, Fahmi, Marwilis, Saidin Thamby dan ramai lagi.

Era Datuk Harun yang dianggap akan berakhir berikutan hukuman yang dijatuhkan keatasnya rupa-rupanya baru bermula.

Orang-orang Ku Li merasa jijik kerana Selangor tidak menyokong Ku Li sedangkan diawalnya orang-orang Datuk Harun ada membuat janji untuk menyebelahi Ku Li.

Kerana sokongan padu orang-orang Datuk Harun serta endorsement yang Datuk Seri Dr. Mahathir buat disaat-saat akhir maka Tengku Razaleigh yang diawal perlumbaan mendahului



Musa menemui kegagalan. Kegagalan Ku Li begitu pahit untuk ditelan kerana selaku anak emas Tun Razak dan orang yang selalu disebut sebagai bakal Perdana Menteri, Ku Li merasakan dia akan menang dengan mudah sekali. Nyata sekali Ku Li tertipu dengan bayang-bayang seperti di dalam cerita **anjing dan bayang-bayang**.

Seandainya Ku Li mendengar nasihat saya pada tahun 1984 saya percaya bintang politiknya tidak seperti sekarang. Barangkali bukan Ghafar yang duduk ditempat kedua selepas Datuk Seri Dr. Mahathir, tempat itu mungkin di isi oleh Ku Li.

Inilah susahnya Ku Li, enggan mendengar nasihat. Beliau bermain politik Istana yang tidak boleh ditegur sebaliknya hanya mendengar nasihat dari kadam-kadam yang mempunyai kepentingan peribadi.

Kini di tahun 1989 Datuk Harun dan orang-orangnya menyebelahi Ku Li pula. Apakah sejarah 1981 akan berulang?

Analisa boleh dibuat bahawa Musa dan orang-orangnya sudahpun menguasai politik negeri Johor. Pengaruh Othman Saat semakin lemah berikutan usaha orang-orang Musa menyatukan semula pihak yang bertelagah demi perpaduan bangsa. Tak hairan jika Musa dan orang-orangnya akan kembali kepangkuan UMNO.

Seandainya Musa kembali ke pangkuan Datuk Seri Dr. Mahathir tidak mungkinkah Datuk Harun dan orang-orangnya mengikut rentak Musa?

Kerana di dalam percaturan politik, serba serbi boleh berlaku. Datuk Harun yang hari ini berkampung dengan Ku Li boleh berpisah kerana mempunyai matlamat tersendiri. Politik menghalalkan cara seperti yang diajar oleh **Machiavelli** bukan satu yang mustahil untuk diikuti.

Sekiranya Harun dan orang-orangnya meninggalkan Ku Li sekali lagi bererti Ku Li sudah dua kali terpedaya.

Sama seperti dipatuk ular yang sama di dalam lubang yang sama. Masakan Ku Li tidak menyedari keadaan ini atau pun Ku Li diberikan senarai yang lebih baik oleh para kadamnya kerana mereka tidak dapat membaca gerak-geri orang-orang Datuk Harun?

Saya berani menulis bab ini dengan penuh rasa tanggungjawab kerana saya amat mengenalinya.

Untuk pengetahuan para pembaca izinkan saya kisahkan seringkas yang boleh perkenalan pertama saya dan Datuk Harun.

Pertemuan tidak disengajakan itu berlaku sewaktu saya menghadiri satu santapan Diraja di bandar Pekan, Pahang Darul Makmur yang diberikan oleh Almarhum Sultan Abu Bakar dihari keputraan baginda beberapa belas tahun yang lampau.

Datuk Harun baru saja menjadi Menteri Besar setelah memenangi pilihanraya dengan mengalahkan Aziz Ishak. Nama Datuk Harun begitu cemerlang kerana kejayaannya mengalahkan Aziz Ishak dengan bantuan dan sokongan Tunku Abdul

Rahman telah menjadi buah mulut. Ia dianggap **giant killer** kerana bukanlah mudah untuk seorang ahli politik muda mengalahkan Aziz.

Kami duduk semeja bersama Almarhum Sultan Abu Bakar. Saya banyak bertanyakan soalan dan kemudian mendengar dengan penuh perhatian. Maklumlah sebagai orang politik kepetehannya menjawab soalan begitu mengkagumkan. Saya dapat melihat visi politiknya, semangat dan daya perjuangannya yang tinggi. Datuk Harun yang saya kenali waktu itu seorang yang berkelibar, berhemah tinggi dan amat berdisiplin. Seorang ahli politik yang mempunyai karasmetik.

Sejak perkenalan pertama saya tidak segan silu untuk memberikan sokongan terutama setiap kali saya memperkatakan tentang Datuk Harun di dalam buku-buku saya. Di waktu ahli-ahli UMNO di dalam kumpulan Ku Li dan Musa menolaknya, saya mempertahankan idealisme dan cita-cita Datuk Harun.

Tetapi hari ini Datuk Harun menggadaikan prinsip luhur lama itu, sebaliknya sanggup bersekongkol dengan puak yang menentang UMNO semata-mata kerana mahukan Datuk Seri Dr. Mahathir melepaskan jawatan Perdana Menteri.

Atas kesedaran inilah saya yang selama ini menyokong Datuk Harun mengambil keputusan yang pahit dan melalui kolum saya di dalam akhbar Mingguan Kota bertarikh 1 Jan. Saya telah menganalisa kemasukkan Datuk Harun dalam pilihanraya kecil Ampang Jaya. Artikel itu saya per-



turunkan semula di dalam buku ini seperti berikut:

Ramai orang-orang tua dan muda dalam UMNO yang benci, iri hati dan dengki padanya pada ketika itu telah menggunakan pengumuman yang dibuatnya itu untuk mempersenda dan menikam untuk menghapus karier politiknya. Biar apa pun yang dikatakan mereka tetap tidak percaya dan menaruh perasaan curiga terhadapnya. Suara kebencian mereka terpampang didada-dada akhbar.

Hari ini bila Datuk Harun dapat digunakan untuk kepentingan politik mereka yang menamakan diri mereka Semangat 46, ramai dari mereka mula memuja dan memuji Datuk Harun. Tanpa segan silu, mereka menyebut-yebut jasa-jasa dan perjuangannya. Pada halnya dulu, merekalah orang yang mencaci dan memperkecil serta mempersendakan kewibawaan Harun Idris.

Apakah Orang Ku Li dan Musa yang tidak mahu Harun memenangi jawatan Timbalan Presiden dulu tidak takut sekiranya Harun Idris menang nanti Rais Yatim nak dibuang kemana? Datuk Harun lebih layak dari Rais untuk jadi Timbalan Presiden Semangat 46.

Sesudah nanti akan berdiri sama tinggi dan duduk sama rendah dengan Musa, Ku Li dan Rais Yatim dan dari segi senioriti Datuk Harun adalah paling senior. Malahan beliau lebih layak dijadikan Ketua Semangat 46.

Datuk Harun masa nak bertanding dulu tidak cakap Ku Li mesti menjadi Timbalan Perdana Menteri. Kalau Datuk Musa nak menjadi Timbalan

Perdana Menteri dia pun tidak sekat. Siapa nak menjadi Timbalan Perdana Menteri, jadilah. Harun cuma nak jadi Timbalan Presiden UMNO sahaja. Harun nak jaga UMNO. Harun nak selamatkan UMNO jangan sampai berpecah belah. Apakah isu yang sama nak dibawa sekarang?

Harun meminta restu dari pada Dr. Mahathir sebelum bertanding, namun dia tidak minta supaya digalakan dan dia harap Mahathir tidak akan menyekatnya. Mahathir diam saja. *No comment dari Dr. Mahathir*. Kalau ikut cara pengantin perempuan diam itu bermakna persetujuan. *Silence betokens consent*. Yang marah-marah sangat adalah orang Musa dan Ku Li kerana mereka mahukan kerusi yang kononnya boleh menjadikan mereka berdua Perdana Menteri nanti. Akhirnya ketigatiga terkeluar dari parti.

**“Sekiranya saya menang, bermakna ahli-ahli parti menerima penyelesaian yang saya bawa, dan ketika itu dapatlah saya menjalankan usaha-usaha menyatupadukan semula parti.”** Itulah kemahuan dan niat Datuk Harun yang membuatkan saya berjuang dengan sepenuh hati untuk meletakkan beliau ke kerusi Timbalan Presiden. Datuk Harun mahu membawa penyelesaian supaya UMNO tidak berpecah. Saya tentang Musa yang ketika itu menjadi Menteri Dalam Negeri dan pujuk Ku Li supaya bertanding Naib Presiden saja.

Kami sudah nampak perebutan kerusi antara Ku Li dan Musa akan memecah belahkan UMNO dan

memporak perandakan orang Melayu. Dan akhirnya orang Melayu berpecah dan mula bertarung sesama sendiri seperti hari ini. Rupa-rupanya Datuk Harun yang saya sanjung tinggi turut memporak perandakan bangsanya sendiri semata-mata kerana mahukan kerusi.

Saya tidak menyesal atas sokongan yang telah saya berikan pada bekas Menteri Besar juga bekas Ketua Pemuda yang satu masa dulu kerana saya anggap beliau sebagai pejuang **Semangat Kebangsaan Melayu**. Saya tentang mereka yang tidak mahu ikut jalan penyelesaian yang dikemukakan oleh Harun. Inilah yang dikatakan **harapkan pagar rupa-rupanya pagar juga yang merosakkan tanaman**.

Hari ini saya dengar ada orang Harun yang kononnya menyesal kerana Harun telah membawa Dr. Mahathir masuk kembali kedalam UMNO setelah dipecat oleh Tunku dan ada juga orang Dr. Mahathir yang menyesal kerana Dr. Mahathir telah mengusahakan supaya Harun diampunkan, dan Harun pun mendapat pengampunan. Dalam perjuangan yang ikhlas tidak ada penyesalan.

Tetapi saya akan menyesal sekiranya saya akan memberikan kemenangan kepada Harun untuk mendapatkan kerusi Parlimen di Ampang Jaya. Ini kerana Datuk Harun yang saya sokong dulu lain, dengan Harun Idris hari ini yang cuma mahukan kerusi dalam kerajaan, tanpa memikirkan umat Melayu yang terpaksa berpecah belah kerana politik peribadi.



Saya sedar Dr. Mahathir ketika itu cuma ada tangan kiri saja iaitu Musa yang kita tidak boleh harapkan sangat. Mahathir perlukan Datuk Harun untuk menjadi tangan kanannya. Pada pendapat kami iaitu beberapa orang yang setia bersama-sama Harun, orang-orang muda pegang jawatan kerajaan, orang tua pegang parti. Kalau semua jawatan kerajaan hendak dipegang oleh orang muda, orang tua hendak buang ke mana? Inilah akibat dari perbuatan membuang terlalu ramai orang tua dari kerajaan dalam keadaan yang terburu-buru untuk memberi tempat kepada pemimpin muda UMNO yang tidak memahani erti perjuangan yang sebenarnya. Tetapi sayangnya hari ini orang tua nampaknya lebih dahsyat dari orang muda.

Sayangnya orang-orang muda dalam UMNO ketika itu tak peduli tentang formula penyelesaian yang dibawa oleh Datuk Harun. Mereka hanya mahu geng mereka saja yang menang. Sebab itu geng Mahathir sokong Musa sahaja dan geng Ku Li sokong Ku Li sahaja. Datuk Harun akhirnya cuma dapat 34 undi. Kemana perginya mereka yang kini kononnya pernah menjadi pengikut dan orang kuat Datuk Harun yang berada diseluruh negara? Pengalaman pahit telah mengajar saya bahawa mereka ini hanya memikirkan kepentingan diri masing-masing saja.

Tengok apa jadi pada mereka juga yang telah memberikan kemenangan kepada Shahrir "kunci" di Johor. Sekiranya Masood yang menang tentu bebas tidak sebebaskan dan semerdeka ini menghentam

dan mencaci serta mencari apa saja kesalahan kerajaan. Nasib baik Hamdan 'ikan piranha' kalah di Parit Raja. Maka orang Melayu masih terus berpadu walaupun ada perselisihan pendapat.

**“Soal perpaduan adalah penting. Ini soal hidup mati bangsa Melayu. Dan UMNO adalah parti terbesar bangsa Melayu. Perpaduannya mesti kukuh. Saya menyokong Datuk Harun kerana semangat kebangsaan dan perjuangan politiknya. Inilah yang tidak difahami oleh anak-anak muda dalam UMNO. Berapa ramai pemimpin muda hari ini yang luas pemikirannya dan berpendapat bahawa keutuhan dan kekuatan sesebuah parti adalah bergantung kepada perpaduan ahli-ahlinya? Sekiranya ahli-ahlinya tidak bersatupadu, kekuatan politik Melayu tidak akan mantap. Politik Melayu mesti diperkuatkan lagi untuk digunakan sebagai senjata bagi membangunkan ekonomi orang Melayu. Tanpa perpaduan, kekuatan politik tidak akan lahir. Perpaduan tidak akan tercapai tanpa tolak ansur dan pengorbanan”.** Kata-kata diatas saya ambil dari buku saya **PERDANA MENTERI YANG KELIMA (1984)** muka surat 152.

Apabila kita baca akhbar-akhbar tabloid yang menyokong perjuangan Semangat 46 dan kita bandingkan kembali dengan kenyataan akhbar-akhbar pada tahun 1984, kita akan tertawa sendirian, kerana orang UMNO yang sama, bila mereka keluar dari UMNO dan dijadikan diri mereka Semangat 46,

mereka tukar nada dan suara. Mereka tukar muka. Semua komen-komen yang negatif mengenai peribadi Datuk Harun dulu sudah jadi komen yang positif dan semua komen mengenai kerajaan menjadi negatif. Apakah ini yang dikatakan perjuangan untuk bangsa agama dan negara yang dilaungkan oleh mereka?

Mari kita imbas kembali apa kata seorang bekas wakil rakyat dari Selangor yang menjadi penyokong kuat Mahathir – Musa ketika itu. Katanya **“alasan yang diberikan oleh Datuk Harun itu hanya andaian.”**

Orang yang cakap ini adalah orang yang pernah berjuang bersama-sama dengan Datuk Harun selama enam tahun. Katanya pada akhbar **“Kenapa baru sekarang Datuk Harun nak buat perkara ini? Kenapa dulu tidak buat?”**

Orang begini mungkin tidak memahami peranan yang dimainkan berbeza mengikut tempat, waktu dan orangnya. Seperti kata peribahasa Inggeris *“The right time, the right place and the right people”*. Ketika itu kiranya orang UMNO tidak mementingkan diri, jika mereka sanggup berkorban, mungkin suasana tidak serupa seperti hari ini. Tapi pada hari ini segala-galanya sudah jadi *“the wrong time, the wrong place and the wrong people.”*

Katakanlah Datuk Harun jadi Timbalan Presiden, Musa tetap sebagai Timbalan Perdana Menteri dan Ku Li duduk dikerusi Naib Presiden UMNO. Mungkin pada tahun 1987 UMNO tak pecah dua, satu jadi team A dan satu lagi jadi team



B. Mungkin juga UMNO tidak diheret ke mahkamah oleh geng 11 dan UMNO tidak akan mati dan saya tak perlu bacakan Talkin untuk UMNO. Bukankah politik adalah perkara yang serba mungkin?

Saya percaya mereka yang simpan keratan-keratan akhbar mengenai Datuk Harun, dan tahun rahsia peristiwa Bukit Frezer dan mereka yang telah menjadikan Datuk Harun mangsa, tentu rasa serba salah nak kempen bantu Datuk Harun hari ini. Tetapi nak buat macam mana? Ada orang politik yang banyak muka, maka untunglah mereka kerana dapat bermuka-muka, kerana mereka yang kononnya mahu menjaga air muka yang sudah masam dan beracun macam cuka akhirnya mereka akan kecewa dan berduka.

Ramai yang belum lupa bahawa orang-orang Musa juga Ku Li dan orang Datuk Harun yang telah memasuki salah satu dari kem Ku Li, Musa ketika itu menjadi musuh politik Harun kerana Datuk Harun adalah hero Melayu, **Godfather** politik UMNO.

Tetapi sekarang bila tersepit dan tak ada calon yang lebih popular yang boleh jadi isu perkauman mereka sorongkan bantal pada Harun, orang yang sedang mengantuk. Maka bermimpilah Datuk Harun dengan segala macam mimpi-mimpi yang maha indah. Mereka tahu, sekiranya Harun menang, maka bertambah huru haralah keadaan dalam negara. Maka mereka dapat terus bermaharajalela.

Harun yang diberi gelaran 'Harimau tempang' oleh orang kuatnya dulu menang di Ampang, tiba-tiba beliau masuk UMNO, apakah Semangat 46 akan merestuinnya. Siapa tahu Dr. Mahathir akan mengambil beliau sebagai Timbalan Perdana Menteri? Kerana peluang telah diberi pada Musa dan Ku Li tapi kedua-duanya menolak dengan cara angkuh dan takbur. Harun terpaksa masuk dalam kabinet untuk '*political survival*' kerana beliau tahu mereka dalam Semangat 46 berjuang semata-mata untuk '*political survival*' saja.

Perkara-perkara yang sedang dibincangkan ini pernah saya timbulkan dalam buku **PERDANA MENTERI YANG KELIMA** dan **CHALLENGER, SIAPA LAWAN SIAPA**.

Tetapi nampaknya tak siapa peduli sindirian dan ingatan saya itu. Akhirnya buku yang saya tulis menjadi sejarah. Saya sedar rupa-rupanya dalam politik tak ada perkataan '**budi**'. Yang penting menjaga periuk nasi dan peribadi sendiri. Kerana mereka ini mengamalkan politik Machievalli dan orang Melayu telah dipengaruhi oleh budaya yang di indoktrinasikan oleh Musa Hitam semasa beliau berkuasa dulu. Ramai anak muda hari ini mahu jadi Jebat Derhaka. Orang ramai akan memuja manusia Derhaka seperti orang Johor mahukan Shahrir dan Musa. Walaupun perbuatan itu akan membawa padah pada bangsa dan raja-raja mereka tetapi kerana politik kocek, politik jangka pendek mereka ketepikan kepentingan bangsa dan negara.

Mereka yang menentang Datuk Harun dulu

bukan kerana mereka marah dan benci pada Datuk Harun. Tapi kerana, kalau tidak menentang susah nak cari duit untuk membayar segala macam hutang, hutang kereta, hutang bank, entah macam-macam hutang lagi. Suka tak suka bunuh saja karier politik Datuk Harun sampai mati. Kalau tidak mereka fikir mereka akan mati kerana banyak sangat janji-janji dan hutang yang mesti dibayar. Kasihan! Mereka sudah hilang kepercayaan kepada Allah, kepada diri sendiri. Akibat mabuk pangkat, mabuk harta dan mabuk kuasa takut dengan bayang-bayang sendiri.

Mari kita bertanya mereka yang menyokong Datuk Harun hari ini. Apakah mereka ikhlas? Apakah mereka fikir Harun layak jadi Ahli Parlimen? Semangat 46 berjuang mati-matian hari ini, kenapa kalau bukan mahu kembali kepada kerusi yang telah hilang. Kalau tidak masakan sanggup berkerjasama dengan PAS dan DAP.

Datuk Harun hilang kerusi Menteri Besar dimasukkan ke penjara. Kerja siapa ini cuba tanya geng-geng yang sokong dia bertanding di Ampang Jaya sekarang? Tanya Hussein Onn apa nak jadi kalau Ku Li tak mahu berdamai? Bagaimana kalau Majlis Kerja Tertinggi tak setuju resolusi yang membawa usul yang beliau kemukakan? Apakah beliau akan kembali menyokong Semangat 46? Macam mana beliau sokong team B dulu? Bukankah kerana sokongan Tun Hussein dulu Semangat 46 ini jadi bersemangat?

Pada pendapat saya sebelum Tun Hussein me-



mujuk Ku Li dan mahu menyatu padukan orang Melayu melalui UMNO, Tun Hussein sendiri mesti mendaftarkan diri menjadi ahli UMNO. Itu baru sifat seorang negarawan dan pemimpin yang boleh kita agungkan. Tunjukkanlah **Kepimpinan Melalui Teladan**. Jangan suruh orang lain *buang yang keruh ambil yang jernih* kerana *kalau guru kencing berdiri anak murid nanti kencing dari bangunan yang tinggi*.

Tun Hussein pernah jadi Ketua Pemuda UMNO yang pertama kemudian keluar ikut ayahandanya. Lepas itu masuk balik ikut kekandanya Tun Razak. Sekarang Tun Hussein keluar, kalau betul sayangkan UMNO dan Tun Hussein masih mempunyai berpengaruh, pastikan kemenangan Barisan Nasional di Ampang Jaya. Kalau tidak anggapan saya antara Tun Hussein dan Datuk Harun sama-sama sudah jadi seperti Harimau tempang.

Saya teringat masa perebutan kerusi dulu ada seorang Ketua Pergerakan Pemuda UMNO bahagian Renggam Johor, Toshrin Jarvanti mengatakan keputusan Datuk Harun untuk bertanding melawan Datuk Musa tidak logik. Memanglah perlawanan itu tidak logik kerana Musa anak murid Harun. Tahun 1971 dulu semasa Datuk Harun menjadi Ketua Pemuda, Musa jadi Timbalannya. Ramai yang berkata ketika itu jikalau Datuk Harun jadi Perdana Menteri, Musa yang akan menjadi Timbalan Perdana Menteri. Pada tahun 1981 Musa jadi Timbalan Presiden, Harun jadi naib, pada hal Harun ketika itu masih lagi menjalani

hukumannya.

1984 – mereka sama-sama rebut kerusi Timbalan Presiden. 1987 – mereka bergabung menentang Presiden. 1988 – mereka bebaskan diri mereka tentang UMNO habis-habisan. Sendiwara apa namanya ini? Wajarkah mereka mendapat gelaran Nasionalis Melayu?

Sekarang Musa akan sokong Harun kerana ingin buktikan bahawa Dr. Mahathir tidak popular. Kononnya Mahathir adalah seorang diktator. Musa lupa Mahathir pertahankannya ketika Harun dan Ku Li menentangnya habis-habisan dan akhirnya Musa ajak Ku Li dan Harun tentang Dr. Mahathir.

Nampaknya semakin banyak manusia menggunakan akal fikirannya untuk mencari kekayaan, mengejar pangkat dan merebut kuasa untuk kehidupan didunia semata-mata. Tanpa memikir dan mengamalkan ibadat kepada Allah semakin tipislah Iman mereka, maka semakin kuat nafsu kebuasan mereka, maka semakin merbahaya hidup para pengikut mereka dan rakyat jelata.

Semakin ramai pemimpin begini dalam negara kita, semakin buruklah suasana politik. Dan ini adalah satu petanda negara sedang berada dalam jurang bahaya. Dan rakyat sajalah yang dapat mengubah nasib mereka dan rakyat juga yang dapat menghapuskan pemimpin yang hanya gila kepada kebendaan dan kuasa yang akan jadi seperti Firaun, seperti Qarun. Mereka sudah punya begitu banyak harta, yang dikumpulkan semasa berkuasa dulu, namun mereka tidak juga puas-puas, masih mahu

terus berkuasa mahu terus dipuji dan dipuja oleh rakyat.

Sejarah telah banyak mengajar kita tentang kejatuhan satu-satu bangsa dan akhirnya bangsa itu luput dan hilang dari muka bumi. Kalau pun ada tak siapa yang hendak ambil tahu lagi.

PAS dulu berpisah dari Barisan Nasional menampakkan ketegasan Hussein Onn. Itu kata orang. Hari ini PAS sudah berbaik dengan Ku Li dan DAP. Salahkah Hussein Onn ketika itu bersikap tegas dalam membuat keputusan memecat PAS dari Barisan Nasional? Kata Hussein onn dia tidak main politik.

Datuk Harun dipenjarakan dulu kerana Tun Hussein mahu menangkap ikan besar. Nampaknya satu sahaja ikan besar yang jadi makanannya. Sekarang Tun Hussein membawa message perpaduan pada orang yang sedang memadu kasih, mabuk asmara tiga penjuru. Apakah mereka akan dengar pujuk rayu Tun Hussein?

Seorang bekas pegawai tentera mesti berperang untuk menyelamatkan bangsanya. Siapakah musuh Hussein Onn yang sebenarnya?

Sepatutnya dalam keadaan darurat begini Tun Hussein perlu bertanya, apakah kepentingan UMNO, atau kepentingan umat Melayu atau nasib segolongan pemimpin Melayu Johor yang mesti beliau perjuangkan? Beliau bekas seorang *Nasional Figure* masakan boleh turun ketaraf pemimpin peringkat negeri saja kerana semata-mata untuk menyelamatkan dan menjaga maruah dan air muka



politik Johor?

Apa boleh buat kalau Musa dan lain-lain pemimpin UMNO Johor terpaksa dijadikan korban, memang pun dalam politik mesti ada orang yang terpaksa menjadi kambing korbannya. Kalau iapun mereka ini telah pun membuktikan keangkuhan dan ego mereka, apakah orang-orang Melayu sayangkan dua tiga orang pemimpin atau nasib bangsa dan negara mereka?

Kalau penduduk Ampang sayangkan Harun, saya percaya mereka akan pilih calon Barisan Nasional kerana UMNO yang menjadi tunggak kepada Barisan Nasional, sedangkan Harun cuma mewakili bebas yang akan melakukan kebebasan dalam kemungkaran politik seperti yang dilakukan oleh Shahrir (Kunci) dalam cerita Sang Rajuna Tapa tulisan saya di Mingguan Kota tempuh hari.

Ini yang kita tak tahu. Tapi yang kita tahu ialah Datuk Harun dah macam jadi orang tua dalam satu cerita dongeng. Dalam cerita itu; arakian terdapatlah seorang pengembara tua dan anaknya yang mengembara dengan seekor keldai. Bila mereka tiba disebuah pekan, maka berdekah-dekahlah penduduk-penduduk pekan itu mentertawakan mereka. Hatta ditanyakan mengapakah orang-orang disitu mentertawakannya. Maka berkatalah salah seorang dari mereka, *"Mengapakah tuan hamba begitu bodoh. Tuan hamba membiarkan anak tuan hamba berjalan kaki sedangkan keldai tuan hamba tidak memikul apa-apa pun."*

Lalu orang tua itu pun menyuruh anaknya

menunggang keldai tersebut dan meneruskan perjalanan. Kemudian apabila tiba disebuah pekan yang lain, orang-orang disitu pun menggeleng-gelengkan kepalanya dan berkata. "*Tengoklah budak itu. Dia membiarkan bapanya yang sudah tua berjalan kaki sedangkan dia bersenang-lenang menunggang keldai. Kasihan!*"

Orang tua itu terdengar akan kata-kata mereka lalu beliau pun menyuruh anaknya berjalan kaki sedang dia sendiri pula yang menunggang keldai tersebut. Mereka meneruskan perjalanan.

Setibanya disebuah pekan yang lain beberapa khafilah menegur orang tua itu. "*Tuan hamba ini sesungguhnya seorang yang zalim. Mengapa tuan hamba bersenang-lenang menunggang keldai itu sedangkan anak tua hamba yang masih kecil itu tuan hamba suruh berjalan kaki?*"

Mendengar saranan itu, orang tua itu pun mengajak anaknya menunggang keldai bersamasamanya dan meneruskan perjalanan.

Tapi tatkala mereka tiba disebuah perkampungan, penduduk-penduduk disitu menggelengkan kepala. "*Tengoklah manusia yang zalim terhadap binatang. Bukankah binatang itu makhluk Tuhan. Adakah, munasabah mereka berdua menunggang seekor keldai yang sudah tua lagi uzur.*"

Kali ini orang tua itu dan anaknya turun dari keldai tersebut lalu memikul binatang itu sebelum meneruskan perjalanan. Bila tiba disebatang jambatan, keldai itupun meronta-ronta. Akhirnya, ketiga-tiga mereka, orang tua, anaknya dan keldai

terjatuh kedalam sungai. Ha! Ha! Ha! Kasihan dia!

Dari cerita dongeng ini, kita boleh melihat apa yang akan terjadi kepada seseorang yang akur kepada saranan orang lain tanpa memikirkan segala akibatnya. Sepatutnya Datuk Harun tidak patut menjadi seperti orang tua dalam cerita ini dengan menurut kata-kata anak-anak buahnya untuk bertanding di Ampang Jaya. Begitu juga orang-orang Melayu di Ampang dan juga hantu-hantu 46. Kalau hantu-hantu 46 ini betul-betul jujur, mengapa tidak sahaja letakkan calon DAP disitu. Biarkan calon Cina DAP lawan calon MCA. Kita tengok Cina lawan Cina. Tanpa undi Melayu, siapa yang akan menang.

Saya takut nanti Datuk Harun dan orang Melayu jadi macam cerita **'Bayang-bayang keldai'**.

Bab ini saya tutup bagi membolehkan satu bab lain khusus mengenai Datuk Harun yang saya kenali sejak beliau mula-mula menjadi Menteri Besar.

Untuk menutup bab mengenai Datuk Harun ini tidaklah mudah kerana seorang yang sekalibar Datuk Harun layak mendapat lebih dari itu. Sebuah biografi ataupun buku.

Walau bagaimanapun, berikut ini saya per-turunkan cerita 'Bayang-bayang keldai' sepertimana yang telah saya janjikan dalam rencana Mingguan Kota itu.

Ceritanya begini. Di zaman Harun Aminurrashid dulu, tersebutlah kisah seorang pengembara di Baghdad yang telah menyewa sesekor unta dengan



pemandunya sekali untuk membuat perjalanan di Padang Pasir. Setelah lama mengembara, maka mereka pun berhentilah berihat di suatu tempat. Tatkala itu keadaan cuaca di atas padang pasir tersebut amat terik sekali. Oleh yang demikian, maka berteduhlah sipengembara itu dibawah bayang-bayang keldai. Melihatkan itu, pemandu keldai itupun memarahi si pengembara.

**“Tuan hamba tidak boleh berteduh di bawah bayang-bayang keldai sebab tuan hamba hanya menyewa keldai ini bukan dengan bayang-bayangnya sekali.”**

Maka mereka pun berbalah-balahlah sehingga tidak menyedari keldai tersebut telah lari meninggalkan mereka.

Moga-moga peristiwa di atas dapat dijadikan renungan bersama dalam konteks pilihanraya kecil Ampang Jaya khasnya dan negara dan rakyat amnya.

Nota: Rencana di atas adalah lanjutan dari rencana saya ‘Datuk Harun, Ampang, Keldai, Harimau Tempang’ yang tersiar dalam Akhbar Mingguan Kota bertarikh 1 Jan 1989. Terima Kasih kepada Mingguan Kota.



Ke mana saja mukmin pergi, ia membawa hatinya.  
Hati yang sentiasa bergetar dengan kebesaran Allah.  
Hati yang sentiasa berdenyut dengan cinta Allah.  
Hati yang sentiasa mengingat kebesaran dan keagungan Allah.  
Bagi mukmin, tiada ruang waktu yang kosong, tiada tempat  
dijejak dan tiada suasana yang dirasa, melainkan di situlah  
cinta, takut dan kagumnya terkumpul, menuju ke haribaan  
Allah!



"Saya berjanji, macam mana orang PAS tolong bebas di Johor Bahru di Parti Raja. Di Ampang Jaya pun orang kami akan tolong kumpulan serpihan, kerana kami pun serpihan juga, sebab Dr. Mahathir yang jadi musuh Ku Li, dia pun musuh kami juga".

"Bagus Ustaz Fadhil Nor, saya tahu perjuangan PAS dan Semangat 46 lebih kurang sama sebab itu kita mesti bekerja sama menjatuhkan kerajaan yang dipimpin oleh Dr. Mahathir".





Ummph!... Saa.... yang Ku Li. Ummph! Gambar semasa berbulan madu.



Macam itulah jadi pemuda, buka mulut besar-besar baca "Tuhan ... lindungilah kami dari syaitan yang kena rejam ..." Pemuda hari ini mesti tentang musuh-musuh negara. Bukan macam Pemuda masa Datuk Harun jadi ketua dulu. Adakan kerajaan dalam kerajaan, dan desak kerajaan. Pemuda yang baik mesti taat dan berkerjasama dengan kerajaan. Antara para pemuda mulut siapakah yang paling besar?





"Tolong kami .... bantu kami .... Kami mahu bantu bebas ... Aduhai insan insani ... tolonglah kami ...". Ku Li ... Hamdan Yahya (ikan Piranha) Parit Raja dan Musa Hitam. Di Parit Raja, Hamdan tersepit antara orang Ku Li dan Musa. Tengok Tangan Ku Li di depan, tangan Hamdan dan Musa di belakang. Yang mana satukah yang betul letak tangannya?



## BIJI GOLI, BOLA JOLOK DAN LUBANG GOLF

**U**tala Samana dalam bukunya **Papua New Guinea, 'Which Way?'**, telah mempersoalkan mengapakah Perdana Menteri yang pertama Mr. Somare dan para pemimpin parti PANGU berkelakuan seperti *"..... kids playing marble in a political ring drawn on by colonial master. If we assess the leadership role since independence and consider what we have achieved so far we would accept that the ring has been expanded and the game has changed from marble to golf and snooker, suggesting a bit of sophistication."*

Jika diterjemahkan, maksudnya, para pemimpin parti PANGU dibawah pimpinan Perdana Menteri pertamanya Mr. Somare yang telah mendapatkan kemerdekaan untuk negara Papua New Guinea itu adalah ibarat anak-anak kecil yang bermain biji guli di mana ruangnya telah ditentukan oleh penjajah. Cuma perbezaannya keadaan permainan itu diperluaskan sesudah merdeka menjadikan permainan biji guli bertukar kepada golf atau bola jolok. Cuma gaya dan tempatnya yang membezakan.'

Semasa saya berada di Papua New Guinea pada tahun 1988 yang lalu, saya cuba membuat perbandingan antara politik New Guinea dengan politik Malaysia. Tarikh kemerdekaan negara itu ialah tahun 1975, dan negara kita pula merdeka pada tahun 1957. Saya dapati 57 dan 75 lebih kurang sama saja. Ini lebih kurang samalah macam sikap penjajah terhadap sebuah negara dengan sebuah negara yang lain. Tak banyak bezanya, seperti bezanya setan dengan iblis. Itu saja.

Great Britain adalah ibu kepada Australia. Rakyat Australia adalah keturunan banduan yang dibuang ke pulau itu. Masakan tingkah laku orang yang Datuk neneknya banduan lebih baik dari penjajah British terhadap anak negeri yang dijajahnya.

Amerika dan Britain macam itu juga, lebih kurang macam PARTI PANGU di PAPUA NEW GUINEA dan PARTI UMNO di Malaysia, cuma di Malaysia Tunku Abdul Rahman yang menjadi Perdana Menteri pertamanya. Di Papua Mr. Somare. Namun keduanya adalah anak didik penjajah yang mendapat kepercayaan dari tuantuan mereka kerana sifat taat mereka terhadap **'The Colonial Masters'**.

Cara dan gaya pemerintahan dari zaman Tunku, Tun Razak serta Tun Hussein Onn, tak banyak bezanya. Semuanya memakai acuan **'Made in England'**. Bezanya antara satu dengan lain samalah macam beza lubang golf dengan lubang snooker. Lubang golf terletak dalam green biarpun jauh antara satu lubang dengan yang lain. Dan ada

kalanya tempat tersembunyi. Lubang yang kecil itu terlindung dicelah-celah rumput yang tinggi. Namun matlamat utama pemain bola, snooker dan golf adalah sama saja iaitu nak memasukkan bola ke dalam lubang.

Pemain golf gunakan kayu yang panjang dan bengkok dibawah, supaya mudah memukul bola yang kecil dan berat ketempat yang sangat jauh. Mereka terpaksa menghayunkan kayu golf dengan kuat supaya bola itu sampai dekat dengan green.

Golf adalah satu jenis senaman untuk orang berada. Cara bermainnya pula adalah di tempat yang dikhaskan dan istimewa untuk para ahlinya saja.

Tujuan asal dan sebab mereka bermain tidak sama. Ia berbeza-beza antara satu dengan yang lain. Tetapi itu tidak penting. Yang penting ialah mereka yang bermain di padang yang khusus begini akan berasa lapang.

Beruntunglah para pemain kerana dapat merasa lapang bila bermain di padang yang luas terben-tang dan jauh dari orang ramai. Dengan demikian mereka lapang pula untuk berfikir dan berbincang apa-apa sahaja rancangan mereka sendiri ditempat yang jauh dari rakyat yang tidak mengerti bahasa lobi-melobi yang digunakan oleh bapak menteri.

Bukan memasukan bola ke dalam lubang yang menjadi kegemaran pemain, tapi puji-pujian dari teman sepermainan. Satu bola yang berjaya dimasukkan ke dalam green, selain dari 'tahniah', 'good shot', kadang-kadang dapat tepukan. Ini



sungguh menyeronokkan para pemain yang ego dan semakin bertambah puaslah egonya. Tapi ada pemimpin yang saya kenal bila kalah di pagi hari pegawai di Kementerian tentu ada yang tak senang hati.

Permainan ini adalah satu permainan yang diperkenalkan oleh penjajah. Disebabkan tidak ramai yang mampu main, kerana belanjanya yang mahal maka jadilah permainan ini satu permainan yang penuh prestij dan eksklusif.

Di kalangan Perdana Menteri-perdana Menteri dan menteri-menteri sebelum Mahathir permainan ini sangat populer. Di sinilah terjadinya lobi.

Dari segi faedah dan keseronokan sebenarnya permainan golf ini tidaklah sehebat mana sangat. Lebih kurang macam main guli juga tetapi main guli itu di kampung dan masa waktu budak-budak. Kalau dah dewasa dan tua pun main guli nanti orang tengok pun gelak. Jadi itulah makanya terpaksa main golf. Bunyinya pun lain macam. Bola-nya pun besar sikit.

Sewaktu di padang golf itu, seperti sewaktu masa kecil bermain guli jugalah, di samping bermain itu mereka bercakap-cakap. Sewaktu bercakap-cakap itulah terjadinya lobi-melobi. Ini permainan pada zaman Mahathir ada sikit susahlah. Jadi tidak semua orang boleh dekat itu PMlah. Bila jadi begitu maka golongan yang tidak dekat dengan PM ini pun menyebarkan berita mengatakan PM sekarang ini begitu dan begini.

**“Ini benda gua tak mainlah, lain benda gua**

**main.”** Itu kata budak-budak rock. Saya tak tahu apa kata Dr. Mahathir **“Gua pun main lain barang punya”**.

Demikianlah yang terjadi untuk waktu-waktu yang dahulu. Perkara-perkara itu tidak terjadi pada era Mahathir. Ini tidak peleklah sebab Mahathir mempunyai latar belakang yang berbeza dengan orang-orang yang dulu itu. Orang-orang yang dulu itu keturunannya baik-baik, gah-gah, dari golongan bangsawan. Mahathir pun keturunan orang baik-baik juga tetapi dari kalangan rakyat. Dia bukan sahaja tahu tentang penderitaan rakyat dari cerita orang-orang lain kepadanya tetapi dia lihat sendiri dengan mata kepalanya sendiri kerana dari kumpulan itu dia datang.

Manusia ini ada tabiatnya sendiri iaitu apabila orang lain tidak berbuat seperti yang dia buat maka dengan mudah saja dia akan menilai bahawa orang itu tidak baik, sebab setiap orang berasa dia baik. Lebih daripada itu tidak ramailah orang yang dapat asosiasikan dirinya dengan Mahathir.

Apabila dia tidak dapat asosiasikan dirinya dengan Mahathir, maka dia pun sebarlah fitnah mengatakan begitu dan begini kepada Mahathir. Oleh sebab itu kalau kita minta alasan-alasan dan bukti-bukti yang konkrit, minta data dan sebagainya mereka pun tidak boleh berikan. Tapi walaupun tidak ada datanya, ada juga orang yang percaya kepada keadaan demikian.

Konon ramai orang kata. Jadi bagi mereka bila ramai orang kata maka perkara itu betul. Macamlah

cerita sebatang pohon yang berhantu. Mulanya ada satu orang mengatakan ada hantu. Kemudian diikuti oleh sepuluh orang mengatakan ada hantu. Bila kita tanya dia: Adakah dia pernah tengok hantu itu. Dia kata ada orang beritahu dia. Kemudian kita tanya pula orang yang beritahu dia itu, orang itu pun kata: Ada orang juga yang beritahu dia. Maka kita pun kalau dah tak ada kerja lain dah, pergilah bertanyakan orang lain pula. Begitulah jawapannya. Maka alhasilnya jadilah sebuah cerita yang paling panjang di bawah langit Tuhan ini. Ada hantu orang lain cerita.

Berbalik kepada cerita hantu tadi lagi, apabila terjadi begitu maka lama kelamaan masuklah dalam kepala orang bahawa pada pohon yang tertentu itu ada hantu.

Apabila keadaan yang begitu terjadi, maka dalam kepala orang pun sudah ada hantu. Ada pun hantu ini adalah suku sakat kepada syaitan dan iblis. Jadi bila sudah jadi geng-geng tu, tidak adalah kerja lain lagi kecualilah cerita hantu.

Berbalik semula kepada Mahathir. Mahathir tidak populer di kalangan menteri-menteri yang pengampu dan menteri-menteri yang penjilat sebab mereka tidak boleh mengampu dan menjilat. Itu saja perkaranya bukan apa sangat.

Mahathir ini satu lagi perangnya yang tidak disukai oleh kebanyakan menteri-menteri yang berperangai fesyen dulu. Ada pun perangai itu ialah perangai suka membaca. Suka menambah ilmu pengetahuan. Dia berasa masa terlalu singkat



dan tidak cukup baginya, jadi setiap waktu dia terpaksa menambahkan pengetahuannya.

Disebabkan oleh tabiat membaca yang demikian, maka apabila ada rombongan Perdana Menteri ke luar negeri, Menteri-menteri yang mengikutnya tidak berapa suka. Begitu juga pegawai-pegawai yang fesyen lama. Apabila di luar negeri, sekiranya ada masa lapang, Mahathir mempunyai tabiat yang lain atau berbeza dengan Menteri-menteri yang fesyen dulu. Mahathir akan menggunakan masa lapangnya untuk pergi ke kedai buku dan membeli buku dengan sebanyak-banyaknya. Mana ada Perdana Menteri lain sebelum ini yang ada perangai macam Mahathir.

Sebelum sesuatu mesyuarat diadakan pula, Mahathir memberi taklimat kepada pegawai-pegawai dan rombongannya yang akan memasuki mesyuarat bersama-samanya. Oleh sebab itu dalam mesyuarat tidak adalah percanggahan pendapat berlaku. Maka mesyuaratpun dapatlah berjalan dengan lancar.

Mahathir itu Perdana Menteri. Tidak ada sesiapaapun dapat menafikannya. Sesuai dengan Perdana Menteri, maka dia membuat kerja-kerja sebagai seorang Perdana Menteri. Pernah terjadi sebelum Mahathir, dalam satu mesyuarat di luar negeri pendapat menteri bercanggah dengan pendapat pegawai dalam mesyuarat tersebut. Ini sangat memalukan di mata antarabangsa.

Zaman Mahathir perkara yang semacam ini tidak berlaku. Ini sesuai dengan visi Mahathir dalam

mengembalikan martabat dan maruah bangsa di mata dunia.

Begitu juga bermain snooker. Ada pun akan Snooker ini nama baru. Kalau zaman dahulu orang panggil billiard. Kedua-duanya budaya penjajah dan imperialis. Budaya ini tidak lain hasilnya ialah memberikan keseronokan yang sementara dan meleakakan.

Tujuan permainan Snooker ini sama saja. Masukkan bola itu ke dalam lubang. Lagi banyak masuk lagi baik. Jolok pelan-pelan maka masuk pun pelan-pelan. Kalau nak tahu macam mana cara mainnya tanyalah seorang kawan saya yang sangat terkenal Zahrin Mohd Yassin. Dia pun dah masuk UMNO.

Berbalik kepada main golf. Dan cakap pasal golf, kena tanya kawan saya Datuk Harun Idris. Datuk Harun suka main golf. Pagi petang bila nak cari lubang Datuk Harun jumpa kawan-kawannya di padang golf. Pusing satu round, 18 lubang, dada pun lapang.

Cakap pasal lubang, saya teringat bahawa manusia adalah ciptaan Tuhan dari tulang-tulang dan daging yang mempunyai sembilan lubang. Dua lubang mata, dua lubang hidung, dua lubang telinga, satu lubang mulut dan dua lagi lubang yang tersembunyi yang saya tak perlu sebut. Semua orang tahu. Kalau tak tahu juga, tak retilah saya nak cakap kerana baru-baru ini saya terbaca satu berita di akhbar yang melaporkan perihal seorang bayi yang dilahirkan tanpa lubang dubur. Jadi dia cuma ada 8 lubang.

Saya bercakap dan bercerita pasal lubang-lubang ini kerana saya mahu mengingatkan bahawa orang yang cerdik tidak akan membiarkan dirinya dipatuk oleh ular yang sama di satu lubang yang sama biarpun berlainan waktu. Samalah seperti seorang yang pernah tertipu oleh kawan atau musuhnya sekali, kemudian kita dengar dia tertipu sekali lagi oleh musuhnya yang sama. Ini menunjukkan dia tak layak jadi pemimpin.

Berbalik kepada cerita Tunku dan dua Perdana Menteri sesudah beliau, iaitu zaman Tun Abdul Razak dan zaman Tun Hussein Onn. Kenapa zaman itu macam tidak ada masalah seperti di zaman Mahathir ini?

Dr. Mahathir tak main golf seperti orang lain. Dia tidak ikut didikan British. Dia tidak bersekolah di England. Dia dapat ijazah MBBSnya di Singapura.

Oleh kerana dia tidak ikut didikan Inggeris maka pemikirannya bukan pemikiran Inggeris. Cara hidupnya pun bukan cara hidup Inggeris.

Ini banyak akibatnya. Banyak reporter dan penulis yang tidak sukakan kepadanya. Bukanlah sebab apa sangat. Dengan orang-orang dulu, dengan Tunku misalnya wartawan dan reporter boleh *toast* sampai tunggang terbalik. Dengan Mahathir itu semua tak main.

Mahathir adalah pemimpin politik yang sekaligus intelektual. Jadi apabila penulis-penulis atau



reporter ingin membuat wawancara dengannya mestilah membuat persediaan yang lebih. Tidak boleh pergi kosong sahaja. Penulis pula tak boleh main kerana Mahathir banyak membaca. Jadi tak bolehlah nak pergi cakap perkara yang sama. Balik-balik brother-brother, diktator, aneh bin pelek bin ajaib. Itu semua tak mainlah.

Jadi kalau kita lihat Dr. Mahathir ini lahirnya daripada acuan yang lain. Acuan yang berbeza dengan yang lama-lama dulu, yang sekarang telah menjadi tawarikh.

Tidak aneh bin ajaib al-peleklah kalau Dr. Mahathir telah membuat satu acuan baru yang telah menyebabkan geng-geng yang memindahkan permainan guli kepada snooker dan golf tak dapat menyesuaikan dirinya. Mereka yang biasa main bola sembilan lubang ini merasa terseksa, bila lubang-lubang tempat mereka main itu terbiar begitu saja. Mahathir tak mahu main sama. Susahlah mereka nak cari lubang nak lobi Mahathir untuk nak dapat lubang baru.

Main goli tujuannya nak masuk lubang, tapi Mr. Goli lain pula, kerjanya nak goli orang. Nak tahu cerita pasal Mr. Goli ini tanya Cikgu Salim Ali di Johor Bahru. Beliau pernah kenal dengan Mr. Goli.

Main snooker atau dulu dikenali dengan nama bola jolok atau bola tonjol pun matlamatnya itu juga. Ia membuat orang lalai dan leka. Kerjanya nak masukkan benda itu ke dalam lubang juga. Maka oleh kerana keasyikan kepada permainan ini

ramailah member yang beritahu anak dan isteri pergi main snooker tapi mereka sebenarnya pergi main goli.

Apakah lubang yang jadi matlamat? Atau adakah tujuan-tujuan lain yang ingin dijayakan oleh wakil-wakil penjajah ke atas negara ini? Di atas padang golf yang penuh misteri inilah berkumpulnya para menteri dan para peniaga yang sentiasa mencari lubang.

Main golf itu sendiri sebenarnya tak salah. Itu adalah hak perseorangan mereka yang mampu dan gemarkan permainan itu. Yang ingin dipersoalkan ialah macam mana politik negara hendak selamat, kalau pemimpin-pemimpinnya leka membuang masa dari lubang ke lubang? Bolehkah soal perpaduan ummah diselesaikan dalam perjalanan meninggalkan lubang yang satu menuju ke satu lubang yang lain. Dan ada banyak lubang yang pula boleh diulang-ulangkah? Lubang pula kalau lama tak tengok iblis nanti masuk berkeluarga dan berumahtangga di situ.

Sekarang rakyat sudah tahu di padang golflah pemimpin mereka leka berbincang pasal lubang. Mereka juga tahu pemimpin mana yang selalu ke sana mencari lubang. Ada macam-macam lubang yang dibincangkan dari yang sekecil-kecil dan secetek-ceteknya sampailah kepada yang sebesar-besar dan sedalam-dalamnya.

Kalau kita kembali kepada al-Quran sebenarnya cerita lubang ini bukanlah cerita baru yang tidak

disebut di dalam al-Quran. Inilah yang sepatutnya diingati oleh para pemimpin yang suka main lubang iaitu ada lagi lubang lain di antara lubang-lubang itu yang amat dahsyatnya.

Lubang apakah itu ya Maulana? Tidak lain dan tidak bukan lubang itu adalah lubang yang apabila kita masuk ke dalamnya, maka kita tidak mempunyai peluang lagi untuk keluar daripadanya. Itulah lubang kubur. Apabila masuk ke dalam lubang itu tidak ada sesiapa lagi yang dapat menolong dan membantu.

Segala di dunia ini adalah gambaran semuanya. Pukullah bola golf itu, nescaya perbuatan yang begitu jugalah nanti akan berlaku pada zaman akhirat nanti.

Saya banyak bercakap pasal padang golf dan meja snooker ini bukanlah sebab apa melainkan kerana inilah antara tempat-tempat orang-orang yang berasa berhak konon untuk menyelamatkan negara ini berbincang dan menyebarkan fitnah memburuk-burukkan pemimpin bukan kerana kesalahan dan kesilapan atau kerana pemimpin itu tidak melaksanakan tugas-tugasnya melainkan kerana dia tidak dapat asosiasikan dirinya dengan pemimpin hari ini. Itu sahaja.

Dari itu sebelum kita semua dimasukkan ke dalam lubang lahad, marilah kita fikirkan dan menungkan apakah jawapan yang bakal kita berikan pada Mungkar dan Nakir, bila ditanya tentang tanggungjawab kita terhadap bangsa, agama dan



tanahair kita. Apakah kita ini makhluk yang engkar atau taat?

Harimau mati meninggalkan belang, gajah mati meninggalkan tulang, manusia mati meninggalkan nama. Nama yang macam manakah yang kita hendak tinggalkan? Nama yang macam nama Tunku Abdul Rahmankah? Atau nama macam Datuk Musa Hitamkah? Atau nama macam Tengku Razaleigh Hamzah, macam Tun Hussein Onn yang sekali ke hilir sekali ke hulu, tidak tentu arah tujuan dan matalamatnya.

Contoh teladan yang macam manakah yang mahu ditinggal oleh mereka ini kepada anak cucu kita? Apakah mereka ini mahu meninggalkan satu generasi yang hidupnya korek lubang tutup lubang. Hidup yang tidak ada pegangan dan tanggungjawab, tidak ada *sense of belonging* dan *sense of responsibility* terhadap masyarakat, agama dan negara.

British adalah satu bangsa yang taat setianya kepada bangsa dan negaranya sungguh luar biasa. Inilah yang sepatutnya yang menjadi amalan pemimpin Malaysia yang lama bergaul dengan tuan-tuan British mereka. Tetapi sayang seribu kali sayang, patriotik mereka untuk British dan bukan untuk negaranya sendiri.

Sudah lebih 30 tahun kita merdeka. Apa perlunya kita terus setia pada penjajah yang telah mengambil hampir segala-galanya dari negara kita melainkan sikap biadap, engkar, ego dan kurang

ajar yang ditanamkan ke dalam diri sebahagian pemimpin kita yang menjadikan kita hidup huru hara dan menderita hingga ke hari ini. Patriotisme dan nasionalisme kita tidak untuk Malaysia tercinta.

Dalam sejarah manusia, bulan dan bintang serta matahari, semuanya maju ke hadapan tidak berundur kebelakang. Kenapa Tunku, Hussein Onn, Ku Li, Musa dan golongan serpihan mahu kita berundur kebelakang, mahu kembali seperti di zaman kita semasa dijajah dulu? Kita mahu mempunyai identiti kita sendiri, kita mahu jadikan diri kita 'The New Breed of Malaysian'.

Ular yang kita pandang hina itu bersalin kulit. Apakah salah kita buang kulit yang lama dan pakai kulit yang baru. Pohon pun dari masa ke semasa berganti kulit, berganti daun. Itulah yang dinamakan sifat baru. Ia mesti berubah-ubah dari waktu ke waktu. Mestikah UMNO di zaman Tunku sama dengan UMNO di zaman Mahathir sedangkan mereka mempunyai acuan, aliran dan laluan sejarah politik yang berbeza.

Kalau kita mahu juga berundur, berundurlah, tapi marilah kita umat Islam berundur ke zaman Keagungan Islam, zaman semasa Islam sedang berkembang seperti bunga. Tapi kita tak mahu kembali kepangkuan Inggeris untuk menjadikan mereka tuan-tuan semula. Umat Melayu sebelum merdeka dulu, miskin dan hina tapi kini kita sudah menjadi tuan di negara kita sendiri.

Harapan rakyat terhadap pemimpin mereka

dalam sebuah negara yang telah bebas dari kongkongan penjajah dan yang mewakili mereka dalam satu **'Constitutional framework'** ialah agar ia membawa faedah kepada seluruh rakyat. Justeru itu pemimpin mesti menunjukkan kepimpinan yang bermaruah dan mempunyai nilai kerohanian yang murni sesuai dengan Islam yang menjadi agama resmi negara.

Kita mahu mereka mencontohi kepimpinan cara nabi bukan seperti labi-labi, di darat hidup di laut pun hidup. Pakai songkok pergi masjid, namun arak minum juga, judi pun main juga, berzinah dan perbuatan jenayah pun buat juga.

Kita tidak mahu ada pemimpin kita kerana nak impres kepada rakyat yang dia telah berubah, telah pergi ke mesjid-mesjid berjumaah, bersembahyang dengan rakyat, makan nasi bungkus, ubi stela rebus dan sebagainya, menunjukkan dirinya rakyat seperti rakyat tetapi menyambut tahun baru di Kuala Lumpur, menahan segala pemberita daripada memasuki kawasan rumahnya.

Sekarang rakyat sudah buka mata, sudah tahu mana satu intan mana satu kaca. Perbuatan-perbuatan yang demikian tidak lebih daripada memperkuatkan angapan orang ramai terhadap hipokrasi pemimpin tersebut semata-mata.

Bila lagi kita dapat melihat pemimpin yang dalam jiwanya tertanam semangat seorang pemimpin yang dapat kita banggakan, yang boleh mengajar kita hidup benar-benar bebas dan merdeka seperti Mahathir, bukan macam Tunku yang maju ke depan



terjerit-jerit: Merdeka... Merdeka... Merdeka... Tapi bila rakyat betul-betul mahu merdeka, Tunku bawa rakyat dengan nostalgia Semangat 46, kata-kata kosong yang tidak punya makna apa-apa. Dia bukan parti politik dan bukan pula organisasi sosial.

Orang yang waras akal dan rasional pemikirannya tidak dapat hendak membayangkan bagaimana-kah sebuah negara di dunia moden hari ini boleh diperintahkan dan ditadbirkan dengan menggunakan satu slogan semangat yang kosong melainkan dengan pemerintahan diktator?

Amalan hidup pemimpin sentiasa berkait rapat dengan corak pemerintahan. Bila kita hubungkaitkan semua faktor-faktor ini, maka kita akan dapati bahawa ideologi adalah satu persoalan yang penting. Mereka yang mahu memerintah wajib memberi tahu kepada rakyat yang telah memberikan kuasa kepada mereka, ideologi apakah yang sedang dibawa atau yang akan diperkembangkan sekiranya golongan Tunku dan kumpulan serpihannya mahu menghidupkan UMNO lama itu?

Banyak persoalan yang dapat dikemukakan dan kalau kita rajin bertanya maka kita tanyakanlah. Apabila kita tanyakan dengan secara sungguh-sungguh maka akhirnya dia akan berkata seperti sebuah cerita yang telah diceritakan oleh seorang kawan saya kepada saya. Ada pun ceritanya adalah seperti berikut;

Ada kepada suatu masa dalam sejarah manusia hidup dua orang pemuda pada suatu kampung.

Ada pun kampung itu letaknya di Jajahan Gasang dalam sebuah negeri bernama Kilatan. Yang tua bernama Ibrahim, timang-timangannya Brehim. Yang muda bernama Abdul Rahman, timang-timangannya Deraman.

Pada suatu hari berlakulah satu perselisihan pendapat. Brehim memberitahu Deraman ada seekor burung sedang hinggap di atas belakang seekor lembu. Burung itu sangat besar dengan sayapnya yang berkilau-kilau. Apabila Brehim memberitahu kepada Deraman, maka Deraman pun keluarlah untuk melihatnya. Apabila Deraman melihatnya maka berkatalah Deraman;

“Bukan burung Brehim!” kata Deraman.

“Kalau bukan burung, binatang apa?” tanya Brehim.

“Kambing Deraman!”

“Burung! Tengok kaki dia tu dua. Burung!”

“Aku dah kata kambing, kambinglah.”

Tiba-tiba burung itu pun terbanglah ke angkasa. Maka berkatalah Deraman.

“Tengok, dia terbang. Burung” kata Deraman. Tapi kata Berahim pula.

“Terbang pun dah kambing! Kambinglah!”

Saya tahu Tengku Razaleigh Hamzah, Ketua Semangat 46 tidak akan senang bila ditanyakan sesuatu mengenai ideologinya. Apakah Tunku, Hussein Onn, Ku Li dari golongan kapitalist atau pun feudal? Sistem pragmatis yang menjadi amalan demokrasi kita boleh berubah ikut mana imam di depan kita. Kalau imam di depan kita itu kita tak

tahu sama ada dianya Islam, Kadiyani atau bahai, kita main masuk dalam saf di belakangnya, maka rosaklah sembahyang kita. Kalau dia Islam boleh juga kita faraqahkan.

Mengikut Allahyarham Tun Razak, UMNO yang dipimpinnya adalah sebuah pertubuhan politik yang pragmatis. Jadi jelaslah di sini bahawa di antara sebab-sebab utama mengapa Dr. Mahathir di tentang oleh golongan serpihan, ialah kerana mereka tidak setuju dengan ideologi yang dibawa oleh kedua-dua bekas Perdana Menteri itu. Mahathir yang telah melahirkan "**Delima Melayu**" cuba membawa perubahan ideologi mengikut cara dan gaya hidup dan visinya yang bukan feudal.

British dan barat merasakan kiranya Mahathir berjaya menewaskan rancangan global barat terhadap bekas tanah jajajahnya, ia akan mendatangkan kesan yang buruk pada kuasa-kuasa besar. Kemerdekaan yang dibawa oleh Mahathir tanpa pekikan merdeka adalah satu-satunya hakikat yang amat digeruni oleh bekas penjajah kerana ia benar-benar akan menjadikan negara ini negara yang merdeka dan berdaulat.

Barat sedang memerhati dan merenung dengan mata tajam akan visi Mahathir terhadap negaranya. Kepercayaan yang menjadi amalan Dr. Mahathir sudah mula secara perlahan-lahan difahami oleh rakyat. Dalam masa yang sedikit lagi tidak mustahil akan menjadi ikutan. Dan setengah-setengah pihak sudah nampak peluang yang Mahathir berikan



pada para pelapis yang tahu apa erti kemerdekaan yang sebenarnya. Visi Mahathir sudah mula tampak jelas oleh rakyat yang berjiwa nasionalis melainkan mereka yang pura-pura mengaku diri nasionalis tapi terus menjadi agen-agen pemikiran imperialis barat. Ini semua amat ditakuti oleh barat. Sebab bagi barat, Malaysia adalah sumber bahannya yang utama.

Agen-agen imperialis barat mahukan setiap penganutnya mesti terdiri dari mereka yang tidak ada asas agama, tidak taat pada Tuhan, tidak taat pada rasul, tidak taat pada pemerintah di negara di atas bumi yang mereka pijak. Penjajah mahukan agen-agen mereka dari kalangan orang-orang yang tidak berdisiplin dan tidak bermoral supaya bila mereka ini dijadikan pemimpin kelak, mudahlah mereka akan jadi boneka.

Kuasa-kuasa luar, mahu kita semua terus hidup terjajah. Jiwa raga dan agama kita juga mereka mahu jajah dan siapa lagi kalau bukan boneka-boneka suruhan mereka yang dapat lakukan ini semua.

Sekarang kita boleh nampak dengan jelas kenapa mereka bermati-matian mahu membuang Mahathir, mahu gugurkan Mahathir dari kerusi, mahu tunjukkan pada dunia bahawa orang Melayu tidak mahukan pemimpin yang macam Mahathir. Mereka mahu terus hidup seperti kehidupan di zaman penjajah dengan golongan tertentu yang rapat dengan kuasa feodal saja yang hidup seperti dalam syurga.

Saya sendiri bangga mempunyai seorang pemimpin seperti Mahathir. Dia mempunyai visi yang jelas ke manakah akan di bawanya negara kita ini. Dan tentang visi ini telah lama diucapkan dan dikerjakan oleh Mahathir untuk mencapainya dan setelah direnung dengan halusi jelaslah bahawa inilah yang sebaik-baiknya. Setiap negara itu dalam zaman-zaman tertentu mestilah mempunyai visinya sekiranya ia mahu merentas zaman-zaman yang amat genting dalam sejarah hidup manusia di muka bumi ini.

Selain daripada sikap yang demikian, negara kita hanya akan menjadi negara pengguna kepada negara lain yang lebih besar kerana pemimpin kita yang lemah disebabkan ia alat penjajah dengan jiwa yang penuh dengan inferiority kompleks.

Secara khusus Mahathir bukan boss saya. Dia Perdana Menteri dan saya adalah salah seorang rakyat, yang hidup dalam negeri ini dan yang mempunyai peranannya yang tersendiri. Oleh kerana itu seperti yang saya katakan dalam buku-buku saya yang lalu dalam buku ini pun sama juga bahawa saya memerhati perkembangan Dr. Mahathir. Saya memerhati kerana dia Perdana Menteri dan saya penulis. Seperti Mahathir melakukan tugasnya maka saya juga melakukan tugas saya. Saya adalah orang yang mengikut apa kata yang dikatakan oleh Abu Bakar al-Sidik. Saya akan menyokong Mahathir sementara dia melakukan sesuatu yang menguntungkan negara, bangsa dan tanahair. Tetapi sebaliknya apabila dia gagal berbuat

demikian, sayalah orang yang pertama yang akan menyerangnya.

Pada masa ini Mahathir adalah seorang Perdana Menteri yang bukan sahaja bijaksana, tegas dan berani membuat keputusan dan menghadapi risikonya sehingga menjadikan Malaysia sebuah negara yang terkenal bukan sahaja kerana sikap tegas pemimpinnya dalam pelbagai perhimpunan bertaraf antarabangsa tetapi juga menjadikan Malaysia sebuah negara yang penting dan menjadi perhatian dunia dalam abad ini.

Pemimpin yang seperti inilah yang kita kehendaki bukannya pemimpin yang pentingkan diri sendiri dan poket sendiri. Yang pentingkan golongan dan daerahnya semata.

Apakah umat Melayu masih belum cukup dengan budaya sosial dan politik dominator masa lampau hingga terpaksa kembali hidup seperti di zaman penjajah? Apakah bangsa Melayu dan bangsa Malaysia tidak mahu mempunyai imej dan identitinya sendiri di mata negara-negara dunia yang lain?.

Pemimpinkah yang akan mencorakwarnakan masyarakat? Atau masyarakatkah yang mesti mewarnakan pemimpin? Gara-gara pemimpin menipu masyarakat dan rakyat menentang dan menyerang pemimpin sudah patut diberhentikan. Kata orang putih **'Enough is enough'**

Sudah sekian lama rasanya kita tidak mendengar kata-kata yang mencerminkan betapa pentingnya ideologi serta falasafah politik yang tersirat di



sebalik ungkapan perkataan 'demokrasi' itu sendiri. Ia seolah-olah terhakis dan terkikis dari pemikiran kita. Apakah kita sudah lupa bahawa kerajaan yang mendasari ideologi demokrasi itu adalah sebuah kerajaan rakyat?.

**Government of the people.**

**By the people.**

**For the people.**

**Kerajaan rakyat**

**Oleh rakyat.**

**Untuk rakyat.**

Inilah intipati ideologi yang tersirat di sebalik demokrasi kita. Bukan demo mahu kerusi. Bukan demo mahu kasi. Tetapi yang jelas itulah yang diperjuangkan oleh Semangat 46. Dia berjuang kerana dia mahu kerusi dan mahu dikasi.

Kita macam dah lupa yang kita sendiri yang memerintah kita sendiri. Kita semacam dah tak ingat bahawa kerajaan yang memerintah kini adalah kerajaan kita yang dipilih oleh rakyat dengan matlamat untuk memimpin kita, iaitu rakyat. Dr. Mahathir itu adalah sekaligus seorang pemimpin dan seorang rakyat. Beliau itu pemimpin di atas sifatnya sebagai Perdana Menteri. Dan dalam masa yang sama beliau juga rakyat, kerana semasa pilihanraya beliau juga turut memasukkan kertas undiannya ke dalam peti undi bersama-sama rakyat yang lain. Begitu juga dengan rakyat, merekalah pemimpin kolektif yang besar dan yang akan memilih segolongan pemimpin kolektif yang lebih kecil semasa pilihanraya untuk diberikan mandat

bagi memimpin mereka. Bukankah ini yang dimaksudkan dengan ungkapan **'kerajaan itu adalah sebenarnya kita rakyat. Dan rakyat itulah kerajaan'**. Itulah demokrasi.

Masyarakat yang macam manakah yang diidam-idamkan oleh rakyat atau jenis rakyat yang macam manakah yang dikehendaki oleh masyarakat? Kemanusiaan yang macam manakah yang mahu kita lahirkan? Apakah kita mahukan rakyat yang berkemanusiaan tetapi tanpa menjiwai sifat-sifat insan terpuji didalam diri mereka? Mahukah kita terus-terusan menjadi pengikut manusia yang katanya ramai? Apakah menang dua kerusi bebas sudah dikatakan ramai? Tidak mahukah kita mengenal diri kita sendiri dengan adil dan rasional? Bila lagi kita hendak belajar mengenali siapa kita dan siapakah mereka sebenarnya?

Hari ini ramai juga orang yang kita susah nak kenali identitinya. Ini kerana suatu waktu dulu lain gayanya manakala sekarang ini lain pula gayanya. Kita tahu dulu siapa mereka tetapi balik-balik sekarang ini lain pula. Ramai pula yang menyorotkan niat hatinya. Bibirnya manis tetapi hatinya kita belum tahu.

Kita tahu setiap makhluk Allah mempunyai hak untuk hidup diatas muka bumi. Kenapakah kita mesti membiarkan hak kita dipermainkan-mainkan oleh mereka. Dulu Tunku Abdul Rahman dan Hussein Onn masa jadi Perdana Menteri tak setuju dengan mereka yang memperjuangkan hak asasi manusia, kini mereka berdua sudah terlantik

sebagai pengerusi dan timbalannya. Apa sudah jadi. Sungguh anih dan ajaib.

Perhatikanlah dengan teliti dolak dalik mereka ini. Mereka telah belajar dengan dolak dalik yang diberikan oleh penjajah yang menjadi *masternya*.

Keperibadian orang yang menjadi pemimpin sangat penting. Disebabkan ideologi yang menjadi pegangannya maka pemimpin tersebut akan mempengaruhi polisi yang akan menentukan corak pemerintahan. Ramai orang mengatakan minyak dan air tidak bercampur tetapi semua orang tahu kalau dicampurkan juga maka rosaklah keduanya. Nak minum tak boleh nak goreng ikan pun tak masak.

Setiap manusia dipengaruhi oleh sesuatu ideologi. Sama ada ideologi yang berteraskan kapitalisme, feudalisme atau sosialisme atau pun kepercayaan beragama. Setiap satunya mempunyai makna dan mempengaruhi tindak-tanduk dan perbuatan seseorang. Samaada kita menyedari atau tidak, kita akhirnya terbawa-bawa oleh pemikiran dan pendapat yang dijadikan akidah oleh amalan hidup mereka.

Kepada para pemimpin Melayu yang telah memperjuangkan kemerdekaan tanahair, mari kita tanyakan kepada mereka: Sejauh manakah kejayaan yang telah mereka capai dalam mengubah sikap orang Melayu? Mereka akan menjawab bahawa mereka hanya berjuang untuk memerdekakan orang Melayu daripada penjajah Inggeris. Bukan tugas mereka untuk mengubah fikiran orang



Melayu kerana tugas itu adakah tugas Perdana Menteri pada waktu itu iaitu Tunku Abdul Rahman. Tanyakanlah soalan itu kepada Tunku Abdul Rahman.

Maka kita pun tanyakan kepada Tunku Abdul Rahman: Wahai Tunku Abdul Rahman, Bapa Kemerdekaan Malaysia, The Happiest Prime Minister in The World, apakah yang kau lakukan untuk mengubah sikap orang Melayu?

Tunku Abdul Rahman pun berdirilah di sebuah pentas terbuka di hadapan orang ramai rakyat Malaysia. Diapun mulalah hendak bercakap. Tetapi apabila dia memberi salam sahaja kedengaran suara pekikan daripada orang ramai yang telah berkumpul di hadapan pentas itu.

Kami tidak mahu pembohongan!

Kami tidak mahu penipuan!

Kami sudah lama di tipu!

Kenapa serahkan Singapura kepada Lee Kuan Yew!

Suara itu bersilih ganti, gegak gempita dan suara Tunku tidak kedengaran lagi. Tunku lemah seluruh badannya lalu dipapah turun daripada pentas.

Kesian dia.

Bagaimana Tunku hendak menjawab soalan itu? Dia teringatkan kepada kehidupan pemimpin politik pada masa itu berbanding dengan pemimpin politik pada zaman ini.

Kita tanyakan lagi apakah yang Tunku telah buat. Dasar Ekonomi Baru bukan zaman Tunku!

Kita tidak mahu lagi kembali ke dalam zaman kegelapan itu. Kita sudah berada jauh di hadapan. Kita hendak ke hadapan.

Sebaik sahaja lepas Merdeka dulu, pemimpin-pemimpin politik yang sezaman dengan Tunku Abdul Rahman termasuk Tunku sendiri, tidak membuat sesuatu yang perlu bagi mengubah struktur undang-undang dan ekonomi negara. Tunku pun seorang lulusan undang-undang. Tak kiralah kalau Tunku mengambil masa lima tahun atau lebih untuk menamatkan pengajian di bidang itu. Tunku dan pemimpin-pemimpin generasi itu tak patut melepaskan tangan kepada British untuk menulis perlembagaan. Mereka tak patut membiarkan British terus menguasai kekayaan negara dan masih terus mahu bekerjasama mengekalkan pengaruh dan kebudayaan yang menjadi amalan **'The Colonial Masters'**.

Sudahlah dulu masa berkuasa Tunku tak berbuat sesuatu yang konkrit bagi membentuk satu kerangka perundangan yang mencerminkan identiti serta ketuanan bangsa Melayu, sekarang Tunku mahu pula menyekat kemajuan umat Melayu yang baru sedar tentang harga kemerdekaannya.

Tunku dan sahabat-sahabatnya macam British juga, memberikan orang Melayu perkataan 'kemerdekaan' tanpa menyertakan sekali roh dan jasad kemerdekaan itu. Dalam konteks ini, jika kita menyingkap kembali kepimpinan Melayu dari ketiga-tiga zaman Perdana Menteri yang lahir dari kebangkitan nasionalisme 46, maka jelaslah oleh

kita bahawa gagasan yang disebutkan itu telah tertinggal bahkan tertinggal dari pemikiran pemimpin-pemimpin tersebut. Apakah gunanya membawa umat Melayu ke kancah nostalgia 46 yang cuma Tunku dan puak-puak Tunku yang berfahaman feudal saja yang bangga dan merasakan nostalgianya.

Ini bukan zaman untuk bernostalgia-nostalgia. Rakyat belum lupa bahawa selepas kemerdekaan, Tunku tidak lagi bekerja keras untuk kepentingan rakyat. Tidak banyak yang dilakukan oleh Tunku untuk mengubah dan merobah wajah masyarakat Melayu dimata dunia antarabangsa. Keperibadian, perwatakan serta pembawakan Tunku dan juga orang-orang kanan Tunku masih lagi berbau penjajah. Tidak ada perubahan yang radikal. Tidak ada sesuatu yang baru. Sebutan **'tuan', 'government servant', I, your obedient servant, Sir'** masih lagi kekal dalam surat-surat rasmi kerajaan Persekutuan Tanah Melayu yang sudah merdeka itu.

Setelah sekian lama berulang alik ke London dan bercampur gaul dengan orang Inggeris, Tunku semacam sudah lupa pada perkataan 'Melayu' di hujung nama negara kita ketika itu. Malah Tunku semacam sengaja melupakan bahawa orang Melayu punya bahasanya yang tersendiri. Ini mungkin kerana perkataan 'Sir' itu bermaksud 'tuan'. Dan Tunku lebih suka menjadi tuan seperti Godfather Inggerisnya. Ini ditambah pula dengan hakikat Tunku adalah orang yang berdarah raja. Tunku



tidak dapat menjiwai hati rakyat kerana rakyat adalah 'servant' iaitu 'hamba'. Apakah ini 'demokrasi' yang difahami oleh Tunku dan cuba dibawa oleh Tengku Razaleigh serta segolongan puak dari istana yang menyokongnya?

Dalam hal yang lain pula, kita mula sangsi sama ada Tunku faham maksud perkataan 'kerajaan' itu sendiri. Nampaknya semacam wujud satu konflik penafsiran. Mungkin menurut tafsiran Tunku perkataan 'kerajaan' yang terbit dari perkataan 'raja' itu bermaksud 'golongan rajalah yang sepatutnya memerintah.' Rakyat zaman Tunku mungkin boleh terima tafsiran yang semacam itu. Tapi rakyat sekarang lebih pintar dan lebih banyak membaca. Anwar Ibrahim dah buat kempen '**Membaca Jambatan Ilmu**'. Dan ramai orang yang dah baca ucapan Abraham Lincoln dan John F. Kennedy pasal 'Kerajaan Rakyat'. 'Demokrasi' bukan lagi setakat sepatah perkataan yang dijaja oleh orang-orang politik sahaja.

Kesinambungan politik seperti ini masih lagi jelas terlihat dizaman Tun Abdul Razak menjadi Perdana Menteri. Namun begitu Allahyarham Tun Razak maju setapak ke hadapan. Latarbelakangnya yang bukan dari golongan istana menyebabkan beliau peka terhadap kemiskinan rakyat. Beliau sedar kemerdekaan hanyalah sehelai kertas yang tidak berguna dan tidak akan membawa apa-apa erti sekiranya rakyat terus menerus dibelenggu kepapaan dan kemiskinan. Masalah kemiskinan adalah masalah yang sah dan Tun Razak cuba

menganjurkan perubahan dengan memperkenalkan dasar-dasar ekonomi yang difikirkan sebagai cara penyelesaian jangka panjang terhadap masalah-masalah tersebut. Tapi walau apapun juga perubahan yang cuba dibawa oleh anak watan dari Pahang ini, tentu ia tidak mungkin dilakukan dalam masa sehari. Dan Tun Razak meninggalkan kita sebelum usaha-usahanya membuahkan hasil.

Kemudian kita dipimpin pula oleh Tun Hussein Onn, anak kepada Allahyarham Dato' Onn Jaafar, pengasas politik 46. Namun Tun Hussein Onn, bukanlah sebenarnya salah seorang yang meneruskan politik 46 dalam ertikata yang sebenarnya dan dalam konteks semangat 46 yang ada sekarang ini. Beliau sebenarnya adalah hanya tempias dari politik anjuran bapanya.

Seperti yang dikatakan oleh beliau ketika berucap pertama kali selaku Pemangku Presiden UMNO, beliau berjanji akan meneruskan dasar-dasar kerajaan yang sedia ada, iaitu dasar-dasar yang terlahir dari cetusan idea Allahyarham Tun Razak. Ini bukti yang menunjukkan yang beliau tidak mempunyai visi untuk mengubah wajah masyarakat Melayu. Memang betul yang Tun Hussein Onn itu pernah berkhidmat dalam tentera, tapi tak layak kita nak panggil dia 'hero' bangsa Melayu. Kehadirannya dalam kepimpinan Melayu menyaksikan detik-detik permulaan politik kotor.

Tatkala Dr. Mahathir mula memegang teraju pemerintahan, dia sudahpun menunjukkan bahawa dia tidak seperti Perdana Menteri-Perdana Menteri



yang sebelumnya. Dia tahu apa yang baik untuk rakyat dan negara. Dia tahu dia tidak boleh mengambil sikap yang konservatif. Dia tahu orang Melayu juga tidak boleh terus-terusan mempunyai sifat konservatif. Orang Melayu sudah terlalu lama tidur. Terlalu banyak masa yang sudah terbuang dengan politik main guli bertukar main golf.

Dr. Mahathir Mohamad tahu dan sedar dengan pasti bahawa Malaysia memerlukan perubahan-perubahan yang benar-benar radikal. Semuanya merupakan perlumbaan dengan masa. Dan masa terlalu singkat dan hampir terlambat. Tindakan-tindakan yang tegas dan segera mesti dilakukan. Dia tidak membuang masa lagi lalu mengambil alih Guthrie dalam **'The Dawn Raid'** yang menggempar dan menggegarkan Bursa Saham London.

Ini kemudiannya diikuti pula oleh keengganannya menyertai Sidang Kemuncak Negara-Negara Commonwealth di Sydney, **'Buy British Good Last'** dan berbagai-bagai lagi dasar dan langkah yang diambil untuk bukan sahaja mengikiskan pemikiran-pemikiran yang telah diindoktrinasikan oleh British tetapi sekaligus untuk menghapuskan kemiskinan kebendaan dan kemiskinan pemikiran bagi mengembalikan maruah bangsa Melayu.

Seperti yang dikatakan tadi, sebelum kita boleh mula memikirkan tentang semangat 46 untuk menggantikan kepimpinan Dr. Mahathir secara serius, kita sepatutnyalah mengemukakan soalan-soalan berikut:

1 — Masyarakat Malaysia yang bagaimai-



manakah yang ingin kita bentuk? Apakah kita mahu sebuah masyarakat Malaysia yang nostalgik atau yang terlalu *'obsessed'* dengan sejarah masa silam yang sudah barang pasti tidak akan berulang lagi.

2 — Bagaimanakah rupa corak kemanusiaan yang kita kehendaki? Apakah kita inginkan kepada satu masyarakat yang tidak habis-habis bertelingkah? Atau apakah kita mahu budaya *'politik-mempolitik'* sebagai mengatasi *'survival'* bangsa Melayu itu sendiri.

3 — Apakah sebenarnya fungsi parti, politik dan pemerintahan? Adakah ianya kena mengena dengan nostalgia semangat 46 ataupun perolehan semula kuasa bagi orang-orang yang sudah kehilangan kuasa?"

Permasalahan-permasalahan ini adalah permasalahan-permasalahan falsafah politik yang amat penting. Walau apapun jawapan yang cuba kita fikirkan, ia haruslah bertolak daripada pertimbangan-pertimbangan rasional yang berkait terus dengan *'survival'*, maruah, kewibawaan, kemakmuran dan kesinambungan kewujudan bangsa Melayu dan Malaysia dalam gagasan-gagasan yang mencakupi segala aspek kemasyarakatan dan kemanusiaan dalam apa jua bentuk. Jawapan-jawapannya juga haruslah mendasari asas-asas

kejiwaan dan moral yang dapat dijadikan sebagai garis panduan kepada pemerintah, kerana tanpa unsur-unsur yang sedemikian, para pemimpin sudah tentu mempunyai kemiripan untuk memimpin diri mereka sendiri menurut hawa nafsu mereka. Kita mesti akur pada hakikat bahawa sesebuah negara itu adalah ibarat sebuah kapal. Apabila kapal itu miring dipukul ombak, maka isi muatannya turut menggelunsur sama. Ada kemungkinan kapal itu akan terbalik dan tenggelam. Kapal seperti ini, tanpa peta dan kompas, akan hanya terumbang ambing tanpa arah yang tertentu.

Ideologi dalam buku **'Ideologi and Modern Politics'** didefinisikan sebagai **'... Satu sistem kepercayaan yang membentuk satu peraturan politik untuk masyarakat, samada peraturan tersebut memang sedia wujud ataupun baru dicadangkan, ia mestilah menawarkan satu strategi bagi pencapaian matlamat. Ia merupakan penonjolan 'imej terhadap kebaikan masyarakat dan juga cara utama bagi membina masyarakat yang sedemikian rupa'**.

Jadi perkembangan ideologi berfungsi untuk mewujudkan perpaduan, membekalkan visi kepada masyarakat, dan memperkembangkan program dan strategi yang bersesuaian dengan rakyat. Dan dengan yang demikian itu, ia merestui satu pilihan bagi kerajaan yang dapat diterima oleh majoriti rakyat.

Perkaitan ideologi dan kepimpinan adalah ibarat aur dengan tebing. Penerimaan kerangka ideologi

yang salah, samada dinyatakan dengan jelas ataupun diselindungi disebalik kata-kata yang samar-samar sebagaimana yang dilakukan oleh pemimpin-pemimpin Semangat 46, terutama sekali Musa Hitam, akan hanya membawa kemungkinan termusnahnya proses demokrasi di negara kita ini.

Kita semua tahu Dr. Mahathir menghayati ideologi politik yang amat jelas. **“Visinya begitu jelas. Saya mahu maju. Saya ingin progres...”** seperti yang dikatakan oleh Sasterawaan Negara Shahnnon Ahmad dalam satu rancangan forum televisyen.

Secara peribadi, krisis yang berlaku ketika ini, dari saat UMNO lama menghembuskan nafasnya yang terakhir sehinggalah UMNO (baru) keluar dari rahim ibunya adalah tidak ada kena mengena langsung dengan Dr. Mahathir. Ia adalah satu fenomena. Apabila akan terjadi tidak ada sesiapa-pun boleh menahannya. Ia juga merupakan satu tragedi terhadap seorang pemimpin yang mempertahankan ideologinya yang sudahpun diterima oleh rakyat secara universal.

Di peringkat ini rakyat Malaysia semacam sedang berada disatu persimpangan jalan. Rakyat terpaksa memilih di antara Lebuhraya Dr. Mahathir atau Lorong Semangat 46.

Jika rakyat memilih Lorong Semangat 46, ini bermakna rakyat Malaysia membenarkan kata-kata Lord Macauley dalam satu catatan kertas minit tahun 1836. Kata beliau, **‘To form a class of people who may be interpreters between us**



**and the million whom we govern; a class of person, India in blood and colour but English in taste, in opinion, in morals and intellects.'**

Lorong Semangat 46 adalah sebuah lorong yang gelap. Lorong yang tidak mendapat cahaya. Ia gelap kerana tidak punya visi. Ia gelap kerana pemimpin-pemimpinnya takut pada kebenaran masa kini yang selari pula dengan kesedaran Islam yang menonjol dalam era ini. Maka bukan sahaja rakyat yang menjadi pengikutnya akan merangkak-rangkak dan meraba-raba didalam kegelapan tetapi juga pemimpinnya pun ikut sama merangkak di dalam kegelapan yang dipilihnya sendiri.

Sebaliknya jika rakyat memilih, Lebuhraya Dr. Mahathir, maka mereka membenarkan kata-kata Sukarno dalam *Indonesia Secret War* karangan Robin Osbore yang mengatakan, **'The victory which we have achieved is not a "personal victory" of whomsoever. Don't make mistake about this. This victory is a victory of History. Every struggle against colonialism will end with the victory of those who fight for freedom, because history has always shown that those who fight for freedom will win. On the contrary, every struggle which aims at the safeguarding of colonialism will lose because that is the law of History'**.

Kata-kata Sokarno yang diucapkan bagi merasmikan 'Tahun Kemenangan' dalam tahun 1962 ini, jika diterjemahkan bermaksud, *'Kemenangan yang kita capai ini bukanlah satu kemenangan*

*peribadi' bagi sesiapaapun. Jangan tersilap tentang hakikatnya. Kemenangan ini adalah kemenangan Sejarah. Setiap perjuangan menentang penjajahan akan berakhir dengan kemenangan untuk mereka yang berjuang untuk kebebasan. Ini kerana Sejarah selalu membuktikan bahawa mereka yang berjuang untuk kebebasan itu acapkali memperolehi kemenangan. Sebaliknya pula, setiap perjuangan ke arah mempertahankan penjajah akan kecundang, kerana ianya adalah merupakan hukum Sejarah'.*

Kejayaan Tunku memerdekakan negara sebenarnya bukanlah satu '**kejayaan peribadi**' tetapi merupakan '**kejayaan Sejarah**'.

Lebuhraya Dr. Mahathir adalah laluan yang disinari cahaya yang terang-benderang. Ia adalah lebuhraya untuk rakyat memandu dengan laju, selamat dan selesa. Ia dibina sedemikian rupa demi mencipta '**kejayaan Sejarah**' bangsa Melayu yang baru dan berwibawa. Ini semua kerana beliau mempunyai visi yang jelas yang disertai dengan penerapan unsur-unsur keIslaman yang cocok dalam era kebangkitan semula Islam kini.

Sehubungan dengan itu juga, maka adalah tidak tepat bagi golongan Semangat 46 atau rakyat sekalipun menyalahkan Dr. Mahathir secara peribadi dalam kes pemecatan Tun Salleh Abas, selaku Ketua Hakim Negara.

Untuk membuktikan salah anggapan ini, cuba kita tinjau kata-kata Jean Jacquess Rousseau, pengarang buku '**The Social Contract**' semasa Revolusi Perancis yang mengakhiri pemerintahan



sistem beraja di negara tersebut.

Kata Rousseau. *"It is because the force of circumstances tends continually to destroy equality that the force of legislation should always tend to its maintenance"*

Kalau diterjemahkan, kata-kata Rousseau ini bermaksud, **"Ia adalah disebabkan oleh arus keadaan yang senantiasa cuba memusnahkan keadilan yang mana arus perundangan sepatutnya selalu cuba memelihara."**

Petikan kata-kata Rousseau ini bukanlah sebenarnya satu **'kontradiksi'** yang ironi. Pendokongan ideologi politik serta visi jangka panjang memaksa kita mengorbankan segala benteng-benteng. Walaupun ia kadangkala tampak seperti satu perbuatan yang kurang rasional.

Namun begitu, kita haruslah akui akan **hakikat bahawa keadilan tidak boleh dipelihara melalui perundangan, kehakiman ataupun mahkamah semata-mata. Apa yang lebih penting lagi ialah perkembangan, perancangan dan penglibatan terhadap ideologi kemanusiaan yang akan menghasilkan garis panduan tindak tanduk politik.**

Kesedaran yang cuba dipelopori oleh semangat 46 kepada rakyat kini, bukanlah satu **'kesedaran nasional'** tapi sebaliknya semata-mata merupakan **'kesedaran palsu'**. Ia adalah dakyah politik peribadi yang bertopengkan **'nasionalisme palsu'**.

Adalah aneh, pelik, menghairankan, lucu dan



bahkan ironi, kiranya masih ada lagi orang yang mudah terperdaya dengan hantu-hantu penjajah yang dijiwai oleh semangat 46 tatkala Dr. Mahathir sedang bekerja keras untuk menghalau hantu-hantu dalam jiwa bangsa Melayu.

Politik adalah berkenaan visi dan pentadbiran negara dan bukannya kenang-kenangan manis yang mengusik jiwa. Dan demokrasi pula adalah ideologi yang membentuk kerajaan dari rakyat, oleh rakyat dan untuk rakyat. Kitalah kerajaan dan kitalah rakyat.

**We are the world**


**We are the people**

**We are the future**

Semoga anda sekalian memahaminya. Dan moga-moga kita semua berada dalam satu saf. Bukan dalam satu lubang, bukan goli dipindahkan dari lubang guli kepada lubang bola tonjul, kemudian masuk pula ke lubang golf. Kalau itulah caranya ada lebih baik tubuh kita yang kita relakan untuk jadi ashahidin dan di kebumikan saja ke lubang lahad.



... lagi Pertubuhan Hak Asasi Manusia Sedunia hendak bertindak terhadap  
...angat 46 yang menggunakan manusia yang sudah lanjut usia dan uzur  
...uk politik. Budak bawah umur disuruh bekerja. Pertubuhan Hak Asasi  
...usia ambil tindakan tapi orang yang sudah nak mati mereka diamkan  
...aja.



Tidak kasihan ke melihat *Bapa Malaysia* yang sudah tua, uzur, berjalan pun tak boleh masih juga diperniagakan oleh Semangat 46. Kalau orang tua macam Tunku mereka boleh perniagakan untuk kepentingan diri, macam mana nasib rakyat dan negara, kalau golongan serpihan ini ambil alih negara. Sepatutnya bapa kita, kita suruh duduk di rumah baik-baik. Ini kerja karut ...  
(Gambar di hari penamaan calon Ampang).





kalau Ku Li yang jadi Perdana Menteri  
tentu Ibrahim Azmi jadi Menteri Agama. Kesihan Yusof Nor  
terpaksa menganggur. Semuga tak buat parti serpihan.



“Tolong! Tolong! Saya kena kidnap. Mereka aniayakan saya. Sebenarnya saya sudah tak larat. Tolonglah lepaskan saya dari seksaan ini”  
(Gambar ini diambil pilihanraya kecil Johor Bahru 26 Ogos 1988)



Tunku dengan Pak Yem ini siapa yang lebih tua?  
Kesian ... Kedua-dua mereka ini *rumah dah kata pergi kubur dah kata mari*. tapi masih sanggup dijadikan khadam oleh Ku Li dan Semangat 46. Semangat jenis apakah ini? Buat aniaya pada orang tua-tua saja.



# GHOST BUSTERS VS AHLI-AHLI SIHIR MALAYAN UNION

**“E**ngland was prepared to grant political freedom to all her Colonial possessions as soon as a generation of intellectuals and politicians imbued through English education with the ideals of English culture were ready to take over but under no circumstances would the British Government for a single moment tolerate an independent Islamic state.”

Petikan dari tulisan Lord Cromer dalam bukunya **‘Modern Egypt’** yang dihasilkannya dalam tahun 1908, iaitu 80 tahun yang lampau bermaksud: **“England sudah pun bersedia untuk memberikan kebebasan politik kepada semua takluk jajahannya sebaik sahaja satu generasi intelek dan ahli-ahli politik yang dididik menerusi pendidikan British serta dengan penyerapan nilai-nilai kebudayaan British sudah bersedia untuk mengambil-alih. Namun, biar sesaatpun kerajaan British tidak akan bertoleransi dengan sebuah negara Islam yang bebas dari pengaruh barat.”**

Tiga Perdana Menteri sebelum Datuk Sri Dr. Mahathir adalah mereka yang mendapat pendidikan Inggeris. Tunku Abdul Rahman Putra Perdana Menteri yang pertama kalau kita selidiki kehidupannya, kebudayaan yang menjadi amalannya masih lagi jelas kebaratan. Mungkinkah kerana Mahathir bukan lagi mewakili gambaran orang yang dikehendaki oleh British baik dari segi kehidupan mahu pun kebudayaan ataupun cara mentadbirkan negara dan bangsa, maka Mahathir kini perlu ditentang habis-habisan?

**Tuhan tidak akan mengubah nasib seseorang melainkan orang itu mengubah nasibnya sendiri.**

Al-Quran.

Jika disemak kembali, mengikut buku sejarah bangsa Melayu belum mempunyai satu sejarah yang agung yang dapat dibanggakan, sama ada sejarah sebelum atau sesudah merdeka. Apakah kerana generasi yang terdahulu tidak mampu mencipta sejarah agung untuk bangsa Melayu, maka kita pun mesti membiarkan sejarah yang ditulis oleh mereka terutama mengenai Islam memperdayakan kita? Kini dizaman kebangkitan Islam kita mempunyai cita-cita besar untuk menjadikan bangsa kita setanding dengan bangsa-bangsa lain yang maju didunia. Dari itu kita mesti berani mengkritik diri dan sanggup menghadapi apa saja ujian dan cabaran.

Kata-kata Dr. Mahathir di malam puisi panjang untuknya pada 24 April tahun 1982 seperti

dibawah ini saya muatkan semula untuk menungan kita bersama.

**‘Saya mimpikan sebuah negara di mana tiada siapa yang papa – setiap orang adalah memadai cukup pakaiannya, sambil menikmati usia lanjut yang sihat – sebuah negara di mana setiap anak kita menikmati pelajaran yang secukupnya agar nanti, bila tiba masanya, mereka akan berkemampuan mengambil tanggungjawab dari ibubapa mereka – lebih-lebih lagi, saya mimpikan sebuah negara yang akan dihormati dan dicontohi oleh setiap negara lain di dunia ini.**

Datuk Seri Dr. Mahathir.

Mimpi dan cita-cita Mahathir sedang di praktikkan diperkampungan Al-Arqam. Di Al-Arqam tidak ada manusia yang menganggur. Mereka hidup cukup makan dan pakai serta bekalan pelajaran untuk dunia dan akhirat dan mereka hidup bebas dalam konteks Islam yang boleh dibanggakan.

Mari kita imbas kembali ke zaman Hang Tuah. Apakah kita sudah cukup berbangga dengan sejarah kepahlawanan Hang Tuah yang sanggup membunuh sahabatnya sendiri atas prinsip setia kepada Sultan? Begitu juga dengan keberanian Hang Jebat yang menderhaka dan menjadikan saudaranya sendiri sebagai seteru dan yang bergelimpangan mati akibat pergaduhan mereka berdua adalah umat Melayu sendiri. Namun kini ada orang yang mahu jadikan Jebat sebagai hero.



Seorang mukmin tidak seharusnya dipatuk kali kedua oleh ular dilubang yang sama. Hanya umat yang meneliti sejarah saja yang dapat mempelajari dari lubang dan jurang yang pernah membawa celaka pada bangsanya.

Mari kita bertanya lagi, apakah kita sudah cukup berpuas hati dengan keberanian Dato Sagor yang sanggup membunuh Residen Inggeris di Pasir Salak? Atau Rosli Dhoby yang telah membunuh Dunken Stewart, Gabenor Sarawak? Sesudah itu Inggeris masih juga terus berkuasa dan yang jadi mangsa orang Melayu juga.

Apakah kemajuan yang telah dicapai oleh umat Melayu sama ada dari segi kerohanian pemikiran dan kejayaan kebendaan, atau pun sejarah kepahlawanannya yang bolih kita bangga-banggakan? Atau apakah sejarah bangsa Melayu masih lagi berada ditahap yang masih lagi boleh ditafsirkan sebagai *'backward'*?

Di Perak orang Melayu sama Melayu masih terus juga bertelagah. Ramai diantara mereka yang tidak senang adanya kuasa ditangan pemimpin Melayu yang mereka anggap tidak sehebat dan segagah mreka dan mereka mesti binasakan orang yang lebih berjaya dari mereka untuk kepentingan politik kotor yang menjadi amalan politik cantas mencantas hari ini. Begitu juga di Sarawak dan di negeri-negeri lain di Malaysia.

Bilakah agaknya sejarah keagungan bangsa Melayu yang sebenarnya seperti zaman keagungan kesultanan Melayu yang dapat menegakkan politik

bermoral serta kerjasama ilmuan serta pemerintahan yang dapat menegakkan keadaan akan berulang kembali?

Dari dulu hingga ke hari ini perpecahan demi perpecahan di kalangan bangsa Melayu tidak juga dapat diatasi dan masih berkeadaan seperti penyakit yang sukar diubati. Ianya sama seperti dalam masa kita sibuk menghadapi peristiwa Malayan Union dulu. Orang-orang Melayu ketika itu tidak mahu duduk dalam sebuah pertubuhan yang besar yang mereka sama-sama tubuhkan, iaitu Parti Kebangsaan Melayu Malaya (PKMM). Antara mereka sesama sendiri masih lagi terdapat golongan yang mementingkan kedaerahan dan kenegerian. Maka itulah sebabnya pada ketika itu tumbuhnya lebih dari lima puluh buah pertubuhan, kesatuan dan persatuan Melayu diperingkat daerah.

Pertelingkahan ideologi sesama ulama seperti yang terjadi antara Pusat Islam dan Al-Arqam masih juga berterusan seperti dizaman tahun tiga puluhan dulu yang mana ada gulungan ulama yang digunakan oleh British dengan beralasan sebagai penasihat agama kepada raja-raja Melayu telah menuduh ulama muda atau kaum muda mengamalkan ilmu salah dan menentang raja-raja Melayu.

Alhamdulillah Allah mentakdirkan. Dalam hati perut orang-orang British tumbuh satu macam keinginan untuk terus menjajah negara ini dan memaksa agen Raja-Raja dan bangsa Melayu, supaya menerima projek yang dinamakan Malayan Union.

Di sebabkan niat jahat British yang berhasrat menakluki Raja-Raja dan bangsa Melayu inilah maka tumbuhnya perpaduan orang Melayu. Bangsa Melayu bangun bersatu, tentang Malayan Union dan terus kepada perjuangan yang besar, iaitu menuntut kemerdekaan. Itulah semangat 1946 yang sebenarnya. Semangat perpaduan Melayu untuk menegakkan maruah bangsa yang berlandaskan Islam.

Tiba-tiba 42 tahun kemudian, timbul segolongan pemimpin Melayu menamakan golongan mereka sebagai 'Semangat 46'. Mereka ini adalah dari golongan yang telah tewas dalam pertandingan merebut jawatan mengikut lunas-lunas demokrasi.

Tanpa memikirkan makna perkataan 'semangat' itu sendiri mereka berbangga dipanggil 'Semangat 46'. Menurut Kamus Dewan 'semangat' ialah **Spirit**. Spirit itu maknanya hantu. Saya takut kalau-kalau hantu Harrold Mac Michel orang yang mengasaskan Malayan Union itu telah menyerap kedalam semangat pemimpin-pemimpin 46. Ini kerana semua orang tahu British tidak mahu melepaskan negeri-negeri dibawah takluk jajahan yang telah dibebaskannya itu untuk menuju kearah keislaman, seperti yang dihayati oleh British mengikut kata-kata Lord Cromer lapan puluh tahun yang lampau. Apa lagi dibawah pimpinan Dr. Mahathir, ramai diantara sisa-sisa anak-anak angkat British yang pernah mewakili Britain memerintah negara satu masa dahulu kini kehilangan kedudukan bila team B yang disokong oleh Tunku



dan Tun Hussein Onn tewas ditangan Team A dalam tahun 1987.

Apabila menyebut orang-orang Melayu bersatu pada zaman itu, iaitu dalam tahun 1946, kita tidak boleh melupakan jasa-jasa wartawan-wartawan Melayu yang berkhidmat dalam surat-surat khabar Melayu, seperti Utusan Melayu di Singapura, Majlis di Kuala Lumpur dan Warta Negara di Pulau Pinang. Mereka menulis dengan serius meniupkan semangat setiap individu Melayu dan menyeru supaya bersatupadu, menentang projek Malayan Union dan menuntut kemerdekaan negara dari penjajah British.

Sejarah merupakan satu-satunya khazanah bangsa. Jauh daripada itu, apakah kita cukup senang dan bangga dengan kemerdekaan negara kita melalui perundingan yang diketuai oleh Tunku Abdul Rahman sehinggakan Inggeris sanggup berundur tanpa pertumpahan darah? Dulu mungkin kita bangga, tetapi setelah kita sedar yang kita ini dianggap lebih kurang macam kucing oleh Bapa Kemerdekaan, sedangkan orang-orang Inggeris dan Amerika macam harimau maka mulalah jiwa merdeka ini memberontak, kerana selama ini kita adalah satu bangsa yang berani, bangsa yang sanggup menyabung nyawa untuk mempertahankan maruah bangsa dan negara.

Sejarah silam menunjukkan betapa kita telah dipermainkan hingga kita terus jadi mangsa. Walaupun ramai pahlawan kita telah gugur akibat mangsa fitnah dan dendam, serta iri hati, namun mereka

tetap pahlawan kita.

Kesilapan besar para pemimpin kita adalah kerana mereka tidak berani memberi sanjungan kepada pahlawan kita seperti negara-negara lain di dunia. Sebaliknya mereka yang menjadi alat penjajahlah yang selalu diagung-agungkan dan di beri sanjungan.

Sesudah Malaysia merdeka, kita kehilangan Pulau Singapura dan banyak lagi pulau-pulau disekelilingnya. Tunku tetap juga dengan gelaran-nya **Bapak Malaysia**. Sandiwara apakah namanya ini? Kalau benar kita bangsa yang sudah merdeka, kalau benar kita mengamalkan demokrasi, kenapa kita takut bertanyakan hak milik kita? Tetapi kita terus membiarkan mereka yang menentang kerajaan terus mencabar dan mempersoalkan kedudukan pucuk pimpinan kita hingga timbul kacau bilau antara ummah?

Tunku Abdul Rahman, Dr. Mahathir, Tengku Razaleigh Hamzah, Musa Hitam, Ghaffar Baba tidak penting. Yang Penting ialah prinsip. Yang penting ialah kebenaran dan kita mesti berani mempertahankan prinsip dan kebenaran.

Kenapa kita takut nak tanya Yang Teramat Mulia Tunku? Kenapa beliau masih lagi belum menjelaskan kepada kita semua kenapa dan mengapa Singapura diserahkan tanpa membuat perundingan dengan orang Melayu? Kenapa beliau dengan senang hati telah menyerahkan sebahagian dari bumi Melayu yang sangat berharga dengan mudah sekali? Kenapa?

Kenapa kita masih terus membiarkan Tunku menjadi duri dalam daging kepada bangsa Melayu? Kenapa Tunku tidak biarkan rakyat hidup dalam aman. Bila lagi Tunku nak jadi seorang ayah yang baik dan adil?

Sementara Tunku masih kuat dan bertenaga tentu Tunku berani menceritakan kenapa beliau terus-terusan menentang Dr. Mahathir? Apakah marah beliau pada Mahathir itu personal? Semuga kemarahan dan keinginan 'Semangat 46' yang mahu menjatuhkan pemimpin ini dapat dihentikan dengan serta merta.

Tunku Abdul Rahman bernasib baik kerana rakyat Malaysia tidak memintanya mambayar wang ganti rugi atas tindakannya. Seandainya beliau berada di Korea tentu beliau sudah jadi seperti Chun, bekas Presiden Korea Selatan.

Cuba Tunku tengok bagaimana rakyat Korea mendesak kerajaan yang ada sekarang supaya Chun memulangkan semua harta selain dari \$20 juta wang parti yang telah pun dipulangkan. Bagaimana kalau orang Melayu desak Mahathir supaya tuntutan Tunku suruh dedahkan rahsia penyerahan Singapura dan tuntutan Tan Sri Othman Saat, Datuk Musa Hitam, Rais Yatim, Ku Li dan lain-lain ahli Semangat 46 supaya dibawa mereka semua kepada pengadilan rakyat.

Jika majalah Far Eastern Economic Review menafsirkan daerah Limbang bernilai US \$15 ribu juta, Pulau Singapura yang menjadi pusat perdagangan, kewangan dan teknologi ASEAN tentu-



lah bernilai berlipat-lipat ganda lagi.

Tunku nak bayar dengan apa? Tunku cuba-cubalah tanya dekat Datuk Musa. Manalah tahu kot kalau-kalau dia masih simpan lagi duit-duit untuk derma rumah UMNO. Kenapa rakyat yang menjadi penyokongnya tidak mempersoalkan tulisan-tulisan saya mengenainya, sebelum mempercayai segala tuduhan dan kritikan Musa terhadap Dr. Mahathir serta kerajaan yang ada?

Musa Hitam sudah ditawarkan jawatan menteri tak berportforlio. Sepatutnya dia terima atau tolak saja. Kenyataannya di akhbar entah berapa kali dibuat, berunding dengan pengikut-pengikutnya entah berapa kali telah diadakan, dan buat kedua kalinya rundingan dengan Tan Sri Muhyiddin, Menteri Besar Johor akan diadakan. Akibat permainan Musa, ramai rakyat Johor jadi keliru dan bercelaru. Begitu juga Ku Li dan apa akan terjadi pada lima orang dari mereka yang dipelawa masuk jadi ahli M.K.T?

Bila kita korek cerita-cerita lama, tentu ada orang akan kata perbuatan ini satu dosa besar sama dengan menfitnah. Pada hal kita sekadar bertanyakan sesuatu untuk rakyat berfikir, jangan dengar cakap sebelah pihak saja. Golongan serpihan tak habis-habis mengungkit-ungkit dan terus mencari salah UMNO dan Presidennya dan terus memburuk-burukan kerajaan dibulan yang baik dalam ceramah-ceramah agama mereka untuk sambutan Mauludil Rasul.

Bekas-bekas pemimpin UMNO yang sudah jadi

kaya raya dengan duit rakyat terus mengganggu dan cuba memusnahkan bangsa dan negara yang tidak berdosa? Penulis tak boleh sentuh mereka tetapi saya percaya rakyat yang bersikap kritis dan yang cintakan bangsa dan negara dengan ikhlas akan dapat hentikan huru hara dan sengketa yang ditimbulkan oleh golongan serpihan ini? Jika mereka berani berfikir berani membaca tulisan yang mendedahkan cerita yang sebenarnya.

Tunku dan ada diantara golongan serpihan turut terlibat dengan kemerdekaan. Mereka juga turut terlibat dengan mematikan UMNO hingga umat Melayu menjadi huru hara hingga ke hari ini.

Bagaimana kalau kita bertanya apakah Tunku dan golongan serpihan yang sentiasa tidak pernah puas hati dengan kerajaan yang ada hari ini sama seperti yang didakwa oleh Lord Macauley dalam satu catatan kertas minit yang sangat tidak popular yang tertulis dalam bulan Febuari tahun 1836.

*"To form a class of people who may be interpreters between us and the millions whom we govern; a class of persons, Indian in blood and colour but English in taste, in opinion, in morals and intellects."*

**"Demi membentuk satu golongan orang-orang perantaraan di antara kita dan jutaan manusia yang kita takluki, satu golongan manusia pada darah dan warna kulitnya sahaja India tapi kehidupan, citarasa, pendapat, moral dan sifat inteleknya tetap Inggeris."**

India dan Malaysia adalah bekas tanah jajahan

takluk Inggeris. Nasib yang sama dialami oleh orang Melayu seperti rakyat India kerana dipermainkan oleh golongan perantaraan yang menjadi pemisah antara Inggeris dan Melayu. Mereka inilah yang dikatakan talam dua muka.

Dan untuk menguatkan bahawa adanya orang Melayu yang menjadi agen Inggeris terutama di bidang agama, Mr. Ewing dari Mission College semasa menjawab di dalam 'Urdu Digest' menyebut

*"While it is true that we have not succeeded much in converting people to Christianity, our objective is not limited to conversion. We want the students to be influenced by western culture, modes, habits and thoughts. True they (students) did not become Christians, but it is a measure of success that nobody passing through our institutions ever remains a Muslim in the true sense. If mission schools only achieve this much our investment is fully repaid."*

Kata-kata Ewing itu, jika diterjemahkan, bermaksud begini: **"Sementara benar bahawa kami (Inggeris) telah tidak berjaya menukarkan agama pribumi kepada Kristian, namun matlamat kita tidaklah terbatas setakat penukaran agama sahaja. Kami mahukan para pelajar terpengaruh dengan kebudayaan, tatacara, kebiasaan dan pemikiran barat. Memang benar mereka (para pelajar) tidak menjadi penganut agama Kristian, namun itulah kejayaan kita kerana tidak ada seorang pun yang pernah menjejakan kakinya dalam**



**institusi-institusi kita keluar serta kekal sebagai seorang Islam dalam erti kata yang sebenarnya. Jika sekolah-sekolah dakwah ini hanya berjaya mencapai yang sedemikian, maka kita bolehlah menganggap bahawa pelaburan kita sudahpun mendapat pulangan balik.”**

Mereka yang sudah dididik dan masih menjadi agen-agen pemikiran imperialist barat merasakan penerapan nilai-nilai Islam, adanya Menteri Pendidikan yang berjiwa Islam, adanya Menteri Penyiaran Datuk Mohd Rahmat, walaupun tidak berubah dan tidak berserban dan tidak banyak bercakap mengenai Islam, tapi dari segi perbuatan telah menanamkan semangat cintakan negara melalui bendera dan perasaan setia dengan lagu setia, bukankah cintakan negara itu sebahagian dari Iman? Dan kesetiaan kepada Tuhan, Nabi dan pemimpin itu dituntut oleh Islam?

Cara Tok Mat mentadbirkan R.T.M kini ada mempunyai unsur-unsur keislaman dan menghidupkan budaya Melayu. Sebab itulah agaknya Tok Mat menjadi sasaran Musa Hitam dan kuncukuncunya di Johor. Sudahlah Musa Hitam seorang yang durhaka pada raja, pada parti kini mahu bawa bangsa Melayu ke kancah penderhakaan. Shahrir (kunci) telah menjadi macam murid yang saling tak tumpah seperti gurunya. Sekarang mereka berdua meluaskan pengaruh mereka agar rakyat Johor menderhaka sama pada pemerintah dengan menanamkan indoktrin yang bertentangan dengan

agama dan adat. Siapakah yang nanti akan menjadi *the real 'Ghoster Busters'* untuk menangkap ahli-ahli sihir Malayan Union yang sedang bermaharajalela itu?

Sewaktu saya berada di Medan dalam bulan November 1988, saya diberi tahu seorang teman bahawa dikota Medan ada orang-orang yang memuja-muja semangat orang yang telah meninggal dunia. Perbuatan ini dikenal sebagai jailangkung, dengan menambatkan sebuah pensil di bawah sebuah raga kecil. Setelah diberikan segala puji-pujian, raga itu akan bergerak dan pensil itu akan menuliskan segala apa yang dikehendaki daripada orang mati berkenaan.

Karena hampir semua pertanyaan dapat dijawab oleh jailangkung tersebut, bagi orang-orang yang khusuk mengerjakannya ada menjadi gila.

Nota: Tulisan di atas merupakan rencana saya yang tersiar dalam akhbar Mingguan Kota keluaran 11, Dec, 1988 di bawah tajuk 'Ghost Busters vs Hantu-Hantu Malayan Union'. Terima kasih kepada 'Mingguan Kota'.



Shahrir, Rais, Ku Li, mendakwa mereka mahu memperjuangkan nasib rakyat. Nasib sendiri pun terubang ambing, parti pun masih belum berdaftar. Jadi macam mana nak memimpin antara satu sama lain kalau sendiri pun tak sebulu.





"Apa macam ..... Ampang bagus ka?  
Datang, gua mesti datang punya. Gua hantar tape tolong sama lu. Olang  
kata gua takut serupa itu JB Shahrir dulu. Parit Raja gua datang itu ikan  
piranha takut sama gua. Kuda tempang tak takut ke?"



Hee ... Hee ... Hee ... Hee ... Hee.

Sekarang siapa main siapa?

Hee ... Hee ... Hee.

Harun, lu caya gua, gua caya sama lu tapi lu fikir Mahathir. Ku Li masih caya sama lu?

Macam mana Hussein Onn, Shahrir bila-bila pun tak caya lu punya. (Gambar di hari Penamaan Calon Ampang)

# MUSA HITAM MUSA CHOKLAT

**O**rangnya tidak tinggi dan tak pula pendek. Tapi jika dibanding dengan tokoh-tokoh politik lain beliau lebih rendah lagi. Dahinya luas seperti padang pasir. Kata orang tua-tua, orang ber-dahi luas cerdik.

Sebutir tahi lalat sebesar biji saga terletak dibawah mata kanan. Suka tersenyum dan amat gemar ketawa. Bila ketawa dia macam gagal mengawal diri.

Pernah menikahi wanita asing tapi jodoh tak lama. Mereka berpisah. Jandanya menikahi lelaki lain, dia pun ikut sama mengahwini seorang model. Jauh lebih jelita dari jandanya. Jika dilihat pasangan ini nyatalah mereka bukan macam suami isteri tetapi lebih macam anak dan bapa. Per-bedaan umur amat ketara.

Siapa orangnya?

Tidak ramai rakyat Malaysia yang tidak kenal pada Datuk Musa Hitam. Jika dulu ketika menjadi Timbalan Perdana Menteri dan Timbalan Presiden UMNO beliau merupakan seorang tokoh politik yang popular, kini sesudah melepaskan semua jawatan-jawatan politiknya, sesudah men-



dapat gelaran Musa coklat, popularitinya masih lagi kekal.

Begitupun, populariti seseorang itu bukanlah bermakna ianya disukai oleh para sahabat handai dan juga masyarakat umum. Seseorang itu boleh popular kerana perbuatan serta tingkah lakunya. Jika tingkahlaku, tutur kata seseorang itu baik maka ia popular sebagai orang yang baik. Begitulah juga disebaliknya.

Musa bin Hitam atau Musa Hitam (sekarang ini Musa Coklat) adalah merupakan tokoh politik yang kedua popular selepas Dr. Mahathir Mohamad. Musa amat popular kerana sejak menceburi diri di dalam kancah politik, banyak tindak tanduknya tidak disenangi oleh kawan-kawan yang seangkatan di dalam perjuangan. Apatah lagi oleh musuh-musuh politiknya. Musa menjadi popular kerana beberapa isu yang beliau selesaikan bukan sahaja tidak selesai, malah menimbulkan kontroversi serta tidak disenangi oleh orang ramai.

Dikalangan orang-orang Melayu, Musa sangat popular kerana beliau berjaya meletakkan dirinya sebagai jaguh orang-orang Melayu. Dari nada ucapan dan isi ucapannya jelas memperlihatkan semangat kecintaan yang tinggi di dalam menyelesaikan masalah yang dialami oleh orang-orang Melayu. Imej ini sesungguhnya berjaya meletakkan dirinya lebih popular, lebih berjaya dari Tengku Razaleigh Hamzah.

Sekiranya Tengku Razaleigh dilihat lebih condong kepada orang-orang Cina, Musa pula dilihat

sebaliknya. Sama juga macam Dr. Mahathir mempunyai imej ultra. Pro Melayu.

Tengku Razaleigh menyedari betapa Musa naik mendadak kerana imej radikalnya itu. Untuk menyaingi imej ini Tengku Razaleigh tentulah menghadapi kesulitan kerana darah ningrat yang mengalir dalam dirinya itu amat sukar untuk diketepikan. Dia tentu tak sanggup untuk turun ke bawah, membuang title Tenggunya itu. Di Kelantan misalnya, rakyat terpaksa berpatik dan berengku apabila berbual dengan Tengku Razaleigh. Keadaan seumpama ini samalah ketika dizaman Tunku Abdul Rahman Putra menjadi Presiden dan Perdana Menteri dulu. Ahli-ahli UMNO terpaksa berpatik bila menemui Tunku. Jika tidak berbuat demikian, Tunku akan merasa terkilan. Disebabkan adanya "gap" inilah yang membuatkan Tunku tidak begitu disayangi sepertimana ahli-ahli UMNO lebih menyayangi Tun Abdul Razak. Itulah sebabnya maka rakyat lebih mudah bergaul mesra dengan Tun Razak.

Keistimewaan ini bukanlah ciptaan manusia. Ianya adalah ciptaan Tuhan. Tunku dan Tengku Razaleigh dilahirkan di dalam istana. Justeru itulah mereka terpaksa hidup menuruti adat resam kebangsawanan mereka yang turun temurun. Tuhan pula menjadikan Tun Razak, Dr. Mahathir dan Musa sebagai orang kebanyakan. Mudahlah mereka bergaul dengan sesiapa tanpa perlu menggunakan bahasa istana.

Tetapi ini tidak bererti seorang berdarah ningrat

seperti Tunku dan Tengku Razaleigh tidak boleh mengorbankan darah keturunan. Mereka boleh meminta orang ramai memanggil mereka Tunku ataupun YB ataupun apa jua panggilan. Panggilan patik ataupun Engku tak perlu digunakan. Macam Tengku Razaleigh yang dianugerahkan gelaran Tan Sri, hendaklah dia menerima dan menggunakan gelaran tersebut. Gelaran Tan Sri diberikan oleh Yang DiPertuan Agung, maka wajarlah dia menggunakan gelaran itu. Tak manislah gelaran yang setinggi itu diberikan tetapi tidak digunakan secara rasmi. Lebih baik tidak diberikan langsung.

Tengku Razaleigh amat menyedari Musa mempunyai imej "kampung", justeru itu membuatkan ahli-ahli UMNO lebih mudah menerima Musa dari beliau. Memang dari segi kebolehan dan pengalaman, Tengku Razaleigh telah membuktikan kegigihan, keupayaan, ketabahan dan kebijaksanaan di dalam mengendalikan tugas yang diamanahkan dengan sebaik-baiknya.

Tapi di dalam politik, kebolehan bukanlah satu kriteria yang menentukan seseorang itu boleh jadi menteri ataupun timbalan menteri. di dalam politik, orang lulus Tingkatan Lima sajapun boleh jadi menteri. Semuanya terletak kepada nasib dan peluang.

Dr. Nordin Selat mempunyai kelulusan yang tinggi dan pengalaman politiknya mendalam. Tetapi lihatlah apa yang dia perolehi. Paling tinggi beliau dapat jadi seorang senator sahaja. Kata orang sekarang habuk pun tak dapat.



Tetapi Datuk Khalid Yunos dan Encik Mustapha Mohamad, walaupun tidak mempunyai kelulusan universiti tetapi peningkatan mereka di dalam kerjaya politik amat cemerlang. Datuk Khalid adalah bekas wartawan Utusan yang sekarang menjadi Timbalan Menteri Kemajuan Tanah dan Wilayah manakala Encik Mustapha Mohamad pula ialah Menteri Kebajikan Masyarakat.

Lihatlah betapa keciwanya Tengku Razaleigh yang kononnya kaya dengan pengalaman politik dan luas pengalaman pentadbiran apabila dia tewas pertama kali kepada Musa pada tahun 1981 bagi jawatan Timbalan Presiden UMNO. Beliau menyedari bahawa dia tidak sehebat Musa dalam banyak segi.

*"Saya telah menjadi Naib Presiden selama tiga penggal berturut-turut dan sebelum itu Ahli Majlis Kerja Tertinggi. Ianya bukan soal darah keturunan. Mereka menerima saya sebagai individu. Saya kalah kerana saya tidak berkempen bersungguh-sungguh. Saya tidak memekik dengan slogan atau janji-janji. Saya tidak berlagak sebagai seorang pelampau atau seorang perkauman kerana saya tidak suka berlagak demikian. Saya suka menjadi seperti diri saya hari ini dan membuat kerja dengan diam sepertimana yang telah saya lakukan selama ini. Dan jika saya bercakap tentang kecapaian saya, orang akan kata saya meniup trumpet sendiri."*

Suka atau pun tidak, Tengku Razaleigh tewas kepada Musa, seorang anak muda yang junior jika dibanding dengan Tengku Razaleigh dibidang

politik. Berlagak ataupun tidak berlagak, Musa berjaya meletakkan dirinya sebagai radikal. Sifat-sifat ini sangat disukai oleh orang-orang Melayu.

Tengku Razaleigh barangkali tidak suka menjadi seorang yang radikal dan masih suka bersikap seperti sekarang. Kerana tidak suka jadi seorang yang radikal, Tengku Razaleigh gagal mengatasi Musa. Barangkali senario yang saya sebutkan tadi sudah tidak lagi sesuai hari ini. Sekarang Tengku Razaleigh sudah dilihat sebagai tokoh radikal yang berhaluan kiri. Radikal yang berhaluan kiri yang dimaksudkan disini bukanlah radikal fahaman komunis tapi perbuatan memecah tradisi dengan menentang Dr. Mahathir dan UMNO secara terbuka. Sekarang Tengku Razaleigh sudah jadi seorang radikal yang berhaluan kiri, baik dari segi tindak tanduk mahupun pemikiran. Budaya dan adat lama UMNO sudah tidak diikuti, ia sudah berani mencabar kekuatan UMNO.

Kini Musa pula yang memperlihatkan watak yang hampir serupa dengan Tengku Razaleigh. Watak kekampungan yang ditonjolkan di dalam ceramah sekadar gula-gula untuk dihadihkan buat anak-anak yang memerlukan manjaan dan belaian. Patutlah bila keluar dari UMNO beliau menceburi bidang coklat. Rupa-rupanya sejak dari dulu lagi beliau sudah pun tahu cara menghadihkan coklat dan gula-gula kepada orang kampung. Bila orang-orang kampung dah kena coklat Musa, maka senanglah beliau menukar budaya kampung yang dipelopornya dengan budaya "kurang ajar" yang

pernah dipopularkan beliau tidak beberapa lama dulu.

Itulah sebabnya anak-anak muda yang membesar di zaman ini bukan sahaja tidak diajar menghormati pemimpin malah di bentuk supaya menjadi seorang yang kasar dan tidak berbudaya.

Contohnya sebaik saja Shahrir kunci diumumkan menang dalam pilihanraya kecil Johor Bahru pada 26 Ogos 1988, ramai para belia yang pro kumpulan serpihan mengangkat tangan, memekik-mekik dan melompat-lompat.

Shahrir kunci turut diberi gelaran Rambo. Selepas pilihanraya di Johor Bahru dulu, para pengikut beliau telah menimbulkan watak-watak ganas hingga membimbangkan para penyokong Barisan Nasional. Musa tidak cuba menyekat budaya Rambo sebaliknya mempersalahkan UMNO kerana mengwujudkan pasukan komando. Soalnya siapakah yang memulakan budaya gangsterism di dalam UMNO?

Musa tentu sedar bahawa di dalam pilihanraya kecil Johor Bahru adanya beberapa tempat di kampung Melayu Majidee yang telah dikawal ketat oleh para penyokong Shahrir dan mereka bertindak menyekat penyokong Barisan Nasional dari berkempen. Bukankah ini juga budaya gangster yang kumpulan Musa amalkan? Jadi mengapa pula mempersalahkan Barisan?

Kecerdikan Musa ialah menggunakan Shahrir untuk kepentingan politiknya. Shahrir barangkali tidak menyedari dirinya dijadikan tikus ujian oleh Musa. Shahrir seronok mengikut rentak tari politik Musa meskipun dalam beberapa insiden yang lain,



Shahrir dikecewakan.

Bukan setakat Shahrir dijadikan tikus untuk diuji selidik, malah negeri Johor Darul Takzim pun hampir-hampir nak dijadikan bahan ujian. Kalau dulu politik Johor merupakan paling aman, tidak ada pecah belah seperti mana Kelantan ataupun Terengganu dan Kedah tetapi sekarang Johor sudah berubah.

Orang-orang Johor diajar untuk membenci pemimpin. Kononnya Dr. Mahathir tidak sukakan orang Johor. Dr. Mahathir digambarkan sebagai tokoh yang anti orang Johor. Contohnya Dr. Mahathir telah memecat tiga tokoh utama Johor-Musa, Shahrir dan Ajib Ahmad. Inilah lagu ghazal yang dimainkan oleh pancaragam yang dianggotai oleh orang-orang yang pro Musa. Mereka bersembunyi disebalik topeng fitnah.

Dan tak hairan jika sesetengah rakyat di Negeri Johor ikut menentang Dr. Mahathir kerana terpengaruh dengan budaya benci yang ditanam oleh orang-orang Musa.

Dulu politik Johor begitu stabil, tokoh-tokoh dari Johor dianggap tokoh yang berprinsip dan berpendirian. Lagenda Tun Dr. Ismail menjadi sebutan, cerita kehebatan permainan politiknya diputar berpuluh-puluh kali.

Tetapi mengapa pula Musa tidak mencontohi Dr. Ismail. Wajar benar Musa mengikut stail dan cara Dr. Ismail. Bila beliau meletakkan jawatan dari kabinet Dr. Ismail tidak keluar berkempen memburuk-burukkan Tunku. Setiap kali ditanya men-

genai perletakan jawatannya dia hanya tersenyum dan enggan memberikan hujah. Beliau ikut resmi padi, semakin berisi semakin menunduk.

Tetapi Musa bukan saja menghebahkan melalui surat-surat malah sanggup memberikan kenyataan akhbar di luar negeri memburuk-burukkan Dr. Mahathir. Contohnya sewaktu di Hong Kong, Musa menuduh kerajaan Dr. Mahathir akan buat apa saja untuk mempertahankan kuasa. Malah kata Musa, Dr. Mahathir akan mengistiharkan undang-undang darurat jika parti yang dipimpinnya tewas di dalam pilihanraya. Musa merasa bangga mendapat liputan meluas di luar negeri sedangkan nama Malaysia ikut tercemar. Ketuanan Melayu di negara ini mula dipersoalkan oleh orang-orang asing.

Inilah Musa Coklat yang dulu kita kenali sebagai Musa Hitam. Dulu dia suruh orang Melayu kurang ajar, sekarang dia tabur coklat pada mereka. Siapa tahu dalam coklat ada pecahar Brooklax. Lagi pun coklat dengan Brooklax serupa sahaja warnanya. Hanya pakar coklat macam Musa saja yang tahu membezakan. Mungkin sebab itulah politik Johor khasnya dan politik Malaysia amnya kini sudah jadi macam sarkis. Rakyat sudah mula terkincit-kincit.

Musa tak ubah macam marahkan pijat, kelambu dibakar. Hatinya puas jika berlaku sesuatu yang tidak baik kepada UMNO pimpinan Dr. Mahathir.

Saya sedar jasa Dato Onn bin Jaafar banyak ditumpukan untuk bangsa Melayu. Tetapi diwaktu

Tun Hussein menjadi Perdana Menteri, dimasa Tunku masih menjadi Perdana Menteri, jasa Dato Onn tidak dibesar-besarkan. Dato Onn mati di dalam sejarah Tanah Melayu. Tidak ada usaha oleh dua tokoh ini untuk mengangkat Dato Onn. Tetapi hari ini Tunku dan Tengku Razaleigh begitu memuja memuji Dato Onn seolah-olah Dr. Mahathir tidak langsung menghargai Dato Onn.

Kalau dua tokoh ini masih mengingati jasa-jasa Dato Onn mengapa contoh tauladan dan tokoh besar itu tidak dicontohi. Sebagai contoh Dato Onn sanggup berkorban, meletakkan jawatan dan keluar menentang UMNO dan bukannya mengaku dirinya UMNO seperti dua tokoh ini yang terus-terusan menentang UMNO. Kononnya UMNO sekarang tidak sama, tak seperti UMNO zaman dulu. Barangkali apa yang cuba diperjuangkan oleh Tunku ialah agar UMNO sekarang memasukkan satu peruntukan istimewa didalam undang-undang tubuhnya khas bagi mengakui jasa-jasa Tunku.

Kebanyakan orang-orang Johor merasakan saya tidak sayangkan pemimpin-pemimpin Johor. Tulisan saya yang banyak mengkritik Musa dijadikan contoh saya anti orang Johor.

Tetapi sedarkah orang-orang Johor bahawa negeri Johor bercelaru sekarang adalah atas perbuatan orang Johor sendiri. Orang itu tak lain Musa sendiri yang telah menaburkan coklat yang bercampur Brooklax.

Hasil tindak tanduknya Johor kini sudah jadi macam Kelantan. Keluarga berpecah belah kerana



satu menyokong UMNO, satu menentang. Kenduri kahwin dipulaukan. Kenduri aruah turut diboikot. Sedarkah rakyat Johor bahawa Johor sekarang sudah tak seperti Johor dulu. Kalau dulu letakan tunggal kayu pun UMNO boleh menang dengan mudah. Hari ini orang-orang Melayu berkelahi sesama sendiri. Di Johor Bahru dan Parit Raja orang-orang Melayu melaknati satu sama lain.

Setiap kali saya bercakap tentang politik Johor saya teringatkan Dato Onn. Ketegasan dan pendirian politiknya begitu jauh jika dibandingkan dengan Musa ataupun Shahrir.

Siapa yang tidak menitikkan airmata apabila menerima berita perletakan jawatan Dato' Onn bin Jaafar dari jawatan Yang DiPertua Agung UMNO. Berita itu begitu lambat merangkak ke lubuk hati orang-orang Melayu di Johor kerana mereka tidak dapat menerima kenyataan bahawa orang yang mengasaskan UMNO sanggup pula keluar meninggalkan UMNO. Perbualan mengenai subjek ini menjadi panas dan menarik, mematikan berita-berita lain. Siapa jua yang berbicara mengenai perkara ini tidak terlepas dari memikirkan kesan dari perletakan jawatan Dato' Onn. Kerana bagi mereka, Dato' Onn itu UMNO dan UMNO itu Dato Onn. Sukar untuk dipisahkan Dato Onn dari UMNO seperti mana sukarnya untuk memisahkan UMNO dari orang-orang Melayu. Tetapi hakikat ini tidak ditolak begitu mudah. Lama kelamaan umum terpaksa menerima walaupun dengan begitu berat bahawa Dato Onn telah bertindak keluar dari

UMNO untuk mengasaskan sebuah parti politik yang bersifat multiracial (majmuk). Kisah sedih ini berlaku pada 28 Ogos, 1951 iaitu hari terakhir Dato Onn berucap kepada ahli-ahli UMNO.

Pesanan yang beliau sampaikan amat mengharukan jiwa yang mendengar, amanat terakhir beliau itu sungguh bererti sekali.

Antara lain Dato' Onn menghuraikan sebab musabab mengapa dia terpaksa bertindak keluar dari UMNO dan mengapa beliau harus berpegang teguh kepada prinsip untuk melihat UMNO menjadi sebuah parti majmuk, bukan hanya dianggotai oleh orang orang Melayu.

**Kepada mereka yang sukar menerima kenyataan ini beliau berpesan "... biarlah kita memandang kepada keadaan yang ada di Tanah Melayu ini dengan menggunakan cermin yang boleh nampakkan barang yang benar ada, dan bukannya cermin yang nampakkan mimpian-mimpian barang-barang yang karat-karat masa-masa yang telah sudah. Biar kita sedar iaitu hal dan keadaan di Tanah Melayu ada orang-orang yang bukannya keturunan orang-orang Melayu, tetapi yang kasih dan sayang kepada Tanah Melayu - barangkali lebih daripada... orang-orang Melayu. Biarlah kita sedar iaitu orang-orang Melayu sendiri telah menuntut supaya dijalankan kemerdekaan dengan secara demokrasi dan berkehendakkan suatu cara pemerintahan yang berdasarkan di atas**

demokrasi itu. Dan biarlah kita sedar iaitu suatu pemerintahan atau suatu negeri yang berdasarkan di atas demokrasi itu tidak boleh hendak memelihara hak negeri-negeri itu bagi kepunyaan satu pihak saja rakyatnya.”

Demikianlah keikhlasan hati Dato Onn di dalam memperkatakan pendapat peribadinya di depan ahli-ahli yang sudah tidak lagi sealiran di dalam menggerakkan dasar parti itu.

Dato Onn tidak cuba untuk mensabotaj UMNO dari dalam, malah berusaha untuk menamakan seorang tokoh yang berpengaruh yang beliau percaya boleh melayari UMNO menuju ke matlamat perjuangannya.

Dato Onn telah menamakan Tunku Abdul Rahman Putra sebagai penggantinya. Waktu itu Tunku berkhidmat dengan kerajaan kolonial sebagai Timbalan Pendakwa Raya Persekutuan. Dato Onn sangat tertarik kepada Tunku untuk mengambil alih tempat beliau memimpin UMNO kerana beliau percaya UMNO masih tebal dengan fahaman **“konservatif dan kebangsawanan-nya.”**

Maklumlah hal ini dapat difahami kerana UMNO lahir di Istana Besar Johor dan dianggotai oleh kebanyakan orang-orang yang berdarjat. Dato Onn sendiri adalah keluarga berdarjat. Salasilah keluarga beliau amat berbau fuedal.

Dan Tunku sendiri sewaktu menyertai pertandingan bagi jawatan Yang Dipertua Agung UMNO



di dalam mesyuarat agungnya selama dua hari berturut-turut iaitu pada 27 dan 28 Ogos, 1951 dengan mudah mengalahkan dua pencabarnya C.M. Yusof dan Haji Ahmad Fuad.

Di sini dapat dilihat dengan jelas betapa Dato Onn walaupun tidak bersetuju dengan corak perjuangan UMNO di waktu itu tetapi tidak bertindak membunuh UMNO. Malah beliau perkuatkan UMNO dengan membawa masuk Tunku untuk memimpin parti itu.

Sekiranya beliau ingin merosakan UMNO dengan mudah beliau boleh lakukan. Contohnya dengan meletakan tokoh radikal yang tidak pro Istana mengepalai UMNO.

Sekiranya ini terjadi sudah tentu UMNO tidak akan berjuang seperti mana yang diperjuangkan selama ini. Barangkali UMNO akan menjadi sebuah parti yang liberal dan tidak lagi memperjuangkan nasib bangsa Melayu.

Orang-orang Melayu Johor tidak harus bersifat sentimental dan menebal dengan semangat ke-Johoran. Orang-orang Melayu Johor yang berpandangan jauh hendaklah berani mengorbankan tokoh-tokoh yang mereka kira telah menderhaka kepada perjuangan bangsa.

Jangan biar diri mereka diperalatkan oleh se-gelintir pihak untuk kepentingan diri orang itu yang mana akibatnya orang-orang Johor menanggung malu besar.

Hari ini Johor berjaya melahirkan Tan Sri Muhyiddin Yassin, anak Johor yang berjaya men-

jadi tokoh utama. Selaku Menteri Besar banyak kejayaan dibuat tanpa memikirkan periuk nasi ataupun kariernya.

Johor berjaya menjadi negeri contoh di dalam sekelip mata jika dibanding sewaktu Othman Saat menjadi Menteri Besar. Tokoh muda ini sanggup turun ke padang menemui rakyat kerana dia sedar dia naik atas kehendak rakyat. Dia tidak perlihatkan kekayaan peribadinya, dia tidak miliki kereta jenis mahal-mahal seperti Othman Saat.

Nampaknya Johor beruntung kerana mempunyai Muhyiddin walaupun pada masa yang sama Johor berdepan dengan gelora politik yang ditiupkan oleh orang-orang yang gilakan kuasa dan sanggup melakukan kerja-kerja gila untuk mendapatkan kuasa tersebut. Mereka seolah-olah sedang menghadapi *'mental illness'*. Untuk menjelaskan keadaan *'mental illness'* mereka-mereka ini, suka saya memetik tulisan seorang pakar jiwa Amerika, Dr. Thomas Szasz dalam bukunya *'Myth of Mental Illness'*.

Dalam buku tersebut beliau menulis, *mental illness is a metaphor. Mental illness is not something a person has, but is something he does or is*".

Bila kita terjemahkan tulisan ini, maksudnya berbunyi lebih kurang begini: **"Penyakit mental (tak siuman atau otak tak center, kata sesetengah orang) adalah satu metafora. Penyakit mental bukanlah sesuatu yang dimiliki oleh seseorang, tetapi ianya ada sesuatu dari apa yang dilakukan olehnya."**

Jadi apakah keadaan celaru yang berlaku di negara kita ini disebabkan oleh permainan politik mereka-mereka yang mental illness?

Habis apa yang harus kita buat untuk mengamankan orang-orang bercelaru ini? Kalau orang gila, langkah yang bijak ialah menghantarnya ke pusat pemulihan. Ke Tampoi atau ke Tanjung Rambutan.

Di sini orang-orang Johor yang telah bersusah payah membina kekuatan politik harus berani mengorbankan seorang dua bagi menjamin kestabilan politik negeri dan nasional. Mengorbankan Musa tidak merugikan Johor, ia menguntungkan rakyat Johor. Rakyat tak perlu bersusah payah keluar menentang kerajaan sebaliknya menumpukan perhatian membangunkan Johor supaya setanding dengan Singapura. Kalau Malaysia belum mampu berdiri sama tegak dengan Singapura, barangkali Johor mampu.

Keistimewaan Musa ialah apabila dia bercerai dia tak gila talak. Tak macam sesetengah duda yang asyik berkunjung ke rumah jandanya kerana masih tergila-gilakan si janda itu.

Bagi membuktikan dia tak gila talak Musa memilih untuk beristeri lain, jauh lebih muda dan cantik pula. Barangkali dari segi ini Musa bukan gila talak. Tetapi dari sudut politik Musa boleh dianggap sebagai gila talak. Apakah bukti yang kuat untuk kita mendakwa dia gila talak? Sewaktu dia terserpih dari kumpulan Dr. Mahathir, Musa memilih untuk membawa diri ke luar negeri. Mera-




juk kerana jawatan kedua di dalam parti gagal dipertahankan sebaliknya tempat lamanya itu diambil alih oleh Ghafar Baba. Kekalahan di tangan Ghafar, bukan seorang intelek tentulah memberikan satu tamparan yang maha hebat kepada Musa.

Tapi bila gelora politik sedang melanda bumi Malaysia, Musa tiba-tiba muncul dilayar perak. Namanya diumumkan sebagai Ketua UMNO Bahagian Segamat. Ia tidak pula menafikan kemasukan semula kedalam UMNO. Entah apa yang tak kena, Musa secara tergesa-gesa keluar meninggalkan UMNO lalu menyertai puak Ku Li. Ia aktif di Johor bersama Shahrir.

Sekarang namanya diramalkan akan menyertai UMNO semula. Musa masih percaya kepada konsep UMNO, tak macam Ku Li yang sudah menolak wadah UMNO sebagai platform untuk meneruskan perjuangan di arena politik.

Nampaknya gila juga Musa pada UMNO, kalau tidak masakan dia sanggup pulang semula ke pangkuan parti itu? Kalau tak gila-talak gila apa yang harus kita panggil. Takan nak panggil Musa gila-gila?



"Apa pasal you ni Datuk, kurus-kurus pun berat juga". Zainal Abidin Zain gembira kerana kemenangannya, Shahrir kunci sudah jadi macam Sang Rajuna Tapa, ada kunci boleh buat huru hara dalam politik.



"Apalah lu ... Datuk. Gua caya lu Tuk bikin ini macam punya kerja. Kita kasi lu menang di Johor Bahru bukan suruh lu duduk mencangkung dekat Parlimen. Lu cakap mula-mula tak mahu angkat sumpah, lepas itu lu angkat sumpah juga. Lu tengok berapa ramai orang sudah sumpah sama lu".

"Cari makan Pak Cik .. Nak hidup ... Tak angkat sumpah tak dapat claun, pilihanraya sekali lagi belum tentu menang".





“Rir kita mesti main ‘politik breakdance’ baru peminat ramai”.  
“Tapi ingat sikit Tok ‘politik breakdance’ tak evergreenlah nanti orang cepat jemu. Tengku tak boleh ikut, dia cepat mengah”.

## SESAL DAHULU PENDAPATAN

**A**khbar *Watan* keluaran Khamis 5 Januari, 1989 melaporkan 'SHAHIR SAHKAN HANTAR ROMBONGAN KE AMPANG JAYA'. Ketua Semangat 46 bahagian itu, Datuk Shahrir Abdul Samad berkata pihaknya akan menghantar 20 bas untuk membawa rombongan dari Johor Bahru dan Senai untuk membantu. Katanya kepada *WATAN*, Semangat 46 bahagian Johor Bahru dan Senai yang juga di bawah kepimpinannya berasa terhutang budi kepada kumpulan Semangat 46 Selangor yang telah membantu kempen calon-calon Bebas Semangat 46 di Johor Bahru sebelum ini.

Katanya, walau apa pun keputusan mesyuarat Majlis Tertinggi UMNO tentang resolusi yang dirumuskan dalam Perhimpunan Melayu Johor, beliau tetap akan membantu kempen Datuk Harun."

Kenyataan Shahrir di atas menunjukkan dengan jelasnya bahawa beliau adalah seorang manusia yang hidupnya tidak berprinsip. Dulu semasa beliau menjadi Setiausaha politik Perdana Menteri Hussein Onn, beliau telah sama-sama menyokong

Hussein Onn yang menyaksikan Datuk Harun terpaksa meletakkan jawatan sebagai Menteri Besar Selangor. Ekoran dari peristiwa itu Datuk Harun tercampak ke dalam penjara.

Kenapa kini tiba-tiba sahaja Shahrir mahu menyokong Harun yang pernah menjadi musuhnya? Apakah dia takut kot kalau-kalau Harun akan jadi Perdana Menteri satu hari nanti?

Kerusi kawasan Parlimen Johor Bahru adalah kerusi orang Melayu dan orang-orang Cina tidak ambil kerusi tersebut. Orang Cina dengan sokongan DAP mengembalikan kerusi tersebut kepada yang hak, iaitu orang Melayu.

Kerusi Ampang Jaya adalah kerusi yang memangnya dimiliki oleh orang Cina. Jadi mengapakah orang-orang Melayu mahu merampas kerusi tersebut dari tangan orang-orang Cina. Apakah orang Melayu sudah lupa dengan peribahasa **'Hutang budi dibalas budi'**.

Kepada saya Shahrir terpaksa menyokong Harun kerana dia perlu meyakinkan penyokong Semangat 46 bahawa dia masih sebahagian daripada puak serpihan itu. Kenaikannya adalah berasaskan sokongan Serpihan, bukan atas kekuatan dirinya. Pilihanraya kecil Johor Bahru dulu berupa pertandingan antara Semangat 46 dan BN, bukan antara Shahrir dan Masood. DAP dan PAS, musuh tradisi Shahrir telah tampil memberikan sokongan kerana mahu membuktikan bahawa mereka mempunyai pengaruh untuk menentukan naik atau turun seseorang calon.



Shahrir yang bertanding di Johor Bahru adalah kerana kawasan itu dimiliki oleh orang-orang Melayu. Contohnya ialah di dalam beberapa kali pilihanraya, kawasan itu ditandingi oleh orang-orang Melayu. Shahrirlah orang Melayu yang diberi peluang untuk mewakili orang-orang di situ.

Tetapi di Ampang Jaya walaupun majoriti pengundi terdiri dari orang-orang Melayu namun kawasan itu telah diserahkan oleh UMNO kepada MCA. Shahrir yang menjadi anggota MKT lama mempunyai saham di dalam menyerahkan kawasan itu kepada MCA kerana atas semangat setiakawan.

Tapi hari ini bila Shahrir sudah terkeluar dari establishment, dia pura-pura pula menyokong calon bebas. Ia mengistiharkan diri menentang calon MCA dan menyokong Harun kerana dia boleh memperalatkan Harun untuk menjadi ayam sabungnya menentang Dr. Mahathir. Shahrir yang bertindak sebagai Setiausaha Politik Tun Hussein dulu telah cuba menyisihkan Harun dari orang-orangnya. Akhirnya Harun dijatuhkan dari kerusi Menteri Besar akibat permainan politik Hussein dan Shahrir.

Dengan demikian kedatangan Shahrir ke Ampang Jaya boleh menyulitkan kedudukan Harun kerana orang-orang yang masih setia dengan Harun masih belum dapat melupakan trajedi lama itu. Bila dikenang-kenang, luka lama kembali berdarah. Sakitnya hati hanya Tuhan saja yang mengetahui.

Dalam konteks muafakat antara DAP, Serpihan

dan PAS maka sewajarnya kerusi Ampang Jaya diberikan kepada DAP kerana kawasan itu ditandingi oleh MCA. Selaku parti yang mewakili masyarakat Cina DAP harus membuktikan bahawa orang-orang Cina menyokong mereka. Untuk membuktikannya maka DAP perlu diberi kesempatan untuk bertanding.

Tetapi malangnya Harun awal-awal lagi mengistiharkan bahawa Semangat 46 akan bertanding dan mengumumkan bahawa beliaulah selaku calon bebas yang akan menentang calon BN. DAP yang belum sempat membuat pengumuman terperinci dalam keghairahan Harun untuk jadi YB dan tidak boleh berbuat apa-apa. Kalaulah Serpihan benar-benar gentleman, maka kerusi Ampang Jaya tentulah diberikan kepada DAP sesuai dengan semangat hutang budi dibalas budi. Sebabnya tanpa menunjukkan semangat kemuafakatan maka DAP tentulah akan hilang kepercayaan kepada Serpihan dan menganggap ianya tak ubah seperti alat, digunakan semata-mata untuk kepentingan Serpihan. Barangkali kerana Lee Lam Thye seorang tokoh DAP yang lemah jika dibanding dengan Kit Siang, maka putaran politik Serpihan gagal ditangkis. Malah Lam Thye menuruti saja kehendak Serpihan kerana ia tidak mampu menyusun satu strategi untuk mengatasi strategi Serpihan. Kalau Kit Siang yang duduk di tempat Lam Thye tentulah DAP akan menjadi calon di kawasan Ampang Jaya.

Terkilannya DAP dan masyarakat Cina kerana tidak dihargai boleh dibaca daripada gerak geri ahli-ahli DAP di kawasan itu.

Tetapi mereka tak boleh buat apa-apa kerana mulut mereka dikunci oleh strategi Lam Thye yang tak diketahui hujung pangkal.

Dalam hati DAP tentu sudah dapat menilai bahawa semangat 46 hanya berminat untuk meletakan sebanyak calon yang boleh, memenangi pilihanraya samada kecil ataupun umum melalui sokongan DAP tetapi tidak sanggup berkompromi dengan DAP di dalam pembahagian kerusi.

Jika suasana syak wasangka di kalangan masyarakat Cina dan DAP berterusan maka 30 peratus pengundi Cina di Ampang Jaya akan diam-diam menyokong calon BN. Ini sudah dapat dirasai melalui kempen yang berjalan sekarang.

Sungguhpun demikian dengan adanya dua orang lagi calon Cina dari bebas, kita dapat menyaksikan kepada siapakah para pengundi Ampang mahu memberikan undi mereka. Kita tidak rasa hairan kalau mereka memilih calon bebas Cina kerana mereka terkilan dengan Harun yang sudah memainkan sentimen Melayu.

Secara lojiknya dengan mengalahkan Harun maka Serpihan akan tersedar dari lamunan bahawa mereka sebenarnya tidak kuat dan mereka memerlukan DAP untuk memenangi pertandingan. Dengan kekalahan Harun juga maka Serpihan



terpaksa berbincang semula dengan DAP di dalam menentukan pembahagian kerusi, strategi dan dasar perjuangan, bukannya membuat keputusan sendiri-sendiri saja.

Shahrir dan golongan serpihan nampaknya hanya mementingkan kepentingan golongan mereka sahaja. Begitu juga dengan Harun yang mahu merampas kerusi tersebut dari tangan orang-orang Cina.

Jadi apakah kalau faktor Cina boleh memberikan kemenangan kepada Melayu, tidak mustahil kalau faktor Melayu akan memberikan kemenangan kepada calon MCA. Lagipun calon MCA mewakili perjuangan Barisan Nasional. Perjuangan Barisan Nasional adalah sebahagian dari perjuangan UMNO. Perjuangan UMNO adalah perjuangan orang Melayu. Jadi tidak ada sebab mengapa orang-orang Melayu Ampang mahu memberikan undinya kepada seorang Melayu yang tidak mewakili mereka secara universal dan yang hanya memementingkan puak tertentu. Penduduk Ampang tahu Harun tidak akan dapat membela nasib mereka sebagaimana seorang ahli Parlimen Barisan Nasional. Mereka yang sedar tidak akan membiarkan kepentingan mereka dijadikan alat untuk kepentingan puak tersebut.

Tapi samada Harun kalah atau menang bukanlah soal pokok. Dalam sesuatu pertandingan, memanglah adat, ada yang kalah dan ada yang menang. Itu kerja Tuhan. Tuhan yang memberikan kemenangan kepada sesiapa sahaja yang disukaiNya. Tuhan juga telah memberikan demokrasi kepada manusia

samada untuk memilih jalan Allah atau jalan iblis. Jadi sekiranya Harun ditakdirkan menang, itu bererti pengundi di Ampang Jaya mahukan perpecahan terus berlarutan akibat keengkaran dan kemungkaran yang akan berlarutan.

Kemenangan Harun tidak akan merugikan Dr. Mahathir serta tidak akan juga menguntungkan bangsa Melayu seperti juga kemenangan Shahrir di Johor Bahru. Di sebaliknya ia hanya akan mengajar umat Melayu supaya mempelopori budaya 'pengikut mesti tentang pemimpin', murid mesti melawan guru', dan 'anak-anak mesti engkar kepada ibubapa' demi menunjukkan bahawa mereka itu kononnya benar dan kuat.

Kita semua telah memilih Demokrasi sebagai sistem kerajaan kita. Sama ada kita suka atau tidak kita mesti terima dengan hati dan perasaan yang terbuka kemenangan yang diperolehi oleh Datuk Shahrir. Kita umat Islam mesti patuh pada janji dan mesti taat kerana orang Islam yang tidak menepati janji dan berbohong bila bercakap dan mengkhianati amanah adalah orang yang munafik.

Sudah terantuk baru mengadiah, itu satu perkara biasa bagi manusia bersifat leka dan lalai. Orang tua-tua Melayu tahu bangsanya hanya akan menyesal sesudah melakukan sesuatu sebab itu pesan dan ingatan '**sesal dahulu pendapatan**' menjadi amalan orang tua-tua dulu. Sesudah calon Barisan Nasional kalah di Johor Bahru, baru saya teringat kata-kata Saiyidina Ali bin Abi Talib r.a. "**Bahawa kebatilan itu jika diatur dan dikemaskan**

**dengan rapi dapat mengalahkan yang hak, yang tidak teratur dengan kemas.”**

Kejadian ini berlaku sewaktu berkobarnya peperangan diantara Saiyidina Ali melawan Mu'awiyah di Sifin, dimana pasukan Saiyidina Ali mendapat kemenangan dan Mu'awiyah menderita kekalahan, lalu Mu'awiyah mengusulkan damai dengan menjunjung Quran di atas hujung tombaknya. Setelah itu Mu'awiyah berundur ke Bahgdad dan Syam lalu mengatur dan menyusun pasukannya semula. Setelah pasukan beliau teratur dan tersusun Muawiyah pun kembali menyerang Saiyidina Ali di Madinah. Pasukan Saiyidina Ali yang tidak teratur dan tersusun menderita kekalahan. Bukan-  
kah keadaan politik sekarang ini ada persamaannya? Manusia berada di dalam keadaan kebingungan.

**“Hai orang yang berselimut, bangun dan berilah peringatan! Besarkanlah pakaianmu, jauhilah perbuatan maksiat. Janganlah kamu memberi kerana hendak memperolehi yang lebih banyak dan hendaklah kamu, bersabar untuk memenuhi perintah Tuhanmu.”**

**(Al-Quran surah Muddatstsir: ayat 1-7).**

Sebelum saya meneruskan tulisan ini saya teringat akan pertemuan saya dengan Haji Ikhwan Nasir, bekas Yang Berhormat, bekas Setiausaha Akhbar Allahyarham Tun Dr. Ismail di Subang Airport. Kini menjadi pegawai penerangan khas UMNO.

Malam 26.8.88, saya adalah salah seorang penumpang yang sedang mencuba sebagai standby,



menunggu tempat duduk ke Alor Setar, kerana ingin mengikut SEMARAK di Sik.

Kebetulan saya bersua dengan Haji Ikhwan, saya sedang berbual dengan beberapa orang kawan dari Kelantan. Bila ditanya oleh seorang kawan mengenai kekalahan Haji Masood, dia cepat-cepat buat post mortem, antara isi post mortem yang diceritakan, yang tidak begitu sedap didengar oleh telinga saya. Kata Haji Ikhwan antara sebab-sebab kekalahan Haji Masood adalah kerana tulisan saya yang begitu kuat menghentam Shahrir dalam Mingguan Kota 28.8.88 tetapi khabar itu keluar lebih awal. Sekali ramal cukuplah. Katanya akibat dari tulisan saya pihak Shahrir makin tambah kuat menentang dan tambah hati-hati dan pengundi tambah simpati terhadap Shahrir terutama pegawai dan kakitangan kerajaan.

Saya jawab mudah saja, begitulah adat manusia opportunist bila sudah kalah mereka cari kesalahan orang di keliling. Salah sendiri mereka tidak mahu cari. Kalau nak buat post mortem biar adil. Menteri dan Timbalan Menteri serta setiausaha-setiausaha mereka dan pemimpin UMNO yang jadi "talam dua muka, gergaji dua mata" kenapa tidak salahkan sama?

Itulah kata-kata saya kepada Ikhwan Nasir. Tapi bila saya bertemu dengan geng-geng Shahrir yang lain, cerita mereka lain pula.

Rata-rata mereka mengatakan Shahrir tidak dapat lagi memaafkan saya diatas tulisan-tulisan saya yang mengkritik beliau.

Nampaknya kata-kata Shahrir ini berbau personal. Macam mana Shahrir nak jadi pemimpin kalau dia menganggap tulisan saya sebagai sesuatu yang berbentuk peribadi. Lagipun Shahrir mesti ingat, kalau dia tak mahu, maafkan saya, no problem. Itu antara dia dan saya sahaja. Tapi macam mana kalau rakyat Johor dan rakyat Malaysia amnya enggan memaafkan beliau di atas dosa-dosa yang dilakukannya dalam memecah belahkan perpaduan Melayu. Dosa yang semacam ini lebih besar. Jadi Shahrir janganlah sombong sangat. Sebagai seorang manusia, Shahrir kenalah tanyakan benda-benda berikut kepada dirinya sendiri.

Apakah diri kamu ini sudah cukup baik dan tidak pernah buat salah?

Apakah kamu wahai diri, tak boleh memaafkan kesalahan seorang makhluk Allah yang mana kamu boleh memaafkan dia maka Allah beri kamu pahala dan kesalahan kamu juga. Allah maafkan kerana Allah lebih-lebih lagi sifat pemaafnya dari kamu.

Kalau Allah maafkan kamu, ertinya Allah akan beri syurga pada kamu. Kamu mahu syurga? Kemewahan dunia pun sudah memikat diri kamu dan sering kali buat kamu menghabiskan umur kamu untuk itu.

Jadi kalau Shahrir inginkan kemewahan dan kebahagiaan yang hakiki Shahrir kenalah korbankan sedikit perasaannya pada waktu itu.

Orang UMNO lebih bersikap defensif dari ofensif. Masing-masing mahu jaga nama dan

kedudukan. Ada yang beri amaran agar Dr. Mahathir dan Tok Mat Rahmat, Anwar Ibrahim, Sanusi Junid supaya jangan datang berkempen di Johor. Alasannya orang Johor tidak senang tengok muka mereka. Orang Johor sudah buat keputusan muktamad mereka tidak mahu Mahathir. Mereka mahu tunjuk belang dan ego mereka.

Jentera pilihanraya tidak teratur dengan betul di dalam bilik gerakan, hampir tujuh puluh peratus dikuasai oleh orang-orang Shahrir. Kelemahan Barisan Nasional begitu jelas sekali.

Orang Johor anggap Shahrir hero mereka. Mereka beri bantuan kepada calon Bebas yang menentang kerajaan kerana pada pendapat mereka yang ditentang bukan Haji Masood, bukan Muhyiddin tetapi Dr. Mahathir. Mereka mahu menggantikan Mahathir dengan Musa dan mereka diyakinkan setelah Shahrir menang Dr. Mahathir akan dipaksa berundur. Shahrir dan golongannya akan masuk UMNO baru, merekalah yang akan menguasai UMNO Malaysia nanti.

Penyokong Shahrir tidak hiraukan seruan Datuk Onn '**menentang UMNO, sebagai menentang umat Melayu.**' Pada hal pesan Dato' Onn, **UMNO itu Melayu dan Melayu itu UMNO.** Itulah pesan Datuk Onn yang mereka agung-agungkan sebagai pengasas Semangat 46.

Mereka tidak peduli Shahrir berpakat dengan DAP walaupun yang terang dan jelas perjuangan DAP tidak senang pada bangsa dan raja-raja Melayu. Biar pun guru politik Shahrir, Musa



Hitam sembunyi-sembunyi untuk jaga keselamatan mana tahu kalau Shahrir kalah. Tapi kerana Musa disayangi oleh mereka, Musa buat apa pun tetap dapat sokongan orang Johor, kerana sifat kenegerian Johor yang sangat kuat.

Shahrir tidak lebih dari ayam sabung kepunyaan taukeh-taukeh yang sudah beracun pada taji, bagi menguji ayam sabung Melayu hingga mati. Mereka yang telah diberikan mandat pada Shahrir bangga dan gembira dapat kalahkan Razak Ahmad dan Haji Masood.

Kata orang bangsa Melayu pantang menderhaka. Itu Melayu di zaman Kesultanan Melaka, Musa derhaka tidak bergurukan Laksamana Hang Tuah, Jebat derhaka lebih menyenangkan Musa. Musa berjaya mendidik supaya orang Melayu kini bersikap kurang ajar, bunuh karier politik saudara sendiri tak apa, yang penting dapat kuasa politik.

Musa tak ambil tahu bahawa negara itu adalah kita dan kita itu negara.

Ajaran '**cintakan negara sebahagian dari iman**' tidak lagi jadi amalan, mereka yang tidak taat dan tidak setia, yang penting kuasa, duit dan pangkat serta kedudukan.

Sekarang mereka sudah dapat satu kerusi, kubu terakhir kebangsaan bangsa Melayu telah mereka tumpaskan. Nasib bangsa Melayu sesudah ini lebih baik kita serah saja pada Tuhan.

Kewajipan setiap pribumi untuk mempertahankan kerajaan, tanggungjawab mempertahankan kerajaan kita hingga ketitisan darah yang terakhir

jadi satu mainan. Pemimpin Melayu kini jadi budak suruhan, sekejap ke luar negeri, sekejap berada di dalam negeri untuk timbulkan kekeliruan.

Ada dua tiga orang penulis telah mengingatkan saya. Kata mereka saya sudah tercemar kerana saya turut terlibat secara peribadi berceramah dan berkempen pancing undi untuk Barisan Nasional. Katanya penulis tidak boleh memihak terutama berada di pihak kerajaan. Kalau hendak memihak juga duduk bersama membela penentang kerajaan.

Saya mengemukakan pertanyaan, bagaimana para penulis yang menggunakan kebebasan akhbar untuk menaikkan semula ahli-ahli politik yang sudah lagi tidak berkuasa? Ahli-ahli politik yang terang-terang korup dan penuh dosa terhadap bangsa dan negara. Menulis membantu pemimpin politik yang memberi sesuatu mahukan lebih banyak boleh dan menulis merosakkan, mengelirukan fikiran bagaimana? Itu adalah trend politik hari ini kalau mahu disanjung mesti jadi manusia yang anti establishment.

Saya mempertahankan Dr. Mahathir bukan kerana batang tubuhnya, tetapi pemikiran dan cara pentadbiran yang dibawa oleh Dr. Mahathir. Apakah kita semua sudah terlupa bahawa UMNO adalah satu parti politik yang tidak mempunyai ideologi? Apa juga amalan Presidennya, itulah ideologi UMNO.

Mungkin ramai yang buat-buat tidak tahu jiwa dan ideologi Dr. Mahathir. Perjuangannya untuk

umat Melayu dari sebelum dia pegang jawatan Perdana Menteri hingga hari ini sudah dipadam, diganti dengan semangat kebencian oleh musuhnya.

Berbaik dengan kaum lain bukan bererti dia jenis tak pa.... Walaupun dia orang Kedah yang pandai cakap tak pa.... tak pa... samakah akidah hidup Dr. Mahathir dengan Tunku yang sanggup ditarik dengan upeh ke sana ke mari, sanggup mengalahkan kerajaan yang dipimpinnya satu waktu dulu?

Mudah orang Melayu Johor lupa sejarah. Tengok Tunku menangis, lupa siapa yang lepaskan Singapura. Tengok pita Musa tak teringat ke Memali dan bagaimana Sabah boleh terlepas. Akhirnya menang sorak kampung tergadai. Johor di tangan Bebas, bebas dibawa kemana saja.

Dunia akui Dr. Mahathir sedang membawa Malaysia ke arah keislaman. Lihat saja beliau memberikan taraf kedutaan kepada P.L.O yang mana negara-negara Arab sendiri tidak berbuat begitu juga dengan kedudukan Mujahiddin. Keberanian memerangi dadah Antarabangsa. Bagaimana beliau dapat menutup mulut Australia supaya jangan campur tangan dalam urusan dalam negeri dia mengenai dasar luar kita. Ini yang golongan Datuk Shahrir tak seronok.

Ini yang tidak disenangi oleh Tunku, Tok Musa, Shahrir dan geng-geng mereka. **'The mind of Mahathir'** yang patut diterangkan pada rakyat yang fikiran mereka telah diracun oleh Shahrir dan geng mereka.



Tak apalah orang UMNO marah dan tidak terima kasih. Saya turun ke Johor mambantu pun bukan dijemput. Saya pengundi Di Johor Bharu. Saya merasa bertanggungjawab dan menemui pengundi di Johor Bharu kerana saya pun pengundi. Syukur saya pada Tuhan dapat juga bersalam dan bermesra dengan hampir ribuan orang. Kalaulah Menteri-menteri, Timbalan-timbalan menteri dan ahli Yang Berhormat ikut sikit jejak langkah saya, senyum dengan setiap orang, bersalam dengan ikhlas, benar-benar mahukan Haji Masood menang. Kalau tidak menang pun tidak kalah seteruk ini.

Berapa ramai orang UMNO yang sudah bersalam dengan ikhlas dan mesra, senyum dan memberi hormat dan tunjukkan wajah yang benar-benar gembira bertemu orang yang dia berjabat tangan dan merasakan orang itu penting kerana kuasa memberi undi itu ada di tangan rakyat? Rakyat bukan suka sangat pada Shahrir. Tapi kerana gengnya bersungguh-sungguh bersama rakyat maka rakyat pun terpersona dan terpikat.

Saya tengok kebanyakan Pengikut Dr. Mahathir lebih kurang macam dia juga, tidak ada P.R. tidak macam Tunku, Musa dan Shahrir dan orang-orang mereka yang sentiasa ramah mesra. Mungkin ada orang Mahathir yang baik dan rajin kerja tetapi tak tunjukkan ramah mesra, tak tunjuk sokongan bulat pada Dr. Mahathir.

Rakyat perlukan hubungan mesra antara manusia dengan manusia selain dari projek pembangunan,

sebab itu tambah hari tambah jauh rakyat dengan pemimpin dan pucuk pemimpin. Mereka bukan tidak tahu tidak ada pemimpin buat masa ini yang boleh mengambil alih dari Dr. Mahathir tetapi kerana kurangnya P.R. Mahathir. Jadi tuduhan kata nista terhadap Dr. Mahathir mereka percaya dengan melihat watak-watak manusia di sekeliling Mahathir yang menjadi angkuh dan sombong bila ada kuasa politik di tangan.

King Ghaz dulu gagal bukan kerana dia tidak ada vision, bukan kerana dia tak buat kerja, tidak pandai tetapi dia tak pedulikan orang. Dia kira kalau orang hendak sukakan dia suka, tak suka tak pa. Mahathir dan orang-orangnya kena belajar dari kesilapan King Ghaz dan belajar ambil hati dari Tengku Razaleigh Hamzah atau dari Allahyarham Presiden Zia Ul Haq. Kata Tengku di hari kematian Zia Ul Haq, Presiden Zia Ul Haq hantar buah mempelam istimewa. Dr. Mahathir kena buat macam itu juga. Hantar benda kecil macam itu, Tunku tentu sayang sama Mahathir bila Mahathir sudah mati nanti.

Tunku yang dianggap oleh orang Cina macam Tok pekong pada mereka banyak membantu selain dari perjudian haram yang dilakukan oleh orang Cina. Pertaruhan diadakan antara Shahrir dengan Razak pertaruhan yang melibatkan jutaan ringgit. Beting yang paling tinggi untuk Shahrir. Satu untuk Razak, lima untuk Shahrir tapi bila Shahrir menang bayar cuma empat saja. Nama Masood langsung tidak ada. Orang yang berjudi tentu mahu

Shahrir menang. Mereka pun beli judi yang macam beli empat nombor ekor. Satu lagi simpati orang ramai bila sebuah akhbar mengeluarkan Patung Tunku mahu dihapuskan dari bangunan Parlimen di pagi hari mengundi. Ini patut dikeji oleh Ikhwan Nasir. Kalau betul-betul nak buat post mortem yang baik fikirkanlah mengenai Faktor Cina dalam kemenangan Shahrir.


Buku yang sedang anda baca ini adalah satu post-mortem yang saya buat untuk pilihanraya kecil di Ampang Jaya. Siapa pun yang menang atau kalah bukanlah menjadi persoalannya, yang penting ialah apa akan terjadi pada bangsa kita yang mahukan diri mereka dipimpin oleh golongan serpihan. Mahukah kita semua digelar sebagai rakyat sebuah negara serpihan?

Nota: Rencana di atas adalah lanjutan dari rencana saya yang tersiar dalam akhbar Minggu Kota keluaran 4, Sept, 1988 di bawah tajuk 'Faktor China Beri Kemenangan Pada Shahrir'.





“Harun ah ... Lu caya sama gua, gua tentu caya sama lu. Gua punya olang banyak susah mau caya sama lu. Semua gua punya olang kenal lu sapa Halun ..... Kita tak lupa semua lu punya kerja dulu-dulu punya. Semua olang tahu la! ..... itu Cina Bukit tanam sayur pun tahu”.



“Kita nak buat apa dekat sini Chegu?”

“Pandai-pandai you lah Rir”.

“Datuk nampak macam takut-takut saja, pasal apa?”

“Tengok sikit punya banyak kamera tu Syed Hussein Alattas mesti ada ambil gambar nak bubuh dalam bukunya”.

(Gambar di hari penamaan calon di Ampang).

## GAGAK MENIRU AYAM HUTAN BERJALAN?

**S**ewaktu saya sedang minum coffee dalam kedai “Cafe De Paris” kepunyaan kawan saya di Komplek Tun Razak, Johor Bahru, seorang pemuda dari Sabah menegur saya, katanya dia peminat saya, dia sudah membaca hampir semua buku saya termasuk **Talqin Untuk UMNO**. Sesudah memperkenalkan diri dan kawan disebelahnya dia memulakan pertanyaan.

“Apa pendapat saudara mengenai Parit Raja?” Saya senyum tengok dia, dia meneruskan.

“Bagaimana, ada peluang Barisan Nasional boleh menang?”

“Apalah awak hendak fikirkan sangat tentang Parit Raja? Kalau mahkota atau Istana Raja yang dipertandingkan risau juga kita. Ini cuma Parit Raja saja yang nak direbutkan. Relelah.”

Dia tersenyum, dia tahu apa yang saya maksudkan.

“Saudara fikir bebas boleh menang lagi?”

“Zaman ikan kecil makan ikan besar, susah kita nak buat ramalan terutama kerana fikiran orang ramai kini tidak menentu.”

Dia tersenyum.



“Kenapa saudara bercakap macam itu?”

Kerana 'politik piranha' sudah bermula. Ikan pirana boleh makan seekor lembu di dalam sungai dalam masa kurang dari satu jam yang tinggal rangka saja.

“Kalau begitu nampaknya kita sekarang berada ditahap yang bahaya.”

“Benar, itulah sebabnya banyak negara mengharamkan rakyatnya memelihara ikan pirana. Walaupun hanya seekor di dalam akuarium di rumah. Apa lagi di parit atau di sungai.”

“Saudara ini cakap pasal ikan ke cakap politik? atau cakap politik dalam politik?”

“Terserah ikut pengamatan saudara, piranha biarpun tubuhnya kecil tetapi giginya besar keras dan tajam, lebih merbahaya dari jerung. Jika semangat piranha ini termasuk dalam tubuh orang politik tak lama lagi kita akan jadi macam Filipina, Iran atau Burma. Rakyat saja seronok nak jatuhkan kerajaan.”

“Sepatutnya di Parit Raja ini anak tempatan boleh menang kerana tempat ini pengundinya 90 peratus Melayu.” Dia mengalihkan perbualan. Tak suka cakap politik tinggi.

“Undi Melayu minority, saudara tersilap agaknya?”

“Maksud saudara meajority undi Cina?”

“Bukan. Undi Jawa, bukan Melayu, bukan Cina.”

“Melayu dan Jawa itukan sama saja.”

“Itu dinegeri lain, bukan di Johor, Johor lain sikit sentimen kesukuannya kuat. Saudara tak percaya?”

Dia nampaknya tak percaya.

“Saudara tahu Datuk Mohamad Rahmat itu dari suku Jawa sebab itu golongan Musa dan Shahrir tidak senang dengan dia, saya kenal Tok Mat semasa dia menjadi Ketua pengawas saya, sewaktu kami di ‘English College’ dulu. Dia murid yang pintar. Seorang Ahli olah raga, disebabkan dia anak Jawa, dia tak dapat biasiswa negeri Johor.”

Tahun lima puluhan dulu, anak-anak Jawa susah nak dapat biasiswa. Biasiswa Johor untuk golongan elite Melayu saja, sebab itu Tok Mat terpaksa pergi belajar di Indonesia.

“Macam itu sekali ke sentimen perkauman di Johor?”

“Awak cuba beri tahu saya mana ada negeri lain yang ada kubur dagang? Orang dagang, dikebumikan berasingan dengan penduduk tempatan? Di Johor Bahru ada dua perkuburan, satu di Mahmudiah untuk orang Johor saja. itu pun ada tempat khas untuk Raja-Raja dan kerabat mereka, Datuk-Datuk dan Pembesar serta kerabat mereka saja. Rakyat di tanam berasingan.”

“Dulu orang Melayu bukan saja rapat dengan istana, Mereka rapat juga dengan Inggeris kerana hubungan raja-raja Johor rapat dengan Great Britain sebab itulah pengaruh barat kuat di Johor. Hingga sekarang ini pun ada anak Johor yang sentiasa bangga dengan ego *The Great Johor*. Padahal zaman keagungan dan kebesaran pemimpin Johor kini cuma satu nostalgia.

Melayu lain terdiri dari keturunan Arab yang

berkahwin dengan keluarga diraja. Arab keturunan Hadaramaut yang terdiri dari Syed-Syed ini sama ada mereka berniaga atau mereka hartawan terkemuka ada diantara mereka yang dilantik jadi kadi, mufti dan imam oleh baginda Sultan sendiri. Di samping itu ada juga Arab Yeman dan Arab Sengkek, bangsa badwi meniaga kecil-kecilan yang berniaga sambil menjaja 'celak kain celak kain' dari rumah ke rumah. Itu aje kerja mereka 'celah kain celah kain' biarpun pada mulanya menjadi bahan tertawa suku Melayu. Akhirnya Arab-Arab sengkek ini ramai yang kawin dengan perempuan Melayu, anak mereka dipanggil '**Arab celup**'. Satu sindiran yang mempersendakan suku Arab.

Jawa pula ada dua jenis. Yang biasa disebut jawa totok dan jawa kontrak. Kerja wak-wak jawa kontrak ini jadi kuli diladang, jadi tukang kebun, yang satu lagi jual satay, soto, tempe, jual ubi, tapai ubi atau berkerja buruh mandor di P.W.D. di T.C.J.B. (dulu disebut Tombot yang bermaksud Townboard atau Majlis Bandaran). Orang India pun ada kelasnya juga, ada yang dari ceylon, ada kerla, dari melbar sama ada Islam atau Kristian atau Hindu yang bertaraf parya, dimata suku Melayu mereka orang asing. Suku kaka dan mamak adalah yang kurang disenangi kerana mereka menguasai kedai-kedai runcit, kedai-kedai makan dapat duit bawa balik India, apa lagi kalau namanya yang sepatutnya bin tapi kerana keindianan mereka kekal dengan panggilan anak lelaki atau son of, orang Johor tak dapat terima mereka sebagai pemimpin



hingga ke hari ini ada pemimpin Johor yang berani mengetahui mereka secara terbuka kerana mereka rasakan mereka orang Melayu Johor jauh lebih mulia.

Orang Jawa dan lain bangsa yang datang ke Johor ini asalnya susah-susah belaka, maklumlah orang dagang merantau kenegeri orang. Cakap Melayu bukan betul sangat sama ada suku Jawa, Arab, Mamak, India atau Cinanya sentiasa jadi ejekan dan hiburan segolongan anak Melayu yang untuk menghina mereka. Ada anak-anak Melayu dari golongan elite ini setengahnya saja diajar supaya pandang rendah pada orang keturunan Arab, disiknya anak-anak Arab "Arab dogol minyak sapi, tumpah sikit banyak rugi. Arab dogol pisang kelat satu panjang dua bulat".

Kalau Jawa pula digelar Wak sontolayo, Wak kanglah, Wak ke deng kek lah dan macam-macam lagi gelaran yang menghina. Dapatkah perasaan ego dan prajudis ini dipisahkan dari mereka yang memang tidak senang dengan orang yang mereka saja tak suka kerana mereka merasakan mereka lebih bijak sama dan mulia dan merekalah yang mesti jadi pemimpin negara.

Suku Melayu hidupnya mewah, mereka berkerja dengan kerajaan ada kedudukan dan siapa tak tahu ego dan suka berlagak dan bermewah segolongan orang Johor. Biar papa asal bergaya, sebab itu cukup bulan ramai pegawai kerajaan yang sembunyi takut dengan ceti. Bila pencen Tuhan saja yang tahu hidup mereka dan anak-anak yang sudah

biasa dimewahkan dan lupa daratan.

Orang Melayu kebanyakan tinggal di rumah-rumah kerajaan dan rumah sendiri. Mereka hidup penuh bergaya terikut-ikut dengan kemajuan Singapura dan keluarga elite yang berkiblat ke England dan Eropah. Gaya hidup pun seperti orang barat. Inilah penyakit 'kebaratan' atau 'Euromenia' penyakit yang merasakan diri mereka lebih mulia dari orang lain.

Keturunan mereka yang sudah biasa pandang rendah dan prajudis pada kaum mendatang seperti suku Jawa, India, Arab dan mamak tiba-tiba heran. Kenapa tiba-tiba anak-anak orang mendatang ini sudah mempunyai kedudukan yang lebih tinggi dari mereka selepas merdeka? Sedarkah siapa mereka ini dulunya? Tidak heranlah kini timbul perasaan kurang senang dan iri hati Musa dan gengnya bila seorang lagi anak Jawa akan menguasai politik negara, di Parit Jawa akan timbul Yasin Kemari, Setiausaha Politik Dr. Mahathir yang bertugas di Kementerian Kehakiman akan menjadi sasaran selepas Haji Masood di Johor Bahru.

UMNO dilahirkan di Johor oleh golongan elite Melayu. Setiausaha Agung yang baru, anak Jawa yang berapa kali ditekan timbul juga, dicantas dan dicuba bunuh oleh Datuk Musa Hitam. Tok Mat terus hidup juga dan jadi tambah popular. Berkat perangai Jawa yang sentiasa taat setia pada pemimpin dan negara yang menjadi darah daging suku Jawa. Anak Pak Rahmat ini terus dipercayai dan

disayangi oleh DYMM Yang DiPertuan Agung dan Perdana Menteri. Musa makin hari makin ter-sisih dan golongan desperado.

Musa Hitam lupa bahawa orang Jawalah yang beri dia peluang dalam politik. Siapa lagi kalau bukan Allahyarham Tun Sardon Jubir yang bawa dia naik hingga jadi menteri. Hari ini semua orang buat-buat lupa pada Allahyarham Tun Sardon, nama beliau tercicir dari senarai 46, anak Jawa yang dimatikan keriernya kerana dia suku Jawa.

Mereka lupa bahawa di Indonesia kalau bukan suku Jawa jangan mimpi boleh jadi Presiden Indonesia.

Presiden, Timbalan Presiden dan jawatan penting dalam UMNO baru bukan lagi dari golongan elite Melayu bukan lagi dari golongan Istana seperti dulu. Mana nak rasa seronok. Inilah sentimen dan masalah personal yang kecoh dan keruhkan politik Johor dan semangat 46 yang sebenarnya.

Kita pun tidak boleh marah pengundi di Parit Raja, kalau mereka tak terima Tok Mat dan Mustapha Muhamad, biarpun kedua menteri ini sama-sama J.P macam kebanyakan pengundi disana. Kalau tidak dahan yang digunakan untuk menebang pohon apa lagi? Bukankah burung juga yang digunakan untuk menangkap burung? Ada puak akan gunakan keikhlasan kejujuran dan kesetian suku Jawa untuk jatuhkan anak-anak Jawa yang akan memimpin Malaysia satu hari nanti.

Maklum saja kadang-kadang anak orang susah ini bila sudah jadi pegawai tinggi atau wakil rakyat,



malu nak mengaku asal usul apa lagi kalau sudah pandai makan steak, potato chips, pizza. Lupa masa kecil dulu pergi sekolah bawak bekal ubi rebus, keledak rebus, nasi sejuk dalam upeh, dalam daun pisang, jalan kaki atau tumpang dibelakang basikal yang di naiki dua tiga orang. Inilah silap satu dua orang anak Jawa yang tak sedarkan diri sanggup digunakan untuk rosakkan suku sendiri.

Sekarang sudah ada business besar, ada Volvo, BMW atau Mercedes, tak tahu berapa lama boleh berlagak namun sana sini cakap tentang politik Jawa mainkan sentimen Jawa di Parit Raja. Dulu siapa yang sisihkan Jawa dari politik Johor?

Mari kita cari kesalahan Dr. Mahathir untuk buka mata J.P.J.P di Parit Raja. Kita bandingkan dengan mereka yang nak merebut kerusi Perdana Menteri kita. Mahathir dah beri peluang pada Melayu macam Musa, macam Shahrir tengoklah apa jadi. Sekarang bila beri peluang pada anak Jawa marah, menderhaka jadi bebas.

Mahathir tak minum arak, tak berjudi, tak pergi kelab-kelab malam, tak bawa perempuan sana-sini, tak rosakkan anak isteri orang, tak tukar-tukar girl friend Cina Melayu. Sana sini Mahathir usung Kak Asmah tulah. Mahathir tak main golf, hidupnya berkerja. Cari pelaburan tukarkan Malaysia jadi negara perindustrian, tinggikan image Malaysia di dunia, dalam sibuk semangat 46 buat kacau untuk huru hara dan rosakan negara dan racun fikiran rakyat.

Pegawai kerajaan tak seronok bukan kerana Dr.

Mahathir tak bagus tetapi mereka pukul lapan kena masuk kerja, kena punch card, tak boleh hisap rokok, mesti kerja lapan jam atau lebih ini merosakkan rythem mereka. Mereka biasa kerja dua tiga jam sehari yang lain ponteng, relax atau buat kerja-kerja sendiri tidak endahkan rakyat.

Apa juga suku kaum kita, kita adalah makhluk Allah yang bernama manusia dan Islam adalah agama kita.

Orang Islam tak patut jadi robot ikut bencikan pemimpin dan kerajaan kerana hasutan. Berfikir, pakailah akal fikiran yang waras. Allah bezakan kita dengan haiwan kerana kita beriman dan boleh berfikir. Kalau tidak orang putih tak kata '*Dog is men's best friend*'. Kafir lebih menghormati anjing dari manusia sebab itu saya gunakan peribahasa Inggeris. Kejar anjing jangan keterlaluan, bila anjing tak boleh lari lagi anda jadi mangsa terjahan yang tak sengaja.

Manusia boleh jadi lebih mulia dari malaikat sekiranya dapat mengawal nafsu.

Tidak ada bangsa yang lebih mulia dari bangsa yang lain. Kalau setiap kaum mahu nabinya sendiri berapa banyak nabi didunia ini nanti jadilah kita macam kaum kadini mengaku diri Islam tapi akidah dan nabinya tidak sama. Inilah akibat anti establishment.

Orang Cina terima Gautama Buddha kerana ilmu yang dibawa untuk kebaikan manusia, padahal Gautama anak raja India hampir seluruh umat di serata benua terima Nabi Isa a.s. sebagai nabi

mereka sedangkan Nabi Isa seorang Bani Israil.

Satu pertiga penduduk dunia menerima Muhammad S.A.W sebagai Nabi dan Rasul, tak siapa pun mempersoalkan asal keturunannya macam golongan yang menentang Mohd Rahmat dan Mahathir. Kenapalah pemimpin UMNO Haram ini fikiran mereka tambah hari tambah sempit.

Kalau orang Kelantan mahu Presiden UMNO dari Kelantan, orang Johor dari Johor, sampai bila pun masalah orang Melayu tak akan selesai. Akhirnya kita tenggelam dalam '**politik piranha**' dimana ikan besar menjadi makanan ikan kecil.

Menentang Mahathir kerana mahukan kerusi Perdana Menteri hanya akan memuaskan nafsu rakus dua tiga orang pemimpin desperado yang gila kuasa dan telah menjadi kuda tonggangan ahli perniagaan politik yang mahu jadikan rakyat negeri ini budak suruhan mereka yang terlupa diri seperti yang diceritakan oleh Jalal Al-e Ahmad penulis dari Iran yang karyanya dibaca oleh para intelektual dari orang-orang kiri yang berpendidikan barat hingga ke kaum talabeh tua dari Oam.

Al-e Ahmad membandingkan bangsa Iran dengan burung gagak dalam kisah Sufi, karya Jalaluddin Rumi dimana burung gagak melihat seekor ayam hutan berjalan-jalan. Gagak tersebut kagum keindahan ayam hutan itu berjalan dia pun meniru. Kerana terlalu lama meniru gaya ayam hutan berjalan gagak lupa bagaimana gagak berjalan dengan sebenarnya, namun tidak pula ber-



jalan dengan betul seperti ayam hutan.

Entah berapa lama lagi orang Johor yang sudah mencuba untuk menjadi ayam hutan akan tersedar perbezaan yang mana ayam hutan yang mana gagak.

Maka ingatan yang sebaik-baiknya kepada mereka yang egonya keterlaluan ini kenallah diri kamu rata-rata sebelum kenal Tuhan yang nyata. Kamu tidak lebih dari seorang hamba.

Nota: Tulisan di atas adalah rencana saya yang tersiar dalam akhbar Mingguan Kota keluaran 9, Okt, 1988 di bawah tajuk 'Faktor Jawa Dalam Politik Johor, Ikan Kecil Makan Ikan Besar'.

***Hamba yang sedar akan dirinya,  
ia akan malu selalu dengan  
Allah. Dirasakan budi Allah  
cukup banyak padanya.  
Pemberian Allah diterima dengan  
hati yang puas dan redha,  
sekalipun pemberian itu berupa  
ujian yang pahit. Sebab dia yakin  
setiap pemberian adalah dengan  
maksud baik dari Allah.***

*(Oleh Habsyah Yeop: Dipetik  
dari majallah An Nasihah ke-  
luaran Jan 1989/ Jamadil Akhir  
1409)*



"Harun kita sama-sama sudah tua. Ingat, pepatah kita biar pecah di pe-  
jangan pecah di mulut. Saya tahu hati perut awak, dan saya pun tahu bany-  
mana benda yang awak sudah telan".

"Datuk diktator, negeri ini demokrasi. Saya mesti tentang Datuk ca-  
demokrasi. Takkan Datuk nak marah, kalau saya ganti Datuk jadi Perda-  
Menteri".



Apa nak heran, orang PAS boleh kerjasama Ku Li. Pak Arab-Pak Arab dari negeri Arab pun baik dengan Ku Li, tengok betapa segak dan bergayanya anak raja dari Kelantan ini.





Antara pemimpin negara golongan muda yang saya kenali, Ku Li adalah seorang pemimpin yang berhemah tinggi. Pandai berkawan dan mempunyai budi bahasa yang terpuji, tak hairanlah ke mana beliau pergi mendapat sambutan yang luar biasa.



Inilah dia Rais Yatim, Timbalan Presiden Semangat 46 yang berjuang untuk menghidupkan semula UMNO bersama rakan DAP, Mr. Lee Lam Thye, dan Dr. Chan Man Hen dan seorang lagi rakan. Inilah dia orang yang sudah bakar jambatan tapi mahu juga ke seberang. Bolehkah nasib masa depan bangsa dipertanggungjawabkan oleh Rais yang tak tentu arah pedomannya? Apakah Datuk Rais Yatim tidak tahu bahawa parti DAP serpihan dari parti PAP (Singapore).

## SIAPA TIPU SIAPA

**B**olehkah Tengku Razaleigh Hamzah dan Musa Hitam berbaik-baik semula?

Saya memulakan bab ini dengan pertanyaan kerana krisis yang berlaku hari ini adalah lanjutan dari pertarungan antara dua tokoh ini.

Tanpa pertarungan politik yang berlaku pada pertengahan tahun 1981 bagi merebut jawatan Timbalan Presiden UMNO maka krisis hari ini tidak akan berlaku. Barangkali UMNO akan terselamat dari dihukum oleh seorang hakim di mahkamah dan tidak akan timbul masalah serpihan seperti yang berlaku hari ini.

Disebabkan angkara yang dilakukan oleh dua tokoh ini, bangsa Melayu hari ini terpaksa menumpukan masa dan tenaga untuk menyelesaikan krisis politik yang mereka berdua cipta. Para pemimpin kerajaan berbangsa Melayu terpaksa ke hulu ke hilir untuk menerangkan kepada orang ramai tentang krisis yang berlaku. Semuga dengan penjelasan tersebut rakyat tidak akan terperangkap di dalam krisis dua tokoh ini.

Penjelasan demi penjelasan terpaksa dibuat kerana puak yang menentang kerajaan yang diketuai oleh Tengku Razaleigh, anak raja Kelantan telah menggunakan berbagai cara termasuk campur



tangan istana untuk menjatuhkan kepimpinan Dr. Mahathir. Ku Li dan orang-orangnya fikir dengan jatuhnya Dr. Mahathir maka mudahlah bagi Tengku Razaleigh untuk naik mengambil alih jawatan Perdana Menteri. Mereka lupa Allah saja yang berkuasa menaik dan menjatuhkan siapa saja yang disukaiNya. Manusia sekadar boleh merancang saja. Tapi disebabkan sifat ego dan engkar, diri sendiri juga yang akan rugi akhirnya.

Di dalam pemilihan 1987 Ku Li gagal. Kegagalan beliau untuk menjadi Presiden UMNO itu bererti tuah dan rezekinya belum sampai. Bersabarlah dengan ujian Tuhan.

Orang-orang Ku Li fikir melalui cara hasutan harapan Ku Li untuk menjadi Perdana Menteri akan lebih cerah, sebab itulah mereka gunakan cara hasut-menghasut. Mereka lupa cara hasut-menghasut membuat huru hara itu ialah cara yang telah digunakan oleh iblis untuk merosakkan umat manusia.

Dilihat dari usia, Dr. Mahathir tidak boleh menongkat langit. Dr. Mahathir akan membuat pengumuman untuk bersara bila tiba waktunya. Apa yang Ku Li perlukan hanya kesabaran. Lambat laun tercapai juga cita-citanya tanpa perlu turun ke gelanggang menghasut rakyat membencikan Dr. Mahathir kerana kerja karut marut ini tidak sepatutnya dibuat oleh anak raja yang berketurunan baik-baik. Ini akan merosakkan nama baik istana macam seekor kerbau yang membawa lumpur, akhirnya nanti semuanya habis terpalit.

Tengku Razaleigh yang baru saja menghulurkan tangan kepada PAS sejak kebelakangan ini begitu gemar menggunakan ayat-ayat Quran untuk menguatkan hujah. Sebagai contoh, di dalam ucapan dasar calon Presiden UMNO pada 19 April 1987 di Hotel Regent Kuala Lumpur Tengku Razaleigh memukau para perwakilan UMNO dengan beberapa potong ayat Quran. Beliau menyerahkan kepada Allah samada akan menang ataupun tidak. Pendek kata Tengku Razaleigh bertawakkal kepada Allah. Apa jua keputusan akan diterima dengan dada yang lapang kerana keputusan ini adalah kehendak Allah, bukannya kehendak manusia.

Tetapi hari ini Tengku Razaleigh macam engkar kepada takdir lalu berusaha untuk menghimpunkan orang ramai membenci Dr. Mahathir. Mengapakah Tengku Razaleigh bagaikan dirasuk, macam dalam filem **The Exorcist**, mengajak rakyat menentang kepimpinan Dr. Mahathir? "Ku biji mata Ku cuma dua saja, telinga Ku juga cuma dua saja tapi biji mata dan telinga rakyat berjuta-juta. Bukan semua rakyat di negara ini buta dan Ku saja ada satu mata. Ada pribahasa Inggeris yang menyatakan '*in the world of the blind, the one eye jack is a king*' Ku di Malaysia ini lebih ramai yang celik dari yang buta. Tak tahulah saya kalau pengikutku semua sudah buta.

Ku Li telah memilih Tunku Abdul Rahman untuk menjadi Godfathernya bagi menunjukkan kepada dunia yang Mahathir itu jahat. Namun Dr. Mahathir tak patut buang Ku Li. Mari kita

ingat balik cerita Tunku buang Dr. Mahathir. Di waktu Tunku Abdul Rahman memimpin parti dan kerajaan, Dr. Mahathir dan Musa memperlihatkan sikap ultra. Mahathir menjadi pengkritik utama kepada dasar-dasar Tunku. Kritikan itu semakin bertambah dan semakin pedih berikutan 13 Mei, 1969. Kerana tidak tahan dengan gelagat Mahathir, Tunku telah mengarahkan Tun Razak supaya memecat Mahathir. Malah Tunku mengugut akan berhenti jika MKT UMNO tidak memecat Dr. Mahathir dengan segera. Dalam mesyuarat MKT UMNO Tunku telah tidak hadir, membiarkan Tun Razak mempengerusikan mesyuarat.

Mesyuarat mengambil keputusan seperti yang dikehendaki oleh Tunku memecat Mahathir dari UMNO. Musa ikut terlucut dari jawatan kerajaan walaupun nasibnya agak baik. Dia masih sah menjadi ahli UMNO, tidak macam sahabatnya Dr. Mahathir. Tapi kerana ketika itu yang menjadi Perdana Menteri, anak raja maka rakyat pun tak boleh buat apa-apa. Mereka membisu kerana tak mahu derhaka pada Tunku. Oleh kerana rakyat belum terpengaruh dengan ajaran "kurang ajar" yang dipelopori oleh Musa, maka kedudukan Tunku pun terselamat.

Untuk mengetahui cerita sebenar di sebalik pergolakan politik hari ini, elok kita toleh kebelakang dan baca balik cerita bagaimana mulanya sejarah pergaduhan antara Musa – Ku Li.

Ceritanya begini. Impian Tengku Razaleigh



untuk menjadi Perdana Menteri bukanlah satu rahsia. Ia sudah jadi cerita popular di kalangan rakan-rakannya. Di zaman Allahyarham Tun Razak menjadi pemimpin negara, Ku Li dimanja berlebih-lebihan hingga memberikan gambaran bahawa Tun Razak mahukan Ku Li jadi Perdana Menteri. Tak salah kalau Tun Razak tumpahkan sedikit kasih sayang kepada Ku Li kerana semangat feudal beliau pada ketika itu masih lagi menebal. Dan dengan memberikan peluang kepada Ku Li memegang beberapa jawatan penting maka Istana dengan sendirinya merasa senang dan akan turut menyokong Tun Razak. Ku Li dapat dimengertikan sebagai penyambung yang bakal menjaga kepentingan istana kerana sebelum Tun Razak, Presiden dan Perdana Menteri ialah orang Istana iaitu Tunku Abdul Rahman. Jadi tentulah Istana takut kalau orang bukan istana tidak menjaga kepentingan istana.

Sebaik saja berlaku kekosongan bagi jawatan Timbalan Presiden UMNO maka Ku Li dan orang-orangnya pun mula memasang angan-angan yang tinggi melangit. Jawatan Timbalan Perdana Menteri menjadi idaman kumpulan ini.

Bila kesempatan terbuka luas Ku Li pun mengumumkan menerima pencalonan untuk bertanding jawatan Timbalan Presiden UMNO yang sekaligus menjanjikan jawatan Timbalan Perdana Menteri.

Dalam pertandingan tahun 1981 Tengku Razaleigh pada mula diduga akan menang dengan

mudah, tapi rupa-rupanya telah mendapat saingan yang hebat. Tengku Razaleigh terperanjat apabila mengetahui bahawa Datuk Musa juga berminat dan tampil untuk turut merebut jawatan itu.

Di dalam pertarungan sengit itu Dr Mahathir telah secara diam-diam memberikan sokongan kepada Musa. Sanusi Junid, orang kuat Dr. Mahathir waktu itu bekerja keras bermati-matian untuk memastikan Musa mengalahkan Tengku Razaleigh. Di awal kempen Tengku Razaleigh berada jauh di depan, dan tanda-tanda begitu jelas menunjukkan Tengku Razaleigh akan muncul sebagai juara.

Tetapi sebaik sahaja adanya campur tangan Dr. Mahathir, graf Musa mulai berubah, Musa mulai mendapat sokongan. Musa akhirnya menang bagi jawatan Timbalan Presiden dan terus dilantik menjadi Timbalan Perdana Menteri.

Sejak itulah hati Tengku Razaleigh terhiris kerana sokongan yang dibuat sedangkan mulanya Dr. Mahathir berjanji untuk tidak mahu campur tangan. Kejayaan besar Tengku Razaleigh ialah beliau berjaya menyembunyikan perasaan geram dan marah yang bernyala dilubuk hatinya. Beliau seorang 'gentleman' yang lemah lembut, berbudi pekerti yang tinggi tetapi hati-hati dengan watak manusia yang dikatakan *'pijak semut pun tak mati'*.

Kekalahan pertama Ku Li tidak melemahkan semangat perjuangannya, dia mencuba pula bagi kali kedua. Pada masa yang sama tersebar perkhabaran dengan meluas mengenai pemben-

tukan regu Ku Li-Harun untuk menghadapi regu Dr. Mahathir-Musa. Orang-orang Harun pun begitu seronok kerana merasakan jika Ku Li bertanding jawatan Presiden dan memenangnya maka Datuk Harun yang bertanding tempat kedua tentulah akan dilantik menjadi Timbalan Perdana Menteri. Siapa yang tak teringin nak menjadi Timbalan Perdana Menteri. Kalau beri kepada al Ustaz Ibrahim Azmi dan Yusof Noor, keduanya tentu gembira menerimanya.

Bagaimana pun akhirnya khabar-khabar angin itu menjadi kenyataan bila mereka bersatu pada tahun 1987.

Dalam pemilihan tahun 1984 Ku Li dan Datuk Harun yang turut sama merebut jawatan Timbalan Presiden UMNO kecundang di tangan Musa. Kononnya kerana mereka tidak berpakat. Tahun 1987 mereka berkompromi, kali ini Harun, Ku Li dan Musa, tiga-tiga kecundang juga. Siapa yang tipu siapa? Siapa yang mainkan siapa? Sekarang Ku Li – Harun sudah berkompromi dan bersatu tenaga menentang Dr. Mahathir. Musa pun tumpang sekaki juga. Tapi Musa masih bersikap serong, pendiriannya tidak menentu. Persoalan siapa nak tipu siapa ini perlu kita tanyakan.

Bukan ramai sangat orang yang menimbulkan kekacauan di negara ini. Nama yang terpenting adalah Ku Li – Musa. Merekalah yang telah merubah suasana politik Malaysia menjadikan orang politik Melayu tak gentleman serta menam-



pakkan tidak mempunya umat Melayu menghadapi pertandingan yang besar.

Sifat gentleman tidak diamalkan lagi. Semangat demokrasi diketepikan. Ahli politik pengikut Ku Li – Musa mula menaruh syak wasangka sesama sendiri. Siapa telah tipu siapa? Dan siapa nak kena tipu dengan siapa?

Lazimnya yang kalah akur kepada keputusan majoriti tetapi puak Ku Li – Musa rasa tertipu. Mereka pun bangun menentang, membakar semangat rakyat agar turut bersama mereka menentang kepimpinan yang ada. Kononnya Dr. Mahathir yang tipu mereka sebab itu mereka kalah.

Tengku Razaleigh yang mengetahui belang politik Musa kenapa terima Musa sebagai regunya. Sepatutnya orang nak cari teman mesti yang boleh tidur baring bersama. Ini macam satu pesanan yang mengatakan makan di rumah Yahudi boleh, tapi tak boleh tidur. Rumah Nasrani pula boleh tidur tapi tak boleh makan. Ku Li dengan Musa macam mana rumah siapa yang tak boleh mereka tidur dan tak boleh makan. Apa akan jadi pada negara kalau ditakdirkan mereka berdua memerintah negara ini?

Dalam pemilihan lalu regu Ku Li – Musa ataupun lebih dikenali dengan Team B menjelajah seluruh pelusuk tanahair berkempen menentang Dr. Mahathir. Ku Li seolah-olah terlupa bahawa Musalah yang menjadi musuh utamanya di dalam dua pemilihan yang lalu. Malah Musa telah berusaha untuk mengeluarkan beliau dari kabinet.

Saya tak fikir Ku Li tidak tahu yang Musa Hitam

seorang ahli politik yang cerdik. Selicin-licin belut di dalam lumpur, licin lagi Musa. Belut kalau kita gunakan abu, kita dapat pegangnya tetapi tak mudah hendak pegang Musa atau cakap-cakapnya. Tetapi barangkali kerana matlamat Ku Li ketika itu sama seperti Musa iaitu ingin mengalahkan Dr. Mahathir, mahukan kerusi Perdana Menteri, maka Ku Li terpaksa melupakan kepahitan lama. Biarlah luka lama menjadi parut. Biar luka itu berdarah. Tetapi matlamat untuk mengalahkan Dr. Mahathir tetap dibuat walau dengan apa jua cara sekalipun. Dalam keadaan ini Ku Li telah mengamalkan konsep politik yang dipopularkan oleh Machiavelli. Matlamat menghalalkan cara.

Teory Machiavelli yang menjadi amalan politiknya membuatkan Ku Li terpaksa membenamkan perasaan marah lalu menerima Musa sebagai orang kedua di dalam kabinet bayangannya, biarpun sebenarnya Ku Li mahukan Rais Yatim. Kerana 'grand design' mereka itu bertentangan dengan ajaran Islam maka ianya tidak diberkati Allah. Para pengikut Ku Li di Kelantan, yang ada asas Islam dan yang kenal Siapa itu Musa serta ingat akan permainan kemasukan Musa ke dalam Team B sebagai suatu yang masih segar di dalam ingatan, terpaksa jadi macam burung-burung terkukur, mengangguk-angguk kepala. Ku.. ku.. ku.. ku... kena tipu pun tipulah ku... ku.. patik semua ikut saja.

Sayang seribu kali sayang rupa-rupanya mimpi para pengikut Ku Li yang mengharapkan panas

hingga ke petang rupa-rupanya hujan ditengahari. Ku Li gugur jadi manusia serpihan. Kalau anak raja yang bijak laksana yang kaya-raya boleh berguguran jadi manusia serpihan disebabkan oleh tipu helah politik, inikan pula para pengikutnya yang macam burung terkukur atau orang Kelantan kata burung ketitir. Habis keciwa para pengikut Tengku Razaleigh yang telah mengorbankan jawatan kabinet beliau. Yang tak tahu ujung pangkal berhabis duit dan rugi di dalam perniagaan dan politik akibat tertipu dengan dakwaan yang kononnya Ku Li boleh mengalahkan Dr. Mahathir.

Sesetengah sahabat Musa berpendapat peluang Musa untuk menggantikan Dr. Mahathir lebih cerah dari Ku Li jika berlaku sesuatu malapetaka kepada Perdana Menteri. Ghafar yang hanya Timbalan Perdana Menteri tidak boleh menjadi Perdana Menteri kerana beliau tidak menjadi Timbalan Presiden sebelum pertandingan 1987. Syaratnya mudah, Musa harus terlebih dulu memenangi rebutan ini. Mereka percaya Musa akan menang dan mengekalkan jawatan Timbalan Presiden kerana Ghafar bukanlah tokoh yang hebat waktu itu.

Catur politik yang dimainkan oleh Ku Li – Musa rupa-rupanya menikam diri sendiri, 'backfired'. Tapi kita sungguh pelik ada orang Johor yang masih menaruh harapan yang Musa akan memimpin semula. Maka itulah sebabnya golongan ini bermati-matian mahu menghapuskan Tok Mat.

Seperti kelahiran dan kematian, semuanya telah



tersurat. Bagi sesiapa yang tidak mempercayai qada dan qadar Tuhan maka sesungguhnya dia sudah tergelincir dari landasan Islam. Sudah ditakdirkan nasib Musa jatuh dari kemuncak dalam keadaan begini, terima sajalah. Begitu juga dengan Ku Li, terima sajalah.

Di setiap majlis, Musa dan Ku Li masih menemui para penyokong. Hati mereka yang sedang hiba dan dibekalkan dengan semangat, mereka menjanjikan kemenangan pada tahun 1990. Semangat yang dibakar itu semata-mata dibuat agar penyokong setia tidak berbelah bagi, tidak lari, namun air yang akan surut siapa pun tidak dapat menahannya kerana itulah hukum alam.

Mari kita tengok bagaimana Musa memperlihatkan permainan politik yang licin. Bila UMNO diistiharkan tidak sah, beliau tidak menentang kepimpinan Dr. Mahathir. Malah beliau telah menjadi ahli UMNO baru dan telah dilantik menjadi ketua UMNO diperingkat bahagian. Musa mengharapkan Dr. Mahathir akan memaafkan dia dan seterusnya diberikan tempat yang penting.

Semuanya tak berlaku. Kekeciwaan Musa tidak ditunjuk terang-terang sebaliknya Musa mendiamkan diri. Tidak menjadi juru jual berkempen membantu menghidupkan UMNO yang telah ditubuhkan oleh Dr. Mahathir. Musa mula menyedari bahawa Tengku Razaleigh semakin mendapat sokongan kerana beberapa isu yang melanda bumi Malaysia. Isu Tun Salleh, penangkapan 106 orang pada tahun 1987 dan lain-lain telah menghidupkan

semangat juang Tengku Razaleigh. Rakyat mulai seronok mendengar Tengku Razaleigh menjual coklat. Musa melihat populariti pengarah kumpulan serpihan ini semakin meningkat.

Nama Rais Yatim dan Ibrahim Ali lebih hebat dari nama Musa. Di Johor Ibrahim Ali telah diberi peluang untuk berucap kepada para penyokong Semangat 46. Johor sudah boleh menerima tokoh muda dari Kelantan itu. Ini adalah sesuatu yang mengejutkan.

Musa yang tidak tahan dengan keadaan ini memilih untuk mengundur diri dengan alasan bahawa Dr. Mahathir telah tidak menghormati sistem kehakiman di negeri ini. Pendek kata Dr. Mahathir anti para hakim. Atas alasan ini Musa keluar dari UMNO lalu menyokong semangat 46 walaupun tidak diberikan jawatan penting di dalam kumpulan serpihan. Di Johor Tengku Razaleigh telah menamakan Tan Sri Othman Saat sebagai Ketua perhubungan. Nama Musa tidak muncul. Nama Shahrir pun tenggelam.

Di Johor Tan Sri Othman Saat mempunyai kuasa melantik sesiapa yang dikehendaki menjadi ketua Bahagian kumpulan serpihan. Ramai yang terlantik adalah orng-orang Tan Sri Othman. Tetapi Musa bukanlah tokoh baru yang tidak pandai merencanakan catur politik. Setelah membaca dan meneliti senario politik Malaysia Musa mula memperlihatkan kebijaksanaan. Beliau menjadi macam tupai. Sedang hangat umum memperkatakan Tengku Razaleigh akan mengosongkan

kerusi parlimen Gua Musang, Shahrir telah diarah supaya meletakkan jawatan.

Orang-orang Tengku Razaleigh terpinga-pinga kerana mereka sendiri tidak menduga Shahrir berbuat demikian. Mengapa Shahrir berbuat demikian? Musa sedar pengaruhnya di Johor semakin menurun jika dia tidak berusaha mengembalikan kekuatan. Caranya ialah dengan mengadakan pilihanraya kecil.

Semuanya bergantung kepada keputusan pilihanraya Johor Bharu. Mulanya Musa menghilangkan diri. Tengku Razaleigh, Tunku Abdul Rahman, Tan Sri Othman dan ribuan pengikut setia kumpulan Serpihan mengiringi calon kunci Shahrir ke tempat penamaan calon.

Musa waktu itu berada diluar negeri kerana urusan peribadi. Setengah pengikut Tengku Razaleigh mendakwa Musa telah berpaling tadah. Kempen dua minggu dalam bulan Ogos 1988 itu begitu hangat hingga beberapa hari menjelang hari pembuangan undi, Musa pun muncul bersama tapenya.

Bila Shahrir menang maka hebohlah orang sana kini menyebut kemenangan Shahrir berpunca dari tape Musa. Faktor Tan Sri Othman tak timbul. Pengaruh Tengku Razaleigh tidak diperkatakan. Orang-orang Johor yang sangat taksud dengan Musa percaya bahawa tanpa tape Musa, Shahrir mengalami kesukaran untuk menang.

Sejak itu Musa semakin aktif di dalam kumpulan Serpihan. Selepas Johor Bahru, Musa berpeluang



memperlihatkan kes pengaruhnya berikutan kematian Datuk Syed Zain. Dalam pilihanraya kecil Parit Raja, Musa telah meletakkan calon pilihanraya iaitu Hamdan Yahya, ikan piranha.

Tan Sri Othman merasa keciwa kerana calon semangat 46 tidak terpilih sebaliknya Musa berkeras mahukan Hamdan. Kerana perasaan overconfident dan juga salah faham antara Musa dan Tan Sri Othman maka Parit Raja terlepas ke Barisan Nasional. Akhirnya mati jua ikan piranha di Parit Raja.

Musa tidak terus mendiamkan diri. Musa telah menyusun strateginya sendiri tanpa mengambil pusing apa yang nak dilakukan oleh Tan Sri Othman. Johor kini tak ubah macam satu kapal dua nakhoda. Musa bernasib baik kerana orang-orang Johor lebih sukakan beliau daripada Tan Sri Othman. Krisis antara Musa dan Othman Saat tak dapat dibendung lagi. Ini diakui oleh Tengku Razaleigh. Beliau memberitahu satu majlis dialog di Sik, Kedah bahawa memang ada krisis kecil di Johor tetapi beliau menganggap ianya tak ubah macam krisis keluarga. Katanya adalah kebiasaan bagi sebuah keluarga yang besar menghadapi perselisihan.

Sekali lagi Tengku Razaleigh cuba membela Musa tanpa memikirkan perasaan Tan Sri Othman. Tengku Razaleigh macam takutkan bayang-bayang Musa, tidak berani bertindak mendisiplinkan Musa walaupun telah terbukti Musa gagal mematuhi garis-garis disiplin. Keberanian Musa mencabar

arahan Tengku Razaleigh membuatkan orang-orang yang rapat dengan Tengku Razaleigh merasa keciwa.

Contohnya di dalam mesyuarat kumpulan serpihan yang tidak pernah Musa hadiri, Musa telah dibidas. Ibrahim Ali, tokoh lantang di dalam kumpulan itu telah mengkritik Musa dan Shahrir. Di kalangan orang-orang Kelantan yang selama ini membiarkan Tengku Razaleigh membuat keputusan mulai mempertikaikan keputusan berbaik-baik antara boss mereka dengan Musa.

Sebab itu sewaktu Dr. Mahathir mengajak Musa dan Tengku Razaleigh menyertai kabinet ada orang-orang Tengku Razaleigh mahukan Tengku Razaleigh menerima tawaran tersebut. Sebabnya ialah Musa telah awal-awal lagi menolak tawaran Dr. Mahathir. Jika Tengku Razaleigh menerimanya maka peluang Musa untuk kembali aktif akan mati begitu saja. Dengan Tengku Razaleigh di dalam kabinet maka banyaklah perkara yang boleh dibuat. Dan tak mustahil Dr. Mahathir melantik Tengku Razaleigh menggantikan Ghafar bila tiba masa dan waktunya yang sesuai.

Tetapi Tengku Razaleigh begitu ego keras kepala. Kerana enggan tunduk kepada kehendak Dr. Mahathir, Tengku Razaleigh sanggup menolak dengan memberikan berbagai alasan yang merugikan diri sendiri dan para pengikut dan umat Melayu yang simpati padanya. Mereka tertipu kerana ego Ku Li.

Tengku Razaleigh yang ego lebih sanggup ber-

sekongkol dengan DAP dan PAS semata-mata kerana mahu menjatuhkan Dr. Mahathir dan UMNO dan umat Melayu mula bertanya Ku Li ini nak memperdayakan siapa sebenarnya?

Kebencian Tengku Razaleigh kepada UMNO begitu ketara apabila dia sanggup naik ke pentas PAS dan mengajak PAS bersama-sama menghadapi UMNO kerana kononnya dia nak ikut jejak Mahathir yang naik atas pentas PAS satu masa dulu. Siapa yang sebenarnya menipu diri siapa?

Kata Tengku Razaleigh: **“Dulunya antara kami di sini ada yang bersama saya mendayung perahu menyeberang lautan. Ada pula dikalangan tuan-tuan yang mendayung perahu lain, yang juga juga untuk menyeberang lautan itu. Semoga selepas ini, bersamalah kita membina kapal yang lebih besar dan kukuh untuk kita layarkannya bersama ke pelabuhan yang dituju dengan tekad dan azam yang padu. Kerana dengan kapal yang lebih kukuh dan besar itu sahajalah matlamat dan tujuan kita akan tercapai dengan lebih pantas dan selamat.”**

Kerjasama yang Tengku Razaleigh hulurkan itu tentulah tidak disenangi oleh Musa. Ini disebabkan kes Memali yang mengorbankan 18 orang, termasuk empat anggota polis. Waktu itu Musa menjadi Menteri Dalam Negeri yang bertanggungjawab dalam kes Memali. Kes ini sudah banyak saya tulis di dalam buku yang sudah-sudah. Saya bimbang kalau banyak sangat saya sebut tentang



Memali, Musa akan terkena badi pula.

Orang-orang PAS bukan suka sangat dengan Musa kerana peristiwa Memali, tetapi kerana Musa sekarang anti Dr. Mahathir maka mereka tidak menampakkan tentangan. Mereka menerima Tengku Razaleigh tetapi tidak Musa. Tetapi dengan tindakan Tengku Razaleigh berdamai dengan PAS, ini bermakna dengan sendirinya Tengku Razaleigh ingin menolak Musa dari gagasan mereka. Ia dibuat secara diplomasi agar orang yang menyokong Musa tidak merasa keciwa.

Musa pula, sebaik sahaja Perhimpunan Melayu Johor selesai pada 18 Disember lalu telah menampakkan keseriusan untuk menyertai UMNO.

Soalnya bolehkah UMNO menerima Musa? Kalau Tengku Razaleigh sudah menolak Musa dan UMNO juga membuat keputusan yang sama, kemanakah Musa selepas ini? Barangkali Musa ingin mengundur diri buat selama-lamanya seperti mana yang diberitahu kepada wakil akhbar Mingguan Kota tidak lama dulu.

Saya ucapkan sayonara kepada Musa dan Ku Li dan berharap krisis yang bermula dari perletakan jawatan Musa pada 26 Feb. 1986 itu akan selesai segera supaya siapapun tidak akan menipu siapapun lagi seperti kata-kata bijak pandai, *You can cheat everybody sometime, somebody everytime, but you cannot cheat everybody everytime.*

## ULAMAK SIANG HARI

**D**alam buku saya **TALQIN UNTUK UMNO** saya telah membuat ramalan bahawa tidak mustahil bagi Syaikhul Arqam Ustaz Haji Ashaari Muhammad menjadi Perdana Menteri Malaysia di suatu hari nanti. Ramalan ini adalah berdasarkan andaian sekiranya kesemua 50,000 para pengikut Arqam menyertai UMNO dan Haji Ashaari pula berjaya mengubat segala macam penyakit yang terdapat di kalangan orang-orang UMNO. Jadi ramalan saya itu dibuat atas andaian yang kuat. Ini bukanlah ramalan biasa dan bukanlah satu spekulasi. Ramalan dengan spekulasi memang jauh berbeza. Kerja membuat ramalan ini tidak salah sebab ia tidak boleh memberikan apa-apa kesan. Yang salah ialah membuat spekulasi. Perbuatan membuat spekulasi biasanya boleh mengakibatkan berbagai-bagai bencana. Contohnya apabila seseorang membuat spekulasi ke atas pasaran saham, orang itu samada akan untung atau rugi. Itulah yang saya maksudkan dengan ramalan saya itu.

Apa yang lebih merbahaya lagi bila ada pihak yang menyangkakan yang sesuatu ramalan itu adalah spekulasi. Kesannya lebih buruk. Dan kesan buruk ini telah menjadikan Ustaz Ashaari dan Darul Arqam mangsanya.

Bab *Perdana Menteri Kelima* dalam buku saya **TALQIN UNTUK UMNO** yang telah ditakrifkan sebagai spekulasi politik oleh sesetengah pihak, membuatkan saya berasa bertanggungjawab keatas Al-Arqam dan kerana tangan saya yang mencincang maka bahu saya yang mesti memikulnya. Semuga tulisan ini dapat menerangkan siapa Ustaz Ashaari dan perkara-perkara ghaib yang menjadi perbincangan hangat mengenainya.

Saya tak tahu samada pihak-pihak yang membuat tafsiran yang salah kerana cemburu dengan kejayaan Ustaz Ashaari atau mereka memang sebenarnya takut dengan kebolehan yang ada pada Ustaz Ashaari? Yang jelas mereka ini menunjukkan sikap yang digambarkan oleh pribahasa Inggeris 'sour grapes'.

Pihak-pihak berkenaan yang telah memperalatkan beberapa golongan ulamak untuk menjatuhkan Ustaz Ashaari dan merosakkan nama baik Arqam adalah mereka yang cuba menyembunyikan kelemahan dan sikap inferiority complex mereka sendiri. Dan yang lebih pelik lagi, mengapakah golongan-golongan ulamak yang saya katakan itu sanggup membiarkan diri mereka digunakan oleh pihak-pihak yang berkenaan itu sedangkan mereka terpaksa menipu diri sendiri dengan memalsukan fakta-fakta agama dan nas-nas Quran. Perbuatan ulamak yang semacam ini amat memalukan umat Islam.

Pertelingkahan ulamak yang berlaku kini samalah macam apa yang berlaku dalam ugama Kris-



tian. Dalam ugama Kristian ulamak Protestan senantiasanya bermusuh-musuhan dengan para ulamak puak Roman Katolik. Begitu juga dengan fahaman '*Seven Day Adventist*' yang akidahnya tidak sehaluan.

Di negara kita ini sudah ada pertelingkahan yang semacam itu. Pertelingkahan itu bagaimanapun bukanlah berpunca dari siapakah Nabi Isa AS yang sebenarnya. Ini disebabkan semua orang Islam tahu bahawa Nabi Isa AS itu ialah seorang manusia yang telah dijadikan Nabi dan rasul dan telah diangkat oleh Allah ke atas langit.

Jika ulamak-ulamak Kristian mempertikaikan benda-benda yang semacam ini, maka ulamak-ulamak di dalam negara kita yang jenis oportunist yang menyedari adanya bahan-bahan yang boleh dipertikaikan macam perkara di atas yang terdapat dalam buku Aurad Muhamadiyah terbitan Arqam, maka mereka pun cepat-cepat menggunakan peluang ini untuk merosakan nama baik Arqam.

Inilah susahnyanya bila ada ulamak yang bekerja pada siang hari sahaja. Mereka nampak benda-benda yang terang dan jelas saja kerana mereka memandang dengan mata kasar tanpa menggunakan mata hati. Benda-benda yang tak terang dan tak jelas mereka tak nampak kerana ada kalanya mereka tak menggunakan mata kepala. Kalau mata kepala pun tak pakai macam mana hendak memahami benda-benda yang ghaib, yang menggunakan mata hati.

Apakah mereka terlupa bahawa udara yang kita

gunakan untuk pernafasan adalah satu benda yang kita tak boleh lihat? Lupakah mereka alam pemikiran yang digunakan oleh manusia untuk memikirkan segala macam benda dalam riwayat kehidupannya satu benda yang tak boleh dilihat dan dibuktikan secara objektif? Bagaimana dengan roh dan nyawa manusia? Bolehkah kita lihat seperti kita melihat jasadnya? Tidakkah semuanya ini benda-benda yang ghaib yang ada pada diri manusia? Kalau akal mereka tidak dapat memikirkan hal-hal yang semudah ini bererti mereka ini orang yang tidak mendapat petunjuk. Bukti-bukti bahawa sifat pengasih dan penyayang Tuhan serta kekuasaan Tuhan yang maha ghaib banyak terdapat dalam hidup manusia. Tapi sayang ulamak yang ada degree yang berjela-jela ini bukan ulamak yang original. Mereka tidak menggunakan mata kepala dan mata hati dan mungkin mereka juga terlupa yang Tuhan melihat terus ke hati.

Ulamak yang betul-betul original ialah ulamak yang selain dari beramal di siang hari, bertasbih dan berdoa serta menyebut nama Tuhan diwaktu malam yang gelap dan sepi. Mereka bersendirian dengan Allah. Mereka tahu hikmat-hikmat waktu malam, seperti yang dijanjikan Allah.

**“Demi malam apabila telah sunyi, Tuhanmu tiada meninggalkan kamu dan tiada pula membencikan kamu.”**

(Adh Dhuhaa: Ayat 2)

Maka itulah sebabnya bila Allah SWT mahu menunjukkan kekuasaanNya kepada hamba-hambanya, biasanya Allah akan memperlihatkanNya pada waktu malam. Benda-benda yang ghaib selalunya dapat dilihat pada waktu malam sahaja. Seperti peristiwa isra' dan mi'raj, tentang perjalanan Rasulullah yang berlaku pada malam hari. Begitu juga dengan kisah malam Lailatul kadar. Mari kita baca surah al-Isra' ayat pertama: Dalam surah tersebut Allah telah berfirman:

*'Mahasuci Tuhan yang menjalankan hambaNya Muhammad pada malam hari, dari Masjidil Haram ke Masjidil Aqsa, yang telah kami berkati sekelilingnya, supaya kami perlihatkan kepadanya sebahagian tanda-tanda kekuasaan Kami. Sesungguhnya Allah Maha Mendengar dan Maha Melihat.*

*(Surah Al Israk: Ayat 1)*

Dalam Surah Al-Qadar pula Allah berfirman:

*'Sesungguhnya telah kami turunkan Quran pada malam qadar. Tahukah kamu apakah malam qadar itu? Malam qadar itu lebih baik daripada malam seribu bulan.'*

*(Surah al-Qadar: Ayat 1,2 dan 3)*

Kedua-dua peristiwa diatas itu memanglah benda-benda yang amat ghaib. Perkara-perkara yang memang tak dapat digambarkan oleh otak manusia. Tak dapat difikirkan dengan akal fikiran. Tak dapat dihuraikan dengan kata-kata. Tak dapat dilihat oleh mata kepala. Ia pelik atau tidak, kita wajib mempercayainya kerana dalam surah Al Bakarah Allah berfirman supaya kita beriman



kepada yang ghaib.

**Al-Quran ini tidak ada keraguan padanya. Petunjuk bagi mereka yang bertaqwa, mereka yang beriman kepada yang ghaib.** Perkataan ghaib itu maknanya ialah:

*“Yang tak dapat ditangkap oleh pancaindera. Percaya kepada yang ghaib iaitu yang mengiktikadkan adanya sesuatu yang maujud’ yang tidak dapat ditangkap oleh pancaindera. Ini kerana ada dalil-dalil yang menunjukkan kepada adanya Allah, malaikat-malaikat, hari kiamat dan sebagainya.*

Tapi dalam politik orang tak percaya benda-benda yang ghaib. Mereka mahu bukti dan kenyataan dan bila sudah ada bukti dan kenyataan ada lain lagi yang mereka pinta. Sebenarnya merekalah orang yang berdolak-dalik dan tidak taat. Kalau ada kumpulan tertentu yang menceritakan benda-benda yang ghaib, mereka cepat-cepat jadikan isu. Mereka buat benda itu nampak kontroversial. Ini peluang keemasan bagi mereka. Jadi mereka gunakan ulamak dan para cendikiawan dari universiti.

Dalam hal ini kita ambil satu contoh. Contoh kita ini ialah contoh macam mana seorang pensyarah universiti yang sudah dimainkan oleh orang politik. Orang yang dimaksudkan itu ialah Profesor Madya Dr. Abdulfatah Haron Ibrahim. Disebabkan oleh kena main itu maka Abdulfatah sudah melenting-lentinglah. Beginilah dia melenting.

*Manakala pengetahuan kashf adalah subjektif atau zan atau waham hanya terbatas kepada si yang*

*mengalami sahaja. Pengetahuan kasyf atau ilham bercorak subjektif atau waham hanya dirasai sendiri tak mungkin boleh diceritakan kepada orang lain dan tak mungkin dirasai oleh sesiapa selain dari si yang mengalami itu sendiri.*

*QURAN PENUH BERISI DENGAN PERINTAH MENGGUNAKAN AKAL RASIONAL YANG OBJEKTIF ITU. Disamping tidak pula menafikan adanya ilmu kashf yang subjektif, tapi tiada perintah suruh orang ramai menggunakannya. Penekanan Quran hanya ke atas kelebihan penggunaan akal rasional itu semata-mata.”*

Itulah kata-kata yang di petik dari kertas kerja Abdulfatah. Kata-kata itu tidak begitu jelas dalam banyak segi. Dari segi fakta ia kabur dan samar-samar. Dari segi frasa dan ayat, banyak yang pincang.

Seorang ahli akademik sepatutnya memberikan definasi yang jelas mengenai kata-katanya. Apakah yang dimaksudkan dengan **AKAL YANG RASIONAL YANG OBJEKTIF ITU?** dan apa pula maksud ayat **DI SAMPING TIDAK PULA MENAFIKAN ADANYA ILMU KASHAF YANG SUBJEKTIF?** Berikanlah definasi objektif dan subjektif itu. Apakah bendanya yang objektif dan apakah bendanya yang subjektif? Objektif itu dalam hubungan dengan apa? Apakah objektif itu berdiri sendiri? Bagaimana pula yang subjektif itu? Dalam hubungan apakah sesuatu itu boleh menjadi objektif atau subjektif itu berdiri sendiri juga?

Kata-kata yang demikian kalaulah ditulis oleh

orang-orang biasa lainlah. Ini ditulis oleh seorang akademik. Seorang Mahaguru separuh (Prof. Madya). Bayangkanlah bagaimana jadinya murid-muridnya, yang belajar dengan mahaguru separuh.

Sebagai seorang akademik dia mestilah jelas apakah premis apabila dia bercakap. Dia mesti tahu dalam paradigma apa dia menulis. Jangan jadi sebarang-sebarang. Tidak boleh pakai hentam kromo saja.

Apa yang jelas dalam kertaskerja Abdulfatah ialah bidaahnya terhadap Al-Arqam. Dia menyebarkan keraguan Barangkali inilah dia contoh ulamak jumud yang duduk di dalam kokoon.

Inilah yang dinamakan **Dongeng yang bidaah.**

Saya ingin mengemukakan satu pertanyaan, siapakah guru Abdulfatah ini? Konon ceritanya dia seorang guru dalam bidang Usulluddin. Kalau macam itu pendapatnya macam mana dia boleh menjadi guru.

Allah SAW berfirman dalam surah Al Kaafirun:

**Katakanlah, hai orang-orang kafir!**

**Aku tidak akan menyembah apa yang kau sembah. Dan kau bukan penyembah Tuhan yang aku sembah.**

(Al Kaafiruun: Ayat 1 hingga 3)

Kita tahu kebanyakan dari orang-orang kafir ini ialah orang yang berilmu. Tapi ilmu mereka adalah setakat melihat, memahami dan menganalisa benda-benda yang nampak sahaja. Maka itulah sebabnya Tuhan mengakhiri Surah Al Kaafiruun dengan berfirman:



**“Untuk mu agamamu, dan untuk ku agama-ku.”**

(Al Kaafiruun: Ayat 6)

Bagi orang-orang yang tidak percaya kepada yang ghaib, tuhan-tuhan mereka berbentuk objektif sedangkan Tuhan orang Islam adalah berbentuk subjektif dan ghaib. Itulah sebabnya orang-orang kafir tidak dapat menerima hakikat ini. Para cendekiawan dan ulamak-ulamak siang hari juga adalah orang-orang yang berilmu. Tapi amat malang kerana mereka tidak dapat mengamalkan ilmu itu. Dan amat malang lagi bila mereka tidak menjiwai isi Quran dan menggunakan ilmu yang diperolehinya dengan cara yang tidak ikhlas malah menjadi malang lagi kerana ia boleh memecahkan kesatuan umat Islam.

Dalam hal ini suka saya memetik kata-kata Al-imam Al Gahzali dalam Ihya Ulummudin seperti berikut:

*“Sesungguhnya telah tersingkap bagi orang-orang yang mempunyai akal dengan mata hati iman dan Nur Al-Quran. Bahawa sesungguhnya dia tidak akan sampai kepada kebahagiaan selain dengan ilmu dan ibadah. Manusia itu semuanya akan binasa kecuali orang-orang yang berilmu. Orang-orang yang berilmu juga akan binasa selain dari orang-orang yang mengerjakannya. Orang-orang yang mengerjakan ilmu itu juga akan binasa selain dari orang-orang yang ikhlas. Orang-orang yang ikhlas itu di atasnya bahaya yang besar. Maka amal perbuatan itu tanpa niat adalah satu kepayahan. Niat tanpa ikhlas itu*

*satu keriyakan. Dan itu kesesuaian bagi kemunafikan dan kesamaan dengan kemaksiatan. Ikhlas tanpa kebenaran itu macam debu yang berterbangan*

*Firman Allah dalam Surah Al Furqan, ayat 23 :*

*Dan kami hadapi segala amal yang mereka kerjakan, lalu kami jadikan amal itu bagaikan debu-debu yang berterbangan”.*

Jadi sebagai seorang Profesor dalam bidang Usulluddin dan falsafah Islam apakah Dr. Abdulfatah dah baca segala isi kandungan Quran. Apakah beliau sudah mengamal dan mengerjakan segala ilmu yang terdapat di dalam kitab suci tersebut baik yang objektif mahupun yang ghaib atau mengikut istilah Abdulfatah yang subjektif. Apakah beliau ikhlas dalam menyampaikan ilmunya kepada umat Islam di dalam negara ini?

Dr. Abdulfatah seorang cendikiawan. Hari ini orang banyak mainkan orang lain. Ramai orang makan orang. Ini **‘cannabalisme’** dalam politik. Tapi dalam Quran tak ada **‘cannabalism’**. Yang ada ialah perintah supaya mempercayai yang ghaib. Ini saya nampak. Dr. Abdulfatah tak nampakkah? Kalau Profesor belum nampak lagi, biar saya tunjukkan pada Profesor.

**“Alif laam miim”.**

**Aliflaam mim** ini ialah **‘Fawaati-hushshuwar’** yang bererti pembukaan surah. Ia merupakan huruf-huruf hijaiyyah. Dan **Alif laam miim** ini memanglah amat ghaib. Kalau tak ghaib masakan tak ada orang yang boleh menafsirkannya. Akal yang objektif memang tak boleh sampai. Begitu

juga dengan akal yang subjektif. Dia tak tertakluk kepada kaedah induktif ataupun kaedah dedaktif, yang macam profesor katakan itu. Kalau **Immanuel Kant** pernah baca Quran dia tentu pening kepala. Tapi Kant bukan ahli falsafah Islam. Dia orang kafir. Dia hanya ada akal rasional. Akal yang lebih tinggi dari pada itu dia tak ada kerana dia tidak mendapat taufik dan hidayah dari Allah. Dia cuma dapat ilham yang hanya menggunakan mata kepala dan tidak dengan mata hati. Sebab itulah dia tulis *Critique of Pure Reason*. 'Reason' dia hanya bertolak pada apa yang akal dia boleh terima sahaja. Kalau ada orang Islam yang tak boleh terima sesuatu yang para normal, itu tanda dia sudah hampir sesat. Keislamannya boleh kita pertikaikan.

Dalam Islam ada banyak perintah yang tak pakai '**pure reason**'. Misalnya dalam bacaan tahyat sembahyang fardu kita memberikan salam kepada nabi. Nak buat apa beri salam pada orang mati? Apakah profesor tak tahu ada orang yang mendengar Nabi menjawab salam yang kita berikan padanya?

Rasulullah SAW telah menyuruh kita (umat Islam) supaya memberi salam kepadanya di dalam bacaan Tahayyat Akhir dengan ucapan:

**Assalam mullaika ayyuhan nabi yu warahmatullah hi wabarakatuh. Kama salai'ala Muhammad wa'ala alihi Muhammad...**

Rasulullah SAW sedar semasa baginda mengeluarkan ucapan itu bahawa satu ketika tidak dapat tidak beliau akan wafat dan beliau juga sedar betapa sembahyang dan bacaan tahayyat akhir yang di



dalamnya terkandung ucapan salam kepadanya akan menjadi amalan jenerasi Islam sesudah baginda wafat. Bukankah menjawab salam itu hukumnya wajib? Dan sudah tentu Rasulullah SAW menjawab salam yang diucapkan oleh umatnya walaupun sesudah baginda wafat. Jadi apakah mustahil Rasulullah SAW (yang telah menjawab salam yang diucapkan padanya itu) dapat ditemui oleh orang-orang tertentu (orang yang hampir dengan Allah dan dengannya) sesudah baginda wafat?

Nabi SAW telah bersabda: **Apabila salah seorang dari kamu sembahyang hendaklah baca: segala kemuliaan ialah bagi Allah dan juga segala kepujian dan segala kebaikan bagiNya, dan muga-muga Allah kurniakan keselamatan kepadamu, HAI NABI, dan juga muga-muga Allah kurniakan belas kesihanNya dan berkatNya kepadamu.**

Kalau pun profesor pernah dengar dan tahu hal serupa ini mungkin profesor tak percaya? Dan kenapa pula kita mesti mendoakan Nabi Muhammad SAW dan Nabi Ibrahim AS. Kalau kita ikut akal rasional, memanglah ini tak logik. Seorang penghulu segala nabi perlu apa dengan doa dan selawat lagi?

Logik atau tidak, itu perintah Tuhan. Kita mesti laksanakan juga. Tak payahlah kita bersusah-susah nak cari dia punya "reason". Nak cari dia punya rasional. Kalau kita cerita tentang perintah ini pada **Kant**, atau **George Berkeley** atau **Alfered N.**

**Whitehead, Martin Buber** atau **Jean-Paul Satre**, tentu dia tertawakan kita. Mereka akan kata orang-orang Islam ini **absurd**. Mereka ragu-ragu kerana mereka tak pernah baca Quran yang menyeru kepada yang ghaib. Kalau pun mereka baca mereka sekadar nak tahu dan menimba ilmu tapi bukan mahu jadikan AlQuran sebagai petunjuk dan beriman kepada kitab suci kepunyaan umat Islam yang Tuhan turunkan untuk memberi rahmat kepada sekalian alam.

**“Kitab itu (Al-Quran) tidak ada keraguan padanya, menjadi petunjuk bagi orang-orang yang bertaqwa, iaitu orang-orang yang beriman (percaya) kepada yang ghaib, mendirikan sembahyang dan menafkahkan sebahagian rezeki yang kami berikan kepada mereka.”**

(Al Baqarah: Ayat 2 dan 3)

Ayat yang saya petik itu semua orang Islam tahu. Kalau kita tak percaya kepada yang ghaib, kita bukanlah orang-orang yang bertaqwa. Orang yang tak bertaqwa tapi memahami segala usul-usul Islam selalunya boleh menyesatkan orang lain. Ilmu dia tak boleh digunakan untuk membuat orang lain mempunyai taqwa. Tapi kalau untuk setakat menulis tentang ajaran-ajaran sesat, itu boleh.

Inilah masaalahnya bila orang banyak ilmu ugama tapi tak mahu menggunakan tarikat dan makrifat. Dia duduk dalam kegelapan walaupun disekelilingnya tersimbah cahaya yang terang benderang. **‘Ambiguity’** yang macam ini berlaku sebab para ulamak yang makan gaji kebanyakannya

memeriksa apa yang ada di bumi sahaja. Mereka tak mahu memeriksa apa yang ada di langit. Sebab yang ada di langit itu tidak boleh buat duit. Pada hal ada ayat yang memerintahkan supaya kita memeriksa apa yang ada di bumi dan di langit. Bila ada orang-orang yang menulis buku macam mana hendak periksa benda-benda di langit, mereka cepat-cepat buat dongeng bidaah. Mereka katakan Al-Quran tidak menekankan ilmu-ilmu yang macam itu. Kata mereka kalau adapun perkara-perkara yang macam itu yang disebut oleh Al-Quran ia adalah ayat-ayat yang berbentuk cerita (khabariyyah) dan bukan perintah (insyaiyyah).

**“Kashaf Ghaib dalam Quran hanyalah terbatas kepada peristiwa yang boleh dibuktikan secara fizikal oleh orang lain selepas berlakunya itu. Seperti kisah nabi Yaakob, ibu Musa dengan Hidir.”**

Dalam kata-kata lain peristiwa-peristiwa yang dimaksudkan oleh Abdulfatah ini adalah peristiwa-peristiwa yang bertolak pada **‘pure reason’**. Misalnya, ‘UMNO parti haram’. Mengapa dia haram? Dia haram sebab ada cawangan-cawangannya yang tidak didaftarkan. Ia ada sebab dan ada kesan. kata orang sastera ada **‘cause and effect’**.

Sepertilah kemalangan dan mati adalah dua benda yang berbeza sama sekali. Ramai orang yang menemui kemalangan tapi tak mati sama seperti ramai yang mati tanpa kemalangan. Mati ditakdirkan oleh Allah sedangkan kemalangan sekadar



sebab yang dapat kita lihat saja dan dapat kita berikan sebab-sebab kenapa terjadinya kematian. Sebab itu mereka yang tidak percaya kepada kekuasaan yang ghaib menyalahkan sebab dan terus mencari sebab tanpa memikirkan itu kehendak penciptanya iaitu menghidupkan dan mematikan.

Dalam politik memanglah ada **'cause and effect'**. Macam juga dalam benda-benda lain dalam hidup kita. Tapi dalam agama ada benda-benda yang tak boleh bertolak pada akal rasional sahaja. Ataupun pada **'pure reason'**. Ataupun pada **'cause and effect'**. Dalam Islam banyak benda-benda yang ada **'effect'** tapi tak ada **'cause'**. Ibarat kata **Conon Doyle**, pengarang cerita **Sherlock Holmes**, **"We have been compelled to reason backward from effects to causes"**.

Siapakah yang boleh membuktikan tentang peristiwa Isra' dan Mi'raj ataupun malam Lailatul-qadar. Peristiwa-peristiwa ini memang tak ada **'cause'** tapi ada **'effect'**. Kesannya kepada ummat Islam amat besar. Maka itulah sebabnya Tuhan berfirman dalam Surah Yunus ayat 101.

**Periksakah olehmu, apa-apa yang ada dilangit dan dibumi..."**

Surah Yunus 101

Ini ayat insyaiyyah bukan khabariyyah. "Periksalah.." adalah perkataan yang **'imperative'** yang menyeru dan bukan **'indicative'** ataupun yang menerangkan.

Tapi perintah-perintah yang macam ini hanya

difahami oleh orang-orang tarikat sufi sahaja. Mereka memeriksanya bukan dengan akal yang rasional yang fizikal tapi dengan akal subjektif yang metafizikal. Sebab itu mereka berzikir pada waktu malam. Mereka boleh nampak dan alami benda-benda yang ulamak siang hari tak boleh nampak. Firman Tuhan

**'Demi malam tatkala telah sunyi, Tuhanmu tiada meninggalkan kamu dan tiada pula membenci akan kamu'**

(Surah Adh Dhuha: Ayat 2 dan 3)

Ulamak-ulamak siang hari tak boleh buat macam apa yang dibuat oleh ulamak-ulamak sufi dan tasa-wuff. Ini kerana pada sebelah siang mereka kerja makan gaji, tidak mengikut sunah rasul. Nabi bersabda jadikanlah 90 peratus pendapatan kamu dari perniagaan. Orang berniaga menyerahkan hidup mereka pada Tuhan bukan macam ulamak yang makan gaji serah hidup pada tuan dan pada kerajaan. Entah dari mana datangnya wang yang membayar gajinya? Mereka tak berani bertanya, telan saja. Tak wajib usul, kata dia. Tapi banyak benda-benda lain yang dia usul. Bukan sebab apa, tapi kerana kena suruh.

Ulamak siang hari bila habis kerja ada yang pergi berjumpa teman-teman politik. Perjumpaan yang macam ini biasanya berlarutan hingga ke waktu malam. Sebelum tidur mereka berzikir juga. Namun apakah sama zikir mereka dengan zikir ulamak sufi? Ulamak siang hari ada yang perangai macam kucing senak, bergaduh sama sendiri kerana ada kawan

yang nikahkan pasangan yang menjadi pelanggan mereka. Ada yang waktu kerja mereka akan memikirkan tentang bagaimana hendak melobi orang-orang politik supaya senang naik pangkat. Yang baru jadi pensyarah, teringin nak jadi Prof. Madya. Yang dah jadi Prof Madya teringin nak jadi Profesor. Bila dah jadi Profesor timbullah pula keinginan nak jadi Timbalan Naib Chanselor dan mungkin selepas itu nanti Chanselor atau Menteri Agama atau Ketua Pengarah Pusat Islam. Dan macam-macam lagi. Yang nak kahwin dua tapi takut kat bini pun ada. Ada pula yang hebat lagi angan-angannya, mahu jadi Perdana Menteri. Tu dia, jalan yang paling mudah tentang Ustaz Ashaari dan Al-Arqam.

Naik pangkat bererti naik gaji. Naik gaji bererti duit semakin banyak. Bila duit dah banyak beli saham itu dan ini labur sana dan sini. Kadang-kadang pula terlupa nak bayar zakat. Padahal ibadat sembahyang dan zakat tidak dapat dipisahkan, macam aur dengan tebing. Maka akhirnya mereka meninggalkan saudara-saudara mereka jauh ke belakang. Mereka mahu hidup sendiri-sendiri saja. Orang lain biar mati. Kalau tak mati racun fikiran orang suruh matikan musuh mereka. Ada ke patut orang yang berjihad di jalan Allah dijadikan musuh? Apa punya ulamak?

Itu memanglah kerja ulamak siang. Ulamak malam tak buat kerja macam itu. Mereka tak ada cita-cita nak naik pangkat atau nak dapat gaji besar. Mereka beramal semata-mata untuk Allah. Duit



mereka dapat dari hasil perniagaan mereka sedekahkan kepada anak-anak yatim dan fakir miskin. Itulah sebabnya dulu bila Al-Arqam mahu mengambil alih pengendalian anak-anak yatim dari Pusat Islam dengan niat yang jujur dan ikhlas kerana Al-Arqam percaya mereka dapat buat kerja itu dengan lebih dedikasi dan penuh minat daripada Pusat Islam, maka ulamak siang hari pun suruh akhbar menulis tentang kumpulan itu mahu mengambil alih seluruh Pusat Islam supaya kumpulan itu nampak macam tak betul. Inilah akibatnya bila ulamak-ulamak yang makan gaji ini ada cita-cita politik. Mereka sanggup membuat bidaah dan ulamak-ulamak lain diseluruh negara pun terjerit terlolong burukkan Ashaari dan Al-Arqam. Macam orang serpihan burukan Dr. Mahathir dan UMNO. Apa saja Mahathir dan UMNO buat tak betul.

Tapi bidaah biasa oleh Ku Li, Musa dan orang-orang Semangat 46 lemparkan terhadap Dr. Mahathir, itu tak mengapa sebab tak boleh memesongkan akidah. Cuma mereka tak mahu percaya kekuasaan Tuhan boleh beri kerusi pada siapa yang Tuhan suka. Itu perkara biasa dalam politik. Tapi antara ulamak dengan ulamak memanglah tak patut ada politik, ada syak wasangka dan ada 'cannibalism' kerana mereka orang yang berilmu.

Adalah tak patut bagi ulamak makan gaji mem-bidaahkan apa yang diceritakan oleh ulamak yang mengikut sunnah Rasulullah. Dalam hal ini inginalah saya petik lagi tulisan dalam kertas kerja yang betul-betul mahu mengerjakan buku Aurad

Muhamadiyah dan kumpulan Darul Arqam. Dalam bahagian kecil yang bertajuk '**Satu Kesesatan**', Profesor Madya Abdulfatah menulis:

*"Saya berpendapat jika benar Syeikh Suhaimi sendiri mengaku bertemu dengan Rasulullah waktu dalam Kaabah menerima Auradnya, maka itu adalah pengalaman peribadi yang subjektif. Tiap-tiap ilmu yang bercorak subjektif maka orang lain tak boleh menyertainya. Tak boleh menyatakan benar dan tak menyatakan salah. Tinggalkan begitu sahaja.*

*Dakwaan kononnya Syeikh Suhaimi berjumpa dengan Rasulullah dalam keadaan jaga dalam Kaabah menerima Aurad Muhamaddiah.*

*Kisah-kisah seperti ini terdapat juga dikalangan pengasas-pengasas tarikat yang lain.*

*Umpamanya Sidi Ahmad pengasas tarikat Ahmadiyah juga mendakwa bahawa Rasulullah sendiri mengijazahkan wirid tarikatnya dalam keadaan jaga bukan mimpi. Sedangkan jarak masa hidup Rasulullah dengan Syeikh Suhaimi, atau Sidi Ahmad adalah ratusan malah ribuan tahun".*

Perkara yang semacam ini kita tak boleh pelik. Kita tak boleh hairan, tak boleh was-was, tak boleh ragu-ragu, tak payah nak mintak tunjuk bukti, tak payah nak susah-susah mintak pensyarah Usuluddin menghuraikannya. Tapi kalau ada juga orang yang mahu merasa pelik, ataupun hairan, ataupun ragu-ragu, maka beratlah cerita. Ceritanya berat sebab dosa yang akan dipikul oleh orang itu juga cukup berat. Kata pepatah, berapa berat bidaah yang dilakukan, beratlah lagi dosa yang terpaksa



dipikul. Ini sebab orang-orang yang seperti ini, mereka meragui kekuasaan Allah SAW.

Tidakkah mereka tahu bahawa Tuhan memberikan kemenangan, kemuliaan, kelebihan, bahkan hatta kekeramatan sekalipun kepada sesiapa sahaja yang disukainya. Dia sahaja yang Maha Mengetahui. Tuah Syeikh Suhaimi nak bertemu Rasulullah dalam keadaan jaga. Itu rezeki dia, tuah dia, kekeramatan dia dan nikmat yang diperolehinya dari Allah SWT. Segala-galanya berpunca dari Allah SWT. Yang para cendikiawan, ulamak dan ahli-ahli politik tertentu jadi resah gelisah ni, kenapa? Cuba tanya pada diri sendiri, ukur akal, kebijaksanaan dan ilmu yang ada pada diri dulu sebelum hendak mempersoalkan hak-hak dan pemberian Tuhan kepada hambanya.

Lagipun apa dihairankan jika Syeikh Suhaimi dapat bertemu Rasulullah SAW secara jaga, bukannya ada ayat Quran yang menyatakan:

**Dan janganlah kamu mengatakan terhadap orang yang gugur di jalan Allah itu mati; bahkan mereka itu hidup, tetapi kamu tidak menyedarinya”**

(Al Baqarah: 154)

Nabi Muhammad pun pernah bersabda:

**Adalah nabi-nabi itu hidup di dalam kubur mereka dan sembahyang mereka itu.**

(Riwayat Imam Baihaqi dari Anas bin Malik).

Begitu juga Rasulullah SAW pernah mengajar para sahabat supaya berkata begini:

**Salam atasmu hai penduduk kampung**



**Mukminin dan Muslimin dan kita InsyaAllah akan mengikuti kamu. Kami memohon afiat untuk kami dan kamu**

(Riwayat Muslim)

Perkataan itu diajar oleh Rasulullah kepada sahabat-sahabatnya supaya diucap ketika menziarahi kubur.

Bahkan perkara pertemuan para aulis dengan Rasulullah SAW secara jaga adalah lumrah dalam riwayat hidup para ulama-ulama sufi. Saiyidi Abdul Wahab As Syaarani berkata:

**Hukum-hukum yang mereka (iaitu imam Mujtahid yang empat) keluarkan adalah bersumber Al Quran, Sunnah (Hadis), perkataan sahabat, Imam Mujtahid dan kasyaf. Kasyaf itu bertemu langsung dengan roh Rasulullah SAW dan bertanya: *Wahai Rasulullah, adakah ini (Quran dan hadis) dari engkau atau tidak?***

Syeikh Adul Hasan As Shazali berkata:

**Jikalau terlindung dari kami melihat Rasulullah SAW dengan sekelip mata sahaja bukanlah kami dianggap dari orang Islam.**

Apakah kita lupa kesah Is'ra Mikraj, yang mana meriwayatkan Rasulullah SAW juga telah bertemu para nabi-nabi di tiap-tiap langit yang dilaluinya? Begitu juga telah mahsyur ditulis dalam kitab berzanji yang dibaca oleh kebanyakan umat Islam di Malaysia bila tibanya Hari Maulud Nabi begini:

**Adalah rohanian Siti Mariam dan rohaniah Asiah hadir keduanya pada malam diper-**

**anakkan Nabi Muhammad SAW seolah-olah menjadi bidaan menanti kelahiran Nabi Muhammad.**

Bukankah Siti Mariam (ibu Nabi Isa) dan Siti Asiah (isteri Firaun) telah lama meninggal dunia sebelum kelahiran Nabi Muhammad? Mengapa mereka boleh hadir ketika Nabi Muhammad dilahirkan? Inilah antara perkara-perkara ghaib yang tidak mampu dicapai oleh kekuatan akal fikiran dan pandangan mata kepala sahaja!

Itu satu pasal. Satu pasal lagi yang saya nak cakap ialah tulisan profesor yang tak '*consistence*' dalam mengemukakan hujjah. Profesor bukan lepasan dari sekolah pondok. Profesor ada Ph.D. Jadi tak patutlah profesor tulis macam itu.

Mula-mula profesor kata kalau Syeikh Suhaimi benar-benar menerima Aurad Muhamadiyah dalam keadaan jaga, itu adalah pengalaman peribadi.

Tengoklah profesor ini, dia tak tolak pertemuan itu bulat-bulat. Dia **Play-safe**. Dia kata tak boleh menyatakan benar dan tak mengatakan salah. Tinggalkan begitu sahaja.

Bila tinggal begitu saja jadilah apa-apa yang terjadi hari ini. Nak beritahu yang benar takut kena marah. Bila kena marah nanti kena turun pengkat atau turun gaji. Jadi duduklah diam-diam. Jangan buat apa-apa. Ulamak apakah ini?

Untuk *play safe* lagi dia buat ayat-ayat yang tak lengkap. Ayat-ayat yang tak boleh berdiri dengan sendirinya. Kalau mengikut orang-orang sufi, ayat-ayat yang jenis-jenis begini adalah ayat-ayat yang

ghaib. Ayat dia berbunyi **Dakwaan kononnya Syeikh Suhaimi berjumpa dengan Rasulullah dalam keadaan jaga dalam Kaabah menerima Aurad Muhamadiyah.**

Alih-alih ayat itu terputus macam itu sahaja.

Ini satu lagi *'inconsistency'*. Satu *'ambiguity'*. Malah satu paradoks. Bukan sahaja *'absurd'* malah *'contradictory'* sifatnya. Dr. Abdulfatah mendakwa bahawa sesuatu itu mestilah dilihat dari akal yang objektif. Tapi macam mana pula dia boleh menulis sesuatu yang subjektif, dan yang tergantung? Ini pelik. Kita ambil satu contoh lagi. Contoh kali ini bukan dari kertas kerja yang dia bagi pada **Utusan Malaysia**. Kita ambil dari buku dia yang bertajuk **Ajaran Sesat**. Di akhir **'Pendahuluan'** buku tersebut dia menulis, **"Jika buku ini dapat membawa kebaikan kepada orang Islam, maka ini adalah fadl dan talqin dari Allah Subhanahu Wataala."**

Tapi jika tidak, macam mana?

Kata Dr. Abdulfatah lagi dalam kertas kerjanya **"Tiap-tiap ilmu yang bercorak subjektif maka orang lain tak boleh menyertainya."**

Ayat ini sengaja difrasakan sedemikian rupa supaya ia membawa implikasi yang Ustaz Asahaari turut bersama Syekih Suhaimai ketika bertemu Rasulullah.

Bila pula Ustaz Asahaari cakap macam tu? Tulisan Dr. Abdulfatah nampaknya sengaja nak menyesatkan pembaca. Patutlah dia tulis buku **'Ajaran Sesat'**. Kata peribahasa Inggeris **'it takes**



### **a thief to catch a thief.**

Inilah akibatnya bila berguru tak habis. Bila dah keluar universiti, tak mahu baca buku banyak-banyak. Kalau baca pun pasal ajaran-ajaran sesat. Sese kali cuba baca falsafah Einstein dan Lonrentz.

Menyentuh pasal penggunaan rangkai kata 'ribuan tahun' dalam tulisan profesor bagi menerangkan jarak masa Sheikh Suhaimi dengan Rasulullah, ini kenalah saya cakap sikit dengan profesor. Menurut anak saya yang belajar matematik dalam darjah empat, katanya rangkaikata 'ribuan tahun' bermaksud banyak ribu tahun. Bukan setakat satu atau dua ribu tahun. Kalau profesor tak pandai kira, mari saya tolong profesor kira. Nabi baru wafat selama lebih kurang 1400 tahun. Tak pun sampai dua ribu tahun. Jadi macam mana profesor kata ribuan tahun? Ini objektifkah atau subjektif?

Terlanjur kita dah cakap pasal matematik ini ada baik juga kita cakap sikit pasal teori Albert Einstein. Maklumlah orang Usulludin macam profesor mungkin tak main teori-teori yang macam ini.

Kata Albert Einstein **space-time** ataupun masa dan tempat bukanlah nilai-nilai yang mutlak. Jadi jarak masa (ribuan tahun, mengikut kiraan profesor) diantara Syeikh Suhaimi dengan Rasulullah bukanlah sesuatu yang mutlak tapi hanya relatif diantara Tuhan dengan manusia. Dalam hal ini mana yang objektif dan mana yang subjektif? Di dalam syariat tidaklah salah jika kita berdoa untuk bertemu Rasulullah SAW secara jaga. Dan

terpulanglah kepada Allah untuk memperkenannya. Tapi Allah ada berfirman: **Berdoalah nescaya Aku perkenankan.** Jika kita layak, nescaya Rasulullah ingin menemui kita. Maka apa mustahilnya lagi jika Allah telah perkenankan dan Rasulullah pun telah ingin menemui kita? Cuma yang menjadi masalahnya hanya sedikit orang yang layak. Ramai yang tak layak. Jadi yang tak layak itulah yang mengatakan perkara ini mustahil, bidaah dan sesat. Pepatah Arab ada mengatakan: **Orang Jahil memusuhi apa yang tidak diketahuinya.** Jadi bila ilmu-ilmu hakikat, makrifat yang berkaitan dengan pengalaman-pengalaman kerohanian yang tidak diketahui apa lagi dialami dan dirasakan sendiri oleh penentang-penentangannya, maka dengan mudah mereka menuduh yang bukan-bukun.

Perhatikan sebuah hadis yang diriwayatkan oleh Imam Bukhari ini:

**Barang siapa melihatku di dalam mimpi maka ia akan melihatku dalam keadaan jaga. Dan syaitan tidak boleh merupa dengan rupaku?**

Apa tafsiran ulamak-ulamak sufi tentang hadis ini? Mereka berkata, barang siapa yang bermimpi berjumpa Rasulullah maka ia akan berjumpa Rasulullah di dunia lagi (maksudnya semasa hidup secara jaga). Antara ulamak-ulamak sufi yang telah bertemu Rasulullah secara jaga ialah Asy Syeikh Al Barrowi, Saiyidil Ibrahim Al Matbuli dan lain-lain lagi. Dan tidak mustahil Syeikh Suhaimi

seorang daripadanya.

Allah berfirman dalam Al-Quran sesungguhnya **Kami berkuasa menghidupkan yang mati dan mematikan yang hidup.**

Ayat ini juga sesuatu yang relatif. Bagi orang tarikat sufi, mereka boleh memahami kedua-duanya sekali. Bagi orang biasa dia melihat dari satu aspek sahaja, iaitu mematikan yang hidup?

Tuhan juga menyuruh hamba-hambanya berdoa. Kita boleh berdoa tidak kira bila-bila masapun. Semua orang tentu pernah berdoa walaupun sekali dalam hidupnya. Ada orang yang berdoa supaya Tuhan memelihara nikmat yang diterimanya. Ada orang yang berdoa supaya **business** dia maju. Tidak kurang juga orang yang berdoa supaya cepat naik pangkat, jadi menteri, atau jadi Perdana Menteri. Malah ada yang membaca yassin beramai-ramai agar Mahathir hilang jawatan atau mati.

Orang-orang tarikat sufi pun berdoa juga macam orang lain. Bezanya doa orang sufi tak sama dengan orang yang masih lagi ada kepentingan pada hal-hal keduniaan. Doa orang sufi adalah doa yang ghaib-ghaib yang tak ada kena mengena dengan kepentingan duniawi. Mungkin itulah sebabnya bila Syeikh Suhaimi berdoa, barangkali dimalam Lailatul qadar maka Tuhan mengizinkan beliau bertemu Rasulullah dalam keadaan jaga atau hidup. Ini memanglah ghaib tapi tak mustahil. Mustahilkan Tuhan menghidup yang telah mati?

Kalau ada orang mengatakan mustahil, orang itu sudah tak percaya lagi pada kuasa Allah SWT. Orang macam itu bolehlah kita katakan dia dah



sesat. Bukankah Allah itu berkuasa dengan hanya berkata **Kun faya kun**. Jadilah! maka terjadilah ia.

Lagipun Syeikh Suhaimi jumpa Rasulullah di Kaabah, yang terletak di tanah haram, Makkahtul Mukarammah. Semua orang tahu Rasulullah lahir di Mekah dan makam Rasulullah letaknya di Madinah. Dan semua orang tahu Madinah bukan jauh sangat dengan Mekah.

Pertemuan itu bukan berlaku di Batu Cave, di Gunung Ledang atau diatas Gunung Jerai atau dekat kolam bekas lombong bijih di Bangi.

Ini adalah nikmat-nikmat yang dikurniakan oleh Allah SWT kepada orang-orang sufi yang sentiasa berzikir di malam hari. Banyak lagi nikmat yang semacam ini kita tak tahu dan tidak akan mengetahuinya.

**Hai jin dan manusia, jika kamu sanggup menebusi (melintasi) langit dan bumi, maka lintasilah, kamu tidak dapat menembusnya kecuali dengan kekuatan.**

**Maka nikmat Tuhan kamu yang manakah yang kamu dustakan?**

(Ar Rahmam: Ayat 34 & 35)

Semuga profesor dapat terangkan makna firman yang diatas untuk orang ramai faham, bahawa mereka yang beriman pada yang ghaib saja yang akan mendapat nikmat tentang kekuasaan Allah yang berada di langit dan di bumi. Insafilah bahawa tidak ada manusia yang berilmu melainkan Allah. Semoga profesor tidak menidakkan ilmu dan nikmat Allah yang telah diberikan pada hambanya. Sekiranya Abdulfatah berasa dia jauh lebih berilmu

dan lebih pandai pada Ustaz Ashaari dan beliau tidak mahu mengikut perjalanan Al-Quran itu tak mengapa. Ego Abdulfatah adalah haknya biarpun Allah tidak suka pada mereka yang ego, riak dan sombong tapi janganlah sampai menggoda supaya orang lain jangan jadi pengikut Al-Arqam yang banyak mendidik umat Islam kejalan yang diajarkan oleh Al Quran dan Sunnah.

Satu perkara lagi yang patut diselesaikan kalau rajin sangat ialah menulis buku. Kalau tak reti menulis buku terjemahkan saja kitab-kitab agama Islam. Ini perkara yang berfaedah untuk umat Islam. Anuar Ibrahim telah meminta supaya kitab-kitab besar diterjemahkan. Banyak kitab-kitab yang perlu diterjemahkan seperti kitab-kitab oleh Shah Waliyullah Al-Dihlawi. Itu semua patut diterjemahkan. Janganlah masuk ke dalam dunia yang kita tak tahu. Nanti kalau tersilap, budak-budak kata, awak ini profesor kucing senak. Bila dikatakan kucing senak kita nak marah. Tapi nak marah pun tak boleh sebab kita memang buat perangai kucing senak. Apa tidak nya kalau kita berlagak tahu dengan benda-benda yang kita tidak tahu. Istilah kucing senak ini saya pinjam dari Yusuf Harun.

Janganlah jadi ulamak siang atau ulamak kertas. Pergi belajar dapat ijazah maka orang pun panggil ulamak. Orang panggil ulamak sebab dia ada ijazah, bukan sebab ketampilannya dalam bidang ilmunya atau kepandaiannya dalam bidang ilmunya. Kalau betul-betul nak jadi ulamak jadilah ulamak yang dianugerahi oleh Allah. Ulamak yang boleh dipercayai sebagai pewaris nabi.

# TEORI KUCING SENAK

**D**alam perkampungan politik perpecahan sesama orang politik memanglah lumrah kerana masing-masing mahukan kuasa. Itulah sebabnya terdapat banyak parti pro-kerajaan dan tidak kurang pula parti-parti yang anti-kerajaan. Dalam parti-parti yang pro-kerajaan pun, ada kem yang bertenangan, masing-masing ada puak-puak serta kem-kem yang mirip kepada pemimpin pemimpin tertentu.

Bagi mereka yang sudah membaca sejarah bagaimana iblis menjadi makhluk pertama yang tersingkir dari syurga dan mengepalai peranan sebagai 'Godfather' kepada golongan-golongan serpihan, tentulah mereka tidak merasa hairan. Bahkan mereka tidak akan rasa sedih atau menyesal kerana manusia yang berpecah belah itu telah dipermainkan dan diperdayakan oleh syaitan ataupun telah terpengaruh dengan ego syaitan yang tak mahu tunduk kepada insan yang telah Tuhan berikan kemuliaan.

Benda-benda seperti ini tak payahlah kita susah-susah nak buktikan sebab buktinya ada dihadapan mata kepala kita kini. Dalam UMNO umpamanya, ada puak yang pro-Anwar, ada yang pro-Yusof Nor, ada yang pro Ghafar, ada yang anti Ghafar.



Begitu juga dengan Semangat 46, ada yang pro Ku Li dan ada yang pro Musa. Sekarang bila sudah berpecah dua dalam kem Ku Li ada yang pro Rais Yatim ada yang pro Harun Idris.

Dalam PAS pun macam itu juga ada pengikut-pengikut yang berpuak-puak. Ada yang merestui kerjasama PAS dengan golongan serpihan dan ada yang melihatnya sebagai satu bahaya kepada parti tersebut. Sebab itu Haji Hadi kena berfikir, jangan sampai terpengaruh dengan Subki yang mendakwa pro Islam tapi tulisannya pro sekular. Kita bimbang kalau Hadi tidak hati-hati, nanti PAS akan kehilangan Trengganu yang rakyatnya sudah pun mula mendapat nikmat Tuhan yang keluar dari perut bumi dalam negeri dimana Haji Hadi sedang berpijak.

Namun, walau apapun ideologi yang di dokong, kepercayaan politik yang dianuti serta kepentingan pribadi yang terselindung disebalik perjuangan masing-masing, alasan yang digunakan tetap satu. Semuanya mendakwa mahukan orang Melayu bersatu. Inilah bendanya yang **'cakap tak serupa bikin'**. Macam mana nak bersatu kalau pemimpin tak mahu membuang sifat yang mementingkan diri sendiri.

Pertelingkahan manusia politik yang kini mengancam kestabilan negara serta menimbulkan keresahan rakyat ialah kerana tidak adanya sifat taat dan para ulamak pula mula berpuak-puak. Banyak implikasi yang berkait rapat dengan sifat ketaatan yang menyebabkan perpecahan. Masing-masing

mahu mempertahankan ego.

Macam mana kita nak pakai cakap ulamak seperti Ibrahim Azmi apabila beliau mendakwa yang beliau cintakan perpaduan sedangkan kita tahu beliau bergantung di bawah ketiak Tengku Razaleigh. Siapa tak tahu yang beliau ada kepentingan dalam politik.

Ulamak-ulamak PAS pula boleh mengkafirkan orang lain demi kepentingan perjuangan politik mereka. Sepatutnya ulamak dan tuan guru PAS ajar pengikut mereka tentang fardu ain dan bawa semua ahlinya menjadi jemaah Islam yang benar-benar berjuang atas nama Islam tanpa memperjuangkan ideologi dan manifesto pertubuhan politik yang boleh mengubah pemikiran ummah ke arah yang tidak Islam. Adakah nabi-nabi yang mendaftarkan parti politiknya sebelum berjuang.

Karl Marx tak payah tubuh parti. Tapi kerana kekuatan pemikirannya orang berubah mengikut fahaman yang dibawanya. Kita ada Al-Quran, ada hadis.

Cuba tengok ulamak-ulamak yang bergiat dalam Pertubuhan Arqam mereka sibuk menerbitkan majalah-majalah. Ketuanya Ustaz Ashaari menulis berapa banyak buku yang boleh memberikan kesedaran kepada umat Islam. Mereka hidup dengan cara berniaga. Mereka ajar ahli-ahlinya berniaga, menjadi salesman (jurujual) mencontohi sunnah Nabi. Ini dilakukan kerana mereka memerlukan kekuatan rohani dan jasmani untuk kehidupan keduniaan dan akhirat. Dalam masa

yang sama mereka terus memperjuangkan hukum-hukum Allah dengan mengajar ilmu tasauf dan tarikat biarpun mendapat tentangan hebat dari ulamak kertas dan ulamak siang hari. Mereka tahu tidak ada perjuangan yang mudah. Mereka ingat sejarah perjuangan Rasulullah tatkala mula-mula mengembangkan Islam.

Sepatutnya ulamak-ulamak semua mesti bersatu untuk mengatakan kebenaran serta bekerja sama untuk meninggikan syiar Islam. Bukan berpuak-puak untuk merebut pangkat atau nak menjadi kadi atau imam dan sebagainya. Penyatuan ulamak nampaknya masih diawang-awangan. Ulamak tak akan bersatu padu kerana mereka mempunyai kepentingan politik serta kepentingan peribadi dan tidak mahu taat kepada Allah dan Rasul dengan sebenar-benar taat.

Dalam bab ini saya mahu membawa anda melihat bagaimana sesetengah ulamak makan gaji cuba membidaahkan ulamak tidak berkepentingan.

Untuk menjadikan contoh saya ambil isu tentang kelahiran Imam Mahadi. Isu ini sengaja saya ambil kerana semua orang Islam tahu siapakah dia Imam Mahadi.

Untuk itu kita petik tulisan seorang ulamak makan gaji yang namanya sedang sibuk diperkatakan. Ulamak yang saya maksudkan itu ialah tidak lain dan tidak bukan dari Professor Madya Dr. Abdulfatah Haron. Dan Tulisan yang hendak dipetik itu berbunyi: **'Kemuncak dari segala-segalanya ialah insan ideal iaitu Wali Kutub**



**dan Imam Mahdi yang berasal dari Syiah pengaruh falsafah neoplatonisme.'**

Mengikut kesimpulan di atas itu, Dr. Abdulfatah telah menolak kewujudan Wali Kutub dan menidakkan kelahiran Imam Mahadi. Menurutnya lagi kepercayaan kepada Imam Mahadi adalah berpunca dari golongan Syiah. Dan menurutnya lagi orang Syiah terpengaruh dengan pendapat neoplatonism.

Perkara pertama yang nak saya ceritakan ialah tentang falsafah neoplatonism.

Neoplatonism adalah falsafah yang cuba memperkembangkan idea metafizik yang dipelopori oleh ahli falsafah Greek, Plato. Rata-rata doktrin falsafahnya bersifat Greek. Neoplatonism yang membawa aliran idealisme, metafizik dan monoisme dikatakan bermula di Alexandria, Mesir pada kurun ketiga.

Sungguhpun ia banyak mempengaruhi ahli falsafah Syria, Yahudi dan Kristian, namun tidak ada satu buktipun yang menunjuk dengan sejelas-jelasnya (*beyond reasonable doubt*) bahawa golongan Syiah Syiddina Ali telah dipengaruhi oleh falsafah neoplatonism ini. Jika adapun, bukti itu samar-samar dan tertakluk kepada penafsiran yang tidak mutlak.

Mungkin inilah yang dimaksudkan oleh Hasbullah Abdul Rahman dari **Universiti Kebangsaan Malaysia** dalam rencana beliau yang disiarkan dalam **Berita Harian** keluaran Jumaat 6 Januari 1989 yang bertajuk '**Ilmu — Amanah besar**

**Allah kepada makhluk’.** Tulisan itu saya petik:

*“Pemalsuan fakta keilmuan dilakukan demi kepentingan survival diri, kelompok serta bangsa sebagai contoh intelektual yang telah mengakibatkan imej Islam dirantau sebelah sini sudah terlalu banyak tercemar oleh tulisan bernada sinis”.*

Konsep kelahiran Imam Mahadi tidak boleh dihubungkan dengan falsafah neoplatonism. Ini kerana kelahirannya itu adalah bersandarkan beberapa buah hadis.

Hadis pertama yang diriwayatkan oleh Abu Daud dan Tarmizi berbunyi:

**“Imam Mahadi itu akan keluar di akhir zaman, namanya Muhammad bin Abdullah atau Ahmad bin Abdullah.”**

Hadis kedua yang di riwayatkan oleh Imam-imam Abu Dawud dan Hakim pula berbunyi:

**“Imam Mahadi itu termasuk dalam lingkungan ahlulbait atau keluarga Rasulullah SAW yakni dari puteri beliau SAW yang bernama Fathimah.”**

Manakala hadis yang diriwayatkan oleh Imam Muslim pula bermaksud:

**“Imam Mahadi dikaruniai ketetapan kekuasaan dan di masa pemerintahannya amat luaslah rezeki ummat, karena memang benar-benar berlaku adil dan banyak pula harta diberikan. Ia menyebarkan harta itu dengan merata sekali, tanpa menghitung jumlah sama sekali.”**

Jadi berdasarkan hadis tersebut dan beberapa

hadis yang lain lagi, Imam Mahdi bukanlah satu mitos neoplatonism. Ia adalah satu perkara yang akan berlaku dan menjadi sebahagian dari Asyraatus-Saa'ah alkubra iaitu tanda-tanda besar hari kiamat.

Mengatakan Imam Mahadi itu satu kepercayaan neoplatonism adalah sama seperti mengatakan bahawa Imam-imam Tarmizi, Hakim dan Muslim itu imam-imam yang menganuti neoplatonism. Sekiranya ini benar, maka kita tak bolehlah lagi mempercayai segala hadis-hadis Rasulullah yang disiarkan sebagai slot TV3 setiap malam. Datuk Ahmad Sebi terpaksa mengeluarkan arahan serta merta supaya slot-slot yang macam itu diberhentikan. Manalah tahu kot ada orang yang akidahnya akan terpesong pulak.

Tapi kita tahu imam-imam di atas adalah imam-imam yang sah. Imam-imam yang berpegang teguh kepada ajaran Allah dan bukan yang dipengaruhi oleh aliran neoplatonism. Bagi mereka yang ada hanya satu aliran sahaja, iaitu aliran keimanan. Dan kita pun sedia maklum ilmu yang ada pada mereka itu adalah jauh lebih tinggi dari mana-mana pensyarah universiti dalam bidang pengajian Islam.

Menurut Hasbullah Abdul Rahman lagi, sarjana-sarjana orientalis dan '**carbons copy**' mereka selalu memutar belitkan fakta-fakta keilmuan.

*Ajaran Islam adalah hasil ciptaan Nabi Muhammad sendiri yang ditimba daripada kata-kata idea-idea keagamaan sebagai pengaruh daripada hubungan*



dengan orang Yahudi dan Kristian yang memberi kesan mendalam terhadap dirinya.

Bahawa wahyu yang dirasakan oleh Nabi Muhammad adalah satu gejala daripada penyakit yang hanya dideritai oleh manusia 'super' yang membawanya kepada kehidupan lain yang belum pernah dirasakan sebelumnya serta menimbulkan kekuatan dahsyat untuk menghadapi segala rintangan.

Bahawa hadis yang tertulis dan dijadikan sebagai sumber hukum Islam selama ini kebanyakannya hadis palsu yang timbul daripada pertukaran agama pada abad-abad pertama untuk menguatkan pendapat golongan masing-masing.

Untuk menutupi kebohongan mereka demi melancarkan isu-isu diatas dan agar tulisan-tulisan mereka nampak ilmiah dan objektif serta menunjukkan bahawa mereka sentiasa menjaga amanah ilmu, mereka menggunakan taktik penulisan yang antaranya ialah:

Menentukan idea terlebih dahulu; kemudian mencari dalil yang sekiranya menguatkan berkenaan walaupun terasa dipaksa dan tidak mengena, bukan tanpa memperdulikan sumber dari mana dalil itu diambil.

Persoalan pokok dari penolakan konsep Iman Mahadi yang cuba dibentangkan oleh Profesor Madya Abdulfatah Harun itu ialah siapakah yang menyesatkan siapa? Siapakah yang memesongkan fakta keilmuan? Dan siapakah yang memalsukan hadis-hadis Nabi.

Dalam hal ini kita nampak macam ada satu trend

dalam rencana-rencana beberapa akhbar berbahasa Melayu kini. Ada akhbar yang sengaja mengambil kesempatan menonjolkan pemalsuan fakta ilmiah ini dengan cara yang berlebih-lebihan. Malahan ada pula yang menjadikan fakta-fakta tertentu sebagai mainan.

Seorang wartawan pernah menulis sebuah rencana akhbar yang diantara lain berbunyi:

*“Seorang pelajar menasihati saya supaya jangan menulis lagi mengenai Haji Ashaari terutamanya tentang Imam Mahadi yang menjadi pegangannya.*

*Nasihat itu, katanya ialah untuk menghindarkan kemarahan Haji Ashaari yang dikatakan menganggap kepercayaan kepada kemunculan Imam Mahadi sebagai kekuatan ruhiyyah bagi jamaah Al-Arqam.*

*Kata pelajar itu jika Haji Ashaari marah, maka jinnya boleh mengacau saya”.*

Astora JB, penulis rencana itu juga mendakwa bahawa dia menulis untuk membersihkan khufarat dalam Islam. Dia pun tidak percaya yang manusia ini boleh memelihara jin, semata-mata dengan hanya membaca-baca ayat-ayat suci dan Asmaullah Husna. Menurutnya lagi Quran melarang keras manusia memperhambakan manusia dan melakukan perkara yang sama ke atas jin adalah sesuatu yang tidak masuk akal.

Bila saya habis membaca tulisan wartawan khas dari Kaherah ini hanya satu perkara sahaja yang terlintas difikiran saya, iaitu kata-kata Imam Al-Ghazali dalam Ihya Ulumuddin. **“Tidakkah anda akan mengutuk ketololan seorang manusia .....**”

Memanglah kita tidak takut kepada sesiapa pun melainkan Allah SWT. Tapi bila kita kata 'takut', takut ini ada banyak konotasinya. Ada orang takut bini, ada orang takut kena marah dengan boss, ada orang takut kehilangan kuasa politik dan kedudukan. Ada orang takut jawatan khasnya dilucutkan bila dia melakukan sesuatu yang berlawanan dengan kehendak bossnya.

Bila kita kata kita takut pada Allah, maksud takut itu sudah lain. Maksud takut pada Allah ialah kita meninggalkan segala laranganNya dan beramal seperti yang dikehendakiNya. Jadi kalau ada orang yang mengatakan dia takut pada manusia, pada jin dan pada syaitan, itu perkara biasa kerana dalam dunia ini ramai orang yang telah dianiyai, ditipu dan dipermainkan oleh manusia, jin dan syaitan. Kalau tak percaya, tengok sahajalah golongan serpihan, dalam baik mereka telah ditipu oleh para iblis.

Maka itulah sebabnya Tuhan melarang kita bercakap takbur. Bukankah kita manusia ini sejenis makhluk yang lemah. Macam kata saudara Astora sendiri, **'tidak siapa pun yang tidak pincang walau serban sebesar bakul pun.'** Jadi kalau orang yang tidak takbur sarbannya sebesar bakul dan menggunakan sebahagian besar dari hidupnya mengerjakan perintah Allah dan sunnah nabi itu masih lagi ada kepincangannya, apatah lagi dengan orang yang tidak memakai serban dan menulis untuk mencari pengaruh dan populariti kerana dibayar gajinya. Kepincangannya tentulah lebih



menyerlah dan lebih dahsyat lagi. Inilah dia kegilaan untuk mendapatkan kedudukan. Dia mahu semua manusia jadi gila. Ini kerja gila namanya.

Bagi Astora JB, Ustaz Ashaari tidak penting. Sekiranya pemimpin sebuah pertubuhan sebesar itu tidak penting tentulah saudara Astora JB lagi tidak penting. Tak tahulah saya sekiranya seorang yang baru jadi 'columnist' ataupun penulis tamu di luar negeri merasakan dirinya penting.

Orang-orang yang akalnya tumpul dan yang cuma dapat melihat dengan menggunakan mata kasar mana boleh jadi penting. Yang penting bagi saya ialah umat Islam dinegara ini, malah diseluruh dunia bersatupadu tanpa menyimpan sebarang prasangka, cemburu dan sebagainya. Perbuatan yang tidak patut dilakukan oleh seorang wartawan yang tulisannya menjadi tatapan ribuan manusia adalah tulisan yang demikianlah. Tulisan yang tidak ada tanggungjawab sosial langsung. Kerjanya hendak mencari sensasi sahaja. Konon apabila menulis dari Mesir nanti orang ingat dialah yang maha tahu.

Orang-orang Islam yang mendakwa diri mereka '*the so called Islamic intelligence*' tidak boleh memalsukan fakta keilmuan dengan sewenang-wenangnya secara memutar belit dan mempolitikan isu-isu agama demi sesuatu kepentingan keduniaan. Apakah cendikiawan Islam kita mahu menerima gelaran **cendikiawan kucing senak**.

Kucing senak ini adalah kucing-kucing yang berlagak macam harimau. Kucing-kucing macam ini banyak terdapat di Chow Kit.

Soal memperhambakan manusia tidak timbul. Perkataan 'hamba' juga ada konotasi-konotasinya. Bila kita kata kita ini hamba Allah dan memperhambakan diri kepada Allah, itu satu konotasi perkataan hamba. Bila manusia menjadi hamba atau orang suruhan, atau pekerja, atau orang gaji kepada manusia kita menggunakan perkataan hamba dalam konotasi yang berlainan sama sekali. Perhambaan yang semacam ini samalah dengan para wartawan kucing senak yang menggantungkan hidupnya dengan menjadi hamba kepada akhbar-akhbar yang mempunyai wartawan-wartawan kucing senak yang sedang diperalatkan oleh ahli-ahli politik standard 'kucing senak'.

Jadi berbalik pada cerita hamba tadi, nas Quran yang manakah yang mengatakan manusia tidak boleh diperhambakan sesama manusia sedang Astora JB sendiri sedang diperhambakan oleh manusia lain? Kalau tidak tentu Astora sudah **'miss syuruk'**.

Menurut kata Astora lagi;

*"Dipihak lain Quran melarang keras diperhambakan manusia sesama manusia, maka tidak masuk akal kalau dibenar melakukan perkara itu keatas jin yang juga merupakan makhluk Allah.."*

Cakap macam ini memanglah tak masuk akal. Kalau Quran mengikut bacaan saudara Astora melarang keras manusia memperhambakan makhluk-makhluk lain, jadi perbuatan Rasulullah menunggang unta itu tentulah salah kerana unta itu adalah juga makhluk Allah sedang Rasulullah

pula seorang manusia. Begitulah halnya juga dengan mereka yang menunggang kuda, petani-petani yang menggunakan kerbau untuk membajak sawah, orang-orang kampung yang menggunakan lembu untuk dijadikan kendaraan.

Jin itu adalah makhluk Allah. Apakah keistemewaan jin dari manusia atau bahkan dari binatang-binatang lain yang juga makhluk Allah sehinggakan dia tidak dapat dijadikan khadam kepada manusia?

Memang ada banyak benda yang tidak dinyatakan dalam Quran. Tapi ini tidak bermakna bila kita buat benda-benda yang tak disebut dalam Quran, kita telah melanggar perintah Tuhan. Dalam Quran tidak ada nas-nas yang menyebut pasal menyuruh manusia membuat kereta, mencipta tenaga listrik ataupun komputer dan sebagainya.

Jadi tanpa dalil-dalil 'akali yang kuat, saranan yang disampaikan oleh Astora itu tidak boleh masuk di akal sama sekali. Usaha-usahanya untuk membersihkan khufarat dalam Islam boleh dianggap sebagai usaha-usaha 'kucing senak'.

Menyentuh tentang amalan membaca Asmaul Husna, yang disebut oleh Astora sebagai tidak masuk akal dalam konteks mengkhadamkan jin, inginlah saya jelaskan sedikit di sini. Apakah Astora tidak pernah mendengar ada orang yang boleh berjalan di atas air dan sebagainya hanya dengan menyebut Bismillahirrahmannirahim. Ini sebab ayat itu mengandungi nama-nama Allah, iaitu Arrahman dan Arrahim, yang Pemurah Lagi amat Mengasihani.



Begitu juga dengan ayat pertama dalam bacaan doa qunut, **“Ya Allah berilah aku hidayah”**. Berapa ramai manusia yang mendapat hidayah dari Allah tanpa disedari atau tanpa pengetahuannya.

Jadi apabila seseorang itu membaca Bismillah-hirahmannirrahim dengan hakul yakin tentulah macam-macam benda boleh terjadi diluar dugaan manusia kucing senak boleh berlaku keatas dirinya. Orang barat pun percaya. **‘Miracle can happen to those who believe in them’**. Dan lagi bila ada orang yang mengamalkan kesemua nama-nama Allah Taala dalam Asmaul Husna, tentulah hikmah-hikmahnya lebih besar. Bagaimanapun ini semua terpulanglah kepada niat sipembaca dan samada Tuhan berkenan memberikan kepadanya hidayah ataupun tidak.

Oleh yang demikian bagi mereka yang membaca ayat Bismillahirrahmannirrahim, dengan sepenuh hati sambil menghayati dan menjiwai ayat tersebut dan percaya sepenuhnya dengan kekuasaan dan kebesaran Tuhan, banyak munafaat yang didapatinya dan dapat ditunjukkan kepada orang lain yang turut percaya akan berjaya sama. Tapi sekiranya kita membaca sambil lewa secara (*take it for granted*), atau ikut saja macam burung kakak tua di rumah saya, macam mana nak dapat hidayah dari Tuhan.

Kita tahu Tuhan senantiasa bersifat Pemurah lagi Amat Mengasihani. Allah boleh memberikan apa sahaja dan kepada sesiapa sahaja yang Tuhan mahu. Tidak ada sesiapa pun yang boleh meng-

halangnya. Seseorang itu boleh dianugerahkan segala macam kemuliaan, seperti pangkat, darjat, kedudukan politik, kekayaan dan bermacam-macam lagi. Tapi sebagai ujian ataupun balasan, Allah juga berhak mengambil semula nikmat-nikmat yang telah diberikan olehNya kepada manusia. Itulah kekuasaan Allah. Tidak manusia, tidak jin, tidak syaitan dan tidak juga para malaikat yang senantiasa sujud dan memperhambakan dirinya kepada Allah. Sesungguhnya Allah itu bersifat Maha Mengetahui. Tengoklah tatkala Allah mahu menjadikan seorang khalifah (manusia), para malaikat cuba mempertikaikannya. Namun kerana sifat Tuhan itu Maha Mengetahui, malaikat yang taat tidak mempertikaikannya melainkan iblis.

Saya tak tahu, ulamak-ulamak tak tahu, malaikat dan jin tidak tahu. Manusia-manusia lain tak tahu. Jadi apakah Astora tahu perkara-perkara yang semua orang tak tahu melainkan Allah?

Itu cerita sebelum adanya umat manusia. Cuba kita ambil pula cerita selepas adanya manusia dimuka bumi ini. Kita ambil cerita pasal seorang perempuan lacur yang telah dimasukkan Allah kedalam syurga hanya kerana menyelamatkan seekor anjing yang sedang kehausan. Andai kata para ulamak kucing senak yang menghakimkan perempuan itu, sudah barang tentu perempuan tersebut dihumbankan ke dalam neraka kerana amalan menyelamatkan seekor anjing tentu dirasakan tidak setimpal dengan segala dosa penzinahannya.

Tapi Tuhan tahu apa yang manusia tak tahu. Disitulah letaknya sifat Arrahman dan Arrahim Tuhan. Tuhan bersifat Pemurah lagi Amat Mengasehani. Allah boleh memberi apa sahaja dan kepada sesiapa sahaja yang disukaiNya. Allah boleh menganugerahkan kemuliaan, kekayaan, kekuasaan malah kekeramatan sekalipun. Dan Allah juga berhak merampas kembali anugerah-anugerah yang telah diberikanNya itu dari sesiapa sahaja. Dan tidak ada sesiapa jua pun yang boleh mempersoalkan kekuasaan Tuhan kerana Allah bersifat Maha Mengetahui.

Jika Allah telah mengizinkan nabi Allah Sulaiman AS menggunakan Raja Jin dan sekalian datuk nenek dan cucu cicit jin yang ada dimuka bumi ini untuk membena Istana Balqis di atas air tanpa didokong oleh sebatang tiangpun. Maka tidak ada sebab mengapa Allah tidak boleh mengizinkan manusia sekalian menggunakan jin.

Berkata Sulaiman: **Hai pembesar-pembesar, siapakah diantara kamu sekalian yang sanggup membawa singgahsana (Permaisuri Balqis) kepadaku sebelum mereka datang kepada ku sebagai orang-orang yang berserah diri?**

Berkata Ifrit dari golongan Jin: **Aku akan datang kepadamu dengan membawa singgahsana itu kepadamu sebelum kamu berdiri dari tempat dudukmu; sesungguhnya aku benar-benar kuat untuk membawanya dan dapat dipercayai.**



Berkatalah seorang yang mempunyai ilmu dari Al Kitab **Aku akan membawa singgahsana itu kepadamu sebelum matamu berkedip.**

Cuba perhatikan ayat Quran di atas. Semuanya mempunyai rahsia-rahsia luarbiasa yang tidak mampu diterima oleh akal manusia biasa. Jin rela diperintah oleh manusia (Nabi Sulaiman) untuk membawa istana Balqis dalam masa yang sungguh cepat, malah lebih cepat dari pada apa yang terdaya dibuat oleh sebarang jenis pengangkutan moden. Dan ayat Quran di atas juga menunjukkan bagaimana seorang manusia biasa dapat mengatasi kekuatan dan kelebihan jin dalam melaksanakan kehendak Nabi Sulaiman. Oleh itu apa peliknya jika jin boleh dijadikan khadam oleh manusia?

Imam Ahmad bin Ali Al Bani dalam kitab Syamsul Ma'arifd Al Kubro, sebuah kitab yang terkenal di kalangan ulamak-ulamak pondok, menulis begini: **Setiap ayat, setiap isim-isim Allah SWT bahkan huruf Al-Quran itu ada khadam yang terdiri daripada malaikat dan jin.**

Jadi tidak mustahil jika para wali Allah apalagi yang telah bertaraf khutub yang selalu mengamalkan ayat-ayat Quran dan Asma Ullah dalam zikir dan wiridnya dikurniakan khadam samada dia menyedarinya atau tidak.

Perkara pelik ini jika berlaku kepada para nabi dinamakan mukjizat, jika kepada para wali dinamakan karamah.

Cuba kita selidiki ayat Quran An Naml ayat 38-44 ini.

Jadi bukankah umat manusia yang ada pada hari ini itu adalah dari keturunan nabi Allah Adam AS, termasuk Nabi Allah Sulaiman AS sendiri. Jadi adalah juga tidak mustahil bagi seseorang wali kutub yang telah mendapat hidayah dan kekeramatan serta berkedudukan begitu mulia di sisi Allah dikurniakan kelebihan membuat hubungan dengan para jin. Inilah kekeramatan para wali kutub yang dianugerahkan oleh Allah SAW yang Maha Pemurah lagi Maha Mengetahui. Mereka bukan sahaja boleh memperhambakan satu jin, malahan kalau mereka mahu disekeliling mereka 40 jin-jin pun sanggup berkhidmat sebagai khadam dan memperhambakan diri. Kerana orang keramat itu dimuliakan oleh Allah akan sifatnya. Karamah itu sendiri ertinya kemuliaan mereka adalah hamba-hamba yang rapat dengan Allah dan taat kepada perintah Allah sebab itu para jin sanggup memperhambakan diri apa lagi wali Allah yang telah diangkat darjatnya menjadi wali qutub. Lupakan Astora bahawa sebaik sahaja Allah menjadikan Adam AS segala jin dan malaikat disuruh sujud kepada Adam?

Oleh itu sebelum Astora berangan-angan membetulkan khufarat Islam, betulkan diri Astora dulu. Janganlah Astora mahu menafikan adanya pengabdian jin kepada manusia. Untuk itu, izinkanlah saya mencadangkan supaya Astora mem-baca semula surah Al-Baqarah dan dapatkan

seorang guru untuk menerangkan kepadanya apakah itu wali, siapakah para-para wali itu yang sebenarnya dan apakah yang dimaksudkan dengan perkataan wali qutub. Sebagai ingatan, elok juga saya katakan disini bahawa hanya orang-orang yang beriman sahaja yang percaya kepada benda-benda ghaib seperti ini.

Jadi bukanlah pelik sangat sekiranya Allah mengkehendakki Ustaz Ashaari diberikan dengan bukan setakat satu jin, malah dua tiga jin pun mungkin. Jin-jin ini pula tidak keberatan menjadikan diri mereka khadam kerana mereka tahu Arqam senantiasa bekerja dan berusaha untuk mengembangkan agama Islam. Bukan macam Astora yang cuba merosakkan kepercayaan manusia terhadap yang ghaib.

Jadi janganlah terlalu angkuh dan sombong serta takbur dalam mempermain-mainkan benda-benda yang ghaib. Saya bimbang nanti pena Astora mati pun ghaib juga.

Kalau kita dengan sengaja menyepak tok pekong Cina ataupun tok pekong Hindu, kerana tunjukkan angkuh dan sombong kita, nasib tak baik tengoklah padahnya. Itu cuma jin kafir yang dijadikan khadam oleh para penyembah tok pekong-tok pekong merasa marah pada kita dan kita boleh jadi haru biru.

Justeru itu Astora tidaklah boleh berasa pelik ataupun takut kiranya ada makhluk-makhluk ghaib yang akan mempermain-mainkan Astora sepertimana beliau mempermain-mainkan Ustaz Ashaari.



Tuntutan tasauf bukan soal minat. Ia adalah pekerjaan menghambakan diri kepada Allah dengan hati yang tulus, niat yang suci tanpa perasaan takbur.

Orang-orang tasauf dan ahli-ahli sufi mengetahui apa-apa yang tidak diketahui oleh orang-orang biasa. Ilmunya lebih tinggi dari ilmu-ilmu 'analytical' orang-orang yang keluar Azhar ataupun mana-mana universiti sekalipun. Mereka tidak berdoa untuk dinaikkan pangkat, dijadikan popular, diperbanyakkan wang ringgit.

Bila orang sufi berdoa, dia akan berdoa dengan doa yang berbunyi:

*Alfatihah kepada roh-roh sadatinal ulamak-ulamak sufi. Moga-moga Allah meninggikan darjat-darjat mereka didalam syurga. Dan moga-moga Allah Taala menggandakan pahala-pahala serta kebajikan mereka, dan menjadikan kami dari kumpulan mereka, dan memberikan kami munafaat dengan mereka dengan ilmu-ilmu mereka dan rahsia-rahsia mereka dalam dunia dan akhirat. Al fatihah.'*

Ahli-ahli sufi yang dimaksudkan oleh sipendoa ini termasuklah AlMuhajirin Ahmad bin Isa, Alfakihil Mukaddam Muhammad bin Ali Baalawi, Alhabib Omar bin Abdul Rahman Alattas, Sahibizikri Wadtauhipidi Shaiekh Abdul Kadir Al Jailani, Shaiekh Omar bin Isa Barakbah, Sheikh Ahmad bin Abdul Kadir Baasyan, Shaiekh Ahmad bin Muhamad Bamasymus dan ramai lagi.

Keimanan, ilmu serta kewalian mereka ini memang tidak boleh dipertikaikan lagi. Mereka

tahu apa yang Dr. Abdulfatah atau Astora tak tahu. Mereka nampak apa yang Dr. Abdulfatah dan Astora tak nampak. Mereka adalah insan ideal sunggupun mereka bukan insan yang maksum.

Untuk mereka yang masih lagi mahu memper-tikaikan tentang kelebihan mistik mereka ini, biarlah saya bawa sepotong ayat Quran dan hadis.

**“Pada hari sangkakala dibunyikan (ditiup), engkau semua akan datang segolongan demi segolongan.”**

(an-Naba’: 18)

Ketika Rasulullah SAW diminta menerangkan maksud ayat di atas, tiba-tiba baginda SAW menangis, kemudian bersabda:

*“Hai Mu’adz, sungguh engkau telah menanyakan suatu perkara yang agung (penting). Ada sepuluh macam dari ummatku itu akan dikumpulkan di padang Mahsyar. Masing-masing itu dalam keadaan yang berlain-lainan dan semua itu telah dibedakan secara tersendiri oleh Allah dari golongan kaum muslimim. Rupa sepuluh golongan itu seluruhnya telah ditukar oleh Allah – yakni tidak lagi berwujud sebagai manusia sempurna. Sebagian dari mereka ada yang berupa menjadi kera, sebagian ada yang berupa menjadi babi, sebagian pula ada yang terjungkir, kakinya diatas serta diseret di atas kepalanya yang ada di bawah, sebagian lagi ada dikumpulkan lagi dalam keadaan buta dan dituntun, sebagian ada pula yang tuli serta bisu dan tidak berakal, sebagian lagi dari mereka yang dikumpulkan itu dalam keadaan mengunyah lidainya sendiri, sedang lidahnya itu*

menjulang ke bawah sampai di dadanya dan dari mulutnya itu keluarlah nanah yang menjijikkan orang banyak, sebagian ada pula yang dalam keadaan terpotong kedua tangan dan kedua kakinya, sebagian ada pula yang dikumpulkan dalam keadaan tersalib di pokok-pohon kurma, tetapi kurma dari neraka, sebagaian lagi ada pula yang dikumpulkan dalam keadaan yang lebih berbau busuk daripada bau bangkai dan sebagian ada pula yang dikumpulkan dengan menggunakan pakaian dari tir yang panas.

Adapun orang-orang yang rupanya menjadi kera ialah manusia yang suka mengadu domba, orang yang rupanya menjadi babi ialah manusia yang suka makan barang yang salah – yakni cara mencarinya tidak halal – atau memang makan makanan yang haram; orang yang dijungkirkan kepala dan mukanya itu, ialah manusia yang makan harta riba; Orang yang buta ialah manusia yang curang dalam menerapkan hukum; orang yang tuli dan bisu, adalah manusia yang suka berpamer dan merasa bangga pada amalannya sendiri; orang yang mengunyah lidahnya sendiri dan lidahnya itu memanjang (menjulang) sampai di dadanya, ialah manusia yang menjadi tukang cerita atau ahli pidato yang ucapannya itu berlainan sekali dengan kelakuannya sendiri; orang yang terpotong kedua tangan dan kakinya, ialah manusia yang suka mengganggu tetangganya; Orang yang disalib di pokok pohon dari api, ialah manusia yang berusaha mengajak-ajak orang banyak untuk membela sultan atau pengusaha negara yang tidak



*jujur pimpinannya; orang yang keadaannya lebih busuk dari bau bangkai, ialah orang yang gemar melampiasikan kesyahwatan dan segala macam kelezatan serta menolak hak Allah Ta'ala yang diwajibkan dari hartanya itu – semacam zakat dan lain-lain – dan orang yang mengenakan pakaian dari tir panas itu adalah manusia yang suka takabur, sombong dan congkak.”*

Bila kita memikirkan kembali apa yang dilihat oleh Sheikh Suhaimi tatkala berhenti disebuah masjid mungkin inilah yang dilihatnya sepertimana hadis diatas. Benda-benda seperti ini tidak mungkin dilihat oleh Dr. Abdulfatah dan Astora sebab mereka bukanlah insan ideal yang memperhambakan dirinya semata-mata kepada Allah sebagaimana Sheikh Suhaimi dan mereka yang namanya tersebut dalam doa orang sufi.

Kritikan saya ini tidak ada kena mengena dengan soal-soal pribadi Astora ataupun Dr. Abdulfatah. Kalau saya nak sentuh soal pribadi boleh, tapi itu soal sensitif dan lagipun dilarang Allah. Cukuplah saya menyeluk ke alam pemikiran mereka-mereka ini.

Pada pandangan saya, seseorang yang berilmu dan beriman serta tinggi darjatnya disisi Allah tidaklah mempunyai sifat-sifat tidak sabar, cepat marah, tidak merasakan tidak ada kesalahan pada diri sendiri, tidak merasa diri lebih mulia dan lebih berilmu serta lebih beriman dari orang lain dan tiada lagi sifat-sifat mazmumah yang mana kalau masih tebal dengan sifat-sifat tersebut manusia

sahajalah memandang lahiriahnya berdarjat, ulama, orang alim dengan kedudukannya di sisi masyarakat umum tapi pada hakikatnya rendah martabatnya di sisi Allah.

Mudah-mudahan sekiranya kita terasa insaf tentang dosa-dosa kita setelah mendengar cerita dari nabi kita bagaimana pembalasan kepada mereka yang telah melakukan dosa-dosa besar dapat bertaubat dan kembali ke jalan Allah. Allah penerima taubat, sifat Tuhan Maha Pemurah lagi Amat mengasihani. Semuga kita cepat bertaubat sebelum terlambat.

Dan moga-moga ulamak-ulamak kita berbantuan-bantu dalam menyatupadukan ummah dan tidak membiarkan diri mereka menjadi ulamak kucing senak.

# MAHATHIR MASUK PERANGKAP ULAMA

**‘K**erajaan sahaja tidak boleh bertindak terhadap hal yang membabitkan agama melainkan golongan alim ulamak dan masyarakat sendiri sedar serta mengambil langkah mengatasi’.

Datuk Sri Dr. Mahathir.

Ucapan diatas telah disampaikan kepada hadirin serta seramai 100 ulama tempatan yang telah menghadiri ijtimak ulama selama tiga hari anjuran Yayasan Dakwah Islamiah Malaysia. Dan dihari penutupnya pada 27-11-88 Yang Dipertua Yayasan Dakwah Islamiah Malaysia, Dato’ Sri Kamaruddin Mat Isa atau (YADIM) berkata **“Itjimak menyedari bahawa umat Islam kini sentiasa terdedah kepada pemikiran-pemikiran yang menyelewengkan asas-asas ajaran Islam secara halus dan berkesan yang dilakukan secara terancang oleh musuh-musuh Islam dan disebarkan melalui berbagai media cetak,”**

Sehubungan dengan itu, ijtimak juga menetapkan supaya ditingkatkan usaha pembangunan semula pemikiran Islam yang



**tulen bagi mengelakkan pemisahan antara golongan intelek dan para ulama.**

Dalam minggu yang sama saya telah terbaca dalam akhbar Watan bertajuk 'Wartawan Perlu Berjihad', satu berita yang sangat menarik sebab itu dibawah ini saya muatkan sebahagian darinya.

"Para wartawan jangan memihak atau berjuang untuk kumpulan tertentu, sebaliknya hendaklah anti kepada kezaliman dan menjadikan Allah sebagai matlamat.

Apa yang perlu mereka lakukan ialah memperjuangkan dasar Tauhid, menegakkan Islam sebagai addin dan cara hidup yang lengkap, mewujudkan keadilan sejagat, membentuk persamaan sesama manusia dan menjadikan amar makruf nahi mungkar sebagai pegangan. Mereka juga hendaklah menjenguk kawasan pendalaman dan mendedahkan kesusahan serta penderitaan hidup rakyat.

Wartawan jangan mengharapkan balasan yang berupa kebendaaan, pangkat atau kemasyhuran dari tugas yang mereka lakukan kerana matlamat itu hanya akan menjerumuskan kepada seksaan api neraka.

Wartawan harus memberi layanan yang adil kepada semua golongan tanpa mengira batas-batas fizikal.

Media yang tidak berusaha melaksanakan cita-cita Islam hanya menjadi punca kepada krisis yang berlaku dalam masyarakat.

Wartawan haruslah menyedari peranan mereka dan sentiasa berusaha mencari keredaan daripada

Allah.”

Kata-kata diatas adalah sebahagian dari ceramah ‘Kewartawanan dalam Prespetif Islam yang telah disampaikan oleh Ustaz Hassan Salleh, Naib Yang Dipertua Persatuan Ulama Malaysia (PUM) kepada wartawan kumpulan Karang kraf yang saya petik dari Watan 26/11/1988.

Datuk Sri Dr. Mahathir Mohamad, Ustaz Hassan, Datuk Sri Kamaruddin telah mengeluarkan kata-kata untuk tatapan kita semua. Pandangan diantara ingatan Dr. Mahathir dan dua ulama tersebut tentu tidak sama, kerana Mahathir adalah seorang Doktor Perubatan. Biar bagaimanapun beliau pernah menulis buku yang ada unsur keagamaan namun ingatan Dr. Mahathir agar kesesatan yang berlaku pada masyarakat Islam hari ini yang telah disiarkan melalui media masa patut difikirkan bersama oleh mereka yang cintakan kesejahteraan dan kedamaian. Kata Dr. Mahathir kerana wujudnya sikap mudah menerima seseorang sebagai ulama maka ramai umat Islam dizaman kebangkitan Islam di Malaysia mudah disesatkan.

Nasihat Naib Dipertuan P.U.M supaya wartawan jangan memihak atau berjuang untuk kumpulan tertentu pula menimbulkan tanda tanya kepada saya. Saya ingin tahu, apakah kerana penerangan beliau kurang jelas atau Berita yang dimuatkan itu yang saya kurang jelas dan sukar untuk memahaminya. Ustaz Hassan tidak menjelaskan maksud ‘Kumpulan’. Sekarang ini banyak kumpulan, samada kumpulan UMNO yang me-

wakili kerajaan atau kumpulan serpihan yang menentang kerajaan, sedangkan yang saya tahu dalam Islam tidak ada sikap 'berdiri atas pagar.' Mengikut wawancara antara Sheikh Saeed Sha'aban dengan akhbar HAKAKAH 7hb. Jun, 1988. Beliau dipetik sebagai berkata, **"Dalam Islam tidak ada sikap 'berdiri atas pagar' atau tidak berpihak kepada sesiapa pun jua. Lebih dari itu seseorang Islam tidak dibenarkan menunjukkan permusuhan kepada suatu perjuangan menegakkan Islam. Di dalam Islam hanya ada dua pilihan, samada berpihak kepada kebenaran atau menolaknya. Sikap tidak memihak dan berdiri atas pagar adalah sikap orang munafiq."**

Sheikh Saeed Sha'aban adalah seorang alim besar mazhab Sunnah yang juga menjadi pemimpin Gerakan Tauhid Islamiah di Tripoli Lebanon yang kini berperang dengan kuasa kufur.

Beliau ialah seorang ahli Badan Pentadbir Kongres Sedunia mengenai pemeliharaan kesucian dan keselamatan tanah Haram yang aktif. Beliau mempunyai ijazah dalam bidang tamaddun dan falsafah Islam dari Universiti Kaherah. Beliau merupakan seorang tokoh yang begitu kuat mendokong Revolusi Islam dan menyokong hak-hak kaum mustadh'afin di seluruh dunia.

Saya juga telah diajar bahawa konsep setia mesti menjadi amalan hidup seorang Islam. Allah menyeru kepada orang-orang yang beriman supaya mereka taat kepada Allah. Taat pada Rasul dan taat



pada Ulil Amri, iaitu Pemerintah.

Yang Dipertua (**YADIM**) juga ada membuat gesaan yang saya nampak tidak begitu jelas kepada siapa gesaan ini hendak disampaikan. Apakah mereka juga tidak suka memihak?

Beliau berkata, **"Ijtimak turut menggesa dihentikan segera segala perselisihan dan gejala-gejala buruk yang membawa kepada permusuhan seperti pulau-memulau, dendam dan perebutan kuasa di kalangan pemimpin di semua peringkat demi kepentingan perpaduan, kestabilan negara dan masa depan umat.**

Sehubungan itu, beliau meminta golongan ulama memberi kefahaman kepada masyarakat bahawa pegangan akidah Islamiah yang kukuh adalah asas keimanan yang sebenar supaya mereka tidak mudah dipengaruhi ajaran sesat dan karut."

Ulama yang macam mana yang dikehendaki oleh ijtimak, ulama bebas atau ulama yang terikat?

Saya sendiri pun ingin tahu akan definisi perkataan 'ulama' itu sendiri. Apakah setiap orang yang mendakwa dirinya ulama kerana deretan diploma dan degree yang diperolehinya sama ada dari pusat pengajian tinggi dalam atau luar negeri boleh menerima penghormatan sebagai ulama? Atau apakah kerana ada pihak yang memberikan orang-orang tersebut gelaran sebagai ulama maka kita pun mesti terima orang yang memakai nama ulama itu sebagai pewaris Nabi sedangkan kita

tahu keperibadian orang yang dinamakan ulama. Sebenarnya mereka tak banyak berbeza dengan ahli-ahli politik yang banyak berpolitik untuk kepentingan pribadi mereka?

Saya yakin kalau setiap ulama dan para pemimpin ikhlas dan ada sifat kasihkan saudara mereka macam Nabi kasihkan umat, kita bukan saja akan menjadi sebuah negara yang maju tetapi kita akan bahagia dunia dan akhirat.

Biar bagaimanapun Mahathir tidak pula mengingatkan bahawa golongan yang hanya menyuarakan suara-suara tuan-tuan mereka lebih berbahaya dari mereka yang mengaku Iman Mahadi atau dapat bertemu dengan Nabi.

Pusat Islam terlupa agaknya mengingatkan Dr. Mahathir bahawa Ulama serta golongan serpihan yang menggunakan politik untuk menentang kerajaan di bulan yang mulia jauh lebih berbahaya. Kemanakah bersembunyinya para ulama semasa Tengku Razaleigh mengeluarkan fatwa bahawa menentang kerajaan itu satu ibadat? Saya tak dengar mereka bercakap ditahun 1987 masa kerajaan berada dalam bahaya.

Dr. Mahathir ada berkata: **“Kesilapan memahami agama Islam”,** kata beliau, **“mungkin boleh menimbulkan berbagai masalah sehingga menyebabkan tercetusnya peperangan dan pergaduhan sesama sendiri.”** Saya berpendapat Perdana Menteri tidak patut digunakan untuk kepentingan orang tertentu yang hendak membalas dendam pada orang-orang tertentu,

kerana mereka tersinggung. Cukuplah sudah masalah dalam negara dengan orang politik dengan para hakim. Kenapa Perdana Menteri diheret untuk bergaduh dengan ulama pula?

Kita telah melihat jiran kita Burma, bagaimana orang Burma membunuh orang-orangnya dan mereka masih berbunuh-bunuhan sesama sendiri.

Selama 26 tahun mereka telah hidup didalam kesengsaraan dan masih terus hidup seperti dalam neraka dan peristiwa ini akan terus berlanjutan. Masalah mereka masih belum selesai dan sukar untuk diselesaikan kerana dendam, tamak dan lupakan kebesaran Tuhan.

Sepatutnya tidak timbul pergaduhan dan persengketaan yang berlanjutan begini di Burma kerana ajaran Buddha yang dianuti oleh mereka mengajar mereka supaya sentiasa bersifat tolerensi dan supaya tidak tamak, serta supaya tidak mengejar keduniaan. Tetapi sayangnya ajaran Buddha yang mengajar penganutnya supaya sentiasa sabar di musnahkan oleh mereka yang tidak sabar. Para sami yang berjubah kuning pun sudah hilang kesabaran mereka dan mereka turut berbunuhan.

..Dengan akallah manusia menjadi makhluk yang berusaha, berinisiatif, bermoral, berkreatif, sehingga berupaya mengembangkan ilmu untuk mengolah alam, mensejahterakan kehidupan manusia serta membekal manusia dengan ilmu bagi melaksanakan amanah Allah, termasuk mentadbirkan negara...

Akal berusaha mencari kebenaran kerana ia



bukan terpisah dari jiwa, tetapi merupakan satu unit dan sifat-sifat jiwa yang terdiri daripada iradah (kehendak), wijdan (perasaan) dan fikri (fikiran).

Tetapi sayangnya dalam tindak tanduk berpolitik, ada ulama yang kurang menggunakan akal dengan sebaik-baiknya. Manusia lebih menggunakan akal yang terpisah daripada jiwa, lari daripada tauhid, terbabas daripada keimanan. Sikap mereka cuma mengaut keuntungan benda yang tidak pernah puas-puas, mengaut kuasa dan memusuhi sesiapa yang menentang hasrat mereka.

Kata Ustaz Hassan dari PUM, "asas Islam adalah penting kerana kewartawanan yang tidak lari dari memperjuangkannya adalah jihad yang sama nilainya dengan mereka yang berhijad dengan nyawa dan harta".

Ulama yang layak dimuliakan selain dari ilmu pengetahuan dan amalan hidupnya yang mencontohi sifat kerasulan dan kenabian. Dia bukan saja membuat kerja-kerja yang wajib dia juga tidak meninggalkan sunnat Muakat dan mengamalkan sunnah rasul. Kalau sekiranya Sunnah Rasul ditinggalkan tapi Sunnah barat yang menjadi amalan hidup dan berat kepada kehidupan kebaratan, macam mana hati kecil kita nak hormat dia sebagai ulamak?

Tun Razak pernah mengamanahkan kepada kita supaya jangan menyapu sampah dan masukkan kebawah permaidani.

Dr. Mahathir telah pun mengeluarkan sampah dari bawah permaidani yang disorokkan.

Sekiranya Datuk Musa Hitam dan Datuk Rais Yatim semasa memegang jawatan dulu telah memberikan penerangan yang cukup kepada rakyat melalui Kementerian mereka, terutama sekali Datuk Musa Hitam mengenai gaji pegawai-pegawai kerajaan, sudah tentu persoalan mengenai polisi-polisi Datuk Sri Dr. Mahathir mengenai Dasar Pandang ke Timur dan Persyarikatan dan kebencian rakyat terhadap Dr. Mahathir tentu tidak berleluasa seperti yang berlaku hari ini tidak timbul.

Ingat mengingati, nasihat menasihati antara sesama Islam dituntut oleh agama kita kerana ulama telah menasihati wartawan, maka wartawan juga patut menasihati para ulama. Cuma saya bimbang kerana kedudukan para ulama terutama, mufti, kadi dan majlis agama Islam berada pada kemuncak yang boleh menyebabkan mereka merasa tersinggung disebabkan sifat mereka yang sensitif sebagai ulama kerana kedudukan mereka di bawah raja-raja. Jadi mereka sama sekali tidak boleh dikritik. Kononnya mengkritik mereka sama seperti mengkritik raja-raja sebab Jabatan Agama terletak dibawah naungan raja-raja. Mereka tentu curiga kritik akan menjatuhkan diri mereka sendiri. Kerana bila bermula satu pendedahan maka pendedahan demi pendedahan, penyelewengan yang berlaku didalam Majlis Agama Islam yang buruk terbongkar kepada masyarakat satu persatu.

Kita telah lihat apa yang terjadi pada Al-Arqam. Mungkin cara penyampaian Arqam yang ingin

mentadbir Pusat Islam tidak betul tetapi orang yang ahli dalam agama tak patut melenting dan marah-marah. Patutnya mereka tunjukkan kesabaran mereka. Kalau perlu ajak puak Al-Arqam berunding.

Oleh kerana Jabatan agama tempat mereka bekerja dapat menyelamatkan mereka daripada teguran, sekarang ini mereka menjadi begitu angkuh sehingga, seolah-olah Jabatannya lebih baik dari jabatan-jabatan kerajaan yang lain. Apakah ada orang yang ada sikap seperti Datuk Hassan Ibrahim, dalam Jabatan Agama hari ini?

Amat mengecewakan apabila Pusat Islam cuba meletakan kelemahan dan kesilapan mereka kepada orang lain dengan berbagai alasan. Mereka tidak pernah mahu mengakui kesilapan. Seolah-olah mereka yang bertugas disitu terdiri daripada manusia yang sempurna. Tentunya ada kelemahan dan kesilapan. Tetapi disebabkan Pusat Islam itu berada dibawah Jabatan Perdana Menteri dan semua pejabat agama Islam diseluruh negara di bawah takluk raja-raja dan ramai pula para pengampu yang sokong menghentam orang yang mengkritik, maka mereka mula merasa angkuh.

Di zaman Hang Nadim dengan ikan-ikan todak, kepintaran Hang Nadim menyelesaikan masalah menimbulkan iri hati beberapa pihak. Atas nasihat dan pujukan mereka Hang Nadim dimurkai Sultan. Akhirnya Hang Nadim dibunuh oleh orang istana yang menjadi talam dua muka. Ke mana perginya



ulama ketika itu yang sepatutnya menasihati raja supaya jangan berlaku zalim. Mungkin ini yang dimahukan oleh orang-orang yang antikan Ustaz Ashaari dan Al-**Arqam**

Saya bimbang Perdana Menteri kita telah mendapat maklumat dan liputan yang tidak tepat mengenai **Arqam**. Apakah perkara yang pernah terjadi semasa Harris Salleh jadi ketua Menteri dulu, Perdana Menteri telah menerima maklumat yang tidak tepat dan atas nasihat petunjuk orang bawahan, Mahathir sangka Harris Salleh pasti menang lalu beliau pun buat pengumuman. *'We sink and swim together'*. Apakah pisang perlu berbuah dua kali?

Nota: Rencana di atas adalah rencana saya yang tersiar di *Mingguan Kota* keluaran 4, Dis. 1988 di bawah tajuk yang sama. Terima kasih kepada *Mingguan Kota*.

## BADAI DAN ANGIN

**T**engku Razaleigh sudah pun mengisytiharkan nak buat kapal dengan PAS. Kata Razak Ahmad, pengerusi PSRM Johor, sekarang ini dan ada tanda-tanda orang-orang tertentu dari golongan Semangat 46 Johor yang merisik-risik parti tersebut. Bila lagi orang-orang Semangat 46 nak hantar sirih junjung pada PSRM. Kalau Ku Li boleh dijodohkan dengan PAS, apa pula kita nak hairan kalau Semangat 46 negeri Johor ingin memperisterikan PSRM. Ku Li bujang. Musa pula dah biasa tukar-tukar isteri.

Lompat-lompat, cerai-berai, gila talak dan kahwin semula dalam politik ini memanglah lumrah. Ada yang lompat kerana kononnya prinsip amalan sesebuah parti itu tak lagi macam waktu dulu-dulu. Ada yang bercerai kerana tak sebulu dengan setengah pemimpin. Ada yang gila talak kerana akibat berpisah dengan kuasa dan kepentingan pribadi dengan sekian lama. Ada yang kahwin semula kerana kononnya ada persamaan dalam perjuangan.

Kata orang UMNO mereka berjuang demi kesejahteraan orang-orang Melayu dan rakyat Malaysia. Kata orang PAS mereka berjuang un-

tuk menegak hukum Tuhan. Kata orang-orang Semangat 46 mereka memperjuangkan keadilan dan perpaduan orang-orang Melayu. Kata gandingan Ku Li – PAS mereka berjuang untuk melepaskan diri dari dijadikan manusia yang telah diprogramkan macam robot. Jadi mana satu yang betul? Kok jadi gilo dibuatnya.

Cuba kita selidik satu persatu. Kita tengok prestasi perjuangan masing-masing. Kita mulakan dengan PAS. Ini kerana parti tersebutlah yang mula-mula sekali mempelopori serpihan. PAS yang tak berapa pas (lulus) dikalangan rakyat Malaysia dan yang mendapat paling banyak telur dalam pilihanraya 1986 adalah sebuah parti yang mendakwa sebagai memperjuangkan Islam. Namun begitu pemimpin-pemimpin PAS sendiri tidak pernah menghuraikan apakah yang dikatakan sebagai **'perjuangan Islam itu'**. Bagi PAS segala-gala sesuatu yang dilakukan untuk umat Islam dinegara ini adalah tidak cukup Islam. PAS selalu mempersoalkan keislaman negara kita atas alasan Perlembagaan kita adalah Perlembagaan yang berbentuk skular. Menurut PAS kalau Perlembagaan kita ditulis semula mengikut Al-Quran dan Al-Hadith, barulah negara ini boleh jadi Islam. Pi Mai Pi Mai Tang Tu, itulah sahaja modal PAS.

Inilah silapnya kalau kita nak gunakan agama untuk ideologi, propaganda dan manifasto politik. Bukankah Islam itu satu agama. Allah turunkan agama Islam adalah untuk manusia. Negara adalah sebidang tanah. Jadi macam mana negara nak



menganut sesuatu agama. Orang yang bukan Islam akan menjadi Islam bila dia mengucap dua kalimah syahadan. Itu memang betul hukum agama. Tapi negara tak pandai bercakap. Kalau negara kita pandai bercakap, tentulah dia kata, "**Aku Malaysia. Aku nak masuk Islam. Aku nak tukar nama aku Muhammad Malaysia Al-Islam macam Yusuf Islam (Cat Stevens).**" Jadi bolehlah negara kita masuk Islam macam manusia-manusia Islam yang lain. Macam mana negara ini kalau sesudah di Islamkan oleh PAS, ada pemimpin-pemimpin negara yang main kuda boleh, minum arak boleh, berzina boleh, menipu boleh, memalsukan fakta agama pun boleh. Jadi sebenarnya negara kita, tak Islam dan tak kafir. Negara kita adalah sebuah negara, sebidang tanah yang berdaulat. Oleh itu bila ada golongan yang mengeluarkan fatwa bahawa negara kita boleh jadi sebuah negara Islam apabila Perlembagaannya diubah, itu sudah mengarang. Boleh terpesong akidah dibuatnya. Ini disebabkan hampir 50 peratus penduduk negara ini terdirilah orang-orang yang bukan Islam. Dan yang Islam pun bukan Islamnya betul sangat.

Apakah PAS sudah terpengaruh dengan ajaran Kristian sebab setahu saya orang-orang Kristian sahaja yang mengkristiankan segala benda. Dia tak panggil mengkristiankan. Dia kata '**baptised**'. Orang Kristian dia '**baptisedkan**' semua benda termasuk rumah dan kereta mereka. Orang Islam tak buat kerja membaptisedkan macam itu. Orang Islam bila anak lelaki lahir di azankan, anak

perempuan di kamatkan. Dalam Islam yang Islam ialah manusia. Kalau adapun tanah-tanah yang Islam, hanya satu sahaja iaitu Makkatul Mukaramah atau lebih dikenali dengan nama Baladdil Amin.

Tapi status yang macam itu Tuhan sahaja yang bagi. Sejak bila pula orang PAS dapat mandat nak jadikan Malaysia negara Islam. Apakah PAS tak tahu dalam politik Malaysia begitu banyak Badai dan Angin bukan Balladul Amin yang dibawakan oleh ulamak politik. Maka berlakulah badai dan angin seperti dalam parti PAS.

Kalau PAS nak jadikan semua rakyat di dalam negara ini Islam, boleh itu memang boleh. Tapi tak bolehlah main pakai bagi ceramah cam tu aje. Benda cam tu Islam tak main. Pas kenalah tunjuk bukti dulu dekat orang-orang lain. Cakap, cakap juga, tapi cakap kenalah serupa bikin.

Mula-mula PAS kenalah buktikan (bukan setakat cakap-cakap kosong yang masuk angin keluar asap) yang pentadbiran dan sistem ekonomi Islam itu lebih baik dari sistem yang dipadankan dari Adam Smith.

Memang betulpun sistem Islam itu lebih baik dari sistem yang lain-lain didunia. Tapi PAS kenalah buktikan, kerana ramai orang Islam, mereka percaya, pun kurang percaya, apalagi orang yang bukan Islam atau orang Islam celup.

Kalau tidak ada idea sendiri, sesekali cuba tengok Al-Arqam. Cuba buat-buat baik dengan orang-orang Arqam, belajar dari mereka. Lagipun dalam Islam ini kita diwajibkan berbaik-baik di-

antara ummah. Bukan dok melanyak sesama sendiri, iri hati dan dengki pada mereka yang lebih berjaya pada kita.

Dari segi ekonomi dan pentadbiran, Al-Arqam jauh lebih mantap dari PAS. Lagipun Al-Arqam tak jijir ceramah politik ke sana ke mari. Mereka tak mahu bergabung dengan Semangat 46. Biar pun kerajaan sudah mengharamkan buku Aurad Muhammadiyah mereka dan majalah-majalah terbitan Arqam. Mereka tetap tidak memusuhi pemerintah. Inilah contoh orang Islam yang baik. Mereka sabar menempuh dugaan.

Mereka pun tak menggunakan Islam sebagai propaganda kerana Al-Arqam itu sendiri bukanlah sebuah pertubuhan politik. Maka dengan itu tak perlulah pemimpin PAS berasa cemburu hadap orang sesama Islam.

Apa yang dilakukan oleh Arqam adalah jelas. Arqam mengajarkan pengikut-pengikutnya supaya mempraktikkan segala sunnah-sunnah Rasul di samping menekankan aspek-aspek fardhu ain.

Bukan itu saja, malah Arqam mencontohi sunnah nabi sendiri dan akur kepada hadis Rasulullah yang menyebut:

**“Sembilan puluh peratus dari rezeki itu adalah datangnya dari sumber perniagaan.”**

Tengoklah Arqam telah berjaya menceburi berbagai-bagai bidang perniagaan seperti yang menjadi amalan Rasulullah. Ahli Al-Arqam mendidik sifat-sifat *'salesmanship'* pada ahli mereka didikan asas untuk menjadi pendakwah yang



consistan dan baik.

Antara sebabnya PAS gagal sebagai sebuah pertubuhan kerana ramai ahli PAS yang tidak mengikut sunnah nabi sepenuhnya, mereka ikut yang menguntungkan mereka saja. Mereka tidak mencontohi sifat-sifat yang ditunjukkan dari segi keimanan, kesabaran dan tujuan berdakwah oleh baginda Rasulullah. Di pendek cerita, macam mana PAS nak memperjuangkan Islam sedangkan, dalam jiwa pemimpin-pemimpin dan pengikut-pengikut PAS sendiri tidak ada perwatakan kenabian yang boleh dicontohi apabila menerima cubaan dan dugaan Tuhan.

Pokoknya disini PAS bukanlah sebenarnya memperjuangkan Islam sepertimana apa yang didakwa-nya. Perjuangan PAS adalah perjuangan untuk sama-sama mendapatkan kerusi dalam Parlimen dan Dewan Undangan negeri. Kalau tidak masakan mereka mahu berpakat dengan orang yang ingkar dan tidak taat.

Sebenarnya perjuangan untuk mendapatkan kuasa politik bukanlah sesuatu yang buruk. Di mana-mana pun di dalam dunia ini ada sahaja parti-parti politik yang memperjuangkan ideologi dan propaganda masing-masing bagi mendapatkan kuasa untuk memerintah negara. Apa yang tak betul ialah apabila agama Islam yang suci dijadikan alat untuk memancing undi orang-orang yang tidak berdosa. Lebih menyedihkan lagi apabila orang-orang yang amat arif tentang Islam mempergunakan Islam sebagai alat politiknya.

PAS selalu menjadikan Iran sebagai model negara Islam serta juga model mereka dalam mempropagandakan sebuah negara Islam. Bila kita bercakap dengan orang-orang PAS, mereka akan menjadi begitu obsessed dan ghairah dalam menceritakan revolusi pemerintahan di Iran. Kata mereka revolusi yang berlaku di Iran di bawah ajuran Ayatollah Khomeini adalah satu revolusi Islam. Maka orang ramai pun percaya dan terima bulat-bulat. Ini sudah silap besar. Kata orang putih inilah yang **'slack'**.

Sebenarnya apa yang berlaku di Iran bukanlah merupakan satu revolusi Islam sepertimana yang diheboh-hebohkan oleh orang-orang PAS. Untuk membetulkan kesilapan ini, kita kenalah kaji apakah yang dimaksudkan dengan perkataan **'revolusi'** itu sendiri.

Sejak kebelakangan ini perkataan revolusi semacam telah sengaja disalahfahamkan, sengaja diberikan salah tafsiran dan sengaja disalahgunakan dengan sewenang-wenangnya. Perkataan tersebut merupakan satu model baru bagi PAS. Orang-orang kampung tentu sudah biasa menerima segala indoktrinasi PAS secara membuta tuli tentulah menyangkakan perkataan revolusi itu satu perkataan bahasa Melayu yang original. Lagipun sejak beberapa tahun kebelakangan ini mereka sudah terlampau banyak sangat mendengar perkataan yang hujungnya berbunyi 'si'. Revolusi, sensasi, aksi, konfrantasi dan bermacam-macam si lagi. Dan akhirnya PAS sendiri bercampur dengan pertu-

buhan Cina yang ada 3-C; Si, Si, Si. Cina kata 'Si' itu mati, jadi PAS tiga kali mati. Yang hidup Cina juga. Pas terkeluar dari UMNO, kemudian masuk Barisan Nasional sesudah itu keluar. Campur 3C mati, sekarang masuk orang serpihan pula, tak serik-serik ke? Mereka sudah berapa kali terserpih?

Sebenarnya perkataan 'revolusi' dalam Bahasa Malaysia itu dipinjam dari perkataan Inggeris '*revolution*'. Jika di Indonesia perkataan tersebut dipinjam dari perkataan bahasa Belanda yang berbunyi **revolutie**. Adapun mengikut cerita ahli-ahli linguistik (satu lagi istilah yang dipinjam dari bahasa Inggeris), perkataan revolusi itu berasal dari perkataan Latin '**re-volvere**' yang membawa erti merubah ataupun menukar kembali sama sekali.

Dengan yang demikian pemakaian perkataan tersebut dalam konteks politik dan tatahidup manusia serta pemerintahan negara ianya membawa makna yang bermaksud perubahan dari sistem beraja kepada sistem republik. Dari sistem sosialis kepada sistem demokrasi, dari sistem authoritarian kepada sistem '*public concesus*' dari feudalisme kepada komunisme.

Kata orang-orang PAS revolusi yang tercetus di Iran adalah merupakan revolusi Islamiyyah. Kalau begitu ini bermakna rakyat di Iran sebelum revolusi tersebut tidak kenal pada ugama Islam dan tidak pernah mengamalkan perintah Allah SWT. Bukan itu sahaja malah rakyat Iran adalah orang-orang kafir sedangkan kita semua tahu bahawa Iran dulu atau Iran sekarang adalah negara Islam. Negara



Islam yang dimaksudkan di sini ialah **'Muslim Country'** dan bukan negara itu yang Islam. Shah Reza Pahlavi yang digulingkan oleh rejim Ayyatollah Khomeni juga adalah orang Islam. Dia juga pernah naik saksi bahawa tidak ada yang disembah beliau melainkan Allah dan Muhamad pesuruh Allah. Tapi sebagai manusia biasa beliau juga tidak sepi dari melakukan dosa-dosa. Yang silapnya ulamak di negeri itu tidak berani menasihati raja, tapi apa jadi pada mereka bila Shah sudah tak ada lagi?

Setahu saya hanya junjungan kita Nabi Muhamad SAW sahaja yang maksum dan suci dari segala dosa. Baginda yang telah dibersihkan oleh malaikat Jibril, namun dalam hayatnya beliau berisghtifar seribu kali sehari.

Bercakap tentang revolusi, Islam mengalakkan revolusi. Firman Tuhan berbunyi, **Tuhan tidak akan mengubah nasib sesuatu kaum melainkan kaum itu sendiri yang mengubahnya.**

Jadi apa yang harus dilakukan oleh ahli PAS ialah memperbaiki keadaan hidup ekonomi, pelajaran dan lain-lain aspek kemanusiaan yang seperti mana yang dilakukan oleh Al-Arqam terutama pemikiran.

Negara kita ini bukan boleh diperintah dengan slogan-slogan, rakyat tidak boleh dididik dengan menyatakan kafir dan Islam, mereka kena bersekolah, kena pergi ke universiti, mesti siap sedia dengan zaman sains dan teknologi.

Calon bebas yang dibantu oleh PAS tiada parti,

tiada organisasi dan idiologi nak perintah negara macam mana? Nak cakap dekat parlimen mesti ada penyokong. Kalau terkonteng-konteng seorang diri seperti ahli parlimen PAS bukan boleh memberi faedah apa-apa. Keputusan diambil dari suara majoriti. Nabi suruh kita memilih perempuan yang beragama untuk dijadikan pasangan hidup, nak cari teman memperjuangkan agama boleh pilih hentam keromo? Iran berjaya kerana mereka yang mengikuti Ayyatollah Khomeni adalah orang-orang Syiah.

Revolusi yang berlaku di Iran bukanlah satu revolusi Islam, ianya satu revolusi sistem pemerintahan. Ianya merubah sama sekali sistem pemerintahan beraja kepada sistem pemerintahan republik. Tidak ada orang yang diIslamkan beramai-ramai kerana orang Iran sebelum itupun memang orang-orang Islam. Mereka tidak senang kepada sistem beraja dan tidak terima mazhab ahli sunnah.

Jadi mengapakah pemimpin-pemimpin, penulis-penulis resmi dan tak resmi PAS membohongi hakikat ini. Apakah bagi PAS membohong untuk mendapatkan kuasa politik itu tidak berdosa? Saya tahu ada yang pernah jawab pada saya *It is okay. A little white lie. It's okay no problem.* Saya pun kata "Lu caya gua, gua caya lu. Percayalah. Percayalah pada Tuhan.

Saya fikir eloklah kita semua jadikan diri kita orang Islam sebenar-sebenarnya terlebih dahulu. Islamkan keluarga kita, sahabat dan kawan-kawan kita. Tanamkan revolusi mental keislaman kepada

jiwa setiap ahli keluarga. Tanamkan kefahaman bahawa Islam itu adalah ugama Allah bukannya alat politik. Kita ini sekadar penunjuk jalan yang sudah disediakan. Janganlah pada jalan itu kita nak letakkan nama kita dan kita pula yang hendak kutip tol.

Islam itu sudah sempurna, yang kita nak pecahkan jadi kumpulan yang kecil kenapa? Masing-masing nak bawa lari Islam macam orang mendulang emas berdekatan dengan kampung Hadi, pasalnya apa? PAS bimbing orang ramai suruh ikut sunnah Rasul dan kitab Allah, Suruh ikut Akhbar Harakah dan kaset Hadi.

Dari PAS kita beralih pula kepada golongan serpihan yang menamakan diri mereka sebagai golongan Semangat 46, samada yang pro Ku Li ataupun yang pro Musa. Kita tengok cara-cara mereka bermain sandiwara politik di atas sebuah pentas haram. Sendiwara mereka ini agak berlainan sedikit dengan sendiwara-sendiwara yang telah kita pernah lihat. Skripnya ditulis oleh dua orang penulis dan kedua-duanya juga yang mengarahkan sandiwara tersebut. Mereka ialah Musa dan Ku Li. Barisan pelakun utamanya pula ialah Ku Li dan Musa Hitam sendiri. Pendokong-pendokong watak yang lain termasuklah Shahrir Kunci, Rais Yatim, Tan Sri Othman Saat, Marina Yusuf dan Ibrahim Azmi, Ibrahim Ali dan ramai lagi.

Ini sandiwara satira. Ianya memperjuangkan sesuatu. Mesejnya ialah kononnya untuk menyatukan umat Melayu yang sudah berpecah belah,



mengembalikan kegemilangan politik Melayu seperti di zaman-zaman sebelum dan selepas merdeka dan mengembalikan semula keadilan yang pada pendapat mereka itu tidak wujud. Tema dasarnya ialah kediktatoran Mahathir. Dari segi plot, ceritanya amat mendatar, amat monotonous. Dialognya sama sahaja. Tak berubah-ubah dan hampir-hampir boleh dianggap sebagai tidak mempunyai plot. Tidak ada cause and effect.

Sebenarnya apa yang dibawa oleh pelakun-pelakun politik tersebut adalah reflection atau pun pantulan dunia yang tidak sah. Dunia yang hanya wujud di alam pemikiran dan angan-angan mereka. Kita tanya: sejak bila pula orang-orang Melayu tidak bersatu padu? Yang tidak bersatu padu bukanlah semua orang-orang Melayu, tetapi se-golongan kecil yang sudah terpengaruh dengan sandiwara mereka. Orang Melayu tetap bersatu dan disatukan di bawah kepimpinan dan parti UMNO yang baru. Masih ramai lagi orang Melayu yang sayangkan kepada UMNO dan perpaduan. Masih ramai lagi orang Melayu yang sanggup mengene-pikan sentimen malah kepentingan pribadi demi per-paduan yang semacam itu. Mereka ini adalah golongan majoriti yang dipimpin oleh kumpulan majoriti. Bukan golongan minoriti yang dipimpin oleh sekumpulan puak minoriti.

Jika mereka sebenarnya orang-orang yang cinta-kan kepada perpaduan, mereka sepatutnya masuk bersama-sama di dalam UMNO baru. Mereka sepatutnya membelakangkan segala ego dan kepen-

tingan. Mereka sepatutnya tidak berpecah kepada dua kumpulan yang selanjutnya. Mereka sepatutnya berusaha sedaya upaya untuk bukan sahaja melegakan kemelut politik negara, malah mereka turut sama menstabilkannya.

Itulah yang patut mereka semua lakukan. Jika mereka tidak suka kepada Mahathir, itu tidak mengapa. Dr. Mahathir hanyalah seorang Perdana Menteri, seorang manusia. Dr. Mahathir tidak akan menjadi Perdana Menteri untuk selamanya. Dan beliau juga tidak akan hidup menongkat langit. Ini bukan zaman Nabi Noh yang boleh hidup sampai 1000 tahun. Mereka patut sedar yang mereka tidak boleh menukar pemikiran rakyat kerana di antara pemimpin mereka sendiri tidak ada doktrinnya yang jelas. Satu perkara yang kumpulan serpihan mesti ingat, ditakdirkan Mahathir yang sedang sakit terlantar di Hospital, akibat huru hara yang ditimbulkan oleh mereka meninggalkan kita, apakah mereka fikir Tuhan akan gantikan dengan pemimpin yang baik untuk negeri kita? Orang-orang yang tidak bersyukur nikmat akan mendapat laknat dari Allah.

Negara dan rakyat kita kini, akan menjadi mangsa badai dan angin dan angin politik yang akan melanda pada bila-bila masa sahaja. Sudahkah kita sedar? Atau masihkah kita sedang terlena?



Sesungguhnya Allah tidak merubah keadaan sesuatu kaum sehingga mereka merubah keadaan yang ada pada diri mereka sendiri.

(Ar-rad: Ayat 11).



## BAPA-BAPA SERPIHAN

Ramai peminat-peminat saya yang membaca buku saya **TALQIN UNTUK UMNO** tersenyum penuh puas apabila mereka menghabiskan bab '*Bapa Kuching*' dari halaman 93 hingga 113. Mereka tak sangka ada penulis yang berani dan sanggup berterus terang dan membetulkan kebenaran sejarah dengan mendedahkan apa yang mesti diketahui oleh seluruh rakyat Malaysia.

Kepuasan pembaca membaca buku saya bukanlah disebabkan oleh kupasan yang saya buat mengenai surat Tunku Abdul Rahman. Kepuasan pembaca sebenarnya adalah disebabkan oleh fakta yang benar yang saya ulas. Fakta yang benar itu ialah surat Tunku Abdul Rahman itu sendiri. Surat Tunku Abdul Rahman itu sendiri mendedahkan kepada pembaca kebenaran sejarah yang tidak boleh dibohongi oleh sesiapa pun.

'*Bapa Kuching*' bukan bererti Tunku seorang pemimpin penakut, cuma dalam konteks memerdekakan jiwa dan hati bangsa Melayu, Tunku gagal membebaskan sepenuhnya. Tunku menjadi negotiator atau perunding macam beberapa orang pakar perunding di dalam bandar Kuala Lumpur, bukannya perjuangan kemerdekaan. Matlamat rundingan Tunku ialah membebaskan negara ini dari pentad-

biran Inggeris meskipun kebebasan yang hakiki tidak diperolehi sepenuhnya. Kita hanya dibebaskan dari belenggu yang mengikat kaki selama 400 tahun dibuang tetapi jiwa kita terus dicengkam. Jiwa kita gagal dimerdekakan. Kita tak ubah macam burung yang hidup dalam sangkar kayu.

Hari ini Malaysia walaupun sudah lebih 30 tahun merdeka masih terus terikat dengan budaya Inggeris, sistem persekolahan Inggeris serta sistem perkhimatan awam ala Westminster. Sistem perundangan Inggeris masih dianggap macam Quran, tak boleh diusik. Ramai yang melenting. Ramai yang masih sayang kepada *'The Colonial Masters'*.

Malaysia barangkali merdeka dan berkerajaan sendiri, anak-anak Melayu sekarang menjadi ketua kerajaan dan negara. Tetapi dari satu sudut yang lain bangsa Melayu masih lagi terancam oleh kebebasan yang terhad. Kita terpaksa tunduk kepada kehendak British. Melalui agen-agen imperialis barat yang masih lagi mahu menunjukkan kukunya di negara kita, kita tunduk takut. Kata-kata British ialah undang-undang yang tak boleh kita derhaka. Contoh yang paling hampir ialah prasyarat kemerdekaan mengenai kaum imigran di Tanah Melayu. Kenapa kita harus menerima orang-orang lain sebagai pra syarat kemerdekaan?

Kerana kita sanggup menerima "ugutan" Inggeris itu, maka bangsa kita pun dikalungkan bunga kemerdekaan. Tunku pun dengan penuh semangat, sambil menggenggam penumbuk, menjerit: Mer-

deka!... Merdeka!... Merdeka!...

Soalnya merdekakah kita? Kalau kita benar-benar sudah merdeka kenapa kita tak boleh berbuat sesuka hati kita, sekalipun tanahair dan bumi yang kita pijak ini adalah bumi Melayu, bumi yang telah melahirkan pahlawan-pahlawan Melayu seperti Mat Kilau, Tok Bahaman, Datuk Maharajalela? Kenapa? Ini kan bumi kita.

Dalam zaman moden pula kita telah melahirkan tokoh-tokoh berprinsip yang berjuang untuk bangsa dan negara seperti Allahyarham Datuk Boestamam, Ibrahim Yaacob dan ramai lagi. Yang menyedihnya di zaman Tunku dulu, orang-orang ini dianggap musuh Melayu. Satu perjuangan yang sentiasa ditindas dan dipandang sepi oleh sejarah. Tunku tidak pernah mengarahkan agar jasa orang-orang ini dikenang dan sejarah pengorbanan mereka diberi pengiktirafan. Tunku hanya mahu jasanya dikenang walhal saham-saham yang tokoh-tokoh ini tanamkan di dalam perjuangan menuntut kemerdekaan tanahair adalah lebih besar.

Saya tidak terperanjat apabila para sahabat Tunku menganggap tulisan saya di dalam '**Talqin Untuk UMNO**' kurang bermoral dan memandangkan rendah jasa-jasa Tunku. Terus terang saya katakan jasa itu bukan diukur kerana jasa sewaktu menjadi pemimpin. Kerana sememangnya menjadi tanggung jawab pemimpin untuk perhambakan diri, masa dan harta benda untuk rakyat. Tidak ada pemimpin yang naik kerana ingin hidup di dalam istana kemewahan sambil membiarkan rakyat



menderita. Kalau adapun para pemimpin jenis ini mereka sudah lupa daratan kerana pancingan kebendaan dan khayalan di dalam buaian kuasa.

Tunku pun barangkali sebelum duduk ditakhta kuasa, semangat ingin memperjuangkan cita-cita rakyat, hasrat untuk membantu bangsa Melayu keluar daripada gobok kemiskinan adalah suatu azam. Dan azam itu diusahakan untuk menjadikannya satu kenyataan. Malangnya bila kuasa sudah berada di dalam genggaman, lain pula jadinya. Seperti kata pepatah, disangka panas hingga ke petang rupa-rupanya hujan di tengah hari.

Kenapakah golongan terpelajar membiarkan Tunku menjadi penghalang kepada perjuangan bangsa dan ketuanan Melayu. Kenapa mesti biarkan Tunku masih menjadi batu penghalang kepada kemajuan umat Melayu? Apakah mereka tidak terfikir usia Tunku yang lanjut?

Orang Melayu yang berpegang pada adat terpaksa mengalah, biarpun ada yang marah bila peristiwa-peristiwa di Johor Bahru, Parit Raja dan Ampang Jaya adalah peristiwa yang memecahkan orang Melayu. Tunku sanggup mengeruhkan lagi suasana politik negara ini dengan turut berkempen bersama golongan serpihan. Pada hal kan lebih baik Tunku nasihatkan mereka yang sudah jadi serpihan supaya kembali ke pangkal jalan. Itulah cara yang sebaik-baiknya kalau hendak berdamai.

Pokok perbincangan saya ialah mengenai Bapa Serpihan, suatu konsep yang baru yang perlu diberikan pengenalan dan perhatian kepada orang

tua-tua yang sepatutnya menjadi pendamai tetapi sebaliknya menjadi seperti budak-budak juga dengan ikut berkempen.

Bapa serpihan lebih merbahaya daripada Bapa Kuching. Sebabnya ialah serpihan politik yang berlarutan ini satu kerja mungkar yang akan membawa bencana.

Sebagai contoh dua orang yang terkorban di dalam satu kebakaran di Gombak akhir bulan Disember lalu adalah kerana terkena 'serpihan' tangki gas. Tengoklah betapa berbahayanya serpihan dari satu tangki gas dan cuba pula tengok betapa bahayanya keadaan orang Melayu hari ini akibat tindak tanduk kumpulan serpihan yang telah membuat orang Melayu bermusuhan sesama sendiri dan ramai yang akan mati kerana politik mereka.

Di dalam memperkatakan tentang serpihan kita tidak boleh mengelak dari mengingatkan semula makna serpih. Kerana konsep serpih bukanlah suatu yang baru. Dalam arena politik negara konsep serpih telah digunakan berkali-kali cuma cara ia digunakan sahaja tidak sama walaupun maknanya selari.

Perkataan serpihan digunakan acapkali sebagai menggambarkan suatu keadaan puak, kumpulan atau orang perseorangan keluar menubuhkan sebuah pertubuhan lain. Ia adalah pecahan dari badan induk. PAS sebagai contoh adalah serpihan UMNO cuma orang ramai tidak mahu menyedarinya. Tengoklah keadaan hidup parti itu sekarang, penuh dengan misteri.

Perkataan serpihan telah berpuluh-puluh kali ditulis oleh para penulis buku-buku sejarah dan politik untuk menggambarkan sesuatu keadaan. Namun demikian ia tidak pernah menjadi popular. Ia hanya menjadi popular apabila Dr. Mahathir Mohamad mengingatkan umat Melayu betapa bahayanya golongan serpihan ini pada bangsa dan masa depan negara. Berpijak dari situlah seluruh rakyat Malaysia menggunakan dan memahami maknanya kata-kata serpihan itu.

Perdana Menteri sewaktu berucap diperhimpunan agung UMNO pada 28 Oktober 1988 memanggil kumpulan semangat 46 sebagai kumpulan serpihan. Beliau mahukan ahli-ahli UMNO memanggil semangat 46 sebagai kumpulan serpihan. Justeru itu sejak 29 Oktober, perkataan serpihan menjadi popular sehingga berita RTM dan TV3 pun tidak ketinggalan menggunakan serpihan bila merojok kepada kumpulan Semangat 46 dan itulah antara sebabnya saya namakan buku ini **'Politik Serpihan'**.

Jika kita lihat serpihan sepintas lalu nyatalah sejak orang-orang Melayu mula sampai ke bumi bertuah ini, kita sudah melihat kewujudan serpihan.

Tak salah jika kita katakan Parameswara atau Sultan Iskandar yang membuka negeri Melaka di awal kurun ke 14 dianggap **'Bapa Serpihan'**. Tetapi kerana niatnya baik malah dia yang pertama memeluk ugama Islam dan mengajak rakyat Melaka menganut fahaman Islam, maka semuanya



berjalan lancar. Melaka maju dan makmur sehingga datang beberapa orang pengkhianat yang sanggup menjadi tali barut semata-mata kerana perasaan hasad dan dengki.

'Sang Rajuna Tapa' itu pun Bapa Serpihan juga. Beliaulah yang telah menghancurkan Pulau Singapura dengan memberikan kerjasama kepada kuasa asing hingga Melayu hilang kuasa. Rajuna Tapa membuka pintu kepada angkatan asing yang bersenjata menyebabkan Sultan Iskandar Shah terpaksa lari ke Melaka. Lama kelamaan Melaka yang memulakan sistem kesultanan di Tanah Melayu terpaksa mengakhiri pemerintahannya apabila barat datang.

Kejayaan Parameswara memulakan empayar kesultanan Melayu telah membesarkan lagi jurang antara Temasik dan Melaka.

Untuk beberapa ketika Melaka dilihat dengan cemburu oleh lain-lain kerajaan di sekitarnya. Peperangan yang meletus membuatkan Melaka senantisa berada di dalam keadaan tidak selamat.

Kalaulah suatu iktibar dapat diambil dari serpihan "**Temasik**" dengan wujudnya Melaka ialah Melaka dan sistem kesultananannya tidak kekal lama. Ia hidup lama tetapi akhirnya ia musnah sikit demi sikit, langsung menenggelamkan idealisme menjadikan Melaka sebagai pintu masuk Islam.

Islam gagal berkembang melalui Melaka sebaliknya agama Kristian yang dibawa oleh para pedagang Portugis berkembang pesat. Kristian sudah mengambil alih agama Islam.

Para Mujahid Islam terpaksa menghadapi saingan dari musuh mereka dan ramai yang melarikan diri kelain-lain negeri. Dipendekkan cerita akhirnya Sistem kesultanan Melayu Melaka turut berakhir. Dalam konteks politik moden Melayu, serpihan dari Melaka dan Parameswara telah membentuk lain-lain kerajaan dan mengujudkan dinasti kesultanan lain-lain negeri seperti Perak dan Selangor. Hari ini lahir banyak kumpulan serpihan. Setengah serpihan yang lahir hidup subur, berkembang mengikut peredaran zaman. Ada yang hidup macam seperti kata orang tua-tua **'hidup segan mati tak mahu.**

Saya tak berani mendakwa UMNO yang mati pada 4 Feb 1988 di tangan Hakim Datuk Harun Hashim akan menjadi macam Melaka dan Parameswara. Saya berani berkata apa yang berlaku kepada UMNO tak ubah macam apa yang berlaku kepada Melaka dan rajanya waktu itu.

Sejarah membuktikan bahawa bila tiba sesuatu tahap sesebuah kerajaan ataupun tokoh akan runtuh dan turun maka tidak ada sesiapa pun yang dapat menahannya. Ini hukum alam kerana roda hukum itu tak pernah membenarkan panas sepanjang hari, ada ketika turun juga hujan. Hakim Datuk Harun Hashim bukanlah Parameswara, Melaka pula bukannya UMNO. Kebetulan dua suasana yang berlainan itu telah mengajar kita melihat malang yang menimpa bangsa Melayu.

Hidup kumpulan serpihan ini tak ubah macam pelangi selepas hujan. Ia cantik dan menyerikan

tetapi bila tiba saatnya pelangi itu hilang dari pandangan mata.

Dalam sejarah UMNO pula Dato' Onn bin Jaafar memulakan era baru di dalam memecah tradisi kepartian. Ia melakukan suatu yang tidak terlintas dibenak fikiran orang-orang Melayu waktu itu. UMNO yang diasaskan diserahkan kepada Tunku Abdul Rahman Putra di atas dulang emas dan beliau telah menubuhkan sebuah parti lain, IMP bagi memperjuangkan sebuah parti multirasial.

UMNO yang cuba dibuka pintu kepada bukan Melayu yang diilhamkan oleh Dato' Onn dibantah oleh ahli-ahli. Kerana keciwa dengan tindak tanduk ahli-ahli UMNO, Dato Onn terpaksa memisahkan diri dari UMNO. IMP yang disertai oleh semua kaum gagal menjadi parti alternatif kepada UMNO. IMP sebuah serpihan dari UMNO dan dipimpin oleh bekas Presiden UMNO ataupun Presiden serpihan seperti BERJASA, hidup tidak menentu.

Sejak pengambilan alih jawatan Presiden UMNO Tunku melancarkan gerakan menentang Dato Onn dalam IMP. Tapi bila Dr. Mahathir yang bertindak menentang kumpulan serpihan dari UMNO, Tunku tak dapat terima. Tun Hussein Onn pun berikan kerjasama. Pada hal Tunku dulu menentang habis-habisan Bapa Serpihan ketika itu iaitu ayahanda Tun Hussein Almarhum Datuk Onn.

Perkembangan di dalam UMNO dan kepada diri Dato' Onn sama seperti yang berlaku di dalam UMNO dewasa ini.

Puak Tengku Razaleigh bermati-matian hendak



menghidupkan Semangat 46 tak ubah seperti kumpulan serpihan yang wujud di dalam sejarah tanahair semasa Tunku jadi Presiden UMNO yang kedua. Masa itu Datuk Onn menjadi pemimpin parti serpihan. Tetapi Dato' Onn menyedari bahawa kumpulan serpihannya tidak boleh hidup lama, tidak boleh memikat hati rakyat. Sebelum dia menghembuskan nafasnya yang terakhir dia mewasiatkan agar membalutkan bendera UMNO ke kerandanya bila dia mati. Apakah Hussein Onn masih belum boleh jadikan sejarah ayahandanya sebagai pedoman dan petunjuk?

Dato' Onn mulai menyedari bahawa konsep politiknya sudah mulai kabur dan dia telah berusaha untuk memukau orang-orang Melayu melalui strategi lain pula.

Ini dapat dilihat melalui konsep Parti Negara, parti kedua yang Dato' Onn asaskan. Dato Onn memperlihatkan betapa Parti Negara pimpinannya terpaksa mengambil alih tugas mempertahankan hak ketuanan Melayu. Parti negara telah membicarakan hal-hal kemelayauan melebihi yang dibuat oleh UMNO hinggakan ada pihak menuduhkan Parti Negara sebagai pro Melayu. Mengapa beliau harus keluar dari UMNO jika mahu menjadi pro Melayu? Tidakkah Melayu itu UMNO dan UMNO itu Melayu, satu konsep yang pernah beliau pertahankan?

Sejak IMP dan Dato Onn, proses pembentukan kumpulan serpihan telah dapat dilihat dengan jelas. Ia semakin menjadi satu cara tokoh-tokoh yang

kecewa dengan dasar dan pucuk pimpinan parti keluar untuk menubuhkan parti lain. Tujuannya ialah untuk menyaingi parti asal dan merampas kuasa eksekutif.

PAS sebagai contoh adalah asalnya dari cabang UMNO. Haji Ahmad Fuad, Ketua Jabatan Agama UMNO Malaya atau kini dikenali sebagai Ketua Biro UMNO telah keluar dari UMNO untuk menubuhkan PAS. Penubuhannya dibuat di Seberang Prai. Haji Ahmad dilantik menjadi Yang Dipertua PAS yang pertama dan Setiausaha Agungnya ialah Haji Maliki. PAS yang berjuang begitu lama dan begitu taksub dengan fahaman keagamaannya begitu sulit untuk menerima sebarang bentuk kerjasama. Hinggalah di dalam tahun 1974, PAS tertarik untuk berkongsi kuasa di dalam pembentukan kerajaan Barisan Nasional. Malangnya umur PAS tak panjang, ia dipecat dari komponen itu pada tahun 1978.

Sekarang PAS dan Semangat 46 begitu ghairah untuk membentuk pakatan bertujuan untuk mengambil alih negara ini. Mengapa sekarang PAS begitu berminat untuk bekerjasama dengan bekas ahli-ahli UMNO?

Mengapa PAS tidak bekerjasama dengan UMNO. Dalam UMNO ada Anwar Ibrahim. Latarbelakang Anwar sudah cukup menyakinkan PAS betapa Anwar seorang tokoh dari dulu hingga hari ini yang benar-benar bersih dan memperjuangkan cita-cita Islam. Sedangkan Tengku Razaleigh tidak mempunyai rekod seumpama itu. Bahkan kerjasama

yang Tengku Razaleigh cuba panjangkan kepada PAS itu pun adalah satu helah untuk menarik sokongan. Bila tiba masanya PAS akan tertinggal seperti dulu juga.

PAS tidak menyedari bahawa salam perpaduan yang dihulurkan oleh Tengku Razaleigh bukanlah keikhlasan yang hakiki. Perangkap politik yang dipasang oleh Tengku Razaleigh boleh melemahkan PAS dan akhirnya memusnahkan harakah yang dibina oleh PAS sekian lama.

Semoga di dalam keadaan keghairahan ini PAS mengimbas kembali kejadian yang menimpa Dato' Onn dulu.

Sewaktu Dato Onn menanam idea pembukaan pintu UMNO kepada semua kaum, Tan Cheng Lock dan Turaisingham ikut menunjukkan minat. Dato Onn merasakan MCA dan MIC berminat dengan konsep parti majmuk lalu meninggalkan UMNO kepada Tunku. Dalam hatinya beliau fikirkan IMP boleh mengalahkan UMNO kerana konsep multirasial itu disokong oleh MCA dan MIC. Rupa-rupanya Tan Cheng Lock lebih mementingkan strategi politik dari janji politik. Dato Onn keciwa dan tersepit dengan ideanya sendiri.

Tengku Razaleigh yang asyik dengan idea bekerjasama dengan PAS dan DAP perlulah memikirkan hal ini sejenak. Kalau MCA sendiri lebih mementingkan strategi politik daripada janji politik masakan DAP juga tidak begitu. Sikit sebanyak DAP berjuang untuk ahli-ahlinya yang rata-rata adalah orang-orang China. Orang-orang Melayu



yang menjadi ahli DAP adalah kerana keciwa.

Setengahnya berhajat nak jadi "Orang besar dalam parti kerana masih terbayangkan pangkat Presiden. Lalu dia sanggup mengorbankan kepentingan peribadinya. Cuba tanya diri sendiri, andai kata DAP berkuasa apakah "awak" boleh pegang jawatan penting. Lihat kerajaan Singapura, berapa kerat Melayu yang duduk di keypost. Dalam angkatan tentera pun orang-orang Melayu diragui kesetiaan mereka oleh tokoh PAP Singapura, apakah di dalam kabinet mereka sanggup memberikan peluang kepada orang Melayu menjadi Timbalan Perdana Menteri ataupun Menteri Pendidikan.

UMNO menjadi tulang belakang kerajaan dan menjadi payung bangsa Melayu kerana sokongan dari orang-orang Melayu. Atas nama perpaduan orang-orang Melayu sanggup hidup dan mati untuk memastikan orang-orang Melayu kekal berkuasa.

Perpecahan antara UMNO dan PAS telah banyak meretakkan perpaduan bangsa Melayu. Bagaimanapun nasib masih menyebelahi UMNO. Keretakan orang-orang Melayu akibat dari kewujudan UMNO dan PAS masih belum seteruk seperti hari ini.

Masih ada jalan pulang bagi bangsa Melayu untuk berdamai, itupun jika kumpulan serpihan mahukan perdamaian. Janganlah perdamaian yang boleh menguntungkan puak mereka saja yang mereka kehendaki. Lain dari itu mereka anggap perangkap politik. Majlis Perpaduan Melayu Johor yang dianjurkan bersama oleh 52 pertubuhan Melayu

di Johor dianggap sebagai detik permulaan ke arah menjalin semula perpaduan bangsa. Hussein Onn yang diawalnya menjadi penentang Dr. Mahathir sudah sanggup menjadi orang tengah untuk mendamaikan semula dua puak yang bertentangan itu. Barangkali Hussein Onn yang sudah mengalami erti serpihan apabila dia dan bapanya keluar dari UMNO sedar betapa cita-cita peribadi Tengku Razaleigh untuk menghidupkan Semangat 46 adalah sia-sia. Wadah yang ada sekarang perlu digunakan, bukannya membesar-besarkan isu UMNO baru dan UMNO lama.

Perpecahan yang menimpa bangsa Melayu hari ini tidaklah sedahsyat perpecahan orang-orang Hindu di India ketika menuntut kemerdekaan dulu. Kerana orang-orang Islam merasakan orang-orang Hindu tidak memberi perhatian dan menganggap mereka rakyat kelas dua maka Mohamad Ali Jinnah mahukan sebuah negara baru yang dinamakan Pakistan. Pakistan ialah serpihan dari India. Di Pakistan, majoriti rakyatnya ialah umat Islam berbanding dengan di India. Umat Islam di India hidup menderita kerana diskriminasi. Masjid pernah di bakar, nyawa terkorban. Semua ini kerana adanya kebencian setengah pihak terhadap Islam.

Tetapi Pakistan tidak berjaya memelihara negara itu dari berpecah. Kerana krisis seperti Hindu-Islam di India dizaman Mahatma Ghandi masih hidup, Bangladesh diwujudkan pula. Ia adalah serpihan dari Pakistan. Tetapi hari ini lihatlah bala

yang menimpa negara Islam itu. Banjir yang melanda negara itu akhir bulan Oktober 1988 suatu bala yang telah mengakibatkan ribuan nyawa hilang.

Tetapi ada juga kumpulan serpihan yang berjaya. Australia dan Kanada, dua buah bekas tanah jajahan Inggeris berjaya muncul sebagai negara yang maju dan merdeka. Ia berjaya meninggikan taraf hidup rakyatnya dan berjaya membawa negaranya menuju ke arah kemakmuran.

Uganda dan banyak negara di Afrika mengalami kepayahan walaupun tuan besar (Inggeris) pernah menjajah negara-negara itu. Singapura, serpih dari Malaysia pada tahun 1965 kini berjaya mengatasi Malaysia. Taraf hidup mereka lebih tinggi. Mata wangnya kukuh dah lebih tinggi nilainya dari Malaysia.

Dalam sistem politik dua parti atau '**two-party system**', rakyat tidak mempunyai masalah di dalam menentukan siapakah yang mereka kehendaki berkuasa. Di Amerika Syarikat sebagai contoh, rakyat mempunyai kebebasan menentukan dua calon antara Democrat dan Republican sebagai pilihan. Kedua-dua mempunyai isu yang hendak diperjuangkan dan rakyat boleh menilai dari dasar yang mereka perjuangkan.

Tidak timbul kumpulan serpihan kerana mereka sedar puak ketiga tidak mampu untuk menarik sokongan. Sesungguhnya mereka tidak mempunyai fikiran. Seandainya Jessie Jackson tidak puas hati dengan layanan parti Demokrat, dia tidak memilih



menubuhkan parti lain untuk melepaskan geramnya. Dia sedar dia harus bergerak dari dalam dan berusaha memenangi pencalonan jawatan Presiden Amerika. Andainya dia kalah (dia sudahpun kalah) dia menerima kekalahan itu dengan hati yang lapang, tidak merajuk ataupun bersikap berdendam macam orang yang tidak beriman.

Jika ditanya tentang untung rugi kumpulan serpihan jawapannya bergantung kepada keadaan politik negara. Di Amerika dan Britain kumpulan serpihan langsung tidak diterima.

Kalau pun wujud ia tak boleh mengoncangkan sistem politik negara berkenaan. Rakyat di England sudah sehati dengan parti Buruh, Liberal ataupun Konservative.

Rakyat Amerika hanya tertarik samada Republican ataupun Democrat.

Dalam negara yang komposisi penduduknya 50-50 seperti di Malaysia, keadaan amat membimbangkan jika perpecahan sesuatu kaum berlaku. Dalam hal kumpulan serpihan Ku Li boleh merugikan UMNO kerana kemasukan mereka di dalam pilihanraya boleh memecahkan jumlah pengundi.

Sebagai contoh di Johor Bahru, Haji Maasod kalah kepada Shahrir Samad kerana sokongan masyarakat Cina.

Bagaimana pula kalau ada calon ketiga, katakan dari orang keturunan Cina yang bertanding. Hasil pecahan undi Melayu, barangkali calon Cina itu berpeluang untuk menang. Bagaimana jika ke-

dudukan macam di Johor Bharu, pun orang-orang Cina sama banyak dengan orang-orang Melayu dan tiga calon bertanding, mampukah kita menghadapi keadaan ini jika ia benar-benar berlaku?

Pendek kata kumpulan serpihan tak ubah macam pengacau di dalam memperjuangkan cita-cita. Tidak ada idealisme. Kalau ada pun hanya dendam untuk menjatuhkan Dr. Mahathir Mohamad itu sahaja. Bukanlah baru perasaan dendam yang membuku dihati kerana sejarah Melayu sangat kaya dengan cerita dendam kesumat yang akhirnya merugikan bangsa Melayu. Contohnya ialah "Hang Nadim" dihukum bunuh kerana kecerdikannya yang menghalang Singapura dari dilanggar todak.

Kerana dendam kepada seorang yang telah menganiayanya, Mahsuri sanggup menyumpah pulau Langkawi menjadi padang jarak padang terkukur. Mengapa tidak sumpah si pengkhianat, mengapa seisi negeri harus menanggung bencana. Banyak lagi cerita dendam kesumat.

Bukan saja orang, binatang pun ada perasaan dendam. Di dalam filem **Orca, The killer Whale**, ikan paus itu macam bersumpah untuk menuntut bela di atas kematian 'isterinya' kerana menjadi mangsa buruan Richard Harris. Diakhir cerita Richard mati ditangan ikan paus itu. Kesan dari pembentukan kumpulan serpihan memperlihatkan betapa ia lebih banyak mendatangkan bahaya daripada memberikan kebaikan. Dilihat sejarah politik Malaysia kebanyakan kumpulan serpihan merugikan perjuangan ahli-ahli terutama

bangsa Melayu. PAS telah memecahkan belahkan perpaduan Melayu dan menanam budaya membenci dikalangan ahli-ahli. Contohnya PAS yang cuba memisahkan diri dari UMNO telah akhirnya menyertai Barisan Nasional. Perasaan ingin merojok semula kepangkuan UMNO macam tertanam di dalam hati, barangkali malu alah membuat PAS tidak berani. Tetapi Asri yang mulanya memimpin PAS dan telah keluar dengan menubuhkan HAMIM menyedari kesalahan ini. Asri yang cuba memujuk agar HAMIM dibubarkan dan ahli-ahlinya menyertai UMNO telah gagal meyakinkan mereka. HAMIM gagal dibubarkan. Tetapi Asri dan 12 ahli jawatankuasa agungnya keluar dan menyertai UMNO.

Gerakan yang memisahkan diri dari MCA kerana Dr. Lim Chong Eu tidak boleh lagi bekerjasama dengan Tan Siew Sin nampaknya sekarang sudah ada tanda-tanda yang mengadakan kerjasama samada dengan PBS atau DAP. Tak hairan jika Gerakan keluar dari Barisan dan mewujudkan kerjasama dengan DAP. Ini semata-mata untuk memperjuangkan semangat kecinaan parti itu. Apakah MCA akan berdiam diri melihat Gerakan semakin pro Cina?

Begitu juga halnya dengan USNO yang mulanya begitu kuat macam tiang seri bagi politik Melayu di Sabah. Kekuatan USNO berkembang hingga ke akar umbi dan rakyat begitu taksub dengan parti pro Islam itu.

Tun Datu Mustapha Harun sebagai tokoh yang



paling karismatik dan disegani, berkuasa dan berpengaruh. Hingga Tun Razak merasakan Tun Mustapha melampaui kekuasaan yang sepatutnya ada ditangannya. Melalui projek Berjaya yang turut dibantu oleh YM Tengku Razaleigh Hamzah maka USNO berjaya ditumbangkan. Naiklah Datuk Harris Salleh. Turun pula Tun Mustapha. Namun Tun walaupun sudah berusia tetapi tidak sanggup membiarkan USNO berjuang sendirian. Tun Mustapha hingga hari ini meneruskan impian untuk melihat USNO kembali memerintah Sabah dan dapat menjamin orang-orang Melayu/Islam di negeri itu tidak lagi ditindas.

Tetapi di waktu Berjaya, kumpulan serpihan dari USNO berkuasa, ia bukannya menjalankan pemerintahan secara adil. Ramai ahli-ahli USNO menjadi mangsa kezaliman kerajaan Berjaya. Datuk Harris dengan kesombongannya telah berusaha untuk menekan USNO. Tun Mustapha sendiri menjadi mangsa Harris. Sekarang Harris telah jatuh, sudah menjadi orang biasa saja. Yang menewaskan dia di dalam pilihanraya 1984 dulu ialah **Kadoh Agundong** orang baru yang tidak dikenali.

Sekarang Harris ingin menyertai USNO, mengapa dia sanggup pulang ke pangkuan USNO sesudah dia mengkhianati USNO. Jika tidak kerana dosa lama Harris tentulah USNO dan Melayu terus berkuasa di Sabah. Kumpulan serpihan seperti berjaya nampaknya telah memusnahkan gerakan Islam di Sabah. Kenaikan PBS yang dipimpin oleh **Pairin Kitingan** membimbangkan gerakan Islam.

PBS bukan sahaja pro Kadazan malahan pro Kristian. Gereja tumbuh di Sabah macam cendiawan lepas hujan, tapi pembinaan masjid amat kekurangan.

Tengku Razaleigh harus mengkaji sejarah terlebih dahulu sebelum ghairah untuk menubuhkan kumpulan baru untuk menjatuhkan UMNO. Jangan kerana marahkan pijat, kelambu pula hendak dibakar. Barangkali Tengku Razaleigh geram dengan Dr. Mahathir telah campur tangan dan menyokong Musa, ini menyebabkan Musa menang dan terlantik menjadi Timbalan Perdana Menteri.

Kalaulah itu alasan dia menentang Dr. Mahathir maka hujah beliau sangatlah lemah. Orang yang sehebat Ku Li harus mempunyai sebab yang lebih kuat dan konkrit, bukannya alasan budak-budak.

Jika Ku Li menyertai UMNO sudah tentu negara tidak akan berada di dalam kucar kacir. Pembangunan untuk kesejahteraan rakyat boleh dijalankan dengan lebih licin. Tetapi kerana tindak tanduk Ku Li dan kumpulan serpihannya rakyat hidup di dalam kekeliruan. Pecah belah sesama anggota keluarga sudah menjadi-jadi kerana ada setengah menjadi ahli UMNO, ada yang pro Ku Li. Akibat dari politik ini maka keluarga yang suatu masa dulu aman bahagia, kini porak peranda.

Kenapakah kita tidak boleh memandang dari pandangan global? Pandangan yang tinggi bahawa kita ini manusia, kita ini satu. Kenapa kita mesti berpecah belah dan berpuak-puak dan hanya memikirkan puakpuak kita saja? Kenapa kita tidak

fikirkan masalah semua manusia itu adalah sama? Masalah ego yang ditanamkan oleh iblis menjadikan golongan-golongan serpihan yang terus memusuhi asal permulaan.

Orang Islam sepatutnya kembali dengan pandangan mereka, cuma ada satu Tuhan Allah, satu Nabi Muhammad, satu kitab Al-Quran. Setiap orang Islam itu bersaudara. Kita hidup kasih antara satu sama lain dalam dunia yang kita hidup hanya sementara. Kita perlu kepada bapa-bapa insan bukan bapa-bapa serpihan.

## PERPADUAN

**Sebuah perkumpulan, akan ujud perpaduan**

**Bila ahlinya:**

**Berpegang pada satu keyakinan,**

**Hati-hatinya berkesefahaman,**

**Fikirannya sealiran,**

**Tindakannya pula sehaluan,**

**Ditambah ukhwah penjalin kasih sayang,**

**Taqwa penghubung hati pada Tuhan,**

**Biarpun dalam kelompok yang sedikit bilangan,**

**Ia tetap kukuh, payah untuk diceroboh,**

**Apa lagilah kalau banyak bilangannya,**

**Pasti menakutkan dan menggerunkan musuh.**

*(Oleh Khalisah: Dipetik dari  
majallah An Nasihah keluaran  
Jan 1989/Jamadilakhir 1409)*



## SESAT DI HUJUNG JALAN KEMBALI KE PANGKAL JALAN

**“K**ita tak boleh memandang pada symptom-symptom bersifat sementara saja, pada hal-hal yang aktual saja, tapi hendaknya kita mencuba melihat hal-hal yang lebih besar, dan mengarahkan akal budi kepadanya; itu memberi ketenangan, kekuatan dan keyakinan.”

Kata-kata diatas adalah amanat oleh Almarhum Bung Shahrir, semasa beliau di dalam tahanan di penjara **Cipinang** sebelum dibuang ke **Boven Digual** pada tahun 1934.

Kenapa kita mesti membiarkan terlalu ramai orang memperkatakan perkara-perkara yang kecil, perkara yang remeh temeh tentang satu peristiwa yang tidak patut diperbesar-besarkan. Sedangkan persoalan yang mesti kita hadapi kini jauh lebih besar lagi? Bukankah kita semua sedang menuju zaman pembangunan yang jauh lebih besar. Bukankah lebih baik sekiranya kita pupuk dan kembangkan idea-idea yang boleh digunakan untuk membangunkan bangsa dan negara daripada kita membiarkan mereka yang tidak menghormati de-

mokrasi dan tidak tentu arah matlamat yang dituju memerangi kerajaan yang kita pilih.

Kini cuba kita lihat apakah yang terjadi kepada ketua-ketua Serpihan yang memusuhi pucuk pimpinan UMNO. Dulu terjerit-jerit mahu hidupkan kembali UMNO yang mereka matikan. Kini yang satu sudah mahu bersatu semula dengan pucuk pimpinan dengan menyatakan persetujuan. Dan yang lagi satu pula berasa marah dan cemburu tapi dalam masa yang sama mereka tetap bersatu dalam kemungkaran menentang Ulilamri. Mereka tidak taat pada pemimpin negara.

Baru-baru ini secara senyap-senyap kita dengar berita mereka yang nak hidupkan UMNO telah tertangkap basah dengan pemimpin PAS. Janda dan duda dari rumpun UMNO ini rupa-rupanya sudah ada hubungan sulit dan sudah pun bersekedudukan sebelum bernikah dan di Ijab kabulkan tanpa mendapat restu dari anggota keluarga terlebih dahulu. Sendiwara sumbang inilah yang menjadi topik perbincangan saya dalam tulisan ini.

Sendiwara ini adalah sendirwara pribadi. Drama dendam kesumat yang tidak sudah-sudah kerana ada yang merasakan periok nasi mereka dimasukkan pasir atau najis. Perjuangan untuk bangsa, agama dan tanah air kini bukan lagi menjadi soal pokok kepada mereka yang menimbulkan angkara. Mereka menunjuk baik bila berada di dalam kumpulan kerajaan diluar mereka mengata dan mencerca Perdana menteri, anak-anak dan menantu. Mereka menyebelahi musuh dan mereka menjadi

musuh di dalam selimut.

Ini adalah satu penyakit hipokrit, penyakit munafik, penyakit ini lebih dahsyat dari penyakit anjing gila. Anjing gila bila menggigit orang, orang yang kena gigit turut menjadi gila. Penyakit munafik sudah pun menular kedalam jiwa sebahagian besar golongan serpihan yang masih duduk di dalam kerajaan kerana nak menyelamatkan perniagaan dan lain-lain kepentingan adalah jauh lebih berbahaya. Ia telah memunafikkan seluruh keluarga dan bahayanya mereka akan dihumbankan kedalam neraka sebelum orang-orang kafir.

Kita patut bimbang manalah tahu kalau penyakit ini nanti akan menjadi wabak kepada anak-anak kita yang tidak berdosa. Tanda-tandanya kini sudah jelas.

Berbalik pada cerita PAS dan 46 ini pada pandangan Umum Pertemuan yang telah diadakan, itu bukanlah satu perbahasan ataupun muzakarah. Pertemuan itu nampaknya diadakan dalam suasana silatul rahim. Tidak ada pihak yang kita lihat dengan mata kasar merasakan bahawa mereka lebih besar atau lebih kecil. Walaupun PAS merasakan yang kini PAS lebih penting dari 46.

Pertemuan mereka adalah pertemuan di antara orang Islam dengan orang Islam. Pertemuan di antara abang dengan adik. Antara saudara dengan saudara. Ianya merupakan Satu pertemuan yang baik. Memang orang Islam wajib menyambungkan silatulrahim. Tapi kerana tidak semua pertemuan yang baik mempunyai niat yang baik dan meng-



hasilkan kerja yang baik terutama apabila yang bertemu itu sudah kita kenali setakat mana kebaikan mereka, maka sebagai rakyat yang cintakan negara, kita terpaksa berwaspada dengan pertemuan yang seperti ini. Al maklum mereka ini adalah ahli-ahli politik yang desperado. Mereka merupakan orang-orang dari golongan serpihan yang sudah terlalu rindu pada kuasa politik.

Adakah pertemuan yang telah diadakan itu untuk mencari keuntungan jangka pendek atau jangka panjang untuk ummah, seperti pertemuan yang diadakan oleh Pertubuhan Melayu Johor yang membuat pengakuan bahawa Melayu itu UMNO dan UMNO itu Melayu. Tapi anehnya bila bebas lawan UMNO yang mewakili Barisan Nasional dulu segala undi dan sokongan mereka semuanya pergi pada Bebas. Dan apabila bebas menentang Barisan Nasional di Ampang Jaya hari ini, mereka juga orangnya yang beria-ia benar menentang kerajaan habis-habisan? Mereka datang beramai-ramai dari Johor pada hal resolusi yang mereka minta Majlis Kerja Tertinggi sudah setuju.

Kita semua tahu pertemuan itu untuk membantu Harun untuk mendapatkan satu kerusi di Ampang Jaya dan sesudah itu mereka akan berjuang habis-habisan, bermati-matian seberapa banyak kerusi dikawasan Melayu diseluruh negara. Apakah kerajaan pasti menentang mereka pula dalam pertempuran mesti ramai yang rugi.

Kerusi yang akan didapati ini bukannya lama sangat lepas pilihanraya ini akan ada pilihanraya

umum pula. Sekali lagi Melayu sama Melayu akan bergaduh. Maka sekiranya kita mahukan ketenangan dan kedamaian kita terpaksa menentang kerja-kerja jangka pendek yang menjadi amalan 46 dan PAS ini, walaupun pada hakikatnya negara kita mengamalkan demokrasi dan Al-Quran dan tidak menyekat manusia mencari kemajuan.

**Tidak ada sama sekali fikiran pada diri Nabi untuk membelenggu fikiran dikalangan sahabatnya atau untuk menetapkan suatu prakarsa hukum yang lebih kaku, jumud, kolot yang tidak bisa diubah. Al-Quran adalah salah satu kitab petunjuk kepada orang mukmin. Dan sama sekali bukan penghambat untuk kemajuan masyarakat, kebudayaan, syariat, undang-undang dan kemajuan yang dicapai oleh daya intelektual.**

**Said Khudory Baikh.**

PAS adalah sebuah parti Islam yang anggotanya hampir kesemuanya terdiri dari orang-orang Melayu. Parti ini adalah salah sebuah dari parti-parti politik dinegara ini yang didaftarkan dibawah Akta Pendaftaran Pertubuhan . Ini bererti parti PAS **'Ditanggung halal'** oleh Perlembagaan dan undang-undang negara. Tetapi Mengapakah sebuah parti pembangkang yang anggotanya sering bercakap menentang kemungkaran dan memandang UMNO sebagai musuh **'nombor 1'** dan yang mana pada satu ketika dulu ada anggota PAS yang mengkafirkan ahli-ahli UMNO tiba-tiba sahaja mahu bergabung dengan golongan 46, satu kum-

pulan Desprado yang dulunya ahli UMNO yang pernah dianggap kafir? Kenapa? Apakah ahli-ahli PAS tidak tahu bahawa golongan desprado yang bernama Semangat 46 atau perkataan Semangat yang sama dengan hantu ini telah melakukan banyak kemungkaran dan masih terus melakukan kemungkaran? Ianya juga adalah satu pergerakan politik. Macam mana yang halal bolih bercampur yang haram? Ini samalah seperti seorang lelaki mukmin yang berkahwin dengan seorang wanita Nasrani tanpa menukarkan agama wanita itu. Ugama yang manakah yang bakal diikuti oleh anak mereka kelak? Patutkah seseorang yang mengelar dirinya orang mukmin menggunakan tiori '*marriage of convenience*' untuk menegakkan hukum-hukum Allah?

PAS dan serpihan yang mahu berkerjasama di Ampang Jaya seperti yang telah mereka lakukan di Johor Bahru dan Parit Raja menampakkan bahaya-bahaya yang mungkin terjadi terhadap rakyat serta negara akibat dari gandingan golongan serpihan yang bertujuan untuk menumbangkan sebuah kerajaan Melayu. Kemenangan mereka tidak akan membawa rahmat melainkan menimbulkan perpecahan demi perpecahan.

PAS bukan tidak tahu Semangat 46 telah berpecah dua kepada golongan pro – Ku Li dan pro – Musa. Dan sekiranya Datuk Harun menang, ini mungkin mengakibatkan satu lagi perpecahan dalam team KU Li sendiri kerana Rais Yatim tentu tidak senang menerima Datuk Harun sebagai



saingannya. Apakah tidak mungkin PAS akan berpecah dua kerana pakatan untuk melakukan kemungkaran ini mungkin tidak dipersetujui oleh semua ahli PAS.

**Hai Ahli Kitab, mengapa kamu mengingkari ayat-ayat Allah padahal kamu mengetahui (kebenarannya).**

**Al-Imran**

Kata orang PAS orang-orang Melayu terutamanya anggota-anggota UMNO melihat PAS sebagai musuh. PAS beranggapan UMNO tidak berbuat begitu terhadap parti-parti lain'. Mengapa terhadap PAS saja? Apakah kerana PAS berjuang untuk menegakkan negara Islam dan akan menukarkan perlembagaan negara kita dari bentuk skular kepada perlembagaan berbentuk Islam. Atau mungkinkah kerana kebiasaan pemimpin PAS yang cakupnya tidak serupa bikin? Seperti mana yang selalu dilakukan mereka hari ini. Mereka mengakui ingin menyatukan ummah tapi dalam waktu yang sama mereka juga yang menimbulkan perpecahan dikalangan ummah?

Di dalam perlembagaan negara dan undang-undang, adalah tidak menjadi kesalahan parti-parti politik meneruskan perjuangan menurut garis-garis panduan perlembagaan, iaitu asal tidak menimbulkan huru hara dan seumpamanya. Apakah memisahkan Melayu dengan Islam bukan satu kesalahan? Kalau kita selidiki secara halus PAS menanamkan semangat kebencian rakyat terhadap Perdana Menteri dan kerajaan yang berjuang atas

landasan-landasan nasionalisme Melayu yang berlandaskan Islam. PAS mahukan kerajaan Islam. Semangat asabiah ditentang oleh PAS habis-habisan. Kalau Melayu dengan Islam sudah dipisahkan, bagaimana? Apakah Melayu dalam semangat 46 sama dengan Melayu Islam dalam PAS?

Sekiranya benar kerjasama 46 dan PAS ini akan berlaku maka perbuatan mereka ini lebih berbahaya lagi dari mengadakan huru hara secara demonstrasi atau revolusi senjata. Ini kerana indoktrinasi benci pada pemimpin tanpa bukti-bukti serta kononnya hanya mereka saja akan menjadikan rakyat di negara ini baik. Perbuatan manusia yang tak bertanggungjawab akhirnya akan menyebabkan rakyat hilang keyakinan dan kasih sayang pada pemerintah, hilang perasaan taat setia pada pemimpin dan negara. Jika ini terjadi keadaan dalam negara akan menjadi huru hara sepanjang zaman. Akhirnya rakyat sanggup berkerjasama dengan siapa saja musuh negara asal mereka dapat mengambil alih pemerintahan negara.

Semangat 46 juga menanamkan semangat yang sama kepada sekelian rakyat. Semangat kebencian yang ada dalam diri mereka terhadap Mahathir supaya mereka puas. Mereka tak peduli masalah pribadi mereka boleh menimbulkan huru hara dengan menanamkan semangat '**Kesedaran Nasionalisme palsu**' yang mereka tanamkan sebagai wadah perjuangan.

Serpihan bukan satu benda yang hina. Singapura juga adalah serpihan dari Malaysia. Jepun serpihan

dari China. Australia serpihan dari Great Britain. Parti Gerakan berjaya memerintah Pulau Pinang. Kerusi mereka kurang dari kerusi UMNO. UMNO memenangi 12 kerusi tapi kita jangan lupa DAP mempunyai 10 kerusi, MCA 3 dan Gerakan 8. Sekiranya MCA, DAP dan Gerakan bersatu apa akan jadi jika mereka tuntutan Pulau Pinang, sebagai mana bebas tuntutan kerusi Ampang Jaya untuk orang Melayu kerana majoriti undi adalah kepunyaan orang Melayu.

Gandingan PAS dan Semangat 46 akan membuat bangsa Melayu jadi lemah seperti yang telah berlaku diatas umat Arab di Palastin, Lebnon, Iraq dan beberapa buah negara lagi. Pada hal sekarang ini Iran dan Iraq sudahpun bersatu walaupun kesan peperangan terlalu buruk kepada rakyat dan negara mereka sendiri. **Sesal dulu pendapatan, sesal kemudian tidak ada gunanya.**

Masa itulah akan berlaku bangsa Melayu yang mempunyai ramai bilangan kepala manusia Melayu yang akan menjadi mangsa kaum atau bangsa yang bangun di negara ini dengan tujuan untuk menakluki bangsa Melayu dan tanahair orang-orang Melayu. Buat masa ini kita tidak mengetahui bangsa mana, tetapi kita tidak dapat menafikan akan adanya bangsa itu.

Jangan kita fikirkan kerana ramai orang Melayu sudah jadi Menteri dan Timbalan menteri, ini bererti orang Melayu telah berkuasa. Begitu juga bila kita lihat ramai orang Melayu telah menjadi kaya raya dan ramai orang Melayu mempunyai



kedudukan istimewa, maka kita pun tidak lagi perlukan kepada perpaduan. Kita boleh bergaduh dan bermusuh sesama sendiri. Kita mesti ingat tidak banyak benda yang boleh membanggakan bangsa Melayu walaupun sudah ada yang berjaya di banyak bidang. Apakah kita semua sudah cukup kuat hingga boleh hidup dengan bebas tanpa memerlukan kaum-kaum lain di negara ini? Berapa orangkah daripada golongan serpihan yang hidupnya kaya raya? Yang kita tahu kebanyakan dari pengikut golongan serpihan masih hidup dalam kemiskinan, yang kaya raya cuma bekas Menteri-Menteri Besar, Menteri dan oppturnist di keliling menteri.

Kita harus membina sebuah bangsa yang bermaruah tinggi. Tetapi kalau kita sesama sendiri - orang Melayu dengan orang Melayu tidak bersatu padu, bagaimana mahu mencapai, maruah yang tinggi itu. Kalau serpihan mahu dan sanggup bergabung sesama serpihan, kenapa tidak sahaja kita kembali kepangkuan ibu? Pesan orang tua-tua *Sesat dihujung jalan kembalilah kepangkal jalan.* Marilah kita belajar dari Datuk Asri. Beliau sedar bahawa P.A.S adalah serpihan UMNO yang telah melahirkan Hamim. Kenapa terus hidup ber-serpihan? Kenapa tidak kembali kepangkuan Ibunda UMNO? Perderhakaan terhadap ibu ada batas dan had waktunya.

Maka, golongan muda di dalam UMNO, PAS dan lain-lain harus memikirkan hal perpaduan ini dan memandangnya lebih penting dari segala-

galanya. Dari pada memikirkan sebuah kerusi di Ampang Jaya, bukankah lebih baik mereka bimbing umat Islam ke jalan Allah. Ramai umat Islam yang sesat hari ini. Siapakah yang dapat menunjukkan mereka kejalan yang benar kalau bukan para alim ulamak? Jangan ajar umat Islam mencintai PAS dan pemimpin dulu. Perbuatan macam itu serupalah macam kakitangan MAS diudara yang sambil berkerja mahu jual keropok di udara.

PAS juga harus melihat kembali peranannya dalam politik Malaysia. Kita tahu ada banyak cakap-cakap PAS yang bukan sahaja menyeleweng dari akidah perjuangannya sendiri, malah cakap-cakap semacam itu tidak mencerminkan keislaman yang sepatutnya menjadi tujuan perjuangan PAS itu sendiri.

Usia PAS lebih kurang sama dengan usia UMNO asal yang sudah mati. PAS yang sepatutnya sudah sebegini lama hidup, sudah pun matang dan dewasa. Parti tersebut sudah lebih dari boleh menjadi '*alternatif*' kepada kepimpinan politik Melayu. Kalau kita tak suka UMNO kita boleh undi PAS dan pastikan PAS dapat membentuk sebuah kerajaan. Ini samalah macam rakyat Amerika memilih samada Republican atau Demokratik. Tapi sayang, masa 36 tahun dalam kancah politik hanya mengajar PAS menjadi '**The big boy of the game**' dan bukan '**The matured learned man**'.

Pengundi-pengundi Melayu yang biasa memangkah untuk Perikatan ataupun Barisan Nasional, rata-rata masih lagi ragu-ragu untuk memberi-

kan mandat mereka kepada PAS. PAS mendakwa UMNO bukan sebuah parti Islam. Tapi adalah ironi bagi orang Islam tidak memberikan sokongan kepada sebuah parti yang mendakwa ianya mendokong ideologi Islam. Tidakkah orang-orang PAS memikirkan akan ironi ini?

Saya tidak fikirkan pemuda-pemuda Melayu yang menganut agama Islam sanggup membinasakan bangsa dan memusnahkan keunggulan agama Islam atau memandang agama Islam seperti orang-orang Islam memandangnya, semata-mata kerana sayangkan parti dan sayangkan nama dan kuasa yang diberikan oleh parti.

Begitu juga golongan muda di dalam parti yang memperjuangkan Islam. Janganlah menggunakan agama untuk menghancurkan orang-orang sendiri atau bangsa sendiri seperti yang salalu dilakukan oleh Ustaz Ibrahim Azmi dari gerombolan 46 di dalam ucapan-ucapannya. Ini kerana agama Islam tidak mempunyai ruang bagi para penganutnya melakukan demikian. Islam menyeru seluruh manusia berpegang kepada tali atau perpaduan yang dikehendaki oleh Allah.

Allah berfirman dalam Al-Quran: 'Al-Imran 103.

**Dan berpeganglah kamu semuanya kepada tali agama Allah, dan janganlah kamu bercerai berai, dan ingatlah akan nikmat Allah kepada kamu ketika kamu dahulu bermusuh-musuhan, maka Allah menjinakkan antara hatimu, lalu menjadikan kamu kerana nikmat Allah orang-orang yang bersaudara.**



Perjuangan Semangat 46 dan PAS tidak akan memberi apa-apa erti kepada bangsa Melayu yang berpegang teguh kepada agama Islam selagi mereka terus meniup api sengketa dan beradu dumba di antara sesama orang-orang Melayu semata-mata kerana kepentingan mereka.

Ini kerana Allah SAW menjadikan manusia sebagai khalifah dimuka bumi ini. Jadi sebagai khalifah yang berakal, mereka sepatutnyalah menggunakan akal fikiran untuk sama-sama mentadbirkan bumi yang telah diamanahkan oleh Allah SAW ini.

Lagi pun setelah Allah SAW menjadikan langit dan bumi serta seluruh makhluk, Allah telah bertanya, siapakah yang sanggup untuk mentadbir dunia ini. Kesemua makhluk tidak sanggup kecuali manusia. Lalu Allah utuskan manusia sebagai khalifah Allah dimuka bumi ini. Lantaran dari itu Allah telah memulia dan mengutamakan manusia dari makhluk-makhluk lain. FirmanNya yang bermaksud:

**Dan sungguh kami telah memuliakan anak cucu Adam dan boleh kami sediakan juga bagi mereka kenderaan di darat dan di laut serta kami berikan bagi mereka rezeki yang baik-baik dan kami berikan pula kepada mereka kelebihan yang lebih utama dari kebanyakan makhluk yang telah kami ciptakan.**

Tapi kenapakah manusia dimuliakan dari makhluk-makhluk yang lain? Untuk menjawab

soalan ini, kitra cuba baca satu kisah yang dialami oleh Amar bin Kaab dan Abi Hurairah r.a.

Suatu hari mereka telah mendatangi Rasulullah dan menanyakan kepada baginda, **Wahai Rasulullah, siapakah yang paling alim lagi berilmu?**

Nabi SAW menjawab, **Orang yang berakal.**

Mereka pun bertanya lagi, "Siapakah orang yang paling beribadah?"

Beliau menjawab, "Orang yang berakal."

Mereka bertanya lagi, "Siapakah orang yang paling utama?"

Nabi SAW menjawab, "Orang yang paling berakal. Tiap-tiap sesuatu itu mempunyai kaum, dan setiap kaum itu mempunyai pemimpin, dan pemimpin orang yang beriman ialah akalanya. Tiap-tiap kaum itu mempunyai tujuan dan tujuan pokok bagi para hamba ialah pada akalanya."

Oleh itu kita kenalah bersyukur sebab Allah SAW telah memberikan kita akal sehingga menempatkan kita menggunakan akal yang telah diberikan oleh Tuhan itu bukan mencari jalan bagaimana hendak menggugat pemimpin kita dan menimbulkan segala macam huru-hara di dalam negara kita sendiri. Jadi kiranya kita tak faham apakah yang pucuk pimpinan sedang lakukan bagi memajukan negara kita, maka eloklah kita berdiam sahaja. Kalau kita tidak berbuat begitu, nanti para iblis dan syaitan akan masuk menggoda hawa-nafsu dan akal kita.

Dari Aisyah r.h.a. Rasulullah SAW bersabda:

**Akal itu sepuluh bahagian; lima bahagian tampak kelihatan dan lima bahagian tidak kelihatan.**

**Lima bahagian yang tampak kelihatan itu ialah diam. Barangsiapa diam, maka selamatlah dia dan barangsiapa yang banyak bicaranya, maka banyaklah salahnya.**

**Keduanya sabar, ketiganya merendahkan diri (sopan). Barangsiapa yang merendahkan diri, maka diangkat oleh Allah. Keempatnya menyuruh dengan kebaikan dan melarang yang mungkar. Kelimanya ialah berbuat baik.**

**Bentuk yang tidak kelihatan ialah berfikir, memberikan ibarat atau teladan atau pengajaran, menganggap perkara besar terhadap dosa, takut kepada Allah, merendahkan hawa nafsu dan mengalahkannya.**

Bagi membatasi diri masing-masing dari terus bersengketa, terus menabur fitnah dan terus menagak tanjak masing-masing, jalan yang paling baik ialah kembali kepada Al-Quran, kerana Al-Quran sahaja sebaik-baik tempat kembali. orang-orang UMNO mesti belajar dari pemimpin-pemimpin serpihan supaya sentiasa bersatu padu, tegas, berani, mengorbankan wang ringgit dan masa untuk memberikan kemenangan kepada calon-calon mereka yang mahu bertanding. Mereka tentang Mahathir habis-habisan hingga menampakan seolah-olah mahu pergi menemui Tuhan dan ber-



tanya kepada Tuhan, kenapa Tuhan jadikan Mahathir ini Perdana Menteri Malaysia? Kenapa Tuhan tidak mahu tukarkan Mahathir ini dengan salah seorang pemimpin serpihan?... Astaghfirullahilazim. Apakah kita semua terlupa bahawa Allah bersifat Maha Mengetahui. Allah memilih dan meletakkan siapa sahaja yang Allah berkenaan untuk dijadikan para rasul, para nabi dan juga Ulil Amri bagi satu-satu negeri. Maka bagi mereka yang beriman hendaklah taat kepada Allah, taat kepada Rasul dan taat kepada Ulil Amri kerana ini adalah perintah Allah.

Wabillahi taufik wa I hidayah.

Wassalamualaikum Warahmatullah hi wabarakatuh.

Nota: Rencana di atas adalah rencana yang telah tersiar dalam akhbar Mingguan Kota keluaran 8, Jan. 1989 di bawah tajuk 'Pemimpin 46 Dan Anggota Pas Di Tangkap Basah'. Terima kasih kepada Mingguan Kota.

*Pesan ayah,  
ikutlah resmi ikan  
di laut,  
mempunyai prinsip  
hidup yang tidak  
berubah walau ke  
laut mana ia  
pergi. Dagingnya  
tetap tawar, Tidak  
diizinkan dirinya  
terpengaruh  
dengan alam  
sekitar. Jangan  
jadi seperti  
sesumpah, di  
mana ia berada di  
situ berubah  
mengikut warna  
dan corak  
kelilingnya ...*

Oleh Jalilah Abdullah  
(AN NASIHAH JANUARI 89)



Media yang tidak berusaha melaksanakan cita-cita Islam hanya menjadi punca kepada krisis yang berlaku dalam masyarakat.

Wartawan haruslah menyedari peranan mereka dan sentiasa berusaha mencari keredaan daripada Allah".

Fatwa oleh:

Ustaz Hassan Salleh,

Naib Yang Dipertua

Persatuan Ulama Malaysia (PUM)

Ustaz Hassan Salleh sebelum kempen untuk Datuk Harun Serpihan Ampang macam berkata begini, "Ana boleh tolong sama ente Datuk. Tapi itu tanah seratus ekar Kerajaan Selangor bagi Datuk berilah sikit sama ana dan Subky Latif, ana buat tapak rumah. Kerana kalau tidak, kami ulamak ada hubungan dengan Akhbar".

Ustaz Ibrahim Azmi 46 ini nampaknya macam tak percaya dengan ulamak-ulamak PAS kerana diapun ulamak yang lebih kurang macam mereka juga sama-sama menentang kerajaan yang dipimpin oleh orang Islam. Apakah mereka tidak anggap Dr. Mahathir dan ahli UMNO itu Islam? Tiga power broker diatas bersama Datuk Harun semuanya Ustaz dan ulamak politik.






"Dengar sini ... dengar sini ... Depan saya ... ini Haji Yahya Ismail ulamak politik kaum serpihan Yahya penulis upahan. Dulu dia sokong saya kerana saya berkerjasama dengan puak-puak serpihan. Sekarang bila saya masuk UMNO tak sokong Ku Li, Pak Ya marah saya. Ada ke patut penulis yang ada M.A. dari MONACH buat macam ini."

"Jangan macam tu Brother. Dulu kata Mahathir diktator. Lu baru jadi Ketua Satu Pena, ahli seumur hidup Pena lu pecat. Nasib baiklah lu punya kuda tempang kalah di Ampang".



Subky Latif tidak terima cara orang skular. Namun Subky hidupnya dua kali lima macam orang yang tidak disenanginya. Berhadapan dengan orang PAS dia pakai kufiah dan berkain. Di depan orang Melayu ulamak politik ini suruh pengundi Melayu undi Datuk Harun, kerana sebangsa dan seagama. Didepan pengundi Cina Subky kata "Cina Melayu macam abang adik mesti kerjasama. Lu caya gua, gua caya lu". Sama orang PAS ana caya ente, ente caya ana.

Pemimpin PAS yang tidak boleh tahan dengan Dr. Mahathir ini pertama, mereka tidak pernah tengok Mahathir berpoya-poya dengan betina, dari kelab malam ke disko. Kedua, mereka tak tengok Mahathir main judi. Mereka tak pernah tengok Mahathir minum arak. Tapi selagi mereka tak berpakat dengan 46 dan DAP, Mereka tak boleh jatuhkan Mahathir. Itulah delima mereka sekarang ini.




Apakah ustaz Fadil Nor tidak tahu cara hidup kebanyakan para pemimpin kaum serpihan yang suka kehidupan yang bermewah-mewah dan berseronok-seronok? Di mana konsep PAS yang menegakkan Amal makruf nahi munkar?





"Alangkah enak si mangga udang, pohonna tinggi, pohonna tinggi, buahnya jarang. Alangkah enak jadi orang bujang, sayang. Ke mana-mana, ke mana-mana tiada yang larang." Itu serangkap pantun untuk Ku Li. Tapi Ku Li kena ingat nak jadi Perdana Menteri dalam sebuah negara Islam tak boleh macam itu. Malaysia belum boleh terima Perdana Menternya seorang yang bujang.



"Ini semua patik punya pasal Ku, patik duduk satu meja sama pemimpin DAP, kerana patik punya pasal nama kaum serpihan sudah busuk. Orang Melayu tak percaya pada kaum serpihan. Tunku Abdul Rahman pun ada kata, kalau kita kalah kita mampus ..... Ini bau bangkai atau kentut siapa yang busuk?" begitulah agaknya kata Rais Yatim. Ku Li dan Abdullah Ismail nampaknya macam terhidu sesuatu yang busuk.



# POLITIK TANG-TANG TUT DALAM PARLIMEN

*'Hai orang-orang yang beriman, jika datang kepada kamu orang fasik membawa berita, maka periksalah dengan teliti agar kamu tidak menimpakan suatu musibah kepada satu-satu kaum tanpa mengetahui keadaannya yang menyebabkan kamu menyesak atas perbuatan itu'*

Datuk Harun Idris, bekas Menteri Besar Selangor mengaku ada menerima 100 ekar tanah, anugerah kerajaan negeri Selangor. Beliau juga mengaku menerima wang sebanyak \$230 ribu ringgit selepas Dr. Mahathir mendapatkan pengampunan untuk beliau.

Harun menafikan beliau menerima \$1 juta seperti yang dikatakan oleh Datuk Mohd Rahmat, Setiausaha Agung UMNO yang dilaporkan oleh akhbar-akhbar.

Cuba Datuk Harun congak berapa banyak yang beliau sudah terima dalam tempuh 15 tahun dari saat beliau diampunkan sehingga hari ini. Pencen Menteri Besar \$4,000; pencen Penasihat Undang-Undang, katakan \$2,000. Ini bermakna sudah ada \$6,000 sebulan. Jadi kalau 15 belas tahun sudah ada \$1,080,000. Itu belum masuk elaun yang



diterimanya sebagai Pengerusi KUBB dan Talasco.

Datuk gua caya sama lu. Betul lu sudah terima \$230 ribu ringgit. Lu caya tak sama gua? Gua sikit mahu cerita. Kalau lu betul-betul lu kira itu wang yang lu sudah terima sesudah Dr. Mahathir dapatkan pengampunan untuk lu itu wang yang lu senyap-senyap dapat punya. Mana lu dapat Tuhan Allah saja tahu, tapi itu wang tentu lebih dari satu juta, betul tak?

Mungkin pada Datuk wang itu tak sebanyak mana kerana Datuk orang kaya, bukan wang yang dipersoalkan di sini, jasa baik Perdana Menteri pada Datuk. Jasa bangsa Melayu pada Datuk. Jasa raja kerana sanggup mengampunkan seorang banduan Peribahasa Inggeris ada mengatakan **Do not look at a gift horse by the mouth**. Hargailah pemberian orang, jangan bertanya harga barang yang diberi pada kita?

Apakah tanah seluas 100 ekar masih belum cukup. Kalau dijual tanah itu tentu harganya bernilai berjuta ringgit. Kalau Datuk benar-benar mahu memperjuangkan nasib setingan berikan tanah yang sepatutnya jadi milik rakyat pada rakyat yang memerlukan tanah. Lagi pun tanah itu asalnya nak diberikan pada rakyat akhirnya rakyat yang tak punya tanah gigit jari. Cuba Datuk terangkan macam mana Datuk yang kaya boleh dapat sampai 100 ekar tanah. Orang Melayu lain nak dapat secebis tanah nak buat pondok di atas tanah haram sikit punya seksa. Antara Datuk dan Dr. Mahathir siapa lebih zalim? Datuk dapat

gelaran Bapak Setingan. Perdana Menteri kitakan macam Bapak **'Stand Gun'**, kejam, zalim pada rakyat. Siapa sebenarnya Bapak Stand Gun?. Siapa sekarang yang jadi mangsa Datuk?

Walaupun Datuk Harun tak duduk bersama para setingan, Datuk Harun duduk di banglo yang macam istana yang bernilai berjuta-juta ringgit siap dengan kolam renang dilereng bukit di Damansara. Namun Datuk masih tetap disayangi oleh rakyat kerana ada rakyat yang pernah dapat sesuatu dari Datuk tetapi tidak dengan semua penduduk Ampang Jaya. Berapa ramai yang berjuang untuk Datuk akhirnya habuk pun tak ada. Tapi perjuangan punya pasal dapat syok sendiri, jadilah ....

Anak Datuk, Mazlan jadi Wakil Rakyat, anak angkat, Fahmi jadi Wakil Rakyat. Dulu mereka jadi EXCO Kerajaan Negeri dan sekarang mereka dah jadi kaya-raya. Ini balasan kerajaan pada keluarga Datuk, tak cukup lagikah?

Duit dan harta yang banyak serta jawatan-jawatan penting dalam koporat ini bukan semua orang boleh dapat. Hanya orang tertentu sahaja yang boleh dapat. Andai kata Harun tidak menerima pengampunan, bolehkah Datuk Harun dapat kemewahan-kemewahan yang macam ini.

Bapak Setingan tak sepatutnya menyusahkan penduduk setingan tapi kerana mahukan kerusi mahukan kuasa jadi Bapak Stand Gun pun sanggup. Hari ini orang Melayu yang miskin, yang jujur merasa bingung antara mengenang jasa Datuk yang sudah dibalas atau nak berikan undi mereka pada



kerajaan? Datuk tahu sajalah orang Melayu ingatan mereka sengkat dan mereka cepat lupa sejarah. Mereka tidak ingat lagi kisah Bank Rakyat macam mana hingga hari ini penyimpan tak dapat apa-apa. Nasib baik kerajaan tolong kalau tidak Bank Rakyat dah tutup akibat politik Datuk.

Maka orang Melayu jadi susah. Gajah sama gajah berlawan yang tersepit lepas pilihanraya mereka juga. Datuk akan menghilang. Sama ada menang atau kalah, yang tanggung segala beban ialah penduduk di Ampang Jaya juga. Keluarga berpecah belah, jiran sama jiran tidak bertegur lagi disebabkan fahaman yang berbeza.

Dah tua-tua ini Datuk Harun patutlah belajar bersyukur pada nikmat yang Tuhan sudah berikan. Dah tua-tua ini nak berjuang apa lagi? Kalau Datuk betul-betul nak berjuang, perjuangkanlah nasib pelabur-pelabur dalam KUBB. Betulkan KUBB sebagaimana yang diamanahkan kepada Datuk. Tapi kalau amanah yang macam itu pun Datuk tak boleh buat betul-betul, macam mana nak betulkan rakyat.

Dah tua-tua ini patut benda-benda politik macam ini Harun tak main lagi. Lainlah kalau Harun Idris macam Omar Mokhtar pahlawan Libya. Ia berjuang menentang penjajah hingga sanggup ketali gantung, tak harapkan apa-apa dan tak dapat apa-apa pun. Orang muda yang ada ideologi bolehlah jadi pejuang. Datuk berjuang bukan ada ideologi. Di Turki dulu pun orang-orang muda yang berjuang dalam politik yang mencetuskan revolusi



mereka tak jual nama, tak ungkit jasa-jasa. Itulah sebabnya mereka digelar the 'Young Turks'.

Dalam sejarah dunia mana ada orang-orang tua yang melibatkan diri dalam perjuangan seperti mana yang terdapat di kalangan para pemimpin Semangat 46. Kalau ada pun mungkin cuma Perdana Menteri negeri Cina Deng Xhao Peng orang tua yang tak cukup ukur sehinggakan kelam kabut negeri China akibat permainan politiknya, dan Rasputin di Rusia. Tapi Rasputin ialah jenis manusia tiga suku. Sebab itulah orang Rusia menggelarnya '**The Mad Monk**'. Rasputin mintak macam-macam benda dari Czar. Harun tak payah mintak apa-apalagi sebab kerajaan dah bagi dia macam-macam. Jadi janganlah gigit tangan yang menyuapkan makanan. Sebagai orang tua Harun kenalah tunjuk contoh yang baik-baik untuk jadi ikutan anak cucu kita nanti.

Junjungan Nabi kita Muhamad SAW semasa menjadi rasul, baginda berumur 40 tahun. Syaidina Abu Bakar, sahabatnya berumur 38, Syaidina Umar berumur 36 dan Syaidina Ali adalah yang termuda di antara mereka dan Rasulullah wafat ketika berumur 63 tahun. Hanya orang yang berfahaman barat saja yang beranggapan kehidupan bermula sesudah umur 40 tahun.

Muammar Ghadafi semasa menjadi Presiden Libya berumur 29 tahun. Mustapha Kamal Atarturk yang menjadi keagungan orang Turki adalah pejuang muda hingga timbul perkataan **The Young Turks**.

Paling anih dan sungguh pelik. Sepatutnya yang menjadi pejuang adalah orang muda-muda belaka yang di bawah umur 40. Orang-orang yang dikatakan **The Angry Young man** tapi di negara kita ini pelik sedikit, orang-orang tua-tua yang sudah uzur yang mempunyai bermacam-macam rekod yang nak balik jadi muda. Inilah yang dikatakan **The Sick Old Man** bukan **The Old Guard**. Ini lebih kurang macam 'the half-past six old man' atau seperti kata peribahasa Melayu, 'Tua-tua keladi ....

Disebabkan orang tua-tua dalam Semangat 46 yang sudah frust mahu kembali berkuasa, maka orang Melayu sibuk bergaduh sesama sendiri, lupa anak bini, lupa kerja, lupa Tuhan ini pasal apa? Apa benda ni? Budak-budak gaduh sekejap baik semula. Orang tua gaduh sampai bila pun tak boleh maaf dan tak boleh lupa. Dia kata orang buat dia. Dia buat orang tak apa.

Terjadinya kekecohan dalam negeri hari ini adalah disebabkan adanya golongan pemimpin-pemimpin bekas-bekas (YB dan YAB) yang sudah menjadikan diri mereka kaum serpihan. Dulu dapat duit, joli sana joli sini, pakai beberapa biji kereta mewah, duduk rumah mengalahkan istana, tapi semuanya berhutang dengan bank. Bila rumah nak kena lelong, syarikat nak kena tutup, minta lagi bantuan daripada kerajaan. Kerajaan di bawah pimpinan Dr. Mahathir tak suka kerja-kerja mem-bazir ini. Kerja-kerja mem-bazir ini lebih kurang macam kerja syaitan. Ini kerja Dr. Mahathir tak

main.

Sekarang mereka tidak mahu taat pada kerajaan mereka sendiri. Mereka hari-hari meludah ke langit, air ludah jatuh ke atas muka sendiri. Muka makin lama makin bacin. Tidak boleh dinafikan apabila ada dua pihak yang sedang atau yang mahu bertelagah, maka akan datanglah syaitan untuk menjadi penasihat kepada salah seorang atau kedua-dua sekali. Arfdainya pertelingkahan itu merupakan pertelingkahan politik, maka syaitan akan mengambil peranannya sebagai penasihat politik. Para penasihat yang kini mendapat gelaran ulamak politik inilah yang membuat angkara hingga melibatkan orang lain yang tak berdosa pun turut menjadi mangsa mereka.

Syaitan memang suka menghasut dan menggoda manusia supaya melakukan kemungkaran seperti berzina, minum arak, main judi, dan menjadi penderhaka dan petualang. Syaitan akan terus menerus menggoda muslimin dan muslimat, menghasut kaum mukminin dan mukminat supaya meninggalkan fardhu ain, melupakan ibadat fardu kifayah dan digalakkannya pula manusia bergelumang dengan noda dan dosa peribadi. Selain dari itu, membuat pula dosa kering dengan menyusahkan orang ramai supaya bergaduh sesama sendiri kerana kepentingan politik mereka.

Saya suka kalau ada calun penentang dan pencabar kerajaan yang baik, yang rekodnya bersih, yang ada perjuangan tapi janganlah calon yang sudah ada macam-macam rekod. Orang lepas



aksiden ini tahu-tahu sajalah, besuk nak bercakap dalam parlimen orang timbulkan itu dan ini, yang sakit jiwa diri sendiri juga.

Satu lagi yang saya sedih ialah melihat Bapa Malaysia atau Bapa Merdeka yang mereka agung-agungkan. Orang tua itu sudah uzur, terlalu uzur. Kalau bapak kucing saya di rumah, saya tak benarkan anak dan cucu saya berkasar dengannya. Inikan pula orang tua yang sudah banyak berjasa. Kenapalah orang-orang Semangat 46 ini tak berperikemanusiaan buat aniaya orang tua itu macam itu sekali. Usung sana usung sini. Jadi yang kena lanyak dengan kata nista Tunku yang sudah tua itu juga.

Saya rasa Tunku ini seolah-olah macam kena blackmail (poshitam). Ini adalah bahaya punya kerja yang dilakukan oleh orang-orang tertentu. Maklum sajalah Tunku seorang bekas Perdana Menteri yang banyak rahsia yang tersimpan didada. Mana tahu takut terdedah, jadi Tunku terpaksa buat dan ikut saja apa yang disuruh oleh mereka.

Beliau hendak mati dalam kemuliaan sebagai seorang negarawan tapi mana tahu ada orang yang menyimpan rahsia dan menakut-nakutkan Tunku. Kalau Tunku tak ikut cakap mereka, nanti Tunku juga sendiri yang susah. Lagi banyak rahsia yang akan terbongkar. Tambahan pula, Tunku sudah biasa berbohong semasa menjadi Perdana Menteri dulu. Diantaranya, sejarah Mahsuri di Pulau Langkawi itu sendiri. Kalau kita semua tak tolong Tunku, mereka akan dedahkan lagi rahsia Tunku,

mana tahu mengenai Singapura. Sekarang kita lihat pasal Genting Highland yang diluluskan oleh Tunku sudah mula terbuka ke pengetahuan umum.

**Rakyat yang sayang pada Tunku tidak akan berikan kemenangan pada Harun kerana Harun menang Tunku akan terus diusung atas upeh kesana kemari.**

Saya harap mereka yang ada kuasa bantu dan lepaskan Tunku dari aniaya yang sedemikian rupa. Tak patut orang setua ini disuruh berkerja lagi. Ini satu kezaliman. Sepatutnya pertubuhan hak asasi manusia ambil tindakan terhadap kaum serpihan yang menggunakan orang tua begini suruh pergi cari makan untuk mereka. Kalau pun betul nak berperang, carilah orang muda-muda suruh sokong Harun. Di Melawati orang ramai marah pada Tunku. Makin lama makin buruklah nama negarawan kita yang dulu kita agung-agungkan sebagai **Bapa Merdeka**.

Ini semua pasal tak syukur nikmat, tak mahu terima perintah Allah. Mereka kalau boleh terus nak jumpa Tuhan, suruh Tuhan buang Dr. Mahathir, dan gantikan dengan orang-orang mereka seolah-olah kaum serpihan ini jauh lebih mulia dan lebih baik dari Dr. Mahathir. Dan kononnya perjuangan ini adalah kerana menentang kemungkaran yang diperintah oleh Allah dan Rasul. Begitulah marahnya mereka pada Mahathir hingga terlupa batas-batas serta etika peperangan. Pada hal Allah sendiri tidak menyuruh umatnya berperang begitu sekali.

*“Berperanglah di jalan Allah melawan mereka yang memerangi dan janganlah kamu melampaui batas, sesungguhnya Allah tidak suka kepada orang yang melampaui batas.”*

*(Surah al-Baqarah: 190)*

Memilih pemimpin satu-satu negara hak Tuhan. Kita ini hamba Allah, bukan rakyat Tuhan yang boleh undi-undi tukar Tuhan lain kalau kita tak suka. Tuhan boleh rampas apa saja yang kita ada termasuk nyawa dibadan kita. Ingat-ingat sikitlah pada Tuhan. Jangan ikutkan sentimen politik hingga keterlaluan.

Kebesaran dan kekuasaan Tuhan adalah benda yang kita tidak boleh persoalkan kerana kita adalah hamba yang tidak mempunyai apa-apa kuasa. Tuhan boleh jadikan orang yang terkaya di dunia dari negara yang terkecil, contohnya Brunei. Kalau dibandingkan Brunei dengan negeri yang besar-besar, Brunei Darul Salam seperti satu titik di peta dunia. Tapi rajanya Sultan Hassanol Bolkiah adalah orang yang terkaya sekali didunia. Tengoklah Sultan dan kerabat baginda tidak payah berkerja, tak payah cermat, tiba-tiba jadi kaya, itu kehendak Tuhan dan satu cubaan baginya.

Begitu juga orang nombor dua terkaya di dunia, Al Malek Fahad. Bukan dia yang bekerja, yang kerja tukang kebun, pengawal, tukang masak, pemandu kereta, kerani dalam istananya. Tapi mereka ini tidak juga senang dan mewah. Orang yang kaya, kaya kerana Tuhan nak berikan kekayaan padanya bukan perlu pandai rajin dan baik.



Tuhan jadikan mereka raja. Tuhan berikan kemuliaan, Tuhan berikan kekayaan, berikan kuasa macam yang diberikan kepada Ratu Elizabeth. Baginda Queen adalah salah seorang dari sepuluh manusia yang terkaya didunia.

Segala-galanya berlaku kerana semua ini adalah hak Tuhan yang tidak boleh dipersoalkan oleh manusia.

Apa nak jadi dengan kaum serpihan? Nak berpolitik, berpolitiklah. Janganlah sampai nak soal hak Tuhan pula. Adalah hak Tuhan untuk memilih siapa saja yang Allah suka untuk menjadi Perdana Menteri kita dan untuk tempuh selama mana yang Tuhan suka. Apakah mereka terlupa apa yang terjadi pada iblis dengan egonya, tak mahu sujud pada Adam kerana iblis rasa iblis lebih mulia dari Adam. Iblis yang dijadikan lebih dulu dari manusia dari cahaya api, lagikan Tuhan keluarkan dari syurga, inikan pula manusia yang dijadikannya dari tanah.

*“Wahai manusia! Sesungguhnya kami jadikan kamu dari seorang lelaki dan perempuan, dan Kami jadikan kamu berbangsa-bangsa dan berkaum-kaum dengan tujuan supaya kamu berkenal-kenalan (bersefahaman). Sesungguhnya yang lebih mulia di antara kamu pada sisi Allah, ialah orang yang lebih taqwa.”*

*(Surah al-Hujurat: 13)*

Insaflah sikit, sedarlah sikit, beristiqfarlah sikit, selagi pintu taubat masih terbuka. Semuga Tuhan ampunkan dosa kita. Cukuplah dosa berbohong dan berdusta sebagai ahli politik Tuhan sudah tidak

beri laknat pada mereka sudah baik. Jangan nak persoalkan kekuasaan Tuhan pula. Bukankah sifat Tuhan itu Maha Mengetahui.

Kaum serpihan dan para penyokong calon bebas janganlah nak tunjuk perasaan dan marah pada Tuhan. Cukuplah dimusim pilihanraya, sana sini tampal poster tunjuk terror, tak mahu dengar cakap orang lagi. Kutuk kerajaan, kata zalim. Ada yang baca yasin doa biar Dr Mahathir padam. Terang-terang mengutuk dan mendoakan orang yang sedang sakit biar cepat mati adalah kerja yang tak baik. Nanti Tuhan betul-betul berikan seorang diktator dan kerajaan yang zalim baru sedarkan diri.

Bercakap pasal pilihanraya kita kena cakap sikit pasal gurkha-gurkha yang dijadikan alat dalam pilihanraya ini oleh kedua-dua pihak: kaum serpihan dan kerajaan. Mereka yang berada diatas juga yang untung. Mereka telan kiri kanan duit dari orang yang mahu membantu kemenangan calon mereka. Duit masuk kocek sendiri. Mereka kebas semuanya. Akhirnya gurkha juga yang terseksa dan sengsara.

Gurkha yang bertanggungjawab kerja siang malam, kerja tak betul kena marah. Kalau kena pukul, kena lanyak, kena maki, parti lawan gurkha juga. Boss ambil tiga empat ratus ribu ringgit untuk diri sendiri dan keluarga. Sedangkan gurkha dapat dua tiga puluh ribu ringgit, yang terpaksa dibahagi-bahagikan kepada beberapa orang untuk buat kerja mati-matian demi perjuangan. Boss bisung kata duit

sendiri yang keluar. Gua tak caya lu lah. Lu pun busuk punya kaki lah.

Gurkha-gurkha yang ikhlas, yang percaya pada perjuangan parti tetap taat saja tapi boss-boss. Jangan lupa nanti gurkha naik hot boss tak dapat pungut duit pilihanraya lagi.

Ramai yang tidak tahu bahawa dalam musim pemilihan begini sama ada pilihanraya atau pemilihan pucuk pimpinan parti, yang buat duit mereka yang diatas saja. Yang bersemangat dibawah ini cuma dapat tumpang seronok, berkenal, berkawan dengan menteri-menteri dan bekas-bekas menteri yang kini tiba-tiba baik budi dan baik hati sementara musim pilihanraya. Lepas tu, lu siapa gua siapalah. Sorrylah, gua tak kenal sama lu.

Kalau Tuhan mengizinkan kemungkaran Tuhan tidak buang iblis dari syurga, dari itu berfikirilah, berfikir itu pelita hati,

Sekiranya Harun menang, ini bererti kemungkaran akan berleluasa dan di Parlimen bertambah seorang lagi tukang kentut.

Andaikata Harun Idris menang, Harun boleh buat apa di Parlimen. Bercakaplah dia macam nak gila, macam anjing yang menyalak gunung. Gunung tak akan runtuh kerana sistem demokrasi kita ikut suara terbanyak. Jadi yang menang tetap rakyat kerana kerajaan di Parlimen adalah kerajaan yang dipilih oleh rakyat.

**Government of the people,  
By the people,  
For the people,**



Kita sudah saksikan wakil PAS yang cuma seorang diri saja di Parlimen. Bila dia bercakap Ahli Parlimen anggap macam ada orang terkentut dengan kuat, semua orang toleh memandang.

Kalau sekiranya kentut itu busuk, orang yang tak tahan angkat kaki lari. Orang nanti tanya dia ini makan apa agaknya. Kentut punya busuk bau macam makan bangkai.

Sudahlah Parlimen kita itu selalunya tidak cukup korum bila bersidang, ditambah lagi geng kaki kentut busuk seperti Shahrir kunci yang datang ke Parlimen duduk mencangkung diluar Dewan yang mulia. Ini perangai budak simpang atau budak besar dekat pasar. Perangai yang semacam ini sungguh kelakar. Jadi tak salahlah kalau kita bagi dia gelaran 'Joker of the Year 1988'.

Sekiranya Harun menang, pengundi di Ampang telah menambahkan seorang lagi 'Joker' di Parlimen. Sudah cukuplah joker-joker yang ada dalam dewan yang mulia itu. Janganlah kita tambahkan seorang lagi circus clown (pelawak circus) ditempat yang kita semua muliakan itu.

Ingatlah negara kita bukan sarkis. Oleh itu kita tak perlulah pelawak-pelawak politik dalam negara kita.

Mingguan Kota.

**SYED HUSSEIN ALATTAS**

29hb. January 1988.

(Akhbar di atas telah diterbit dan diedarkan tiga hari lebih awal dari tarikh yang dinyatakan di atas.)

# *Langkah Musa sebagai menyambung wadah perjuangan UMNO – Abdullah*

KUALA LUMPUR 1 Feb. — Naib Presiden UMNO, Datuk Abdullah Haji Ahmad Badawi hari ini menyifatkan langkah bekas Timbalan Perdana Menteri, Datuk Musa Hitam dan rakan-rakannya memperbaharui keahlian mereka dalam UMNO sebagai usaha menyambung wadah perjuangan UMNO 1946.

Ketika dihubungi di rumahnya disini, beliau berkata, penyertaan semula Datuk Musa juga mengukuhkan kedudukan UMNO seterusnya meredakan kecaman yang dilemparkan terhadap UMNO dan pucuk pimpinan parti.

"Malah saya yakin beliau (Datuk Musa) dan rakan-rakannya dapat membantu Perdana Menteri, Datuk Sri Dr. Mahathir dan Encik Ghafar dalam mentadbirkan parti dan negara," jelasnya.

Beliau memberitahu UMNO akan berpeluang meluaskan lagi pengaruh di samping mendapat lebih ramai ahli dengan penyertaan Datuk Musa semula.



Kata Datuk Abdullah lagi, kalau sebelum ini orang-orang Melayu sentiasa berbalah dan bertelingkah sesama sendiri apa yang diharapkan dengan kehadiran lima pemimpin ini dalam UMNO akan mewujudkan suasana muhibah.

KUALA LUMPUR — Setiausaha Penaja Angkatan Semangat '46 Perhubungan Negeri Melaka Haji Mohd. Azam Datuk Abdul Aziz berkata kemasukan semula bekas Timbalan Perdana Menteri Datuk Musa Hitam ke dalam UMNO sememangnya telah diduga.

Katanya, hakikat itu didasari dengan pendirian Datuk Musa selama ini yang 'tenggelam timbul' terutama dalam perjuangan bersama Kumpulan Semangat '46.

Justeru itu, pejuang-pejuang Semangat '46 Negeri Melaka tidak lagi menaruh kepercayaan terhadap kewibawaan Datuk Musa dan kepimpinan beliau tidak dikehendaki lagi.

"Datuk Musa telah menjilat ludahnya sendiri dan apa yang diperkatakan selama ini hanya dusta belaka. Ia semata-mata untuk kepentingan peribadi saja," tegasnya kepada MK.

Menurutnya, sewaktu Ahli Parlimen Kota Tinggi

itu menjadi Ketua Perhubungan UMNO Melaka, beliau tidak berjaya membawa peranan yang diharapkan sebaliknya menimbulkan pelbagai masalah.

Datuk Musa telah membawa masuk beberapa pemimpin yang sehaluannya seperti bekas Menteri Kemajuan Tanah dan Wilayah Datuk Seri Adib



Haji Mohd Azam

Adam, Ketua Menteri Datuk Seri Abdul Rahim Tamby Chik dan beberapa orang pemimpin negeri yang lain.

Katanya, tindakan beliau itu telah tidak disenangi oleh beberapa pemimpin negeri dan menyifatkan ia sebagai permainan politik yang tidak sihat.

Sehubungan itu, Haji Mohd. Azam berkata pemimpin negeri seperti ADUN Sungai Udang Datuk Wira Ahmad Nordin, Datuk Mohamad Jais dan Husin Konel lebih mempercayai kewibawaan Tengku Razaleigh Hamzah dalam memimpin perjuangan Semangat '46.

"Tengku Razaleigh tetap dengan perjuangannya untuk menghakis kemungkaran politik dalam pentadbiran kerajaan pimpinan Datuk Seri Dr. Mahathir Mohamad. Pendirian seperti inilah yang dikehendaki dan bukannya "sekejap ke sana sekejap ke sini," katanya.



**SEGAMAT:** Sikap degil Ketua Kumpulan 46 Tengku Razaleigh Hamzah yang enggan berlembut dan menerima kenyataan perpaduan dari pemimpin UMNO telah membuat Datuk Mûsa Hitam berasa serba salah.

Bekas Timbalan Perdana Menteri itu berkata, sikap Tengku Razaleigh yang terus-menerus menentang kepemimpinan UMNO sehingga mengadakan kerjasama dengan Pas dan DAP membuatnya serba salah.

Katanya, sebagai seorang penyokong kuat kumpulan 46 dan mahu memulihkan UMNO asal beliau tidak mempunyai kekuatan pengaruh di peringkat kebangsaan.

Bagaimanapun, katanya kerana Johor menjadi kubu kuat UMNO asal beliau telah berbincang dengan bekas Perdana Menteri, Tun Hussien Onn supaya memulihkan semangat UMNO asal di Johor.

Katanya, setelah melihat UMNO yang baru ditubuhkan telah jauh tersesat, rancangan untuk membawanya kembali ke pangkal jalan dikemukakan kepada Tun Hussien dengan menganjurkan Perhimpunan Melayu Johor.

"Kerana saya tidak kuat di peringkat nasional, saya terpaksa kembalikan perjuangan me-



*TENGGU RAZALEIGH  
HAMZAH*

mulihkan UMNO asal ke Johor Bahru bagi memulakan usaha mencari perpaduan sesama Melayu," katanya.

Menurut Datuk Musa, beliau tidak mahu orang Melayu bertelagah sesama sendiri kerana perbezaan politik dan berharap semuanya akan bersatu semula untuk meneruskan perjuangan mengukuhkan politik bangsa.

Katanya, perjuangan orang Melayu dan UMNO untuk melaksana dan mengkaji semula Dasar Ekonomi Baru masih belum selesai dan berharap serta mereka berhenti berpolitik seketika untuk menjayakan DEB.

Sehubungan itu, beliau merayu semua orang Melayu supaya jangan segan dan silu untuk membaharui keahlian mereka dalam UMNO dan bersatu semula untuk kepentingan bangsa.

KUALA LUMPUR 1 Feb. — Kumpulan serpihan berharap Datuk Musa Hitam menyertai UMNO secara ikhlas dan jujur, tanpa tujuan merebut jawatan Perdana Menteri.

Orang kuat kumpulan itu yang juga ahli Parlimen Pasir Mas, Haji Ibrahim Ali berkata, "saya harap Datuk Musa masuk UMNO dengan keikhlasan dan bukan kerana melihat Datuk Sri Dr. Mahathir Mohamad sekarang sedang uzur."

Haji Ibrahim yang ditemui di majlis kesyukuran perpaduan ummah anjuran PAS Wilayah Persekutuan di markas PAS Pusat di Taman Melewar juga mengalu-alukan penyertaan Datuk Musa sebagai ahli UMNO bersama beberapa rakan yang lain.

Penyokong kuat Kumpulan Semangat 46 pimpinan Tengku Razaleigh Hamzah itu juga berharap masalah yang berlaku dalam UMNO dapat diselesaikan setelah bekas Timbalan Perdana Menteri itu menyertai UMNO.

Beliau mendakwa, selama ini Datuk Musa adalah punca kepada berbagai masalah yang dihadapi oleh UMNO.

Perpecahan dalam UMNO, menurut Haji Ibrahim berpunca dari perletakan jawatan Datuk Musa sebagai Timbalan Perdana Menteri diikuti rebutan jawatan Timbalan Presiden UMNO, menerima jawatan Ketua Penaja UMNO bahagian Segamat tetapi kemudiannya menolak dan menyatakan tidak akan menyertai UMNO.

"Rekod rekod ini



HAJI IBRAHIM ALI

menunjukkan Datuk Musa telah banyak menimbulkan masalah dan berharap penyertaan itu dibuat secara ikhlas tanpa tujuan merebut jawatan Perdana Menteri dalam keadaan Perdana Menteri sedang uzur," katanya.

Beliau juga berharap masalah tidak lagi berlaku dalam UMNO berikutan tindakan Datuk Musa itu.

## Sikap

Haji Ibrahim juga berkata, penyertaan Datuk Musa itu memang sudah diduga kerana sikap bekas Timbalan Presiden UMNO itu yang tidak menentu atau tidak berpendirian tetap dalam menghadapi isu UMNO.

Beliau juga berkata, penyertaan itu bagaimanapun tidak melemahkan Semangat 46 kerana pilihanraya kecil Ampang Jaya telah membuktikan bahawa orang-orang Melayu memberi sokongan padu kepada calon 46 Dato' Haji Harun Idris.

Katanya, dari kajian

yang dibuat Semangat 46 tewas setelah pihak BN menjalankan berbagai propaganda di saat akhir melalui berbagai saluran termasuk media massa dalam memutar belitkan beberapa isu yang dibangkitkan oleh kumpulan itu.

Isu pertama yang memberi kesan ialah salah tafsiran mengenai apa yang dikatakan kerjasama Semangat 46 dan DAP serta penyebaran kad-kad yang mempunyai gambar Menteri Besar, seolah-olah Datuk Haji Muhammad Mohd. Taib yang bertanding dalam pilihanraya itu.

Di samping itu juga isu mengenai 13 Mei turut menjadikan kumpulan 46 kehilangan undi dari orang-orang Cina.

Sementara itu bekas Perdana Menteri, Tunku Abdul Rahman Putra Al-Haj berkata, beliau kesal dengan tindakan Datuk Musa menyertai semula UMNO.

Beliau berkata, mereka yang menyertai UMNO adalah semata-mata mahu mengejar kuasa.


## senyum kambing

NON JOHARI  
KATA DATUK MUSA  
KEMBALI KE UMNO  
MENYENANGKAN  
KUMPULAN  
'46



KATA2 INI  
HANYA BENAR  
SELAGI TENGGU  
RAZALEIGH SENDIRI  
TIDAK KEMBALI  
KE UMNO





Tengoklah sikit punya handal Datuk Musa Hitam. Nak masuk UMNO mesti diapit oleh empat budak-budaknya. Y.B Taufik Ismail, Y.B. Adam Hamid dan Y.B Kadri Sabran. Kesemuanya bekas ahli UMNO kemudian bebas dan Hamdan Yahya yang kalah di Parit Raja. Beginilah godfather mafia politik Johor.





“Apalah lu Musa...? Gua tak caya lu... Member sendiri pun lu main... Sekejap masuk, sekejap keluar. Lepas tu masuk lagi. Suka betul lu main kerja keluar masuk ini?” Mungkin itulah yang dikatakan oleh Ku Li kepada Musa. Gambar waktu Ku Li jumpa Musa selepas 12 jam Musa masuk UMNO.

“Gua hendak hidup Ku Li. Kalau gua tak masuk dalam, nanti gua juga yang frust. Semangat 46 sudah tidak bersemangat lagi. Daripada mati derhaka baik mati dalam pelukan UMNO betul tak?”

“Lu pandai Musa. Lu memang bijak. Lu tengok Harun sudah kalah, lu cepat-cepat belah. Lu tinggalkan member lu. Lu fikir mudah ke nak jadi Perdana Menteri? Ini bukan satu perkara yang boleh di rancang. Gua dulu lagi patut sudah jadi Perdana Menteri lu tahu? Bukan Dr. Mahathir lepas Mahathir kena belah dia tak mati gua takut lu nanti belah sekali lagi” Mungkin begitulah kata Tan Sri Ghazali Shafie yang membuatkan Musa terpegun.



Tuhan sentiasa menyebelahi orang-orang yang benar. Hidup mati mereka di tangan Allah. Perbuatan mereka yang meminta supaya Tuhan menamatkan umur Dr. Mahathir adalah satu perbuatan yang syirik. Mudah-mudahan mereka insaf orang Islam yang baik bukan saja mendoakan mereka yang hidup tapi mendoakan juga orang yang berada didalam kubur.





Bukan saja keluarga Dr. Mahathir gembira yang beliau sudah sembuh. Tapi kebanyakan rakyat yang pemikirannya belum tersepih turut gembira bersama. Semuga Allah selamatkan Perdana Menteri kita Dr. Mahathir Muhammad.





Ustaz Ashaari yang selalu menjadi sasaran ulamak siang hari. Siapakah yang sebenarnya yang cuba merosakkan akidah Islamiah Sheikhul Arqam ini atau Ulamak siang hari?.

# ULAMAK DAN TOK GURU MELIHAT ADA TIKUS YANG LEBIH BESAR DARI GAJAH

“Islam telah memilih jalan yang dapat di-terima oleh semua golongan dan semua bangsa dengan rela hati dan lapang dada iaitu pertamanya menyatukan pegangan hidup manusia. Lantaran itu Islam tidak memilih perpaduan dengan cara memperjuangkan bangsa. Kerana bangsa memang berlandaskan keturunan dan keturunan tidak mungkin dapat diubah dan diperbaiki walau dengan apa cara sekalipun”.

Fatwa di atas diberikan oleh Ketua Dewan Ulamak PAS Pusat, Tuan Guru Haji Nik Abdul Aziz Nik Mat dimuka depan Akhbar Harakah (Suara PAS) dengan tajuk besar ‘PERLU PILIH PEMIMPIN ISLAM’, bertarikh 27hb. Januari 1989.

Kata Tuan Guru itu lagi “Bahawa orang-

orang Barisan Nasional juga mengatakan bahawa orang-orang Barisan tidak boleh mengundi calon bukan Barisan. Islam pun begitu juga”.

Tuan guru yang amat disegani, disayangi serta dihormati oleh orang ramai kerana kedudukannya sebagai seorang guru yang baik dan memegang jawatan ketua dewan ulamak tak patut mengeluarkan fatwa yang tidak jelas kerana ini boleh menjejaskan imejnya.

Kata Tuan Guru Haji Nik Abdul Aziz, ‘**KITA PERLU PILIH PEMIMPIN ISLAM**’. Apakah Datuk Harun saja yang dianggap sebagai pemimpin Islam? Apakah Dr. Mahathir dan Datuk Mohd Taib yang jadi Pemimpin kepada Mr. Ong Tee Keat, calon Barisan Nasional tidak dianggapnya Islam?

Tuan Guru Nik Aziz suruh Ghafar Baba supaya mempelajari Islam secara mendalam supaya perkara-perkara utama dalam Islam dapat difahami oleh YAB Timbalan Perdana Menteri kita. Alhamdulillah.... Syurkur lillah....

Tuan Guru kita ini nampaknya seperti seorang yang ada kashaf iaitu yang mempunyai caranya sendiri boleh melihat siapa yang memahami Islam dan siapa yang tidak memahami Islam. Siapa yang Islam dan siapa yang tak Islam.

Sebelum Tok Guru PAS ini mengajar Timbalan Perdana Menteri kita YAB Ghafar Baba, kita fikir eloklah kita mengingatkan ulamak PAS ini bahawa beliaupun patut belajar sama, kerana



banyak manalah ilmu didada manusia, selagi kita yang bersifat hamba.

Allah saja yang Maha Mengetahui. Allah saja yang menguasai ilmu dan junjungan Nabi kita Mohamad SAW pernah berkata sekiranya baginda itu gedung ilmu maka Ali Bin Abi Talib Karam Mulallah hu wajha r.a adalah anak kunci ilmu. Sebab itulah Islam menyuruh kita menuntut ilmu dari buaian hingga ke liang lahad. Syukur-lah Tok guru suruh Che gu Ghafar belajar.

Saya rasa suasana dan tempat tuan guru menurunkan fatwa bahawa orang-orang Barisan Nasional tak boleh undi selain dari calon Barisan Nasional, Islam pun tak boleh undi selain dari calon Islam ini adalah satu fatwa yang berbahaya dan mungkin berjaya merosakkan akidah.

Tuan Guru yang saya sayangi, janganlah kerana marahkan sangat pada Dr. Mahathir dan mahu berkerjasama dengan Datuk Harun, hingga Tok Guru terpaksa mengeluarkan kenyataan yang sungguh mengelirukan.

Tok Guru adalah seorang yang jujur dan baik. Saya kenal dengan Tok Guru. Namun suka saya ingatkan Tok guru, masih tak tahu selok belok dan permainan politik, lebih-lebih lagi politik puak-puak serpihan yang baru keluar dari UMNO. Mereka bukan saja mahu menjerat Tok guru, dan parti PAS tapi orang mereka sendiripun mereka bunuh karier politiknya sama. Politik yang dimainkan di negara ini sangat kotor. Orang

yang sebersih Tok Guru patutnya tak main benda yang kohong macam ini.

Sekarang tengok apa jadi pada Ku Li, Tunku, dan segolongan pemimpin dari golongan feudal dan pengikut mereka sudah terjerat dengan *high politik*

Musa dan orangnya sudah masuk UMNO. Pilihanraya kecil di Ampang dilupakan oleh orang ramai begitu saja, yang jadi mangsa Datuk Harun dan orang-orangnya.

Musa kini sama seperti seekor tikus yang besar duduk dikalangan gajah. Orang ramai akan memperkatakan, "Eh..eh... besarnya tikus". Maka besarlah hati tikus besar. Orang tak sebut kebesaran gajah. Begitulah bijaknya Musa yang macam tikus. Kasihan. Gajah yang besar menjadi ketakutan kerana bila tikus masuk dan bersarang di dalam telinga gajah maka binasalah hidupnya.

Kasihan, UMNO yang macam gajah, badan besar, telinga besar, kepala besar tapi matanya kecil akhirnya nanti menangislah gajah kerana tak dapat berbuat apa-apa. Tikus yang sudah membawa anak penak akan berma-harajalela. Gajah akhirnya nanti jadi gila.

Berbalik kepada Tok Guru yang jadi ketua ulamak ini akhirnya akan jadi seperti buaya-buaya yang taat membiarkan kancil menjadikannya jambatan untuk ke seberang untuk makan buah-buahan yang ranum. Begitu juga dengan Rais Yatim yang telah bakar jambatan nak keseberang buaya-buaya tahu mereka sudah tertipu.

Inilah akibat berkongsi dengan pemimpin DAP. Memang benar yang kalah pilihanraya Harun Idris, yang dapat nama busuk orang PAS yang bersengkokol dengan mereka. Orang-orang mengutuk Mahathir dan Anwar habis-habisan tanpa sedikit pun ada belas kesihan, tanpa disadari yang mereka dijadikan alat membunuh saudara sendiri supaya musuh mudah ambil alih negeri.

Cukuplah Tunku saja buat kenyataan yang karut marut. Sulaiman Palestin, Rais Yatim maki hamun dengan bahasa kesat terhadap Dr. Mahathir itu cuma satu lakunan saja. Mereka semua ini nak hidup. Mereka tak fikir masa depan. Rais dah bakar jambatan, Sulaiman Palestin memang namanya sudah lama rosak. Tapi Nik Aziz yang macam seekor kerbau membawa lumpur hingga semuanya terpa lit ini pasal apa? Kenapa? Tentu syaitan yang bertaraf general yang datang merasuknya.

Kata-kata ulamak seperti mutiara permata disimpan dan dimuliakan. Ulamak tak boleh cakap sesedap mulut kerana mereka adalah pewaris nabi, lain pula seperti ustaz Hassan Salleh, Naib Yang Dipertua Persatuan Ulamak Malaysia, Ustaz Ibrahim Azmi menteri agama kaum serpihan yang dianggap oleh orang ramai macam labi-labi bukan macam pewaris nabi lagi.

Orang-orang yang beriman sentiasa taat pada Tuhan, taat pada Rasul dan pada pemimpin. Orang Islam yang baik tidak akan meninggalkan



sof sewaktu sedang mengerjakan solat di belakang Imam melainkan bermuakaf saja.

Mungkin kerana sibuk berpolitik Tok guru terlupa bahawa antara Tok guru dan Ghafar Baba tak banyak beza. Apakah Tok guru sudah lupa amanat Rasulullah di hari Haji wada:

**“Wahai manusia! Tuhanmu hanyalah satu, dan asalmu juga hanyalah satu. Kamu semua berasal dari Adam dan Adam dari tanah. Orang yang paling mulia di antara kamu pada sisi Allah ialah yang paling bertaqwa. Orang Arab tidak ada kelebihanannya dari bukan Arab, dan orang yang bukan Arab pun tidak ada pula kelebihanannya dari orang Arab, kecuali kerana bertaqwa.”**

Jadi apa bezanya diantara orang PAS dengan orang UMNO? Jangan mereka merasakan diri lebih mulia dan lebih Islam. Itulah yang dikatakan ego.

Disebabkan hari ini ada yang sudah tidak mahu percaya dengan hadith Nabi maka saya perturunkan firman Tuhan yang bermaksud:

**“Wahai manusia! Sesungguhnya Kami jadikan kamu dari seorang lelaki dan perempuan, dan Kami jadikan kamu berbangsa-bangsa dan berkaum-kaum dengan tujuan supaya kamu berkenal-**

kenalan (bersefahaman). Sesungguhnya yang lebih mulia di antara kamu pada sisi Allah, ialah orang yang lebih taqwa.”  
(Surah Al-Hujurat: 13)

Ya Ustaz Nik Aziz! Ana sangat terkejut bila tiba-tiba Ustaz suruh pilih pemimpin Islam. Dulu masa berada di dalam Barisan Nasional ulamak PAS suruh undi siapa? Alhamdulillah. Berkat doa dan amanat Tok guru pengundi memberikan kemenangan pada Barisan Nasional.

Tak mengapalah tiba-tiba parti Tok Guru, orang-orang tok guru, akhbar tok guru sokong Harun macam Harun nabi. Harun disokong seolah-olah tak ada cacat cela, tak ada salah silap.

Pada hal Ana masih ingat, tak tahulah kalau Ustaz lupa macam mana Harun dan orang-orangnya membuat kecaman terhadap PAS? Harun juga buat kecaman terhadap DAP, teman lama PAS dalam 3-C semasa beliau menjadi Naib Presiden UMNO Malaysia? Kalau kita kata macam tu, Harun jawab mudah saja. Itu dulu. Dulu lain, sekarang lain. Harun pun akan cakap juga lu caya gua, gua caya lu. Tapi Ustaz nak jawab macam mana pula? Nak cakap orang PAS sudah bermaaf-maafan kah? Habis kalau tak jawab macam tu, nak jawab macam mana? Nak kata benda itu semua politik, tentu lagilah teruk.

Kata Harun, “PAS pernah menjual maruah orang-orang Melayu kepada DAP termasuk membiayai calon-calon PAS yang bertanding

dalam Pilihanraya 1969". Macama mana tu. Itu Harun mana yang kata? Takkan Ustaz dah lupa. Itu belum lama lagi?

"DAP tidak dapat diterima oleh orang-orang Melayu. Dasar DAP adalah merbahaya kepada negara dan dasar pemimpin itu juga sekarang menjadi tandatanya. Parti itu tidak mahu menerima dasar Perikatan yang memberi peluang kepada semua kaum negara ini berusaha ke arah perpaduan semua kaum." - Dato' Harun berucap dalam kempen pilihanraya kecil Parlimen kawasan Hulu Selangor, 40 batu dari Kuala Lumpur pada 23 Mei 1972.

"DAP sudah kehilangan penyokong-penyokongnya kerana mengamalkan dasar perkauman yang keterlaluan."

"Tidak ada pilihan lain selain Barisan Nasional pada masa ini berkemampuan mengambil alih rancangan-rancangan pembangunan yang telah dilaksanakan sehingga negara membangun dan semua kaum menikmati faedah." - Dato Harun berucap merasmikan mesyuarat agung UMNO cawangan Gadong Jaya, Labu, 20 kilometer dari Seremban pada 10 Mac 1982.

Dato' Harun juga pernah menyifatkan undi yang diberikan kepada calon-calon Bebas sebagai undi yang sia-sia. Kenyataan ini dikeluarkan oleh Dato' Harun semasa beliau berucap di rapat umum Barisan Nasional di Semenyih, Negeri Sembilan pada 17 Ogos 1974.



“Calon-calon Bebas tidak terikat kepada sebarang prinsip perjuangan, kerana itu pengundi-pengundi yang memilih calon-calon Bebas tidak mempunyai jaminan,” kata Dato’ Harun lagi.

Inikah dia calon Islam yang PAS bantu dan minta orang ramai sokong. Dulu cakap lain sekarang cakap lain. Orang Islam boleh ke berbohong? Cuba Tok guru terangkan. Siapa yang menzalimi siapa? Siapa yang serang siapa? Kerajaan menyerang pembangkang atau pembangkang yang serang kerajaan?

Kenapa saya perlu tulis ini semua padahal Barisan Nasional sudah menang? Ingatlah bahawa Harun kata dia yang menang kerana masih ada 19,000 pengundi di belakangnya. Jadi bila dia nak lawan lagi atas nama calon bebas dan bergabung dengan DAP, kita tunjukkan keratan akhbar ini padanya.

Calun MCA kosongkan kerusi, kumpulan serpihan jadikan isu. Bagaimana dengan Musa Hitam yang tak tunjukkan sikap taat dan setia tinggalkan tiga jawatan penting dalam satu waktu? Orang kafir tidak taat kerana mereka tidak terikat pada hukum-hukum Quran dan Al Hadith. Shahrir Kunci, calon bebas di Johor Bahru letak jawatan, susahkan orang ramai.

Bagaimana dengan puak-puak serpihan se perti Ku Li, Rais, Zainal Abidin Zain, Haji Ibrahim Ali, Ibrahim Azmi, Rahmah Osman dan Marina Yusof? Apakah mereka ini orang yang taat? Walau

bagaimanapun nampaknya mereka yang menentang, telah mengkhianati amanah rakyat mendapat kepercayaan dan sokongan ulamak PAS.

Tahukah Tok Guru bahawa Datuk Harun dan pemimpin kaum serpihan adalah mereka yang sudah tidak punya visi lagi. Perjuangan mereka adalah perjuangan peribadi yang didorong oleh perasaan ego. Inilah contoh manusia politik atau dalam kamus politik '*political animal atau political beast*' yang tidak faham erti kemanusiaan dalam konteks politik itu sendiri. Inilah politik Melayu Mashuri, politik dendam, ego dan peribadi.

Politik semacam ini amat berbeza dengan politik bangsa-bangsa yang sudah maju. Tengoklah Michael Dukakis dan Jesse Jackson di Amerika Syarikat. Biar pun mereka kafir namun mereka tidak tunjuk perasaan dendam ataupun sifat merajuk dan keluar menjadi kaum serpihan setelah kalah bertanding. Sesekali tunjuklah sikap gentleman.

Kita semua sayangkan negara, kita sayangkan anak cucu kita. Kita mahu mereka hidup dalam sebuah negara yang aman makmur, negara yang dapat menjamin kesejahteraan mereka sebab itu kita perlu tahu visi pemimpin-pemimpin kita hari ini.

'*Nation-building*' adalah satu proses yang tidak ada penghujungnya. Ia unik kepada sesuatu keadaan dan era. Datuk Harun, Tunku, dan kaum serpihan semuanya pernah memberikan

sumbangan ke arah proses ini. Tapi kini masa mereka sudah tamat. Malah masa Dr. Mahathir sendiripun akan berakhir tidak lama lagi. Biar-pun begitu kaum-kaum serpihan masih lagi dapat menyumbangkan sesuatu ke arah '*nation-building*' ini jika mereka boleh menerima kekalahan dan bersedia bersatu kembali untuk mem-bangunkan bangsa dan negara kita yang tercinta.

Begitu juga PAS. PAS harus memikirkan perjuangan bangsa, kerana macam mana ada agama kalau tidak ada bangsa? Lupakan perju-angan untuk kerusi untuk minum pagi, makan tengah hari saja. Berfikir besarlah "*Think Big*" kerana Tuhan kita besar. Allah hu Akhbar.... Allah hu Akhbar.... Allah hu Akhbar....

Kita semua perlu melihat kerajaan dari kaca mata rakyat biasa dan tidak dengan sudut pan-dangan orang politik. Kalau penglihatan kita tidak dipolitikkan oleh orang-orang politik, kita akan akur pada hakikat yang tidak ada satu kera-jaan di dalam dunia ini yang tidak melakukan kesilapan. Malah kerajaan Malaysia di zaman Tunku, Datuk Harun, Ku Li, Musa sendiripun telah melakukan kesilapan-kesilapan yang besar. Apakah PAS masa menguasai kerajaan dulu tidak melakukan kesalahan dan kesilapan?

Dan kesilapan yang paling besar yang telah kita lakukan hari ini ialah kita telah membesarkan ego tikus kecil, dengan memberikan perhatian yang besar sehinggakan gajah yang besar kita anggap kecil dan adanya manusia yang sanggup mem-



biarkan akal fikiran mereka digunakan sehingga mereka tidak lagi boleh berfikir. Apakah nilai manusia yang sudah tidak boleh berfikir lagi?

Bagi mengakhiri cerita ini saya muatkan satu cerita bagaimana ayam-ayam yang taat tidur dalam reban tiba-tiba keluar tidur di atas pokok. Apabila tuannya bertanya, jawab ayam *"Saya tabu musang yang tuan letak dalam reban kami itu musang peliharaan tuan, kami pun ayam peliharaan tuan. Reban ini tuan ambillah, kami lebih sanggup tidur di atas pohon dari satu reban dengan musang yang makan ayam"*.

*"Kamu jangan takut pada musang ini, kami sudah beri dia pakaian bulu ayam. Kami kenal dia dan dia sudah tidak makan ayam lagi, dia nak jaga ayam-ayam yang ada."*

*"Kalau tuan begitu percayakan musang, tuan saja yang tidur bersama musang di dalam reban kepunyaan tuan ini"*.

## POST SKRIP.

“Saya banyak berbohong dalam Mahsuri dulu. Bimbang juga bila mati nanti, jumpa Mahsuri di akhirat. Sementara masih hidup ini, baiklah saya perbetulkannya,”

Begitulah kata Tunku Abdul Rahman di hari pelancaran filem **Sumpah Mahsuri** keluaran Mahsuri filem Sdn. Bhd., yang menelan belanja setengah juta ringgit yang akan dibuat dalam empat versi; Melayu, Inggeris, Jepun dan Thai.

*Siakap Sinobong  
Gelama Ikan Duri  
Akibat Suka Berbohong  
Maka Busuklah Nama Menteri*

Syukur Alhamdulillah nampaknya Tunku sudah insaf dan ada tanda-tanda yang beliau sedar hidup ini lawannya mati dan manusia mesti membetulkan kesalahannya sebelum dia mati. Yang menjadi persoalannya apakah benar yang Tunku ini sudah sedar dan insaf? Atau Tunku sudah jadi macam Musa Hitam?

Saat-saat yang penting di dalam hidup manusia ini ialah sebelum menghembuskan nafasnya yang

terakhir. Mudah-mudahan semasa kita sedang menghadapi *sakkaratul maut* kita dapat mengucapkan dua kalimah syahadat dan mati kita didalam Islam.

Selagi nyawa dikandung badan, selagi tubuh belum bercerai dengan nyawa, selagi itu kita masih ada masa untuk menuntut maaf dan mengaku akan kesalahan dan kesilapan kita. Dan kita boleh meminta pengampunan dari Allah kerana Allah itu bersifat Maha Pengampun. Tapi bagaimana pula dosa kita dengan manusia? Dosa kita dengan bangsa? Takkan Tunku takut dengan Mahsuri saja?

Wahai bangsa ku! Wahai pemimpin ku! Ingat-ingatlah kamu! Sebelum nasi menjadi bubur! Sebelum yang hidup mati! Sebelum yang mati menjadi busuk! Sebelum hujan turun dengan tidak henti-hentinya! Sebelum banjir melanda tanpa belas kasihan! Sebelum benteng pecah! Sebelum tambak runtuh! Sebelum tiang roboh! Sebelum ribut taufan menganas tanpa belas kasihan! Sebelum pendayung patah! Sebelum bulan dan matahari menghilangkan diri. Berfikirlah..., beringatlah..., sebelum terlambat. Ingat pada Allah... Ingat pembalasan di akhirat.

Beristigfarlah! Bertaubatlah, sebelum negaramu menjadi padang jarak padang terkukur. Astargfirullah... Astagfirullahil Azim.....

*Wahai para penulis! Wahai orang-orang politik! Berkata benarlah kamu tentang bangsa mu, negara mu dan agama mu, kerana per-*



*buatan dan kata-kata mu dihari ini adalah sejarah. Ingatlah yang kamu adalah khalifah Allah*

**HAI ORANG-ORANG YANG BERIMAN, JIKA DATANG KEPADA KAMU ORANG FASIK MEMBAWA BERITA, MAKA PERIKSALAH DENGAN TELITI AGAR KAMU TIDAK MENIMPAKAN SUATU MUSIBAH KEPADA SATU-SATU KAUM TANPA MENGETAHUI KEADAANNYA YANG MENYEBABKAN KAMU MENYESAL ATAS PERBUATAN ITU**

Al-Hujerat Ayat 6.

Tidak sia-sia Tuhan turunkan ingatan yang diatas ini di dalam Al Quran. Ingatan ini untuk manusia, untuk kamu yang mahu berfikir, berfikirilah kerana Tuhan Maha Mengetahui tentang kejadiannya dilangit dan dibumi. Janganlah selalu berpolitik hingga lupakan Allah, menipu diri dan menipu orang ramai.

Ramai umat Islam hari ini tidak sedar ada diantara pemimpin Melayu yang sedang menarik kaum bangsanya untuk menuju kejalan yang sesat. Jalan yang dimurkai oleh Allah, me nganjurkan kita supaya jadi angkuh, riak, takbur dan merasa diri benar dan semua orang lain itu salah. Inilah ego yang dimurkai Allah. Inilah perbuatan yang dilakukan oleh pemimpin yang merasakan

dirinya jaguh dan berpengaruh. Mereka boleh bertukar-tukar topeng sekejap masuk, sekejap keluar, masuk lagi keluar lagi.

Mereka tahu orang Melayu yang tidak mempunyai asas agama, orang Melayu yang tidak berilmu mudah percaya dengan tipu daya mereka. Orang Melayu yang lemah imannya cepat lupa sejarah dan mudah terpengaruh disebabkan gilakan keduniaan akan sanggup jadi khadam mereka. Orang-orang yang tidak ada sifat taat dan setia mereka pada bangsa dan negara akan sentiasa jadi penyokong kuat mereka untuk merosakkan agama, bangsa dan negara.

Kaum serpihan datang kepada mereka membawa berita-berita yang tidak benar mengenai Datuk Sri Dr. Mahathir. Ketua-ketua mereka membohongi rakyat dengan cerita-cerita yang tidak benar. Tunku kata pemerintahan Mahathir lebih dashyat dari zaman Jepun. Disebabkan bijaknya para pencerita, rajinnya mereka mengatur ceramah dari satu tempat ke tempat yang lain dan mereka membawa bersama orang-orang tua yang pandai, berpangkat, berpengalaman dan berpengaruh, maka terpengaruhlah rakyat yang tidak mahu berfikir dan yang tidak ada perasaan patriotik terhadap negara. Orang ramai yang mengikutkan hati dan pengaruh serta godaan iblis pun percayalah akan dakyah orang fasik itu. Mereka pun beramai-ramai memberi sokongan pada puak-puak serpihan.

Al-Quran telah mengingatkan kita supaya

berhati-hati dengan berita-berita yang dibawa oleh orang-orang yang fasik, berita-berita yang mengelirukan. Allah tahu hambanya yang bersifat lalai akan termasuk perangkap orang yang suka kita berbuat dosa dan berpecah belah serta bergaduh sesama sendiri.

Kesalahan pemimpin secara teknikal yang kecil dibesar-besarkan untuk menutupi kesalahan dan dosa-dosa besar mereka sendiri yang jauh lebih besar. Merekalah yang telah menipu dan menzalimi rakyat semasa kekuasaan berada di tangan mereka dulu. Mereka masih tamakkan kekayaan dan kuasa. Mereka takut dengan bayang-bayang mereka sendiri. Mereka terlupa ribuan manusia yang mendengar ceramah mereka duduk ditempat-tempat gelap. Penduduk rumah-rumah haram ini lihat bekas-bekas menteri ini datang dengan kereta yang besar-besar, kereta mewah, siap dengan supirnya sekali. Mereka kenal kepada ketua-ketua kumpulan itu yang telah banyak berbohong. Bagaimana mereka mahu memberi undi kepada pemimpin yang macam ini?

**Lautan mana yang tak bergelumbang,  
bumi mana yang tak ditimpa hujan.**

Inilah buktinya yang kita ini hamba, tak kira siapa kita. Sama ada kita seorang pemimpin negara atau rakyat biasa atau kita dari kaum serpihan, kita pasti telah melakukan kesalahan dan kesilapan. Kita pasti pernah melakukan dosa



sama ada dosa itu besar ataupun kecil. Dari itu mereka yang tinggal di dalam rumah kaca jangan main lontar-lontar batu. Perbuatan kumpulan serpihan yang meludah ke langit ini sebenarnya sengaja dibuat untuk membacinkan muka mereka sendiri.

Pilihanraya di Ampang baru saja berlalu. Calon Barisan Nasional, Encik Ong Tee Keat sudahpun memenangi kerusi itu dengan majoriti 4250 undi. Ini satu kelebihan undi yang meyakinkan bahawa rakyat padu bersama-sama dan mempercayai kepimpinan Datuk Seri Dr. Mahathir selaku Perdana Menteri. Ini petanda Allah bersama-sama dengan pemimpin yang benar. Tuhan berikan kemenangan semasa Dr. Mahathir sedang terlantar di rumah sakit biarpun diserang dengan hebat oleh kaum serpihan yang mengharapkan supaya beliau segera pejam.

Ramai yang gembira kerana telah memberikan kemenangan kepada Y.B Encik Ong. Tapi ada juga yang nampaknya menyesal sesudah memberikan undi disebabkan ada pihak yang mengungkit-ungkit kononnya orang Melayu tak patut memberikan kemenangan kepada pemimpin Cina. Mereka berkata: Tengoklah bila calon Cina sudah menang, pemimpin-pemimpin MCA tambah besar kepalanya.

Puak-puak Serpihan pula bersedih dan marah sambil bertanya-tanya macam mana mereka boleh kalah pada hal mereka sudah berkerja keras.

Saudara mara, sahabat handai dari seluruh pelusuk negara datang membantu. Segala macam fitnah, segala macam dakyah dilakukan. Macam mana Dr. Mahathir masih tetap juga menang. Mereka heran macam mana mereka masih kalah. Kekalahan ini bukan saja kekalahan bagi Datuk Harun, tapi pukulan serta tamparan yang hebat bagi kaum serpihan termasuklah Ku Li, Tunku dan kuncu-kuncu mereka kerana mereka kata menang Harun bererti menang Ku Li maka kalahlah Dr. Mahathir.

Ramai dari mereka tidak mahu menerima kekalahan Harun. Biarpun dibibir mereka menyatakan mereka patuh kepada keputusan rakyat. Tapi hati kecil mereka tak terima yang rakyat itu adalah penentu. Dan kita pun tidak boleh pandang ringan undi serpihan 19,469 yang Harun dapat kerana orang-orangnya tetap berasa mereka menang. Bagi mereka pengundi masih solid padu di belakang mereka. Untuk mereka ini, sebagai ingatan dan amaran kepada Barisan Nasional supaya berkerja lebih keras dan mesti pandai ambil hati rakyat. Jangan musim pilihanraya saja baru nak tunjuk muka.

Dendam kesumat di hati, Allah saja yang tahu. Sejarah telah mengajar bangsa kita. Sejarah Sang Rajuna Tapa dan Mahsuri mengingatkan kita betapa bahayanya perasaan dendam kesumat bila terlekat di dalam hati perut manusia. Mereka yang merasa kecewa dan terhina akan membalas dendam dengan apa jua cara.

Namun dendam kesumat ini tidak berlaku dalam politik orang-orang barat yang sudah matang dalam politik dan kenegarawan. Tengoklah Michael Dukakis yang tewas ditangan George Bush. Dia tidak pula menjadi ahli politik serpihan. Dia mengakui dan menerima kekalahannya dengan dada yang lapang.

Tapi peribahasa Melayu mendidik mereka yang tak beriman supaya jangan berputih mata, putih tulang tak mengapa. Alang-alang menyeluk pekasam biar sampai ke pangkal lengan. Ini adalah budaya yang merbahaya dalam masyarakat kita.

Teringat pasal dendam, saya teringatkan Tunku dan filem **Sumpahan Mahsuri**. Perlu apa Tunku buat balik filem **Sumpahan Mahsuri**? Apakah Tunku tidak tahu kesan dari filem itu akan menunjukkan kezaliman Raja di zaman itu. Sikap pemimpin Melayu yang pendendam, zalim, suka menfitnah dan terpengaruh oleh syaitan. Dan Mahsuri pula sebelum mati telah menyumpah pulau Langkawi dan penduduknya yang lain yang tidak berdosa supaya turut sama terseksa dengan menjadikan pulau itu padang jarak padang terkukur selama tujuh keturunan.

Tunku sendiripun menunjukkan sifat dendamnya dalam membuat filem ini, kata beliau;

**“Mereka tipu saya. Jadi, untuk puaskan hati baiklah saya terbit sendiri, sementara ada waktu. Tambahan pula anak**



dan cucu saya ada membantu”.

Sebab-sebab Tunku marah ialah kerana pengeluar filem dulu tidak membayar wang kepada Tunku sepertimana yang dijanjikan. Adakah patut seorang negarawan, seorang bapa kemerdekaan membalas dendam selepas lebih 20 tahun.

Walau apa pun kita kini berada dizaman kebangkitan Islam. Nabi Muhammad SAW mengajar kita supaya menanamkan sifat bermaaf-maafan, berkasih sayang, tolong menolong, bantu membantu serta sentiasa menyambungkan sila-tulrahim antara sesama kita. Cukuplah sejarah yang menunjukkan keburukan telatah bangsa Melayu dizaman silam. Ia terjadi kerana ketika itu orang kita belum ramai yang pandai. Negeri kita belum merdeka dan belum ramai orang yang mengenali ajaran Islam. Apakah dengan membuat filem itu Tunku hendak mengajar supaya orang-orang Melayu menjadi pendendam dan balik seperti dizaman Mahsuri atau dizaman Raja Bersiong yang menghisap darah rakyat dengan sesuka hatinya.

Ramai yang menyalahkan akhbar diatas kekalahan Ampang Jaya. Kononnya akhbar-akhbar tidak memberikan berita yang sepatutnya. Apa benarkah ini? Tunku sendiri pun salahkan akhbar juga. Kenapa tidak salahkan diri sendiri? Adat berperang membunuh atau dibunuh. Menang atau kalah. Janganlah bila kalah cari

kesalahan orang.

Kata Sahibulhikayat, maka Datuk Harun Idris pun kalah dalam pilihanraya di Ampang Jaya. Tapi Harun tidak mahu kalah. Macam mana seorang tokoh yang handal, ternama, pejuang macam dia, boleh kalah dengan seorang anak Cina yang ubun-ubunnya masih lembik? Macam mana? Sedangkan Harun seorang *National figure*, Ong ini cuma Setiausaha politik Lee Kim Sai. Itu yang Datuk Harun merasa terkilan. Kalau dengan Lee Kim Sai lain juga. Lawan anak murid Lee Kim Sai, Harun boleh kalah..... Manalah Harun tak hot. Gua caya lu. Lu mesti hot punya.

Hati kecil Harun masih merasakan yang beliau tetap menang. Tapi hakikatnya siapapun tak dapat menafikan yang Harun sudah kalah. Sebab apa dia kalah? Tidak ada kerana lain kecuali kerana rakyat telah memberikan undi kepada calon Barisan Nasional. Rakyat percaya kepada kepimpinan Dr. Mahathir. Ada macam-macam sebab rakyat tak mahu beri undi pada Harun. Tak kiralah. Yang penting dia dah kalah. Kalahlah. Tapi pengikutnya kata dia menang, dia masih berpengaruh. Kalau dia lawan sekali lagi, kali ini dia pasti menang. Inilah yang kita tidak sedap dengar ni. Sampai bila kita orang Melayu ini hendak buang masa, buang duit bergaduh sesama sendiri. Dr. Mahathir sudah tua, baru dibedah. Ghafar Baba pun sudah tua dan sudah dibedah juga. Bukankah lebih baik kita memikirkan dan membuat persiapan untuk me-

mimpin dan mendidik pemimpin muda untuk mengganti tempat mereka berdua ini.

Hari ini ramai umat Islam sedang giat meninggikan syiar Islam. Dan bila kita menghayati ajaran Al Quran dan Sunnah, kita sepatutnya memilih pemimpin muda yang ada kekuatan rohani, ada akhlak yang baik untuk dijadikan calon pemimpin bukan pemimpin berlagak macam orang alim tapi kerja-kerja mengarut buat juga. Sepatutnya Harun dan orang-orang serpihan menerima kekalahan sebagai satu *sport. Learn to swallow our own pride.* Jangan terlalu memikirkan pasal *personal glory.* Fikirkanlah kalau awak menang boleh tak kacau bilau negeri ini.

Pemimpin adalah *Nation Builders.* Tugas dan tanggungjawab pemimpin untuk membangunkan negara bukan merosakkan fikiran rakyat kerana gilakan kuasa sanggup mengene-pikan prinsip, sanggup dilebel sebagai penderhaka.

Kekalahan Harun ini samalah seperti kekalahan Team B lawan Team A pada tahun 1987 dulu. Satu kekalahan yang susah hendak diterima oleh mereka yang sudah kalah. Kalau dulu Harun dan puak-puaknya yang sudah kalah lebih rela jadi kaum serpihan dari menerima kekalahan. Apakah yang akan mereka buat selepas ini?

Mereka percaya satu hari nanti pasti mereka akan menang juga. Ini samalah seperti perasaan seorang penjudi yang dah kalah tetapi tetap



mahu berjudi lagi. Alangkah bahayanya sebuah negara bila ada pemimpinnya memikirkan bahawa politik itu satu perjudian. Apakah rakyat sanggup membiarkan nasib mereka diperjudikan oleh ahli-ahli politik desperado?

Kenapa kita tidak terima saja kekalahan? Itu sudah takdir Allah SWT. Allah mahu memberikan kemenangan kepada Barisan Nasional. Kehendak Allah siapa pun tidak boleh mempersoal dan mempertikaikannya. Apakah ada rakyat yang berani beritahu mereka supaya terima saja kekalahan ini sebagai satu ujian Tuhan kepada kita yang selalu berkata;

**“La haw la wala, qu wata illa billah hil ali yuul azim”.**

***Tidak ada kuasa melainkan kekuasaan Tuhan, tidak bergerak sesuatu melainkan digerakkan oleh Allah***

Inilah kerja-kerja orang yang mahu membunuh demokrasi. Inilah sifat-sifat seorang diktator yang mahu memperjudikan nasib rakyat demi mengekalkan kuasa dan dalam masa yang sama menuduh pemimpin yang mengamalkan demokrasi sebagai seorang diktator. Bila lagi rakyat nak sedar yang mereka telah dipergunakan. Kenapa mereka sanggup membiarkan diri mereka terbawa-bawa oleh kemarahan pemimpin mereka terhadap orang yang menang? Pemimpin yang kalah ada habuan, ada keuntungan dari permainan

*high politik*. Rakyat yang marhaen bagaimana?

Dalam perlawanan mesti ada kalah menangnya. "Tak ada kalah, kalo, tak ada menang kalo, susah", itu kata kawan saya, seorang India. Orang Cina pula kata "Gua caya lu. Lu caya gua". Orang Ampang kata "Gua tak caya lu Harun, itu pasal lu kalah. Undi ada gua punya tangan." Kata Tunku pula 'KALAU KITA KALAH KITA MAMPUS'..... maksud Tunku bukan mampus yang masuk dalam kubur, mampus politik tak kan benda ini pun orang politik tak faham?

Menang jadi arang kalah jadi abu. Itulah MAMPUS yang dimaksudkan oleh Tunku. Segala tembelang, segala penyakit, segala keburukan orang yang kita ungkit dan korek, orang pun akan korek dan dedahkan semua pekong kita. Badan Pencegah Rasuah akan kejar lepas seorang, seorang lagi... itulah dia mampusnya.

Percayalah.... Walaupun lu tak mahu percaya, lu sudah kalah,... kalahlah. Percayalah. Tunku itu orang lama, sesekali cakap orang tua-tua ini masin juga. Kita kenalah percaya.

Tunku berdarah bangsawan. Dia tak patut guna perkataan mampus bagi mengatakan 'mangkat'. Tapi dalam politik tak kan nak gunakan perkataan mangkat. Itulah sebabnya Tunku biar-kan kaum serpihan menyatakan "Bila lagi Mahathir nak pejam? Dah sakit tu pejam sajalah". Patut ke cakap macam tu kat Perdana Menteri kita?

Berbalik kepada pengundi Melayu yang telah

memberikan undi mereka pada calon MCA, mereka tak perlu rasa kesal dan kecewa. Nabi kita berpesan suruh kita semua berbaik-baik walaupun dengan orang Kristian dan orang Yahudi dan orang kafir. Disini saya perturunkan empat perjanjian perlembagaan Madinah, bagi menjadikan Madinah sebuah negara yang kukuh serta sanggup menghadapi cabaran masa depan.

1) Kumpulan rakyat Madinah ini hendaklah mempunyai peribadi keagamaan dan politik sebagai suatu umat. Adalah menjadi hak kumpulan umat itu memberi hukuman kepada orang-orang yang membuat kerosakan, dan memberi keamanan kepada orang-orang yang taat setia.

2) Kebebasan beragama adalah terjamin untuk semua orang.

3) Adalah menjadi kewajipan kepada setiap penduduk Madinah, baik orang Islam, orang-orang Yahudi ataupun bukan Islam hidup saling bantu membantu sama ada dari segi moral mahupun material. Mereka bertanggungjawab bersama-sama mempertahankan Madinah dari serangan luar.

4) Rasulullah SAW adalah ketua negara bagi Madinah. Bagindalah yang akan mendengar segala perkara dan menyelesaikan perselisihan yang besar, jika berlaku.

“Wahai manusia! Sesungguhnya Kami



jadikan kamu dari seorang lelaki dan perempuan, dan Kami jadikan kamu berbangsa-bangsa dan berkaum-kaum dengan tujuan supaya kamu berkenalan-kenalan (bersefahaman). Sesungguhnya yang lebih mulia di antara kamu pada sisi Allah, ialah orang yang lebih taqwa.”

(Surah Al-Hujurat: 13)

Sekarang kita berbalik semula kepada Tunku dan Mahsuri, Tunku ada berkata seperti berikut di majlis pelancaran filem tersebut di kediamannya di Bukit Tunku, Kuala Lumpur.

“Saya membuat semula Mahsuri untuk membetulkan fakta yang salah. Dulu banyak isi cerita yang sengaja ditokok tambah untuk daya tarikan komersil. Kali ini, cerita itu akan lebih menitikberatkan kisah yang lebih asli dan dikaitkan dengan sejarah negeri Kedah”,

Walaupun Tunku telah menunjukkan jiwa besarnya sebagai seorang negarawan. Beliau berani mengakui yang beliau sudah berbohong. Namun orang ramai tetap merasa terkilan kerana seorang Perdana Menteri tidak sepatutnya berbohong. Tunku seorang peguam, sebagai seorang peguam tentu Tunku tahu hukuman di mahkamah kepada seorang yang telah berbohong ialah hukuman penjara, hukum yang dinamakan per-

jury.

Jadi kita nak buat macam mana. Bak kata pepatah Melayu Tunku ini diibaratkan Quran buruk, nak baca tak boleh, nak buat tak tentu pun tak boleh, kerana kita sudah menganggap beliau sebagai bapa kita. Apa yang kita boleh buat ialah mendoakan agar Allah memberi petunjuk dan hidayah kepadanya. Kalau masih ada orang yang benar-benar kasih padanya, suruhlah beliau beribadat saja, tak elok orang tua-tua kita buat macam itu.

Begitu juga dengan Datuk Musa Hitam yang sudah masuk balik dalam UMNO. Tok Mat kata No Datuk Musa, 10052001. Sudah banyak sangat kosong baru nak masuk UMNO pasal apa?

Janganlah duduk buat kerja keluar masuk, masuk keluar, keluar lagi masuk lagi. Kerja main-main masuk keluar, masuk keluar lagi kemudian keluar lepas itu masuk memang sedap tapi Tok Musa, tak patut tunjuk pada rakyat yang dia gemar buat kerja main keluar masuk, keluar masuk macam itu. Sedap itu memang sedap main benda keluar masuk, masuk keluar tapi seorang pemimpin yang nak jadi Perdana Menteri tak buat main benda-benda keluar masuk, keluar masuk macam itu secara terbuka, kerana ianya amat memalukan. Tuhan pun marah hambanya buat kerja macam ini.

**Sesungguhnya orang-orang yang beriman, kemudian kafir, kemudian ber-**

iman (pula). kemudian kafir lagi, kemudian bertambah kekafirannya (maksudnya disamping kekafiran, ia melecehkan Islam pula). Maka sekali-kali Allah tidak akan memberi ampunan kepada mereka dan tidak (pula) menunjuki mereka kepada jalan yang lurus.

Surah AN NISAA' ayat 137.

Saya tak mahu komen panjang-panjang pasal Musa masuk UMNO cukuplah saya salinkan keratan-keratan akhbar tentang apa orang lain kata prihal Musa Hitam masuk UMNO.

Dan bagi mengakhiri post skrip ini, saya sertakan juga berita-berita Dr. Mahathir keluar dari hospital. Alhamdulillah. Beliau sudah sehat dan saya yakin beliau akan bertambah sehat dan segar lagi sesudah bercuti rehat untuk beberapa minggu. Akhir sekali saya muatkan satu cerita yang mengelikan hati kepada mereka-mereka yang fikir Dr. Mahathir akan mati semasa pilihanraya Ampang.

Sebuah cerita lucu, cerita gila-gila dalam bahasa Inggeris yang saya terjemahkan judulnya bertajuk 'Hari Tuhan tersenyum.' Ceritanya begini:

Jerusalem, 7 Januari 1987,  
REAGAN, GORBACHEV DAN  
ARAFAT BERTEMU TUHAN.

Reagan bertanya: *Ya Tuhanku, bilakah*



*Amerika akan memerintah dunia?"* lalu Tuhan pun menjawab, *"Tidak dalam tempuh hayatmu Ronald"*. Dan Reagan pun menangis.

Gorbachev juga bertanyakan kepada Tuhan bilakah Soviet Union akan memerintah dunia. Jawab Tuhan, *"Tidak dalam hayat mu, Mikhael."* Dan Gorbachev pun menangis.

Kemudian giliran Arafat pula bertanya. *"Bilakah soal Palestin dapat di selesaikan?"* Lalu Tuhanpun tersenyum dan berkata. *"Tidak selagi Aku wujud sebagai Tuhanmu, Yasser"*.

Cerita lucu ini kemudian di Malaysiakan ikut iklim negara ini. Ia bermula pada tarikh Dr. Mahathir dimasukkan ke dalam hospital.

Kuala Lumpur, 7 Januari 1989.

DATUK MUSA HITAM, TENGKU RAZALEIGH HAMZAH DAN DATUK HARUNIDRIS BUAT UMRAH JUMPA TUHAN DI DEPAN KAABAH.

Datuk Musa bertanya, *"Ya Tuhanku, bolehkah aku menjadi Perdana Menteri selepas Mahathir mati?"* Seorang malai-kat menjelma didepan Kaabah sebagai Sheikh berjubah, berserban dan berjanggut panjang. Dia pun lalu men-

jawab "*Tidak selagi ada hayat mu, Musa Hitam*". Musa pun menangislah menyesal masuk UMNO.

Sesudah itu giliran Ku Li pula untuk bertanya "*Sekiranya beta masuk UMNO semula dapatkah beta menjadi Perdana Menteri, ya Tuhan?*" Malaikat yang sama pun jawab "*Tidak! selagi ada hayat mu, Tan Sri Razaleigh Hamzah*". Maka Ku Li pun menangis menyesal kerana telah menentang Presiden dan menentang UMNO.

Kemudian giliran Datuk Harun pula bertanya. "*Ya Tuhan sekiranya aku menang kerusi Parlimen di Ampang Jaya, bolehkah aku jadi Perdana Menteri?*". Pak Sheikh yang berjanggut panjang itu pun tersenyum lebar sebelum memberikan jawapannya, "*Selagi engkau bersama Semangat 46, selagi ada aku, itu semua tidak mungkin.*" Maka menangislah Harun Idris kesal."

Hari-hari yang indah didalam cerita kita, semuanya sudah berlalu. Hari-hari yang baru dan segar akan menjelang. Marilah kita bersatulah kembali dalam satu wadah perjuangan dan dalam satu semangat keislaman dan patriotisme yang amat mendalam. Percayalah Tuhan tetap akan bersama kita selagi kita kasihkan saudara kita, bangsa kita dan negara kita.

## **PENGHARGAAN**

Saya merakamkan setinggi-tinggi penghargaan berserta ucapan terima kasih yang tidak terhingga kepada semua pihak yang terlibat didalam penyediaan buku ini, terutama sekali pembantu-pembantu saya Jaharah Omar dan B.H.Amir.

Dicetak dan diterbitkan oleh Al-Suhaimi



## KARYA SYED HUSSEIN YANG SUDAH DITERBITKAN

1. FIRASAT (RAHSIA MENGENAL DIRI) (1969)
2. MELANGKAH DAN BERJAYA (1969)
3. RAHSIA MIMPI ANDA (1969)
4. TEMANKU PEMIMPIN-PEMIMPIN (1972)
5. KENAPA ROSLI DHOBI & 3 HERO SARAWAK DIHUKUM BUNUH? (1974)
6. PERANG DI KUALA LINGGI 1978 (1978)
7. SARAWAK KEPADA SIAPA HENDAK DISERAHKAN (1979)
8. BAHTERA LAMA NAKHODA BARU (1979)
9. SIAPA SELEPAS MUSA? (1981)
10. PEMUDA DI ZAMAN MAHATHIR (1982)
11. TUAH NASIB PEMIMPIN MALAYSIA (1983)
12. PERDANA MENTERI YANG KELIMA (1984)
13. HANTU BUKIT CINA (1985)
14. MUSA DERHAKA? (1986)
15. MUSA A TRAITOR? (1986)
16. SIAPA LAWAN SIAPA? (CHALLENGER) (1987)
17. TALQIN UNTUK UMNO (1988)
18. POLITIK SERPIHAN (1989)

**S.H. ALATTAS**

**"CHALLENGER"**



**SIAPA  
LAWAN  
SIAPA?**

**S.H.ALATTAS**

Harga: \$10.00


**MUSA  
DERHAKA?**



Harga: \$10.00

**S.H.ALATTAS**

**PERDANA  
MENTERI  
YANG  
KELIMA**



Al-Suhaimi  
P.O. Box 11753  
Pos Kod 50756 Kuala Lumpur.

Bersama ini disertakan M.O./P.O bernilai \$ \_\_\_\_\_

Untuk pesanan buku;

a: MUSA DERHAKA ?

naskhah.

b: PERDANA MENTERI YANG KELIMA?

naskhah.

Nama: \_\_\_\_\_

Alamat: \_\_\_\_\_

\_\_\_\_\_

\_\_\_\_\_



**S.H. ALATTAS**

**"CHALLENGER"**



**SIAPA  
LAWAN  
SIAPA?**

**S.H. ALATTAS**

**TALQIN  
UNTUK  
UMNO**



1946 Lahir di Istana  
1988 dibunuh di Mahkamah  
Sana Pembunuhan?

Harga: \$15.00

Harga: \$10.00

**S.H. ALATTAS**

**TUAH NASIB  
PEMIMPIN  
MALAYSIA**



Regulannya  
Melayu  
Buku  
Musa dan  
Kamran Mahathir  
adalah kenyataan.

Al-Suhaimi  
P.O. Box 11753,  
Pos Kod 50756 Kuala Lumpur.

Bersama ini disertakan M.O./P.O. bernilai \$ \_\_\_\_\_

Untuk pesanan buku;

a. TALQIN UNTUK UMNO

naskhah.

b. TUAH NASIB PEMIMPIN MALAYSIA

naskhah.

Nama: \_\_\_\_\_

Alamat: \_\_\_\_\_

\_\_\_\_\_

\_\_\_\_\_

**S.H. ALATTAS**

**"CHALLENGER"**



**SIAPA  
LAWAN  
SIAPA?**



**S.H. ALATTAS**

**POLITIK  
SERPIHAN**



Harga: \$10.00

Al-Suhaimi  
P.O. Box 11753,  
Pos Kod 50756 Kuala Lumpur.

Bersama ini disertakan M.O./P.O. bernilai \$ \_\_\_\_\_  
Untuk pesanan buku;

POLITIK SERPIHAN

naskhah.

Nama: \_\_\_\_\_

Alamat: \_\_\_\_\_

\_\_\_\_\_

\_\_\_\_\_

**S.H. ALATTAS**

**"CHALLENGER"**



**SIAPA  
LAWAN  
SIAPA?**

**S.H. ALATTAS**

**PEMUDA  
DI ZAMAN  
MAHATHIR**



Harga: \$10.00

Harga: \$10.00

**S.H. ALATTAS**



**SIAPA  
SELEPAS  
MUSA?**

Al-Suhaimi

P.O. Box 11753,

Pos Kod 50756 Kuala Lumpur.

Bersama ini disertakan M.O./P.O. bernilai \$ \_\_\_\_\_

Untuk pesanan buku;

a: PEMUDA DI ZAMAN MAHATHIR

naskhah.

b: SIAPA SELEPAS MUSA?

naskhah.

Nama: \_\_\_\_\_

Alamat: \_\_\_\_\_

\_\_\_\_\_

\_\_\_\_\_